



29,107/B

12.25

A xxxi Hof

DB3

leaf 72-247



Digitized by the Internet Archive
in 2019 with funding from
Wellcome Library

<https://archive.org/details/b30513844>

HOFFMANN, Friedrich 1660 - 1742

FRIDERICI HOFFMANNI

CONSILIARII REGIS INTIMI, ARCHIATRI, ACADEMIAE
ET ORDINIS MEDICI SENIORIS

OPVSCVLA MEDICA
VARII

ARGVMENTI

SEV

DISSERTATIONES SELECTIONES

ANTEA DIVERSIS TEMPORIBVS EDITAE

NVNC

REVISAE ET AVCTIORES

DECAS I.

- I. De ratione universae medicinae praeside.
- II. De diätetica sacrae scripturae medicina.
- III. De septem sanitatis legibus.
- IV. De diätetico vitio multorum morborum causa.
- V. De vini Hungarici excellenti natura, virtute
& usu.
- VI. De natura & praestantia vini Rhenani in
medicina.
- VII. De annis climactericis eorumque rationali
explicatione.
- VIII. De praestantia remedium domesticorum.
- IX. De valetudine senum tuenda.
- X. De salutari ac noxio venesectionis usu.

DECAS II.

- I. De balsamo Peruviano.
- II. De terebinthina.
- III. De millefolio.
- IV. De camphorae usu interno securissimo &
praestantissimo.
- V. De infusi veronicae efficacia praeferenda herbae
theae.
- VI. De purgantibus minus cognitis & selectio-
ribus.
- VII. De cauto & praestantissimo vomitoriorum
usu.
- VIII. De usu & abusu pulverum sternutatoriorum.
- IX. De mirabili sulphuris antimonii fixati effica-
cia in medicina.
- X. De specificis antispasmodicis.

CVM INDICE RERVM PRAECIPVARVM.

HALAE MDCCXXXIX.

Prostat in OFFICINA RENGIERIANA.





PRÆFATIO.



Enuinam, solidam & securissimam morbos tam auertendi quam sanandi methodum nec in medicamentorum varietate, multitudine aut pretio, nec in valentiorum effectu, sed in prudenti & sagaci selectiorum, leniorum; & simplicium magis quam compositorum adplicatione consistere; ii demum ex medentibus recte intelligunt, qui longo rerum usu edocti corporis humani naturam & genuinas status tam sani quam morborum causas exquisitius paullo penetrant. Enim vero, primo rei intuitu videri posset, quod tanta morborum corporumque varietas, quæ omnem fere numerum excedit, innumera etiam remediorum genera requireret. At vero, qui prudentia & ratione duce artem fa-

PRÆFATIO.

cit medicus, ex facili perspicit, omnium quotquot sunt, morborum causas tam proximas quam mediatas, non esse multiplices, non valde diffusas, sed paucas admodum & simplices, quæ tantum pro subiectorum & partium, vbi resident, differentia differentes plane effectus & symptomata producant; atque ideo non tanta remediorum copia & varietate, sed perpauca potius, debito tempore, ordine & regimine adhibitis, satisque diu continuatis opus esse iudicat rectissime. Secus autem faciunt imperiti & de causis rerum investigandis minus solliciti, qui, quando medicamentum non protinus desideratum edit effectum, mox aliud atque aliud, quod expectationi magis respondere autumant, temere substituunt, miserumque ægrotum medicamentis obruendo lædunt magis quam adiuvant. Qua quidem in re monumenta veterum euoluenti perplacuit semper egregium CELSI effatum, quod *lib. III. cap. I.* inseruit: *oportet, ubi aliquid non respondit, non experiri aliud atque aliud: nam in longis morbis, quos tempus ut facit, sic etiam soluit, non statim condemnatur, si quid non statim profuit. Minus vero remoueatur, si quid paullum saltem iuuat, quia profectus tempore expletur.*

Deinde, medicus salutis hominum vere cupidus remediis validioribus, quæ vim quasi & impetum naturæ inferunt, magna cum cautione, & nisi summa
vrgen-

PRÆFATIO.

urgente necessitate utitur, sed lenioribus potius & benignioribus curationem, quantum licet, expedire fatagit. Etenim, quum subiecta per naturam imbecilliora maximis plerumque morbis pateant; iudicatu facillimum, ipsiusque HIPPOCRATIS testimonio evictum est: medicamenta fortiora, quibus vis statum corporis transmutandi inest, nec in debilioribus morbis, qualis esse solent chronici, nec in debilibus corporibus tuto adhibenda esse: nisi quis ægros in maiorem præcipitare perniciem velit. Longe autem aliam in medendo viam sibi eligunt medici minus circumspecti, qui in adfectibus longis eradicandis, ut fere sunt cachexia, hydrops, lues venerea, scorbutus, asthma, podagra, adfectio hypochondriaca & hysterica &c. magna vi & vectibus quasi opus esse credunt; ideoque emetica, salivantia, purgantia, sudorifera, aliaque actiuiora remedia maximo ægrotantis damno & exitiali plerumque effectum præscribunt. Equidem bene scio, quid hic obstrepere soleant vani arcanorum venditores, qui sine validiorum, ex mineralium præsertim familia paratorum ope morbos graviores abigi posse negant; sed, qui per dimidium sæculi & ultra innumeris morborum curationibus vacavi, sancta adseuerare fide possum, me nunquam fere non remedia ex euacuantium, alterantium & sedatiuorum classe desumpta leniora, securiora longoque usu ex-

PRÆFATIO.

explorata in vsum vocasse, iisque cum patientia & temporis expectatione adhibitis, morbos æque chronicos ac acutos, iuvante Deo, persanasse felicissime. Splendent autem quam maxime blanda, miti ac temperata operandi energia remedia sic dicta diætetica, & quæ vbiuis facile parantur domestica, quorum prudenti & ægrotantis cuiusque naturæ accommodato usu imminentes morborum accessiones auertuntur & præsentès percommode profligantur. Per diætetica vero intelligimus ex alimentis elementisque omnia, quorum ad vitam & sanitatem conseruandam quotidianus nobis usus est, & quæ priscorum loquendi idiomate res non naturales, vel rectius adhuc physicæ naturales appellari solent. Atque hæc fere sunt, a quibus non modo sana & longa, sed brevis quoque & morbosa vita, imo mors denique ipsa dependet: quare etiam præcipua doctrinæ medicæ pars esse videtur, ex veris & solidis physico-mechanicis principiis harum sibi rerum, quibus omni momento ad vitam vtimur, interiorē comparare cognitionem, vt quid inde aduersi ad morbos ingignendos, quidque boni ad eosdem abigendos in nos redundet, accuratius intelligamus. Penitus hancce veritatem cognouit veneranda antiquitas, quæ nullam medicinæ partem fere magis, quam diæteticam excoluit, & in medendo adhibuit; id quod præcipue aurea Hippocratis monumenta, quæ de victu acutorum, de diæteta, de natura aeris,

PRÆFATIO.

ris, aquarum & locorum, posteritati reliquit, aperte declarant. Et si disertissimi CELSI librum euoluimus, in quo omnium fere vitiorum internorum curationem tradit, hanc ipsam certe potissimum mutatione cœli, locorum, vitæ generis, varietate ciborum & potus, abstinentia, variaque corporis exercitatione, frictionibus, balneis, aliisque huius generis similibus ex voto peractam legimus. Eadem tenuerunt vestigia omnes recentioris æui medici, qui solidi quicquam & imitatione digni memoriæ prodiderunt, quos inter alios antecellunt Itali, & nominatim quidem SANCTORIVS, MERCVRIALIS, MONTANVS, RAMAZINVS, LANCISIUS & BAGLIVVS qui principiis physico-mechanicis, vnde optime corporum motuumque causæ ac leges deriuantur, adiuti, principem artis salutaris partem, diætam paullo subtilius longeque optime excoluerunt. Quamobrem permultum ii hallucinari videntur, qui obliquo decurrentes stadio, originem morborum, & vitæ vel longioris vel breuioris causas ex rebus altioris indaginis, fortuito siderum influxu, principio corpus nostrum dirigente & motus secundum sapientiam vel errorem administrante, vel aliis captum longe superantibus sublimioribus deriuare contendunt. Quibus rebus nihil significantibus, nihil firmi ac solidi in medicina stabilitur; cum contra ex illis causis corporeis, quæ materiam varie adficiunt &

PRÆFATIO.

& motus disponunt, vt sunt alimenta ac medicamenta ex regno naturæ defumta simplicissima, vera & perspicua sanitatis, morborum, vitæque longæ, ac brevis ratio possit reddi ac demonstrari.

Quæ cum ita sint, ego per quadraginta & sex annos docendi munere fungens nihil magis curæ cordique habui, quam vt ex clarioribus anatomicis & physico-chymico-mechanicis principiis, tanquam ex euidentibus causis, artem nostram diuinitus concessam ex obscuriori in clariorem lucem, magisque rationalem statum reponerem; quod inter alios iam editos labores, insigni, vt spero, vsu non destitutos, præcipue dissertationibus de rebus physico medicis, chymicis & diæteticis, vt & de valetudine tuenda conscriptis, summoque vbiuis applausu exceptis præstare allaborauī. Quum vero distracta sint omnia, licet sæpe recusa exemplaria, vt difficulter nunc haberi queant; petiit a me honestus & de re litteraria bene meritus *Dn. Vickius*, vt ipsi licentiam concederem, quasdam denuo recudendi & in opuscula concinnandi dissertationes. Quare ego iuvandum ratus hoc egregium publico inseruiendi studium, iteratam dissertationum quarundam rariorem editionem lubentissime concessi, nihil magis ex animo optans, quam vt B.L. ex frequenti & attentiori earum lectione fructum reportet
vberimum.

DISSERT.



DISSERTATIO MEDICA I.
DE
RATIONE VNIVERSÆ
MEDICINÆ PRÆSIDE.

§. I.



RATIONIS lumen homini a Deo concessum, diuinum esse donum, quo nihil sit præstantius, omni tempore non modo sapientiores agnouerunt, sed & ipse Deus in sacro codice id nobis reuelauit; in huius confirmationem; vt aliorum innumera testimonia taceamus, vnicum ex gentibus CICERONIS in medium producere placet, qui *lib. V. de Fin. cap. 13.* in homine nihil esse ratione diuinius affirmat; & *lib. III. de Republ. rectam rationem perpetuam & æternam, quia Deum sequitur,* appellat; & *Iuuenal. Satyr. X.* hoc habet: *non numen adesse, & frustra Fortunam deam coli, si rebus absit prudentia.* Nemo vero rationis excellentiam maiori opera commendare studuit, quam Regum sapientissimus Salomo in Prouerb. vbi virum prudentem
(Hoffm. Opusc. varii argumenti) A tem

tem & ratione præditum caram vocat animam ; & passim inculcat omnia negotia infeliciter cedere, nec consilia persistere posse, nisi ducem habeant rationem atque prudentiam. Ipse denique sanctissimus noster Seruator *Matth. VII. 22.* stultitiam & imprudentiam summis mortalium miseriis annumerat. Nec profecto si rem paulo curatius intuemur, quippiam in orbe vniuerso animæ nostræ statum melius, quam rationis vsus perficit. Veritas enim, quæ lux humani intellectus dicitur, nihil aliud est, quam rectæ rationis soboles, quæ rerum proprietates, distinctionem, ordinem, proportionem atque connexionem perspicue demonstrat; vti e contrario error iure suo ac merito confusio & rationis abusus dici mereatur. Quamuis vero coelestis doctrinæ veritates ratione humana multo sint superiores; attamen tantum abest, vt ipsi sint aduersæ, vt potius eam ipsam mirifice perficiant. Ecquis igitur est, qui ea, quæ Deus nobis tam ad fidem, quam ad vitam pertinentia in verbo suo proposuit, recte explicare, ab aliorum dubitationibus vindicare & docere poterit, nisi id excultæ fiat rationis beneficio? Iusti & æqui scientiam eiusque originem ab hominum cultiore mente proficisci quis est qui dubitat: quid enim salutare reipublicæ leges aliud sunt, quam regulæ nostras actiones dirigentes, ex summa sapientum prudentia ac ratione adornatæ? Nec quisquam est, qui secundum leges recte iudicare, & forensia negotia hisce apte applicare potest, nisi ratione & prudentia fuerit instructus. Perfectissima disciplinarum mathesis, vnice in rationis cultura atque exercitio consistit, dum rerum quantitates, magnitudinem, numerum, mensuram, pondus, proportionem, æqualitatem & inæqualitatem inuenit & demonstrat, & dein ad vsum multiplicem & omnis vitæ utilitatem applicat. Qui rempublicam bene gubernare multorum saluti prospicere cupit, is præsertim in omnibus difficillimis negotiis rationem ac prudentiam prode & consiliario habeat necesse est. Inter diuersissimarum indolum homines versari, vitamque beate ac tranquille traducere nemo sine singulari prudentia, quæ optima vitæ est dux

dux & moderatrix est, potis erit; vt adeo recte OVIDIVS scripserit *lib. IV. de Pont. vers. 12.*

*Crede mihi miseros prudentia prima relinquit,
Et sensus cum re consiliumque perit.*

Quum itaque tam excellens & ingens recta ratio homini a Deo concessa sit beneficium, & in omni veritatis inquisitione, omnibusque scientiis principem fere locum obtineat; hinc quis vsus, quis fructus, & quantum emolumentum inde in medicam artem redundet, merito venit dispiciendum. Si quidem hæc communis inter doctos æque ac indoctos vsque eo invaluit opinio medendi artem atque scientiam non tam ratione, quam vsu multiplici ac longa experientia sustineri; vnde etiam experientissimi nomen medicis tribuitur. Verum enim vero, vtut experientiæ laudes suas detrahare animus noster neutiquam sit; re tamen paulo altius perpenſa, deprehendimus in vniuersa medicina, tam theoretica quam præcipue practica longe potiores rectæ rationis, quam ipsius quidem experientiæ esse partes, adeo, vt sana medici ratio præses ac directrix praxeos medicæ merito sit dicenda. Et hoc pernobile argumentum est, quod in præſenti paulo diligentius persequi apud animum constituimus.

2. SVNT & fuerunt semper ex nobilium æque ac vulgi numero, qui artem nostram saluberrimam variis probris lacerare ac dehonestare non erubuerunt, his maxime inducti rationibus, quod nimirum experientia, cui ceu fundamento superstruitur, primo quoque medicinæ parente HIPPOCRATE testante *aphor. I. sect. I. admodum sit fallax, cui tuto fidere nequeamus*: iudicium vero medici, de iis, quæ agere debeat, sit difficile, & eam ob causam longissimi temporis filia sit, cui minime vita medicorum brevis comparari queat. Quod grauitè dictum vltèrius variis ratiociniis ex eo præcipue robore annituntur, quod omni fere ætate & loco ingens medicorum, tam in theoria quam praxi vigeat dissensio, ita, vt tot fere opinionum ferax sit æuum, quot medicorum; cum tamen vna tantum sit veritas certitudinis partus; opinio ve-

ro, ipso HIPPOCRATE fatente *lib. de leg.* in medicina in crimen verti debeat, quoniam perniciem affert maximam. Vrgent porro in artis nostræ contemptum, quod plures sæpenumero ex plebeiis atque rusticis, qui nulla medicorum ope fruuntur, conualescant, & cum sanitate in gratiam citius redeant, quam qui consilio medicorum eorumque pretiosis atque copiosis remediis fuerint vsi. Addunt præterea, quod indocti & vulgaris hominum, expertis familiaribus quibusdam remediis in morbis profligandis sæpe sæpius plus valeant, quam doctissimi medici exquisita sua methodo & arcanis suis magnificis.

3. VT itaque has non levis momenti aduersus medicinæ certitudinem adductas difficultates medici diluerent, respondere communiter soliti sunt: a medicorum ignorantia ad artis incertitudinem atque non existentiam haud esse concludendum, neque medicos cum arte esse confundendos; veritatem vero & certitudinem arti nostræ salutari inesse inde colligunt, quod duobus fulcris firmissimis experientia nempe & ratione nitatur; neque negandum esse asserunt, dari ex alimentis & remedia multa, quæ ad sanitatem tuendam, vel morbos modo noceant modo profint; vtilia autem & noxia vitæ & sanitati nosse, præcipuum esse medicinæ officium horumque cognitionem optime vsu atque experientia comparari posse. Porro veras scire & cognoscere causas, cur scilicet hæc vel illa remedia noxam vel vtilitatem in morbis afferant, a recta proficisci ratione asserunt; & quoniam vera ac solida experientia, nec demonstratiua ratio fallere potest, hinc colligunt, artis nostræ fundamenta vtique esse certissima & inconcussa, ex quibus veritas & certitudo in nostra arte optime possit stabiliri.

4. EQVIDEM hæc omnia egregia sunt argumenta, quæ valide satis existentiam ac veritatem artis nostræ roborant: verum si paulo curatius nostræ professionis faciem, indolem modernam eiusque communem & familiarem pertractationem intueamur; fatendum profecto est, de perfecta experientia & solidis inde ratiociniis parum quempiam gloriari posse

posse: paucissimi enim intelligunt, quid velint per experientiam, nec conceptum de hac possident, nec desiderantibus magnum suum fulcrum explicare valent. Plurimorum enim experientia, quam iactant, est imperitia & ignorantia, & rationes, quas in theoreticis pariter ac practicis afferre solent, minus sunt solidæ, incertæ atque inevidentes & nil nisi meræ opiniones, nugæ, speculationes, fictiones & probabiles coniecturæ, quæ nec explicari nec demonstrari possunt, vt etiam ex earundem summa diuersitate & mira discrepantia, imbecillimas easdem esse & prorsus inanes curate in eas inquirenti facile appareat.

5. NE autem hæc in contemptum artis a nobis modo dicta videantur, allaborabimus, vt assertum nostrum sincerius & per singula capita excutiamus. Primum autem, quam instabilis infirma practicorum, quam allegant, sit experientia, ex ingenti horum dissensu circa venæsectionis vsum licet observare, quod certe exemplis vberius confirmari meretur. Constat inter artis nostræ peritos, quod venæsectio olim ab ERASISTRATO & superioribus sæculis a PARACELSO & HELMONTIANIS; nostris vero temporibus, a plurimis Belgis Cartesiana sectæ addictis medicis penitus e praxi proscripta, imo pro infami remedio habita fuerit: nec desunt hodie, qui a ferro velut ab hoste metuentes ad tranquilla hæc castra cruori suo parcituri transeunt, quorum si spectes rationes, potissimum in eo conveniunt, quod sanguis thesaurus vitæ ac virium sit, & quod plurimi sine venæsectione vitam longam & a morbis immunem egerint; necque minus sine hoc remedio chronicæ pariter atque acutæ passiones fuerint persanatæ. E contrario vero ingens etiam eorum est numerus, tam inter veteres quam inter recentiores, qui experientia multifaria non minus quam solidis rationibus suffulti in morbis cum sanandis tum præseruandis præsidium venæsectione nec dari præsentius nec excellentius asseuerant. Vtraque pars dissentientium affert experientiam & ab hac desumtas rationes: illi a venæsectionis vstu in morbis vires deiectas, transpirationem

impeditam & materiæ per peripheriam corporis eliminandæ reversionem ad interiora notarunt; inde præferim noxam in acutis passionibus, periculosa symptomata & dispositionem quoque ad morbos chronicos ac epidemicos grassantes suscipiendos obseruarunt; hi vero in contrariam abeuntes sententiam experti docent, quod a venæ incisione vires restitutæ, transpiratio auctior facta & materia nociua promptissime fuerit expulsa. Præterea illud quoque tutum aduersus morbos epidemicos & febres grassantes præseruatium remedium esse, frequenti obseruatione animaduertisse, idque ab affectione hypochondriaca, calculo, cachexia & hydrope corpus defendere asserunt. Quot sunt practici, qui in omni febre, siue benigna, siue maligna, siue intermittens, siue sit continua, vel exanthematica, vt purpura, varioli, morbilli &c. venæsectionem reformidant? alii contra in omni febre, quæcunque etiam sit, venæsectionem ceu summe necessarium præsidium experientia multiplici & longa induti commendant. Hic si obseruationes medicas prostantes consulere velimus, quot sunt, quæ ad faciliorem & meliorem expulsionem, variolarum, morbillorum aliorumque exanthematum venæsectionis extollunt administrationem?

6. PLURES practicorum venæsectionis vsum in intermittentibus febribus plane damnare solent, eo, quod diuturniores & contumaciores inde factas fuisse obseruauerint: ex aduerso multos proferre licet, qui magna cum *εὐφροία* hisce in febribus ea vsti fuerunt; dum nimirum, facta sanguinis detractione, protinus æstus vehementiæ, grauis capitis dolor, & ingens circa præcordia anxietas remiserunt. Quanta præterea efficacia olim & ab omni tempore venæsectioni in grauioribus internis inflammationibus mitigandis fuerit adscripta, ingentia practicorum volumina testantur. Neque vero minus dantur haud incelebris nominis medici, qui hoc remedii genus ceu inutile in hisce affectibus non modo respuunt, sed longe melius sine illo euadere posse ægrotantes existimant, & præter experientiam, quam profe-

runt,

runt, hoc imprimis ratiocinio se fulciunt, quod sanguis incarceratus & coagulatus siue intra siue extra vasa existens, qui causa inflammationis est, neutrquam sanguinis missione tolli possit: quum tamen vel sexcenta prostant exempla cum in nostris climatibus, tum præcipue in Gallia & Italia, vbi in inflammationibus & imprimis in peripneumonia, non vna quidem vel altera, sed quinta, sexta & septima vice per eiusdem morbi decursum, non sine fructu & manifesto spirandi allevamento, vena fuerit adaperata; quinimo plures practi-
corum in eo conueniunt, quod vera angina ex sanguinis stasi subnata euadat funesta, nisi statim ab initio sanguis e venis sublingualibus fuerit missus. In puerperis, si febris vrget, vel inflammationis metus est, nouimus, non sine felici successu, sanguinem e vena fuisse missum; nihilo tamen minus constat maximam practi-
corum partem id remedii genus mirum quantum in hoc casu reformidare. Vulgaris dein & recepta est opinio, in grauidis ante medium gestationis tempus ab omni venæsectione esse abstinendum, eo quod plerumque eam sequatur abortus: suppetunt vero quam plurima exempla, vbi secundo & tertio mense sanguis fuit emissus, idque vel quinquies per hoc tempus fuit repetitum, adeo fausto successu, vt, quæ alias multoties abortiuerunt, sanam & perfectam prolem hac ratione in lucem produxerint.

7. VERVM enim vero non venæsectio solum, sed etiam alia euacuantium remediorum genera idem fatum ab experientia inconstantia subeunt: nouimus plures haud infelicitis nominis practicos, qui singulis fere in morbis, etiam acutis, emeticis vti non verentur; alii contra eorum usum valde reformidant, iisque vel rarissime, vel plane non vtuntur, eo, quod ventriculo noxam aut funestam induxerint inflammationem; hinc saburram primarum viarum longe tutius abstergentibus aliisque euacuantibus posse educi existimant. Neque obscurum est, in calidioribus regionibus ac locis, Italiae, Hispaniae, Galliae &c. eorum usum non semper feliciter succedere, adeo, vt olim Romæ fuerint permoti, publi-
co

co poenali edicto antimonialium emeticorum vsum interdiceret. In intermittentium contumacia expugnanda quidam practicum non satis ea possunt laudare, quod fomitem febrilem præsentissime extirpent: alii vero contrarium tuentes longe felicius vel tutius harum curationem absolui posse statuunt, si salinis deterforiis obstructions referentur, & sic dictis specificis, v. g. Chin. Chin. statim febriles impetus coërceantur, præsertim cum pleræque intermittentes ex aëris & tempestatum vitio progignantur magisque ex subtili caustica acrimonia, quam copia vel humorum stagnatione oriantur. Ingens quoque omni tempore fuit formido in morbis criticis, vbi ad habitum corporis aliquid expellitur, evacuantia tam emetica quam purgantia præsertim eruptionis vel expulsionis tempore adhibere, propterea quod peccantem materiam magis in interioribus atque in centro retineant; hoc tamen non obstante, nostro ævo inveniuntur practici, qui in variolis & morbillis ante eruptionem imo sub ipsa reiteratis vicibus & emetica & euacuantia propinare non verentur ad experientiam crebri & fausti euentus provocantes. In apoplecticorum insultu vtrum emetica conveniat nec ne, ingens inter praxin medicam exercentes adhuc lis atque contentio est; quidam hac vehementi commotione sanguinis & humorum impetum magis ad caput vrgeri ac propelli putant: alii contra e capite stagnantes humores hoc modo detrahi commodissime iudicant. Multis porro solenne est, post bilis commotionem ab iracundia factam emeticum ad ipsam e corpore eliminandam exhibere; alii experientia inducti hoc remedii genus tali in casu ceu perniciosissimum damnant ac respuunt.

8. PURGANTIA validiora, helleborata, scammoniata, colocynthiaca & olim HIPPOCRATIS tempore, & per longam seculorum seriem in vfu frequentissimo medicis fuerunt; unde in officinis ingentem farraginem compositionum variarum purgantium, tam veterum, quam recentiorum adhuc proflare, vbiuis ferme locorum deprehendimus. Credebant e-

nim

nim his ipsis humores & copia & qualitate peccantes, tam præseruandi quam curandi fine hac ratione quam optime posse educi. Sunt tamen & fuerunt semper, qui omnia valentiora euacuantia ceu perniciofa damnarunt. Ipse ASCLEPIADES referente CELSO *lib. 1. p. 29.* purgantia e foro medico expulit: & ex recentioribus PARACELSVS, HELMONTIVS, BONTEKOE, & qui eius castra sequuntur, acriora hæc purgantia mortifera & infamia remedia appellare non erubescunt, eo, quod semper fere noxia sint obseruata, vires deiiciendo, tonum ventriculi & intestinorum destruendo, & caustico inflammatorio suo sale fibrillas nerveas conuellendo. Nec sine ratione: plus enim damni quam emolumenti ab eorum vsu est expectandum, qua de re peculiari dissertatione *de purgantibus fortioribus e foro medico proscribendis* fusius egi. Ad hydropticorum aquas eliminandas tutus semper acrium purgantium vsus est habitus; nihilominus confirmat experientia, morbum hunc ab eorum vsu ingrauescere, inque peiorem statum ægrotantes præcipitari. Quinimo obseruatum fuit, a frequentiori horum vsu cachexiam & hydropem fuisse inductum. Antiquiores in acutis & exanthematicis febribus nec vilo modo irritare aluum, vel clysterem admittere voluerunt; vsus tamen & experientia docuit, vanum hunc esse metum, cum alui fluxu spontaneo sæpe hi morbi terminentur, & moderata facta eius apertione longe felicius earum curationes succedant. Aloën in concitandis hæmorrhagiis, hæmoptysi, hæmorrhoidibus, mensibus olim admodum reformidarunt: a longo vero iam tempore experientia sumus edocti, hanc ipsam conuenienti dosi & methodo adhibitam, ad hæmorrhagias sistendas esse vtilissimam. Infusum mannæ, & cassiæ in nostris locis ferme proscriptum fuit, ceu languidum, effectum & quod tormina & flatus producat: contra olim Aegyptiorum medici, Galli quoque in ingenti copia ad vncias sex mannâ & cassiam pro dosi præscribunt; & hæc infusa vel decocta, in pectoris præsertim affectibus, inque aliis

(Hoffm. Opusc. varii argumenti.) B mor-

morbis acutis & chronicis præſtantiffimi effectus eſſe crebra docet experientia.

9. COMMVNIS quoque tam vulgi quam medicorum olim fuit opinio, variolas, morbillos, purpuram atque peſtem expellentibus & alexipharmacis eſſe tractandas, quo videlicet illud, quod vitæ ſit infenſum, cito & celeriter per cutis cribrum expellatur: vnde tot in officinis proſtant tincturæ bezoardicæ, alexipharmacæ, ſpiritus volatiles, ſalia volatilia, ex viperis etiam deſumta, ac pulueres varii expulſiui, ſudoriferi, olea calidiora, camphorata, alexipharmaca, quorum uſus in hiſce morbis fuit frequentiffimus. Et quamuis per multa ſæcula hæc methodus medendi fuerit ſolennis, nihilominus ſolida & accurata per plurium annorum decurſum experientia oſtendit, hæc omnia nocentiſſima eſſe, longe vero tutiora in expellendis variolis & morbillis ea eſſe, quæ nimios motus ſiſtunt, impetus arcent, humectant imo refrigerant: cuius generis ſunt acidula, anodyna, terreaque fixa, emulſiones ex feminibus quatuor frigidis, & huius generis plura. Denique omne regimen in hiſ morbis, temperatum calidiori nocentiſſimo multum præferendum eſſe uſus quotidianus ſatis ſuperque docuit.

10. IN recenti forſan adhuc verſatur memoria, quanta æſtimatio, laus ac dignitas ſalibus volatilibus oleoſis, ſali volatili C. C. ſpiritibus volatilibus oleoſis vario modo aromatizatis conſtiterit, adeo, vt pro panaceis & præſeruandi & curandi fine hæc ipſa remedia habita & magno pretio fuerint vendita, eo quod ſanguinis & humorum circuitum nec non partium inutilium excretionem egregie hiſce promoueri credebant, vnde in morbis chronicis debellandis maximi ſemper ſunt æſtimata. Verum enim vero & hæc ſua ſubierunt fata atque tempora, dum annotatum fuit, in compluribus chronicis paſſionibus vehementer humorum maſſam commouendo plus ea damni quam emolumenti attuliſſe. Hoc vero notatu dignum occurrit, quod hæmorrhagias ſalibus volatilibus augeri communiter aſſertum ſit; cum tamen experientia teſte-

tur

tur contrarium; vtpote hæc moderata dosi exhibita, spasmos, qui hæmorrhagiarum fabri sunt, sistendo, hæmoptysin nimiumque mensium fluxum in dispositis egregie cohibent atque coërcent.

11. ANTE aliquot lustra in nostris Germaniæ locis quidam chymiatrī non modo acidōs minerales spiritus, sed & alia acidā refrigerantia ex regno vegetabili desumta in frequentem vsum traxere, & non modo in acutis, sed chronicis etiam affectionibus ea adhibuerunt, quo nomine famigeratissima fuit tinctura illa aperitiua Moebii, quæ spiritus salis bene rectificatus & coloratus est, & maximo pretio habita ac a multis practiciis in renum & vesicæ calculo, malo hypochondriaco & scorbuto fuit ordinata. Postea vero quam praxis Bontekoëana & Belgarum methodus curandi nostris terris innotuit, omnia acidā fere remedia e foro medico proscripta fuerunt, vtpote hi omnium morborum originem stagnationem & coagulationem humorum, consequenter acidum & viscidum statuebant, hinc curationem morborum iis, quæ humores lentos & viscidos resoluebant, acidumque extinguiebant, vnice moliebantur, eumque in finem acidā ex remedium numero penitus eiiciebant.

12. OPIVM, & quæ ex hoc parantur remedia dicta laudana anodyna theriacalia, quorum præcipuum ingrediens est opium, diuinis fere laudibus olim & omni tempore celebrata fuerunt, imo inter panaceas, quasi omnium morborum antidota relata sunt: nec vllus fere exstitit celebris nominis medicus, qui non hoc remedii genus magni fecerit. Quidam integra volumina composuerunt: nonnulli se nolle esse medicos dixerunt, nisi opium existeret; nihilominus ab omni tempore fuerunt medici, qui instar veneni hoc remedii genus reformidarunt, quod vitales motus & vires extinguat, sensibus torporem ac stuporem inferat. Et ex recentioribus complures solidioris doctrinæ viri animaduenterunt, quod ab opiatīs, cuiuscunque etiam generis & compositionis sint, tam in chronicis quam acutis morbis, plus damni quam vtilitatis

in corpora redundet, quippe cum peccantem morbi materiam siue in qualitate siue in quantitate intus retineant ac figant, humorum stagnationes & stases tantum abest, vt remoueant, vt potius augeant & salutare excretionem impendant: quibus rationibus permoti asserere non dubitant theriacalia & opiata valde infida minusque secura esse remedia.

13. DVDM est, ex quo medicamentorum e marte desumptorum vsus in morbis chronicis debellandis, nominatim in malo hypochondriaco, cachexia, hydrope, mensium suppressione ad contumaces viscerum obstructions expediendas, mirifice fuit æstimatus, vsque eo, vt innumeras compositiones vel in forma liquida vel solida, quas ferrum ingreditur, in medicorum scriniis & pharmacopoliis splendentes vbique reperias. Neque tamen deesse plures nouimus ex recentioribus, qui ancipitis & minus tutæ virtutis, vt omnia ex metallorum regno desumpta, martialia remedia iudicant, quum adstrictione sua in chronicis morbis vasculorum obstructions magis firment, ac fibrosas nerueas partes ad spasmodicas contractiones admodum disponant: & hoc vsque adeo, vt dictis in morbis illa magis obesse quam prodesse, experientia practica sit commonstratum. Quanta porro dissensio quantaque contentio inter practicos Chinæ vsum hodie obseuatur? Hic a pluribus magnis medicis, tanquam diuinum aduersus intermittentium contumaciam præsidium habetur, neque innumeris obseruationibus hanc sententiam tueri ac confirmare desistunt. Quod si vero experientiam consulamus obuiam atque peritorum practicorum obseruationes perlustremus; innumera etiam occurrunt exempla, vbi infauus euentus huius vsus fuit consecutus, dum vel peiores febrium recidiuæ factæ fuerunt, vel grauior morbus, vt cachexia, hydrops, malum hypochondriacum, contractura artuum, asthma spasmodicum, & colica conuulsiva febrem hoc remedio intempestiue suppressam exceperunt.

14. PARI modo ex mercurio desumpta remedia ingentibus medicorum dissensionibus obnoxia videmus. Et quamuis

uis vetus illa & male fundata opinio mercurialia & metallica esse venena dudum exspirauerit, solideque compertum sit dextre præparata & applicata non carere insigni fructu & utilitate; nihilo tamen minus censuram merentur illi, qui mercurialia vel etiam solaria, rite etiam præparata, tantis extollunt laudibus, ut ea efficacissima & vniuersalia pronuncient, quum certe fama sua longe sint minora. Quis enim nescit a mercurialibus, quocunque modo etiam præparatis correctis vel rectificatis fuerint, plurima incommoda, generis neruosi debilitates, molestas salivationes, paralyfes & tremores fuisse ortos. At missa hæc facimus, nam si omnia remediorum capita persequi, hocque argumentum condigne tractare vellemus integrum sane volumen his complere possemus. Cui enim ignotum est, quantus dissensus inter practicos, circa vesicatoriorum & fonticulorum, circa thermarum, acidularum & lactis vsum vigeat, & quomodo ad lectum cuiuscunque ægrotantis nullus ferme modus vel finis dissentendi vel contradicendi sit inter medicos; singuli tamen, quod mirum, in sua sententia tuenda ad summum illud experientiæ tribunal & idolum confugiant? Videmus hinc clarissime, quam infirmum ac debile experientiæ, cui medici innituntur, sit fulcrum; videmus porro, quod magis opinio sola ac coeca, quam certitudo & veritas regnet in medicina. Dolendum vero maxime omnium, quod singula hæc ita sint comparata, ut tironem ab artis studio merito arcere & potius horrorem illam addiscendi incutere queant; quæ quoque est ratio, quare apud prudentes ingens contemptus & opprobrium medicis & medicinæ semper accesserit.

15. VERVM enim vero necesse etiam est, ut audiamus, quæ ad hæc omnia reponere, & quibus experientiam suam defendere & vindicare soleant medici. Experientiam, inquiunt, esse omnis certitudinis & veritatis medicæ parentem, dummodo non superficialia, incompleta & imperfecta, sed solida & accurata fuerit; cuius requisita sunt, ut omnes circumstantiæ, quæ ad veram & completam morbi historiam

pertinent, sint iunctæ: quod si enim subiectum, quod ægrotat, indoles morbi, eiusque causæ atque effectus probe fuerint cogniti, nec non ea, quæ opem vel etiam noxam attulerunt, accurate annotata, tunc utique tales obseruationes sæpius repetitas fallere minime posse affirmant, idque non sine ratione. At vero vbi prostant eiusmodi obseruationes, completæ morborum historiarum? vbi inuenitur talis experientia? vbi notatus est talis remediorum effectus, in quo omnes & singulæ circumstantiæ fuerunt iunctæ? Si enim vel veterum vel recentiorum monumenta euoluis, rarissime talia inuenies; omnes potius obseruationes mancæ sunt & mutilæ, præcipuis omissis circumstantiis. Præterea quod piget & dicere pudet, quam parum veræ virtutes & dotes medicamentorum sint cognitæ, quamuis innumeras laudes, encomia & vires in botanicorum, chymicorum, & pharmacopæorum libris iactatas & venditatas videas: quarum tamen paucissimæ fidem sustinent & effectui respondent, cuius rei causa nulla alia esse videtur, quam quod, si forsan a quodam medicamento assumpto faustus sequutus sit effectus, statim huius causam remedio assignauerint, nullo habito respectu ac ratione historiarum morbi, eiusque circumstantiarum, sub quibus illud fuit exhibitum remedium.

16. VERVM enim vero quamuis non negandum sit experientiam bene instructam, & accuratæ morborum historiarum superstructam minime esse fallacem, & maximopere in praxi medica commendandam: attamen dubitari merito potest, num ad talem experientiam peruenire possibile sit? Non enim ignotum est, naturas & corpora hominum mirum in modum variare, differre etiam morbos, eorum indolem ac causas & infinitas esse circumstantias, remediorum usum, applicationem & effectum determinantes; vnde videmus pro diuersitate climatum, vitæ generis, ætatis, sexus, victus, aëris, anni temporum, tempestatum, aquarum, consuetudinum & dispositionis hæreditariæ variare morbos, variare methodum medendi, variare etiam ipsa remedia. Ita idem purgans

gans decem subiectis, eiusdem etiam ætatis & roboris exhibitum, diuersissimas producit operationes; in quibusdam fortius, in aliis segnius movet alvum; nonnullis digestionem turbat, appetitum prostermit, anxietates parit & vomitum simul concitat. Et idem homo, qui hoc tempore bene potuit hoc vel illud remedium ferre, alio tempore damnum inde experitur. Vnde bene notatum a SYDENHAMIO: methodum febrem curandi, vno tempore prodesse, alio nocere.

17. DIFFERVNT quoque pro climatum diuersitate morborum curationes. Quisenim auderet eneruantes Gallorum curas in febribus, per crebrius repetitas venæsectiones purgationes & ptisanas in nostris locis temere imitari? & nemo facile in Hispania, Italia aliisque calidioribus locis, nostram in Germania medendi methodum, quoad vsum emeticorum, volatiliū & calidiorum in vsum trahet? Quare videmus, quam difficilis & operosa res sit, rectam medendi morbis viam per observationes, etiam accuratissime conscriptas, addiscere, quum mirum in modum discrepant circumstantiæ, quarum minima sæpe variat remediorum applicationem. Profecto centum hominum ætates huic operoso negotio haud sufficerent & antequam hac ratione, nempe per longam & annosiorē experientiam, vera medendi methodus inueniretur, plures oporteret extinguī.

18. VLTERRVS vero medici pro defendenda experientia hoc argumento vti solent, quod ingens ille dissensus circa remediorum vires eorumque applicationem ipsum non destruat experientiam, & ad stabiliendam hanc vnice sit opus, vt ad eorum numerum respiciamus, quo hoc vel illud remedium in morbo vel male vel prospere successisse affirmant: ita si mille fuerint, qui bonum esse medicamentum pronunciant, centum vero, qui contrarium asserant; tunc maiori numero plus esse credendum quam minori contrarium observantium libere edicunt. At vero nec hæc argumentandi ratio difficultatem hanc expedit; vtpote a numero & multitudine idem sentientium veritatis criterium non adstruendum

dum esse iudico. A longissimo iam tempore opiata magna in morbis remedia credita fuerunt, quum tamen experientia testetur, plus nocumenti, quam emolumenti in morbis ab ipsis esse expectandum: quot numero fuerunt practici, qui calida expellentia volatilia, myrrhata in variolis & morbillis proficua iudicarunt? quæ tamen certissime plus obsunt quam profunt. Lenientia & alui fluxus in febribus acutis pro interdictis habentur & damnantur; contrarium tamen testatur experientia. Vehementiora purgantia per tot secula in frequentissimo fuerunt vsu, quum tamen valetudinem magis destruant & morbum augeant, quam exoptatum ferant auxilium.

19. QVVM itaque tam misera & desperata res sit, soli experientia in artis exercitio credere & adhærere, hinc non immerito oritur quæstio, vnde certitudinem & veritatem medicus in suis curationibus mutuari debeat? Plerique medicorum in eo dubio procul consentient, quod hoc passu ad alterum medicinae fulcrum nempe ad rationem, quæ cum experientia coniungenda, sit confugiendum. At vero quamuis non animus sit hæc duo artis medicæ fulcimenta infirmare, sed potius ea confirmare; placet tamen eo, quo id perfecimus, modo circa experientiam, demonstrare quoque quam languida & imbecillis res sit medicorum ratio, qua ceu fulcro inniti adhuc communis & peruersus mos fuit. Qui rationem in auxilium firmandæ artis nostræ causâ aduocant, id maxime vrgent, ratione omnium morborum causas & effectus remediorum penetrandos esse, & quomodo hoc vel illud fiat in medicina, vel cur fausti vel infauti curationum euentus proueniant, vnice ratione intelligi posse. Quid vero per rationem, quæ veritatum medicorum norma sit, accipi debeat, non minimæ difficultatis res est; quisque enim sibi persuadet, se recta ratione vti, si veras causas rite cognoscat & firmis in demonstrando principiis nitatur, quum tamen tot diuersæ causæ & rationes eiusdem effectus in medicum proferantur, quot fere numero sint medici, hoc non obstante, quod una tantum existat veritas.

20. MALE fundatæ itaque opiniones imo fictiones pro veris rationibus & demonstrationibus quam sæpissime haberi solent. Quantus enim est dissensus circa principia, quibus theoria & praxis medica superstrui debet? paucissimi artem recte ratiocinandi & vnum ex altero deducendi, ex cognitis incognita eliciendi, res inuicem connectendi & distinguendi, aut errores ex veris & simplicissimis principiis demonstrandi norunt, sed sine ordine, sine deliberatione, sine intima rerum cognitione ex sua imaginatione & persuasione philosophantur. Tædet certe pressius prosequi quot figmenta, quæ nec concipi nec explicari, aut demonstrari possunt, a tot seculis ab ipsis dissentientibus medicis in scenam producta fuerint; cuius commatis sunt ex veteribus calidum innatum & humidum radicale, natura, anima, cuiusque facultates, expultrices, attractrices, concoctrices, spiritus insitus & influus, naturæ prudentia, intentio, directio, energia, sympathia, antipathia, idiosyncrasia, antipraxia, vis plastica, quatuor qualitatum & humorum temperies & intemperies, hæcque vel cum materia, vel sine materia, Helmontii archæus, chymicorum sal, sulphur, mercurius; diuersi salium sapes, Glas, Blas, semina & fermenta morborum, ideæ morbosæ spiritibus insitæ, vel influæ; & nonnullorum lux & flammula vitalis, spiritus vitalis, lucidus & igneus Willisii, peregrinus æther, variæ crases & materiæ secundum figuram, situm & magnitudinem dispositiones; quæ omnia & singula, nil nisi mere termini sunt, toni & soni nihil significantes, quorum explanationem si desideras, nihil aliud nisi petitio principii exsurgit: manent itaque speculationis & imaginationis simulacra & figmenta, nec vllum in demonstrando habent vsum.

21. QVI vero solidiori philosophiæ mechanicæ & experimentalis scientia instructi sunt, facile agnoscunt, omnes in vniuerso mutationes, omnes effectus fieri motu, qui vnice res alterat, corrumpit, destruit, immutat, generat, producit & omnium effectuum causa & fons est. Facile quoque hi perspiciunt omnes qualitates, omnes proprietates & vires

(*Hoffm. Opusc. varii argumenti.*)

C

cor-

corporum motu fieri, nec sine motu concipi posse. Ex quibus etiam recte argumentantur, omnia, quæ contingunt in corporibus humanis, siue circa vitæ & sanitatis, siue circa morborum, eorumque præseruationis vel sanationis negotium versentur, vnice tantum absolui motu; omniumque effectum ac phænomenorum, quæ in corporibus animantium obtingunt, vnicam & veram causam esse motum. Quare cum motus præcipuum fit mechanices principium, hinc omnia, sicuti in vniuerso, ita etiam in corpore nostro mechanice fieri & explicari debere asseuerant: & physicum ac medicum, non secus ac mechanicum motuum omnis generis leges exacte nosse debere, adeo, vt, quo plures cognitas habeat, eo felicius in demonstrandis effectuum causis progredi possit. Ex quo perspicue patet, quid intelligi debeat per philosophiam & medicinam mechanicam, & quam sit turpissimum hæc ipsa a nouellis doctoribus quibusdam non tantum ignorari, sed impudenter etiam contemni, & susque deque haberi. Verum enim vero, quamuis circa hæc inter prudentiores amplius sit consensus, quod scil. in corpore animantium præsertim hominis omnia tam in statu sano, quam etiam quandoque in statu restitutionis, certo ordine, tempore, proportionem, ad certum finem fiant; & quod subsit horum summa ratio, ars & sapientia, quæ ex certis mediis ad finem ducentibus proportionatis cognoscitur; nihilo tamen minus in diuersas recedunt sententias. Quidam dicunt, harum rerum causam esse principium quoddam incorporeum, quod efficiat motus, quod sapientia, ratione, intentione & cognitione præditum, corpus struat, conseruat, præseruet & restituat; si vero hoc ab illa sapientia atque prudentia deficiat, tunc motus erroneos, frustraneos & morbosos efficiat. Alii secundum mentem nostram dicunt motum esse mutationem status in corporibus, ab impulsu, mutua actione & reactione, nisu & renisu vario corporum prouenientem; nam vires, quibus corpora agunt, a Deo creatæ & per multiplicationem diffusæ siue extensæ veram naturam & essentiam
cor-

corporum constituunt; quapropter motus causa non extra corpus, sed intra essentiam corporis est quærenda. Neque negamus in macrocosmo pariter ac in microcosmo, nec non in omnibus animantibus & plantis, a sapientissimo ordine, arte ac ratione in certum finem, siue machinas artificiosissimas esse productas, quæ nunquam clarius perscrutanda potentia & modo, propagantur & multiplicantur, in quas tamen omnes & singulas externa, solida & fluida, elementa, alimenta, medicamenta inducunt. Quas mutationes ante omnia physicus & medicus tam a posteriori, quam a priori nosse probe, inquirere, explicare & postea in vsum ducere debet.

22. NON vero nostri instituti vel temporis ratio postulat hæc fusius adhuc & distinctius hoc loco excutere, & ab aliorum obiectionibus vindicare, sed leuiter saltem illa attingere placuit, vt omnes intelligant, quanta circa prima principia physica & medica inter medicos vigeat dissensio. Enimvero non tantummodo inter medicos circa principia theoriæ medicæ, sed & circa morborum generationem, causas eorumque curationem contentio abundatissime visitur. Quidam plethoram pro causa omnium fere morborum habent, exclusa omni qualitate & falsa & acri. Alii ne vllam quidem sanguinis præternaturalem abundantiam dari affirmant, sed potius ex peruerso motu partium corporis nostri ipsique infensis qualitatibus morborum causas deducunt. Ex recentioribus plures ex solo acido, specifico tamen, nec non viscido, omnium morborum chronicorum originem explicare allaborant. Quidam hæc esse insufficientia asserentes, virtutes salinas, acres, salsas, causticas, volatiles & sulphureas biliosas adiecerunt: nonnulli nec hæc morborum explanationi sufficere iudicantes morborum specifica fermenta, semina, ideas seminales, fermentationes hostiles, ætherem peregrinum, & diuersas materiæ morbosæ texturas in societatem aduocarunt. Sunt quoque, qui omnes causas materiales negligunt & occasionales tantum asserunt, veras autem

morborum causas in ipso archæo seu principio vitali, in spiritu corporis nostri, seu in ipsa anima, corpus nostrum dirigente, quærunt, quæ cognitione, prudentia & vigilantia instructa, contra & propter materiam corpori nostro infensam, præsertim sanguinem abundantem se propriis viribus & proprio Marte armet, motuque salutari critico, aut euacuatorio, aut febrili consumtorio, perniciosum vitæ humorem a corpore arcere & propellere molitur: quales motus salutaria potius naturæ conamina, quam vere morbosi effectus dicendi essent. Alii, qui simile quid concipere nequeunt, a causis mere physicis necessariis hos præternaturales motus proxime deduci debere iudicant, qui in se & per se ad turbationem, sæpius etiam ad destructionem œconomiae corporeæ & eius perniciem tendunt, persæpe vero casu quodam, dirigente sic diuina artificis, qui corpus nostrum struxit, sapientia, salutare fiunt, & in ipsius causæ morbificæ, a qua oriuntur, correctionem vel expulsionem vel destructionem benigne terminantur.

23. NEQVE in explicandis remediorum viribus & operationibus consensus & symbolismus obseruatur, sed plerique in diuersas & contrarias sæpe abeunt sententias. Veteres peculiarem virtutem certis partibus dicatam remediis affingebant, vnde emergebant pectoralia, stomachica, hepatica, cephalica, cordialia, vel etiam sibi persuadebant dari euacuantia, quæ peculiarem humorem, v. g. bilem, pituitam, melancholiam e corporis sphaera attrahant & eliminant. Fuerunt, qui medicamenta saltim operari in spiritus, illos irradiando vel etiam obfuscando, aut terroris vel etiam iracundiæ ideam peruertendo sibi imaginabantur, vel etiam, quod speciali ratione fermenta & semina morborum exstinguerent; quæ omnia, si bene æstimamus, nihil nisi vanæ speculationes & figmenta, quæ nec intelligi nec perspicue explicari possunt, merito dici debent. Ex recentioribus vero surrexerunt, qui omnem remediorum efficaciam in concilianda sanguinis & humorum fluiditate eorumque circulatione promouenda vni-

ce

ce ponébant. Sunt quoque, qui remediis præcipuam virtutem in medendo derogant, & soli naturæ medicatrici sanandi & medendi vim adscribunt, infaustosque successus eiusdem erroribus assignare non verentur. Sed vtinam hæc omnia, quæ gratis sic in medicina afferuntur, solide prius & explicentur & demonstrentur.

24. Ex quibus omnibus dictis & adductis clarissime intelligitur tantopere a medicis laudatam rationem, non secus atque eorum experientiam admodum imbecillem in medicina tam theoretica quam practica esse fulcrum: ecquis enim est, qui vbi tantus opinionum & dissensionum numerus reperitur, certitudinem ac veritatem sibi poterit promittere? Verum enim vero, vt tandem ex omnibus hisce, quæ nos premunt, difficultatibus emergamus, paucis dicimus: opinionem peruersam & errorem, sicuti in omnibus aliis disciplinis, ita etiam in medicina, vnice ex corrupta & peruersa nostra ratiocinatione oriri; omnem vero veritatem & certitudinem ex solida & bene fundata ratiocinatione profluere. Sanam autem, rectam & perfectam ratiocinationem eam statuimus, quæ firma nititur demonstratione, id est, quæ clare & distincte res a se inuicem separat intelligit, explicat, connectit & debito ordine in adstruendis causis vtitur, neque res separatas aut ordinem rerum & causarum inter se confundit, denique ex notis minus nota detegit, media fini conuenientia inuenit, suasque demum illationes multiplici experientia & constanti euentu confirmat. Plurimi profecto eruditorum artem recte ratiocinandi ignorant, vnde in graues incidunt errores. Plures veritates singulares possident, sed eas postea ad inueniendas & eliciendas alias male applicant. Quam pauci norunt speculationes, resque imaginationis a claro & perspicuo conceptu distinguere? Pauci etiam nominales definitiones & explanationes a realibus sciunt separare. Quot sunt, qui nondum satis demonstrata vel explicata pro veris assumunt principiis, ex quibus postea multa inconuenientia inferunt. Causarum ordo a plurimis turbatur, ita, vt remotas causas pro-

proximis ponant & intermedias cum principalibus confundant. Dantur, qui singularia nomina fingunt, iplisque realem quandam tribuunt efficaciam vel a recepta terminorum significatione abeunt, vnde non mirum, quod propter obscuritatem non possint intelligi. Et quod maximum, plures eruditorum hoc morbo laborant, quod ambitionis, philautiæ, contentionis, quam veritatis sint cupidiores, & dedecori sibi habeant, amplexam semel sententiam relinquere. Hic est miseriæ medicæ fundus, hic fons & scaturigo est tot hypothesium, variarum opinionum & sectarum.

25. QVIS igitur non intelligit, medicinam medicinæ esse necessariam, quæ nostro quidem iudicio, non salubrior excogitari potest, quam quod rationem medici ante omnia corrigere, emendare & proficere, qua fieri potest, solertia ac dexteritate allaborent. Cultura vero rationis maxime duobus continetur: cuius alterum est, vt intellectus compluribus veritatibus ex sensu, experientia & obseruatione petitis in physicis, mechanicis, chymicis, anatomicis & practicis imbuetur: alterum est, vt veritates iam cognitæ bene connectere hasque in ordinem redigere ratio discat; quod vltimum, saniorum iudicio, studio diuinæ matheseos maxime acquiritur. *Hæc enim, vt bene monet HIPPOCRATES Ep. ad Thess. fil. non solum vitam illustrem, & ad multa commodam in humanarum rerum statu efficit, sed etiam animam acutiorem & clariorem reddit ad omnium, quorum usus in medicina expeditur, consequendam.*

26. QVODSI itaque medicus artem recte ratiocinandi bene calleat, & plures veritates ex physicis & medicis singulares cognitæ habeat; tunc facile eas ad axiomata inuenienda, nec non ad incognitas veritates ex iis detegendas, & omnia obscura explicanda promouere potest. Hisce præsidiiis iam instructa medici ratio facile perspiciet, experientiam omnem medicam in se non esse fallacem, neque ansam dare diuersis opinionibus atque erroribus, sed præcipitantiam in iudicando horum vnicam esse causam, quod nempe
ea,

ea, quæ obseruauimus, v. g. a dato remedio siue faustos siue infastos effectus, nimis præcipitanter ipsis datis remediis adscribamus. Nam quemadmodum in physicis & mathematicis sensus in se nec fallunt, nec falluntur; sed iudicium, quod nempe secundum sensuales perceptiones ad ipsarum rerum existentiam, naturam & causas statim argumentemur: ita etiam experientia minime in se fallit, sed præceptum nostrum iudicium est, quod fallit. Communis enim & quasi innatus error est, quodcumque, vti supra iam monuimus, a dato remedio in morbo prosperum vel infastum effectum obseruamus, quod statim huius causam ipsi remedio assignemus; cum tamen ad hunc vel illum effectum sæpe plures simul causæ concurrant, quæ nec probe cognoscuntur nec perpenduntur. Quis enim nescit, pro diuersitate humorum, pro differentia motuum, quibus fibræ & partes solidæ corporis assuetæ sunt, mire variare remediorum vires atque effectus? vt proinde remedia non secundum actiuitatem suam, sed secundum receptiuitatem subiecti agere veteres recte inculcauerint.

27. SANA itaque medici ratio ac iudicium solidum genuina clavis est & vera directrix experientiae practicae, & optima conciliatrix diuersarum opinionum. Supra iam mentio facta est ingentem inter practicos, circa remediorum efficaciam in morborum sanatione, existere dissensionem, dum alter certam medendi methodum & certa remediorum genera mirum extollit, alter eadem valde deprimit atque contemnit, vtut singuli experientiam diuturnam pro fundamento assertionum suarum allegent. Causas huius dissensus facile perspicit vir exquisita ratione præditus, & hinc discrepantes inuicem practicos haud difficili negotio conciliat. Et, vt rem confirmemus exemplis, quando concertant medici, vtrum in variolis, in purpura, aliisque exanthematicis febribus venæsectio locum habeat nec ne; tunc perfacile medicus peritus decisionem dabit rationi conuenientem, quod videlicet venæsectio administrata in talismodi morbis exanthematicum exitum promoueat, si subiectum sit iuuenile, vino asue-

suetum, sanguine turgat, vel effrænes motus in fibrarum systemate vigeant; contra vero, quod in corpore segniori, spongioso, cachectico & vbi bonorum succorum defectus est, circa expulsionis præsertim tempus, nunquam suadenda sit. Ita etiam ratione controuersia inter medicos facile decidi poterit, num quisquam sanitatem vel longauitatem a venæsectionis vsu sibi promittere possit? siue, an sanguinis missio ad vitam sanam & longam multum conferat? Quod si quis itaque valde laborat, partiumque solidarum robore instructus est & vasa ampliora possidet, is certe absque venæsectionis auxilio diu sanus viuere poterit: si quis autem in vita tranquilla & otiosa copiosos & boni succi cibos ingerit, corporis vero spongiosi est & laxioris, illi, nisi velit sibi subtrahere alimenta horumque bonitatem, opus vtique erit sanguinis missionibus. Solemne est in Gallia in omni febre, vel inflammatione per repetitas venæsectiones, purgationes, clysteres, ptisanas vires valde eneruare, & ita sanguinis ebullitiones æstusque vehementiam deprimere. Hæc methodus in illis regionibus facilius tolerari potest, quam in nostris humidioribus & frigidioribus, vbi non tanta corporum agilitas, fibrarum sensibilitas, humorum fluiditas & sanguinis restitutio, sed fibrarum maior adest crassities & humorum densitas, vnde nimium per venæsectionem imminuto virium robore, vel pereunt ægri, vel si vehementia morbi remittit, mox tamen maiores fiunt recidiui, vel alii mali moris morbi succedunt. In intermittentibus quando disceptatur, an venæsectio utilis sit nec ne, tunc medicus adhibita ratione commode id quoque poterit definire, videlicet eam locum tunc minus inuenire, si in prima regione, præsertim ventriculo & duodeno, humorum corruptorum stagnet colluies, vel impuro sanguine vasa & viscera sint infarcta. Si vero febris fuerit epidemica vel ex transpiratu prohibito nascatur, præterea corpus iuuenile calidum & ingens æstus cum delirii metu præsens sit, quis dubitabit sanguinis euacuationem summe esse proficuum?

28. IN inflammationibus num venæsectio conueniat nec ne, rationibus solidis medicus facile quoque determinabit; si enim viscus, vti pulmo, inflammatum grauiter fuerit; sique ingens circa hoc sanguinis stagnatio ex oppressione respirationis obseruetur, denique vasa sanguine turgeant; tunc certe venæsectio præsentissimum erit auxilium, quod subito respirationem liberiores reddat. In senibus vero & vbi plus feri impuri, quam sanguinis in venis stagnat, vtiq; sanguinem multum emittere & per crebras vices eum imminuere non tutum, sed periculosum erit. Lis quoque olim inter medicos fuit, num purgatio præcedere debeat venæsectioni, vel hæc purgationi? huius rei haud difficilis erit conciliatio, si inter purgantia & laxantia fiat distinctio; hæc sanguinis missionibus vtilissime semper præmittuntur vtilissime, ne biliosi humores in primis viis collecti succedant in locum sanguinis & vasa occupent: minime vero purgantia ante venæsectionem instituendam locum habere possunt. Vidimus exempla ab imprudenter datis emetico purgantibus in viris plethorico-hypochondriacis varia spasmodica nec non paralytica pathemata excitata, quæ post venæsectionem statim remiserunt. Neque enim aliter contingere potest, quam quod partibus a purgante fortiter commotis & spasmodice tandem constrictis, sanguinis copia ad cerebrum cum impetu deferatur, & ibi facta stagnatione & congestione, varia in genere neruoso excitet incommoda.

29. SVNT nonnulli, qui emetica cum Asclepiade e praxi medica lubentissime expellerent, alii vero nolunt sine illis esse medici. Medicus vero ratione imbutus hanc dubiam sententiam facile conciliabit, quod carere certe emeticis solidus medicus nequeat, quoties considerat plurimorum etiam acutorum morborum fomitem in primis viis & flexura duodeni ceu succenturiato ventriculo plerumque subsistere, vti id latius in *dissert. de duodeno multorum matorum sede* deduxi. Nocent vero emetica, si spasmodicæ partium crispaturæ & contracturæ vrgent, sique plus acrimonia caustica subtili quam

(*Hoffm. Opusc. varii argumenti.*)

D

copia

copia peccant humores, vel si ab animi impetu motus œconomiae corporis fuerint turbati. Vbi vero a saburra & quantitate humorum stagnantium atonia partibus inducitur, tunc certe, iis ablati, robur fibræ debilitatis rursus sua sponte additur.

30. QVÆSTIO etiam decidenda occurrit, num vomitoria, vel etiam laxantia aut clysteres in variolarum vel morbillorum affectu tuta sint, an vero singularis potius noxa ab ipsis metuenda? At vero sana etiam medici periti ratio horum vsum & abusum facile determinabit. Nam certe corpora hisce affectibus correpta, quouis etiam tempore subinde hisce remediis exercere, conatus erit omni prudentia ac scopo vacuus, inde in debilioribus subiectis non sine periculo est; si vero indicium adfuerit saburræ acidæ biliosæ in ventriculo & duodeno existentis, præstat utique hanc moderato emetico cum laxante, v. g. mannæ decocto mixto prius euacuare, ita enim benignior certe & tolerabilior, sine ingenti quoque copia exanthematum, succedet morbus. Quod vero aluum aperire, quandoque per decem dies occlusam in hisce morbis renuunt, nec admittere volunt clysteres lenientes nec temperata laxantia; hi certe non capiunt, quod nimia mora intestinorum canali contenta colluies biliosa mucosa perniciales corruptiones induat, quæ postea grauioribus symptomatibus viam pandit apertissimam.

31. VTRVM in peste emetica vsum habeant nec ne, nuperimo tempore disputatum fuit a dissidentem experientiam allegantibus. Obseruatum tamen fuit mox in principio ea data profuisse: si vero iam malum in vniuersum corpus & neruorum systema dispersum fuit; tunc inflammationem, quæ semper fere in peste præsens est, adauxerunt. Miasma enim pestilens tenuissimæ indolis cum salina mixtum descendens ad œsophagum, ventriculum, ibi stagnantes & ad corruptionem procliues humores, facile in suam naturam confermentat, ubi utique hanc corruptionis virulentæ mineram, antequam elaboretur, subito e corpore expellere tutissimum erit.

32. QVOD attinet ad expellentia & sudorifera, horum magnus olim vsus fuit in expellendis exanthematibus; nostris vero temporibus in totum fere cessat & damnatur. Integrum vero erit hoc loco etiam asserere, sanam medici rationem, modo dextrum horum vsum suadere, modo ab eorundem abusu dehortari, de vtriusque vero legitima indicatione pro diuersa circumstantiarum indole prudenter decernere. Sic vbi nimia vigent commotiones solidorum æque ac fluidorum in machina nostra, vbi irrequieta anxietas, intensus æstus, humorum abundantia, vbi calidiora hæc remedia veneni vicem subeunt, utique magis e re erit tali casu propinare sedativa, quæ efferos sanguinis & humorum motus refrenant, utque hac ratione feliciter heterogeneorum expulsio promouetur. Ita saniori quoque ac recta ratione decernimus minus conuenire calidiora & expellentia in iis morbis, vbi materia nondum est ad motum apta, neque ad secernendum prompta atque disposita minus conuenire. Statuit quoque ratio in morbis chronicis, ante solutionem plethoræ, sudorifera actiuiora neutiquam conducere, ne, intensiori sanguinis & humorum peccantium circulo, per incongrua loca eruptionem materiæ moliens natura ingentes hæmorrhagias, extrauasiones, humorum stagnationes & inflammationes, vel etiam paralyses & apoplexias in scenam producat. Si vero excretionis tempore, & materia ad excernendum digesta & congrua, natura nimis langueat & segnis sit ad expellendum; tunc utique prudentiæ medici in eo versari debet, ut fidelem naturæ ministrum se gerat, eamque in opere suo deficientem adiuuet.

33. SIMILITER vt opiatorum otores cum nimis horum remediorum fautoribus conciliemus, opus quoque & labor vnicus erit rationis. Ecquis enim non intelligit, vbi motus in corpore deficiunt, vbi copia & lentescencia humorum peccantium est, eorumque stasis aut inflammatio metuenda; præterea pulsus debilis & languidus, ætas senilis, habitus corporis spongiosus, quod neutiquam tunc, quicunque demum etiam morbus fuerit, eorum vsus sit conueniens: contra vero,

vbi nimia dolorum & spasmodorum adest ferocia, ex animi affectu, vel principio subtilissimo, aut causa externa producta, vel vbi natura anomalis motionibus morboſis asſueuerit, præterea natura est sensibiliſſima, ætas iuuenilis, & motuum concitata vehementia, ibi certe deſideratiſſimam opem ferre ſolent.

34. EODEM modo ſeſe res habet cum chin. china, cum martialibus, roborantibus & leniter adſtrictiuis, quorum abusus valde nocet, dexter vero vsus ſumme est proficiuus, nec tamen diſcerni inuicem, niſi per iudicium & prudentiam medici, poſſunt. Quis enim chin. chinae excellentem virtutem, in ſiſtendis febrilibus motibus, quis martialibus in roborandis viſceribus, aperiendis obſtructionibus & eliminandis ſuperfluis vim derogare velit, ſi dextre adhibeantur, ſubtracta nempe e primis viis prius nimia humorum peccantium colluvie vel plethora ſoluta, & vbi toni fibrarum remiſſio & laxitas aduertitur. Contra vero, vbi in prima regione non ſolum, ſed in ipsis quoque viſceribus humorum abundantia fuerit; ſi tonus fibrarum vigeat, & ſpasmis conſtrictæ fuerint partes, plus certe obſunt quam proſunt, & ab eorum vsu grauiſſimorum ſemper morborum cateruam tanquam ex Pandora pyxide conſurgere dolebimus, dum materiam morboſam, quæ excerni debebat, intus continent atque coërcent.

35. MERCVRIALIA quod concernit, horum pariter abusus damnat rectæ rationis conſultatio, prouti dextrum eadem adhibendi modum ſummopere ſuadet atque commendat. Quotus enim quiſque eſt, quem lateat mercurialia in pulueris forma deglutita facillime ſaliuationes excitare, quod partim glandularum ſaliualium mæandris celerrime ſe inſinuent, partim etiam tunicis ventriculi impacta, ex concurſu variorum humorum & ſalium, corroſiuam ſuam rursus nanciſcantur indolem, vnde illæ lacrimæ. Contra vero, ſi in pilulas cogantur, effectus longæ præſtantior ſponderi poteſt, dum per inteſtina prius deuoluuntur quam ſoluta fuerint, & ſic ſucceſſive colliquata vim ſuam placide diſpergunt, & tandem foras, qua data porta, ruunt. Præterea mercuriālia nunquam inter-

interne dari debent, quoties prima regio acris salinis biliosis sordibus squalet, ne salinæ hæ particulae mercurialibus associatae corrosiuum virus ipsis restituant, vnde sæpius præsertim in hypochondriacis, scorbuticis, arthriticis, febribus biliosis, infantibus lacte corrupto adfectis, noxam intulisse præsentissimam compertum est. Nec vbi genus neruosum vel cerebrum valde languet, fibrarum & vasorum tonus insigniter relaxatus, vel etiam nimis constrictus est, ceu in paralyfi, epilepsia, apoplexia &c. fieri assolet, locum habent heroica hæc remedia, vtpote quæ stimulando & animando systema fibrosum omnem lymphæ ac humorum massam turbando ingentes concitant motus. In huiusmodi casibus mercurialia, quæ certe alio tempore, loco, morbo & subiecto non modo tutissima sunt, sed etiam efficacissima, eximiam noxam afferre possunt corporibus, tot historiae & obseruationes testantur. At vbi nihil vetat ea propinare, certe nulla potentius remedia contumaces oppilationes referant & obstructiones, etiam in remotis & angustissimis capillaribus vasis, perfringunt ipsis mercurialibus: nulla efficacius viscidos crassos & lentos humores fundunt atque colliquant quam hæc ipsa: vnde in rebellibus ac contumacibus affectibus, venerea lue, antiquis exulcerationibus, tumoribus duris dissoluendis, vermibus fugandis & depuranda lymphæ massa diuinam ferunt opem, dum modo dextra methodo & debito cum regimine adhibeantur.

36. TANDEM quis ignorat a fontium salubrium & nominatim thermarum & acidularum vsu noxam pariter atque levamen ægrotantibus accedere, vt profecto etiam circa horum selectum & prudentem applicationem medici ratio caute versari debeat. Quis etiam non a priori videt, in graui viscerum obstructione, induratione, corruptione &c. vt fit in hydrope & phthisi, vel etiam nimia cerebri & neruorum laxitate, vt in epilepsia & paralyfi, vel feri etiam extrauagatione, vt in hydrope thoracis & asthmate conuulsiuo horum fere nullum esse vsum, adeoque plus detrimenti quam emo-

lumentum inde expectari posse? Contra ubi obstructionum ea est ratio, ut possint superari, ubi humorum tenacitas resolui & expelli possunt, acidi falsive humores corrigi & dilui, constrictæ neruorum partes emolliri, ibi sane hi fontes summa sunt ad rebelles chronicas passiones arcendas vel sanandas præsidia. Non vero huius loci vel temporis est hæc omnia specialius adhuc deducere, cum certe integrum volumen de hoc pernobili argumento posset conscribi. Sufficit, quod sati superque exemplis demonstraerimus, sanam & rectam medici rationem omne fere in omni genere medendi ferre punctum. Quare etiam HIPPOCRATES *lib. de art. Sect. 7.* scribit: *quæ profuerunt, ob rectum usum profuerunt, quæ vero nocuerunt, ob id, quod non recte usurpata sunt, nocuerunt.* Etenim ratio optime causas inquirat & scrutatur, cur medicamenta vel noceant vel profint, adeoque usum eorum vel abusum detegit: ideoque scite rursus pronunciat l. c. *quod medicus omnia bene fundata ratiocinatione facere debeat, & quod opinio in medicina in crimen vertenda sit, quia perniciem affert.*

37. VERVM enim vero non tantum medici ratio potissimum præstat in medendo, sed præcipue etiam in præcauendis morbis plurimum valet, dum exquisitè sanitatis naturam callet, & quæ ad hanc labefactandam idonea sunt, præuidet, & morborum originem, generationem & progressum, cognitis infinitis eorum causis concurrentibus, quasi ex alto propicit & speculatur. His probe euolutis iam facile cognoscit medicus, quæ ex elementorum, alimentorum vel remediorum etiam classe morbis resistere, vel tempestiue illis succurrere eorumque vim infringere possint. Neque minus medicus distinctè perspicit machinæ nostræ vitam æque ac sanitatem a continuis ingestionibus pariter ac egestionibus dependere, quarum utræque si deficiunt, vel modum atque proportionem excedunt, omnino periclitatur sanitas; unde mensuram ingestorum & egestorum curate perpendit. Scit, porro longam & sanam vitam fluidorum iugi perenni ac libero

libero fluidorum motu conseruari ac stabiliri, quare maxime in id incumbit, vt humores conuenienti humidi copia mobiles atque fluxiles, vasaque & vias apertas seruet, ita, vt quæ solidis robur addunt, & fluidorum in solida impulsu adaugent, cuius generis sunt exercitia corporis, motus, medicamenta balsamica, roborantia, suadeat atque de meliori commendet. Cognoscit quoque cogitationes & impressiones animæ in partes solidas, fibras & membranas quam maxime operari, a quarum tono & motu destructo & læso, fluidorum quoque motus inuertuntur, & a regulari sua velocitate deflectunt: hincque animum sedatum & moderatum, qui, vt poëta loquitur, gaudeat minus minusque doleat, vt commendatam sibi habeant, auctor suasorque est. Cum denique a suppressis vel omissis sanguinis vel aliorum humorum excretionibus consuetis præsertim, morbos propullulare videat, hinc de iis mature restituendis semper est sollicitus.

38. SAGAX tandem medicus maximam subiectorum, temporum, circumstantiarum, locorum & climatum in medendi methodo diuersitatem obseruat: neque enim alimenta, quæ certis subiectis conueniunt; aliis eodem modo sunt proficua: neque quæ æstate assumuntur, pari cum successu exhibentur hieme: nec victus certis regionibus ac populis familiaris & consuetus æque aliarum regionum incolis conducit; neque remedia, quæ huic vel illi indiuiduo in certis quibusdam morbis sunt exoptatissima, aliis indiuiduis eodem morbo laborantibus conueniunt. Nullus igitur medicus obseruationibus, aut libris medicis diuersis in regionibus scriptis recte vti, & ea, quæ continent, ad sanitatis ac vitæ tutelam applicare potest, nisi summa ratione sit instructus. Sic enim a priori statim diiudicare poterit, quando circumstantiæ principaliores in obseruationibus sunt omissæ; atque illico perpendet, methodum medendi huic illiue climati ex aëris, victus diuersitate & singulari corporum constitutione familiarem & vtilem non conuenire diuersis ab his regionibus, adeoque non esse facile imitandam. Quare semper exacto cum iudi-

iudicio, & clara, distincta ac solida cum ratione legendi sunt medicorum libri, cauteque perscrutandæ obseruationes aliorum, nisi in praxi postmodum quadrata rotundis miscere & grauiter impingere medicus velit.

39. RESTAT iam, vt demonstremus, artem nostram per solidam ratiocinationem & sanam philosophiam longe magis increuisse, quam per immensam atque infinitam experientiam. In confirmationem huius asserti producere licet magnum illud, quo non datur in medicina superius, nec in mundo præstantius inuentum, sanguinis circulationem, quam exquisitiori anatomes studio debemus. Hæc, vt primum quidem in scenam prodiit, tantam arti & scientiæ nostræ lucem affudit, vt inde medici non solum longe penitus in abditam vitæ & sanitatis naturam penetrauerint, parciūque corporis nostri functiones & viscerum officia dextre magis ac olim factum erat, explicauerint: sed etiam veterum figmenta & somnia in meris verbis, sonis atque tonis nihil fere significantibus, vt supra iam innuimus, tradita, tandem sub felici huius auspicio disparuerint atque sint explosa. Hoc diuinum inuentum hodie tam firma fundamenta cum physiologiæ tum pathologiæ & therapiæ subministrauit, vt huius cognitione omnes fictiones de medicamentis specificis certis partibus dicatis, hepaticis, spleneticis, cordialibus, vterinis &c. præterea omnes facultates concoctrices, secretrices, retentrices, excretrices, nec non electricæ medicamentorum purgantium vno quasi ictu ceciderint & funditus sint euersæ. Neque minus recentiorum commenta de medicina vniuersali, de seminibus & fermentis specificis morborum, de electione venarum quoad scopum euacuatorium, huius ope detecta & profligata sunt, præterea paucis & selectis quibusdam remediis omnium morborum curationes commode & efficaciter posse perfici satis demonstratum est. Non dicemus iam de aliis præstantissimis anatomicis, chymicis, mechanicisque inuentis, quæ non tantum in theoria, sed etiam in chirurgia,
phar-

pharmacia & medica praxi tuto fideliter & iucunde gerenda operam praestant desideratissimam.

40. OPTANDVM vero vehementer foret, vt in mechanicis, hydraulicis, staticis & hydrostaticis plures leges motuum, fluidis pariter ac solidis elasticis, magis determinate nobis essent cognitae, vt motuum in corpore nostro anomalias paulo accuratius explicare & exactissime cognoscere liceret. Praeterea in votis est, vt melior esset oculorum acies, quo exilissimos illos cerebri, neruorum fibrarumque canaliculos rimari, & fluidorum per illos motus pressius prosequi, & mixtiones atque texturas corporum attendere possemus; tunc certe desiderio nostro potitis, longe adhuc nobiliorem futuram esse scientiae nostrae medicae faciem, sperare liceret. Neque minus egregia nostrae arti salutari accederent incrementa, si eius antistites in pulsum, qui de sanguinis atque humorum progressu testantur, negotio, tam in sanis quam subinde etiam aegrotis intensius paulo desudarent, nec non curatius ad excretionem earumque modum, quantitatem ac pondus respicerent.

41. QVIS itaque ex dictis & demonstratis haecenus non euidenter cognoscit, solidam medici theoriam & praxin potissimum in ratione & prudentia fundari? Quis porro ambiget asserere, rationem medici esse experientiae & observationum directricem imo clauem, atque experientiam rationali & physica theoria destitutam infidam esse, empiricam, mutilam atque mancarn, & verum ignorantiae asyllum? Patet vltcrius ex antea adductis, illos, qui inuentis anatomicis, physicis, mechanicis atque chymicis vsum atque praestantiam in solida theoria & praxi medica stabilienda derogant, penitus ignorare, in quo nostrae artis natura, perfectio & incrementa versentur. Neque obscurum amplius esse potest, quod methodus medendi specialis nihil aliud sit, quam medici iudicium: quo differentiam status morbi cognoscit, conuenientia remedia inuenit, inuenta debito tempore, ordine ac regimine applicat, & tandem aegrotantes ab iis omni-

(Hoffm. Opusc. varii argumenti.)

E

bus,

bus, quæ vlllo modo noxam inferre valent, sedulo dehortatur. Vnde etiam fluit, quod, qui acri iudicio pollent, ad praxin medicam faciundam admodum sint idonei, & quod prudentia in iudicando felix atque foecunda mater sit omnis peritiæ, prouti imperitia e contrario misera soboles est hebetis animi & stolidæ in discernendo imprudentiæ.

42. EXPONERE hæc omnia paulo clarius in præsentī dissertatione volumus, quum pauci ex medicis, multo minus e vulgo & artis nostræ rudibus intelligant, quid medicina sit, quæ ad eius incrementa promouenda requirantur, quæ eius sint fulcra atque fundamenta, & quæ medicus discere, scire ac docere debeat? Vulgaris error est, experientiam omne punctum ferre in praxi medica, & medici ratiocinationem in ea parum esse vtilem, quum tamen, vt supra ostensum, veram rationis medicæ & experientiæ naturam ignorent; hinc etiam vsum & abusum remediorum, in quo cardo medicinae practicæ versatur, perperam distinguunt, sed vel ex prospero successu obseruato certa remediorum genera in cœlum vsque extollunt; contra vero, si male aliquando cesserit eorundem vsus, ea ipsa, mirum rursus deprimunt & in orcum vsque damnant, quum tamen ipsum remedium, quod in se est optimum, huius infausti effectus non sit incusandum, sed medici ignorantia, qui prudentia id recte applicandi est destitutus. Quare nostro iudicio ii medici, qui absolute vel remedia nimium extollunt, vel ea aliis laudata sine discrimine & limitatione increpant atque contemnunt, parum certe videntur artis nostræ & veræ theoriæ & praxeos naturam penetrasse. Sed hæc dixisse sufficiant.

DISSERTATIO II.

DE

DIÆTETICA SACRÆ SCRIP-
TVRÆ MEDICINA.

§. I.

Nihil præstabilius in vniuerso terrarum orbe esse, quam sanitate integra vitæque longæua frui, extra omnem dubitationis aleam positum est. Excedit enim vita & sanitas omnium rerum terrenarum pretium, & maxima pars felicitatis humanæ in eius integritate sita est; quippe corpore male constituto etiam animi vigor imminuitur, & homo ad actiones mentis obeundas ineptior redditur. Quanti sanitatis commodum sit æstimandum perpulchre prodidit dexterrimus morum magister, SYRACIDES *cap. XXX. v. 15. Sanitas, inquit, & bona constitutio quolibet auro melior est & corpus validum immensis opibus. Potior est mors, quam vita acerba aut inualetudo permanens.* Quapropter omnes homines egregiam hanc sanitatis tuendæ scientiam sibi habere debent commendatissimam. Licet autem hæc scientia longe sit nobilissima & vtilissima, temporum tamen fato accidit, ut perpauci reperiantur, qui corpus suum recte curare, omni-que modo illud integrum conseruare allaborant; quin potius pleraque hominum pars pro vario connatæ prauitatis impulsu eas confectatur res, quæ ad diminutionem sanitatis & ad morborum productionem, imo ad mortis accelerationem causam fatalem præbent. Proh dolor! nostra ætate in plerisque medicorum scholis eo fere deuentum est, ut vel parum vel nihil cogitent de corpore humano in suo vigore per salutaria diætæ præcepta conseruando & a morbis præseruando; cum tamen maxima pars potestatis medicæ in hoc vnico præseruationis negotio versetur. Notum enim est, potestatem medici in depellendis a corpore morbis & morte auer-

runcanda admodum esse circumcisam & restrictam, quippe in morbis præsertim acutis spectatoris tantum & ministri munere medicus fungitur, cuius adiumento quidem natura sibi adhuc constans parumper subleuatur, quod tamen minime fit ipsa iam succumbente. O tempora! o mores, quibus sanitas vili adeo pretio penditur! Reperias logiatros etiam fama celebres, qui tanquam fungi subito creuerunt, & speciem quandam magnæ eruditionis præ se ferentes subito in altum, quanquam in casum generis humani, euecti sunt, qui ex vana persuasione diætam fere insuper habent, omnem fiduciam collocantes in suis pharmacis vel medicamentosis spiritibus fale acri vel sulphure quodam metallico aut terra prorsus fatua imprægnatis. Hæc ipsorum sunt arma, quibus corpus diu sanum, imo longæum reddere satis iactabunde gloriantur. Pulchrum certe hoc est institutum, quæstuosa sane medicorum auro inhiantium molimina, quibus homines potius præparant ad morbos, ut ipsis postea non desint ægroti, quorum mortibus lucrum facere possint. Ea est iam temporum indoles, ut derisui omnes ii exponantur, qui tum ad præseruandum, tum ad liberandum a morbis corpus maximam artem in diæteticis & naturæ conuenientibus remediis collocant.

2. PERSPECTO igitur insigni hoc circa sanitatis curam errore non potuimus, quin meliora edocti ex diuinissimo illo mysteriorum sacrorum codice, iunctis simul salutaribus medicinæ sobriæ rationibus, diæteticam scientiam de meliori nota commendaremus. Prudentior ille iure meritoque censendus est, qui ad huius boni, sanitatis nimirum, possessionem acquirendam omnes animi vires intendit, & media ad hunc finem collineantia & necessario adhibenda eligit. Ut autem hæc nostra præcepta diætetica maiorem obligationis vim in animis hominum habeant, non abs re fore visum fuit, illam ex sacro reuelationis fonte depromere. Est enim scriptura sacra hac in parte summa philosophia, in qua plurima, quæ circa rerum non naturalium vsum & abusum obseruanda sunt,

sunt, præclare annotata reperiuntur. Hæc enim fons ille est misericordiæ diuinæ, ex quo tanquam ex riuo viuentium aquarum omnes istæ diuitiæ promanant, quarum vsus homines omni ex parte beatos reddit. In hac delitescit arcana conseruandæ sanitatis methodus, quam qui adsequitur, secretum omnium maximum acquirit hacque ratione vitam quam diutissime sanam & ab omnibus fere morbis immunem protrahere poterit; in hac sanctissima præcepta continentur, quorum recto ac pio vsu terrenæ non solum, sed & coelestis illius tantopere a mortalibus expetitæ felicitatis fructum consequi datur. Quum igitur hæc materia tanta cum iucunditate atque vtilitate sit coniuncta, ea propter in animo constitui DIÆTETICAM MEDICINAM EX SACRA SCRIPTURA in præsentis exhibere.

3. ANTE vero, quam ad ipsam diæteticae sacrae tractationem progrediamur, non alienum a scopo nostro erit, fundamentum vitæ ac sanitatis, nec non mortis præmittere & explicare, quippe hoc intellecto minori cum difficultate diæticorum præceptorum, quæ huic superstruuntur, rationem veram perspectam habebimus. Quodsi veterum monumenta euoluimus, & ex iis rei huius dissolutionem expectamus, præter vocabula sesquipedalia & grande quid sonantia, quæ nec concipi nec explicari commode possunt, nihil quicquam inueniemus. Alius calidum quoddam innatum & humidum radicale, alius archeum, rursus alius naturam vel similem voculam causam vitæ ac sanitatis constituit, & hoc pacto unusquisque suam hac in re ignorantiam inuolucro quodam literalis abscondidit. Verum excusandi sunt veterum hac in re errores, quippe accuratiori anatomes studio destituti circulum sanguinis humorum progressivum nesciebant. Nostro autem tempore, ubi ille ipse per solertissimum Harvæum detectus est, ubi deinceps multa, antiquiorum sæculorum medicis prorsus incognita, in structura corporis nostri frequentiori ac diligentiori cadauerum humanorum ope cultri anatomici perscrutatione patefacta & in lucem prodita sunt, ubi in-

simul matheseos studium ad altius fastigium evectum est: multo aliter iam philosophandum. Missa igitur faciamus veterum ratiocinia & verum fundamentum ex ipsa machinae nostrae natura depromptum inquiramus. Exacta inter philosophos rationales res est, omnes actiones corporum in vniuersa rerum natura ex motu profluere, & nullum corpus sine motu ipsi naturaliter insito concipi posse, vnde effectuum vel phaenomenorum naturalium rationes deducendae, vel corporum qualitates explicandae. Quodsi igitur iam principium adaequatum & certam vitae & sanitatis machinae nostrae corporae rationem reddere velimus, omnino ista ex motus natura desumenda est. Quapropter non inconcinne hoc modo definiri potest vita; quod nimirum sit motus sanguinis systolicus & diastolicus per cor & vniuersam tum arteriarum, tum venarum per corpus disperfarum compagem, cui simul arctissime connexus est inde dependens solidarum partium tonus. Haec sanguinis in circulum per totum corpus abiens progressio machinam nostram ex rebus corruptioni valde obnoxiiis conflata & mixta ab actu putredinis egregie defendit. Quamdiu itaque hic motus fluidorum ac tonus solidorum aliquo modo viget, tamdiu vita praesens est: simulac vero hic motus ac tonus partium plenarie cessat, ut non amplius possit reuocari, mors adest & cadaver homo nuncupatur; mortis enim ratio formalis in motuum machinae nostrae omnimoda abolitione consistit.

4. DEDUCTA sic, quam compendiosissime fieri potuit, vitae ac mortis causa, iam facillimum erit sanitatis definitionem exinde formare. Quando hic motus sanguinis systolicus ac diastolicus partiumque tonus vitalis, liber, æquabilis & moderatus est, quod cognosci potest ex pulsu, habitu corporis externo, actionibus corporis nostri praesertim naturalibus, quæ in secretionem rerum familiarium versantur, recte & secundum regulam ac ordinem naturæ se habentibus, homo optimo iure sanus est dicendus. Sanitas itaque dependet a circulo sanguinis & humorum libero, æquali & moderato per omnes

omnes corporis partes. Quoniam vero hic sanguinis circuitus nonnisi ex effectibus in corpore humano se exerentibus, nempe secretionis potissimum & excretionis negotio cognosci & diiudicari potest; hinc optima ratione sanitatis definitio ab his effectibus circuli sanguinis & toni partium petitur. Dicimus idcirco, sanitatem esse conueniens omnium actionum tam corporis, quam animi exercitium a vegeto, moderato & æquabili sanguinis circulo indeque dependentibus secretionibus debitis proficiscens.

5. HISCE suppositis quæritur, quænam sint illæ res, quæ corpus nostrum & conseruandi in debito sanitatis vigore, & variis morbis vel morti quoque illud exponendi facultate polleant pro diuerso eorum vel legitimo vel illegitimo usu? Si veterum hic responsionem nostram facimus, dicendum, eas comprehendi sub nomine sex rerum non naturalium, quibus homo, quamuis eius essentiam non constituent, ad conseruandam vitam ac sanitatem, siue, vt medice loquimur, ad liberum ac æquabilem humorum circuitum continuo opus habet. Sunt vero hæ ipsæ maxime omnium animantium necessarius potus est: sunt alimenta solida æque ac fluida: sunt denique actiones ipsius hominis nunquam non necessariae, quæ ad motum, quietem, somnum, vigilias, consuetudinem vitæque genus pertinent. Quicumque itaque harum rerum vsum ita moderatur, vt circulus sanguinis liber & æquabilis maneat: is veram sanitatis tuendæ ac vitæ longæ methodum & saluberrimas diæteticas regulas obtinet, quæ vnice circulo sanguinis proportionato inhituntur. Quemadmodum enim affabre constructi automatis motus ab elasticitatis vi vel pondere alterius corporis dependet; ita etiam sapientissime fabricatæ machinæ nostræ a corruptione conseruatio atque regularis & ordinatus motionum successus a rebus memoratis externis earumque sub prudenti regimine vsum vnice profluit atque perficitur. Hæc ipsa enim sunt, quæ corpori nostro mobilitatis seu motus materiam sufficientem ac bona temperie gaudentem largiuntur. Hæc ipsa sunt, quæ vigorem, motum,

tum, actuationem partibus solidis æque ac fluidis contribuunt. Quare sole meridiano clarius hinc elucescit, utique in harum rerum iusto usu primum vitæ ac sanitatis nostræ momentum esse constitutum. Hanc ob causam vnica nostra cura eo tendat, ut leges sanitatis, quæ nobis conuenientem earum rerum usum præscribunt, diligentissime obseruemus.

6. CVM igitur sacra scriptura nos optime hac de re instruat, & viam simul monstret tutissimam, qua incedentes & sanitatis exoptatum commodum & vitæ terminum a Deo machinæ nostræ naturaliter concessum ex voto adsequi optime possumus: hinc iam toti in id erimus defixi, ut methodum hanc sacrae diæteticae medicinæ, qua licebit perspicuitate, evoluamus & publico vsui sistamus. Primum vero occupati erimus circa affectus animi eorumque regimen, quibus deinceps ordine subiungemus, quæ circa aerem, alimenta & potulenta, somnum & vigiliam, nec non motus exercitium in sacris litteris præcepta diætetica occurrunt.

7. PRIMVM iam nostræ tractationis caput ab affectibus animi exordimur. Quæritur hic ante omnia: an anima potestatem quandam exercere possit in corpus humanum? Si accuratiori scrutinio hanc rem examinamus, ingenue fateamur necesse est, vitam & sanitatem nostram in rerum natura vix infensiolem habere hostem, qui tam potenter tamque celeriter œconomia nostræ vitalis motus turbare, imo penitus subuertere possit, præterquam animam nostram. Etsi enim nullam potentiam absolutam in actiones sic dictas vitales eas pro lubitu moderandi & dirigendi habeat; attamen has ipsas ob arctissimam connexionem, quæ ipsi cum corpore intercedit, variis modis perturbare potest. Testatur experientia, quantos motus irregulares varii affectus animi, desideria anxiosa, firmiores impressiones producant, sique verum fateri debemus, plurima pars hominum ægrotat & perit magis animi, quam corporis morbis. Id quod ii maxime experiuntur, qui lecto ægrotantium adstant, ubi conuenienti facto examine circa morborum originem, animi grauem affectionem morbo

ansam præbuisse subinde observant. Satis pro compendio dictum putamus; nolumus enim iam in huius quæstionis deductione, cum rem complectatur per se manifestam, esse prolixiores, sed potius nos accingimus ad ipsam exponendam diætam, quæ circa hos affectus homini sanitatis amanti attendenda est.

3. VIDEAMVS igitur, quid commodi ex affectuum animi contemperatione in corpus humanum redundet. Quodsi sacram scripturam hac de re consulamus, ea ad sanitatem & vitam longam hilaritatem atque tranquillitatem mentis egregie commendat. Sapientissimus *Salomo Prouerb. cap. XV. v. 13. animus lætus*, inquit, *bene afficit vultum*. Idem *v. 15. Cap. XV.* ita pergit: *læti animo sunt conuiuium iuge*: quasi diceret: qui lætus est animo & sua forte contentus, melius habet, quam si semper lautissimis epulis frueretur. Ulterius *Prou. cap. XVII. v. 22.* ita fatur: *animus lætus bene medicinam facit*. i. e. optimæ medicinæ loco est, qua corpus a morbis & morte præmatura conseruatur. Quid quod multis in locis hilarem animum vitam quotidianam iucundam adpellat. His adstipulantur verba *Ecclesiastici cap. XXX. v. 21. lætitia cordis est vita ipsa hominis & exsultatio producit dies vitæ*. Ex hisce omnibus sequentem regulam diætetica elicere possumus: cui sanitas curæ cordique est, is hilari atque tranquillo animo sit necesse est. Eiusmodi enim mentis compositio placitum & pacatum in spiritibus animalibus excitat motum, qualis autem spirituum motus, talis motus cordis & arteriarum tonusque partium, & qualis partium tonus motusque cordis & arteriarum, talis sanguinis circulatio, & qualis huius circulatio, talis sanitas. Quapropter mens tranquilla summum hominis in hac vita bonum iudicari debet, vtpote mens in tali statu posita non tantum corpori, sed ratiocinationi quoque quam optime inseruit & ingenii vim acuit. Experientiæ fide certissima constat, animo placido & affectibus vacuo prædites omnium fere morborum & ipsorum quoque epidemicorum contagio inficientium tela plerumque effuge-

(*Hoffm. Opusc. varii argumenti.*)

F

re,

re, ac si forte ab iis petantur, non modo non succumbere, sed ceteris omnibus etiam feliciter euadere. Neque minus in morbis periculo non plane expertibus maximam reconvalescentiae spem ex animi tranquilla habitudine concipi posse praxi clinica quotidie edocemur.

9. Hoc tamen loco maxime notari velim, nos minime sub lætitiæ vel tranquillitatis animi nomine gaudium repentinum atque effusum comprehendere: nam cum hoc celerissima animi sit motio, eam quoque irregulares spirituum & sanguinis motiones excipiant necesse est, unde occasionem magnarum turbarum morbosarum, imo mortis repentinæ præbere possunt; qualia exempla hinc inde apud auctores medicos consignata exstant.

10. SICUTI autem facer codex animi constitutionem hilarem atque tranquillam ad incorruptam sanitatem ac vitam longam suadet atque commendat: ita e contrario tristitiam, quæ lætitiæ aduersatur, & animi angor, cura ac cruciatus est, omnibus & singulis dissuadet. Pertinent huc, quæ a *Salomone* sapienter dicta sunt *Proverb. cap. XVII. v. 22. Spiritus fratellus exsiccat ossa. item Cap. XV. & 13. dolore animi spiritus frangitur. item Cap. XV. sicuti tinea vestimento & vermis ligno: ita tristitia in viro nocet cordi.* Sagacissimus morum præceptor *Syracides Cap. XXX. Ps. 21. vnumquemque hominem a tristitia his verbis auocare studet, ne tradas tristitiæ animum tuum neque angas te ipsum consilio. Dilige animum tuum & consolare cor tuum tristitiâque procul a te pelle.* Rationem, cur fugienda sit tristitia *v. 26. subiungit, sollicitudo, inquit, ante tempus senectutem adducit.* Quicumque igitur sanitatis curam habet, is moerorem ac tristitiam quouis modo fugiat. Quemadmodum enim lætitia blanda ac moderata spiritus recreat, excitat & sanguinis circulum promptum ac liberum reddit: ita moestitia spiritus obtundit, deprimit & sanguinis circuitum impeditiorem facit, sanguinemque a naturali sua temperie, ad spissitudinem lentam redigit. Et sicuti in lætitia sanguis vndiquaque æqualiter circumfertur, & ipsa adeo

adeo cutis vascula capillaria minima peruadit, vnde rubore amoeno facies coloratur: sic contrario modo in tristitia sanguinis calor & spiritus a circumferentia ad centrum magis intro compelluntur, & habitus corporis spasmodice constringitur, vnde in tristibus pallor faciei, cutis constrictio, transpiratio remissior, pulsus exilis ac lentus, appetitus imminutus somnus terroris plenus & virium languor subinde obseruantur. Probe hæc cognouit FERNELIVS, qui ita hanc in rem differit: *tristitia spiritus obtenebrat, ingenium hebetat, rationem impedit, iudicium obscurat, spiritus ascensionem deprimit & melancholicas desperabundas cogitationes efficit, quibus ex causis corpus pallore defoedatur, ignavia torpet, atrophiam liquefcit & in marcorem aliosque frigidos morbos ruit.*

II. IN praxi attentiori obseruare licet moerorem profundum ac pertinacem ad febres mali mores, melancholiam, insaniam, malum hypochondriacum, calculum tam renum, quam vesicæ, phthisin, hæcticam, cachexiam, aliosque morbos frequentissime disponere. Nam ab eiusmodi continuo moerore sanguini fluiditas demitur, vnde spissescit, stagnationes subit & hinc inde obstructions parit, a quo dictorum malorum origo fere vnice dependet. De moerore profundiore pulchra quoque extant apud HIPPOCRATEM *Lib. II. de morbis. Cura in visceribus veluti spina videtur atque illa punit.* Et alibi: *vbi hæc, inquit, anxietas animum corripuit, lucem atque homines fugit & tenebras amat & timor inuadit, aridus est & ad contactum dolet & expauescit & terriculamenta & somnia horrenda videt.* Et hæc sunt præcipua symptomata, quibus moerore sepulti contorquentur & continuo discruciantur, vt quandoque etiam eo insaniam procedant, vt præ vitæ tædio sibi ipsis vim inferant & in laqueo solamen suæ miseriæ quærant. Patet exinde evidentissime, tristitiam & moerorem maximum corporis & animi esse tormentum, vnde sapientissime is rerum suarum & sanitati satagit, qui omnem moerorem procul ablegat.

12. EOSDEM fere effectus cum tristitia habet inuidia, quæ ubi altius animo insidet, humanum consumit corpus, ut rubigo ferrum. Placet hanc in rem allegari *Ecclesiast. Cap. XXX. v. 25.* ubi de inuidia dicitur, quod minuat dies. Pari passu cum tristitia & inuidia ambulat anxia in diuitiis corradendis cura; unde idem *Ecclesiast. Cap. XXXI. v. 1.* eius noxam, quam corpori humano infert graphice depingit: *vigiliae, inquiens, diuitiarum causa tabefaciunt carnes & cura earum amouet somnum.* Huc pertinet quoque amor insanus, cuius vehementia fere contabuit Ammon II. Samuel. Cap. XIII. Vnusquisque ergo, qui sanitati studet ex præscripto sacrae scripturae omni studio ab his vulgaribus & maxime turpibus affectibus, quales sunt inuidia & auaritia, sibi temperet necesse est.

13. RESTAT adhuc alius affectus corpori nocentissimus, qui iræ nomine venire solet. De hac *Ecclesiast. cap. XXX. v. 25.* claris verbis pronuntiat, quod dies vitæ minuat. Idcirco sanitatis cultori incumbit, ut iram ceu pestem corporis omni arte fugiat. In omni enim iracundia commotio fit spirituum & sanguinis extrorsum a centro ad circumferentiam: cum itaque in iracundia sanguis maximo cum impetu ad externum corporis habitum pellatur, hinc euenit, ut sub iræ æstu infletur facies, oculi appareant feroces, in partibus sentiatur tremor & respiratio cum pulsu adauctior fiat, ipsaque mens a statu suo deiiciatur. Et ab hac vehementiori sanguinis in ira commotione plurima mala corpori humano accidunt. Præclara est observatio *Hittani obs. 18. cent. 1.* ubi arteria vulnerata, postea probe sanata, iterum rupta fuit ab ira, quæ disruptio a nulla alia causa facta fuit, quam a sanguinis impulsu maiori & tunicarum arteriæ expansione fortiori. In praxi attentiori obseruamus, iram maxima polle-re vi in consuetis & dispositis enormes sanguinis excretiones siue per nares siue per venas ani siue per vterum in feminis proritandi. In senibus & sanguine abundantibus vehemens ira apoplexiam non raro producit, si, quando enim sanguis cum

cum impetu ruit ad caput, vasa a nimia congestione eius distenduntur ac perrumpuntur, unde sanguinis lethalis fit extrausatio. In plurimis post paroxysmum iracundiæ in latere dextro sub scrobiculo cordis mox sentitur dolor quidam constrictius cum oris amaritie, quod symptoma ortum habet a motu bilis impetuosiore eiusque in intestina effusione, hinc etiam dependet inclinatio ad vomitum & diarrhœa, unde HILDANVS *Cent. VII. obs. 18.* annotavit: alium subductam fuisse ab ira, ac si pharmacum adsumtum fuisset? Morbi inflammatorii, ut sunt pleuritides, peripneumoniæ, inflammatio hepatis, ventriculi & intestinorum, item erysipelas subinde ab ira ortum traxisse observantur. Hi morbi potissimum in iis eueniunt, quorum sanguis impurus ac spissus est, & tubuli corporis angusti, quapropter in arterias ab iræ affectu adactus sanguis, si viscosus & tenax sit, non eadem celeritate per venas reuerti potest, unde sæpius in tubulosa partium solidarum vel viscerum substantia subsistit & inflammatorias eiusmodi passiones efficit. Quicumque igitur ex præscripto sacre scripturæ iram coërcet, is sanitati suæ optime consulit & corpus ab his morbis immune seruat.

14. ORDINE iam progredimur ad aëris diætam. Nihil fane ad sanitatem ac vitam tuendam plus confert, quam elementum illud commune aëris & ætheris fluidum, quo omnia animantia continuo opus habent, cuius secundum HIPPOCRATEM *Lib. de flatibus §. 6. tanta est necessitas, ut si omnibus aliis abstineat homo, neque cibum sumat, neque potum, possit dies tres vel plures vivere: si vero spiritus viæ in corpus intercipientur, breui tempore illi esse pereundum.* Hoc certissimum est, aërem esse primarium corporis nostri quoad solidas & fluidas partes motus materiam ac instrumentum: quo igitur purior est ac temperatior, eo magis ad vitam & sanitatem integre conseruandam confert; e contrario vero, quo impurior & intemperatior, eo magis vitæ ac sanitati est infensus. Sicut enim aër purior circulum sanguinis promouet, robur & tonum partium auget, transpirationi velificatur at-

que ingenio vim addit : ita impurior particulis heterogeneis , narcoticis & putredinosis maxime inquinatus circulum sanguinis turbat , robur partium infringit , perspirationem remoratur ingenique vim obtundit. Unde talismodi intemperatus aer ad morbos ex humorum stagnatione indeque contracta impuritate oriundos , item ad putridas febres , imo ipsam pestem disponit. Et hanc ob causam , ut quidem nostra est sententia , clementissimus rerum conseruator Deus , pro singulari sua in homines prouidentia permotus fuit , ut populo suo cautionem a rebus aerem inquinantibus serio iniungeret. Quare Leuit. XI. v. 35. omnia ea , quae labe quadam forte aerem inficere possunt , ceu impura & inquinata proscripsit , eorumque usum plane interdixit. Cumprimis etiam huc pertinere videntur , quae de inspectione sacerdotali leprosum Leuit. Cap. XIII. v. 8. proponuntur. Lepra enim erat morbus summa ex corruptione humorum ortus , qui suam foeditatem vicinis corporibus infirmioribus praesertim communione aeris facillime adfricare potuit , unde tam sedula leprosum inspectio & custodia separata a coetu hominum fuit iniuncta. Leuit. XIII. v. 46. Quicumque igitur aeris noxas euitare & sanitatem hoc modo integram conseruare nititur , is omni arte & studio loca suspecta ex praescripto sacrae scripturae fugiat & commercium hominum infectorum diligenter euitet. Optimum enim praeseruatium a morbis ex aere impuro oriundis , imo ipsa peste in fuga & curatiori contagii euitatione consistit , ut grauissimorum medicorum est sententia.

15. AD alterum iam membrum nostri propositis pergitur , quod de cibo ac potu institutionem dieteticam subministrabit. Alimentorum & potulentorum maxima habenda est ratio , cum proxime ad vitae ac sanitatis conseruationem concurrant. Nullus enim homo sine cibo & potu vitam diu conseruare , vel sano ac integro corpore esse potest ; siquidem ob continuas egestionem partium , motu sanguinis intestino resolutarum , quotidiana etiam ingestione opus habemus,

mus, ut partes illæ motu sanguinis effoetæ redditæ, ad consueta emunctoria delatæ & foras protrusæ noua vtilium succorum accessione reparentur, & sic corpus sub continuis egestionibus & ingestionibus in vigore actionum suarum adeoque in sanitate conseruetur. Quum autem esculenta & potulenta tum ratione indolis & temperaturæ, tum etiam ratione facultatum & virtutis mirum inter se dissideant, & cum etiam magnus subinde error circa adsumptionis quantitatem committatur: hinc omnino medicum & naturæ consultum oportet scire, quænam ex hisce tam ratione temperaturæ, quam ratione quantitatis corpori nostro congrua vel incongrua sint, ut hoc pacto noxam a corpore auertere possit. Multa præclara huic fini accommodata hinc inde ex sacra scriptura depromi possunt, vnde illa iam ordine percurrere & explicare animus est.

16. QVOD attinet ad ciborum quantitatem, omnis repletio ex iis ceu naturæ corporis nostri inimica & morbis proferendis apta ex præscripto sacræ scripturæ prorsus vitanda est. Notatu digna sunt, quæ hanc in rem adfert *Ecclesiastes Cap. XXXVII. v. 32. seqq.* *Ne esto insaturabilis omnibus deliciis, neque proiectus esto ad escas. Nam multis cibis adhaeret morbus & insatiabilis voracitas maxime accedit ad cholera.* *Voracitate insaturabili multi sunt mortui.* Idem Cap. XXXI. v. 22. ita fatur: *laboriosæ vigiliæ & cholerae torminaque adsunt viro insaturabili.* Recte a Syracide ciborum nimia adsumptio & voracitas plurimorum morborum, speciatim vero cholerae, laboriosarum vigiliarum, torminum, imo ipsius adeo mortis causa statuitur. Nam quandocunque cibis variæ præsertim indolis maiori in copia, quam par est, ventriculus oneratur, non modo eius tonus & robur inde immiunitur, & chylus ob lymphæ gastricæ insufficientiam crudus, intemperatus ac intimiorem cum sanguine mixtionem renuens separatur, sed etiam ingens colluies acidorum, biliosorum, pituitosorum ac putrescentium humorum in primis viis a reliquiis ciborum ibi diutius commorantibus colli-

colligitur, quæ omnia morborum causis iam dictis originem atque materiam præbent fertilissimam. Non inconcinne *Fernelius in Patholog. Lib. I. Cap. XV. pag. 210.* pernitiosam admodum sentinam abdomen insaturabile adpellat, quia omnium tum corporis, tum animi vitiorum fons & origo est, ut adeo verissimæ sint facetiæ illorum, qui intemperantiam medicorum nutricem appellarunt. HIPPOCRATES *Sect. II. aph. 17.* ita de ciborum intemperantia loquitur: *ubi cibus præter naturam copiosior ingestus fuerit, morbum facit.* Cuicunque ergo sanitas curæ est, is a nimia ciborum ingestione & voracitate turpi abstineat. Obseruent vero hanc diæteticam regulam cum primis imbecilliores, quorum in numero habendi ii, qui modo a morbo aliquo conualuerunt, qui enormes cum virium iactura passi sunt hæmorrhagias, & qui fame, vigiliis immodicis ac labore emaciati sunt vel alia ratione vires amiserunt. Horum enim hac in parte excessus tanto sæpe nocumento est, quantum vix exspectari poterat. Profecto innumera sunt commoda, quæ ex accurata & moderata ciborum mensura in corpus nostrum redundant. Probe hoc vidit *Syracides*, vnde *Cap. XXXI. v. 22.* ita exclamat: *quum sufficit homini erudito res modica! nam in cubili suo non anbelat, somnus sanus est, cum intestino mediocri surgit mane animæ suæ compos.*

17. ULTERIUS diætam circa alimenta persecuturis non incongrue quæritur: quinam cibi & quales in usum trahendi? Quando sacram scripturam hac de re consulimus, commendatos hinc inde atque in usum vocatos fuisse temperatissimos & optimi succi cibos reperiemus. Ex carnibus enim quadrupedum a Deo ipso conceduntur bouinæ, vitulinæ, agninæ, hoedinæ, arietinæ. *Leuit. Cap. XI. v. 3. quicquid habet ungulam scissam & bifidatum est fissura ungularum reuocans ruminis cibum, ex quouis bestia illud comedetis.* Carnes harum bestiarum præsertim iuniorum, omnium medicorum consensu, eius sunt indolis, ut & facilius a menstruo ventriculi soluantur & bonum sanguinem ingenerent. Habent enim cum

cum sanguine nostro exactam conuenientiam, & temperatam gelatinam in se recondunt, quam coctione omnes dimittunt. Quid vero aliud est sanguis optime temperatus, quam gelatinosus succus a continua in circulum translatione rubicundus redditus? Hac de causa verissimum manet hoc assertum, quod dictorum animantium puriorum præcipue carnes succique inde excocti & iuscula, quia gelatinam copiosam & temperatam præbent, ad corporis nutritionem & sanguinis restaurationem præ aliorum animantium carnibus optime inseruiant.

18. Ex volatilibus humano vsui concessit summus rerum oeconomus carnes columbarum, alaudarum, gallinarum, perdicum, anserum, anatum & aliarum auium, quarum *Leuit. Cap. XI.* non fit inhibitio. Hæ omnes & adhuc aliæ volatiliū species eandem ob causam, quia succum temperatissimum & cum sanguine nostro conuenientissimum fouent, in optimum nutrimentum corporis nostri cedunt.

19. Ad aliud genus ciborum nempe pisces nos conuertimus: horum vsus *Leuit. Cap. XI. v. 9.* commendatur his verbis: *hos comedatis ex omnibus, quæ sunt in aquis, omne quod habet pinna & squamas in aquis tum per maria, tum in fluminibus, illa comedatis. conf. Deut. XII. 9.* Equidem non sine ratione esus piscium commendatur, nam propter faciliorem solutionem & copiam partium humidarum, quibus abundant, vti ex destillatione eorum videre est, minime nocent, & quoniam non tam facile putrescunt, quam quadrupedum vel auicularum carnes, hinc etiam absque nocumento in febribus, in morbis malignis ipsaque in peste ægrotis possunt concedi, vbi alias ab esu carniū maxime est abstinendum. Siquidem putredo, in qua malignitatis natura continetur, non parum harum vsu promouetur, & humores iam corrupti ad maiorem putredinem disponuntur; vnde etiam euenit, vt natura ipsa in eiusmodi morbis sponte ab esu carniū abhorreat. Datur autem magna piscium differentia respectu aquarum, in quibus degunt, ex
(*Hoffm. Opusc. varii argumenti.*) G qui-

quibus illi sapidissimi sunt & saluberrimi, qui in fluviis, ubi aqua levis & subtilis est ac rapidissimo cursu fertur, progignuntur: e contrario ii minus saponi sunt minusque salubres, qui in aquis paludosis & stagnantibus capiuntur. Deinde etiam datur differentia inter ipsas piscium species, quidam enim durioris & compactioris, quidam mollioris & candidioris respectu carnis sunt indolis. Vnde, si optio nobis datur, pisces omnium sapidissimi ac optimi pro usu seligendi sunt.

20. ALIMENTORVM ex regno vegetabili usus est vetustissimus itemque innocentissimus, quippe herbae, semina & fructus arborum paradisiacus ille cibus erant a creatore sapientissimo Adamo in statu integritatis concessus, uti clarissimis verbis *Genes. cap. I. v. 29.* legitur, ubi scriptum extat: *praeterea dixit Deus: ecce dedi vobis omnes herbas sementantes semen, quae sunt in superficie totius terrae, omnesque arbores sementantes semen vestrae ad comedendum erunt.* item *cap. II. v. 16. de fructu quidem omnis arboris libere comedes.* Herbae & arborum fructus nutrimentum quidem adeo copiosum, ut carnes animantium, non suppeditant, interim tamen hoc verissimum est, illa succum praebere leuiorem, facile transeuntem & necessarium eumque optime temperarum sanguinem gignere, ideoque ad vitam sanam atque longævam maximae utilitatis esse, eam maxime ob causam, quia plethoram auertunt, quae a cibis plenioris nutrimenti corpori ingenerata plurimorum morborum & ipsius etiam mortis maturioris causa esse potest. Maius vero nutrimentum praebent varii generis semina praesertim tritici, filiginis, hordei & ex iis preparata. Est enim ea omnium seminum indoles, ut temperie optima gaudeant, dum ex partibus terreis subtilioribus, mucidis & oleoso-sulphureis probe mixta sunt, unde cum aqueo liquore cocta vel trita, eundem lacteo colore bene saturato imbuunt. Ex his colligi facile potest, quare panis ex frumentorum generibus preparatus in optimorum nutrimentorum numero habeatur. Ex sola aqua & pane ho-

mo

mo vivere potest, testante id *Ecclesiastico* Cap. XXIX. v. 25. *precipua vite humanae sunt aqua & panis.* Hinc etiam regius psalmista pani virtutem confortantem & cordialem tribuit. Psalm. 104. v. 15. Huc pertinent quoque legumina, quorum genus quoddam propheta Daniel cum sociis suis præ cibo regio expetiit, uti ipse testatur in prophetia sua Cap. I. v. 12. quo in loco nempe v. 15. simul indigitavit, quam bene usu huius cibi eorum corpora nutrita fuerint, facies enim illorum inde elegans ut pinguium carne apparuit. Ex hisce iam omnibus, quæ de ciborum conditione ex sacris fontibus protulimus, hæc regula diætetica consequitur: eligenda sunt alimenta corpori nostro congrua, temperata, quæ facilius solvantur & corpus transeunt.

21. ANTEQUAM pedem ulterius proferamus hoc loco non incongrue quæritur an rationes medicæ firmiores dari possint, quod esus adipis Leuit. VII. v. 13. item carnis suillæ Leuit. Cap. XI. v. 7. ut & sanguinis animalium Leuit. Cap. XVII. v. 10. Act. Apost. Cap. XV. v. 29. nec non suffocati Leu. XVII. v. 17. Act. Cap. XV. v. 29. interdictus, sit insalubris ac noxi-
us? Adipem quod attinet, eiusdem indoles noxia cognoscitur ex eo, quod vix in ventriculo dissoluatur & in alimentum cedat, sed ab acido in coagulum concreascit, plicis ventriculi & intestinorum cellulis adhærescat, ubi ex diuturna mora corrumpitur & ructuum, sodæ, pathematum spasmodicorum ac dolorum occasionem præbet amplissimam. Notandum insimul hoc loco est, quod quo viscosiores & magis rancidæ ac vetustiores sint pinguedines, eo etiam peioris sint indolis. Hanc ob rationem præsertim ii, quorum primæ viæ acido copioso scatent, optime sibi consulunt, quando ab esu omnis generis pinguedinum copiosiori penitus abstinent. Quare vero caro suilla ut noxia, maioris paulo difficultatis quæstio est, cum maximam habeat conuenientiam cum sanguine humano & præterea gelatinam præbeat multo copiosiore ipsa carne bouina vel ouina aut alia. Respondemus autem hic cum distinctione aliqua & dicimus: carnem suillam mi-

nus nocere illis, qui eo parciori in quantitate vtuntur & insuper corpus motu ac labore probe exercent, sed infirmioribus, iisque, qui corpus parum mouent, non potest non magno esse nocumento propter glutinosum, quo abundat, succum, hinc promte illius frequentiori vsu emunctoriorum tubuli obstruuntur, quibus obstructis, plurimæ impuritates in corpore accumulatur, quæ deinde variis cutis vitiis & scorbuticis morbis occasionem subministrant. Optime igitur faciunt ii, qui cachecticæ sunt constitutionis & vitam degunt otiosam, si talismodi carnis vsum plane abdicant. Nunc videbimus etiam, quænam ratio medica dari possit de noxa esus sanguinis interdicti. Quicumque sanguinis examen instituit, haud difficili negotio comperiet, eum ex particulis maxime putrescibilibus constare. Elucescit id inter alia ex eo, quod sanguis e vena emissus statim coaguletur & rancorem contrahat. Quodsi igitur eiusmodi sanguis in cibum sumitur, facile in ventriculo corrumpitur & chylum minus aptum suppe- ditat. Eadem est ratio suffocati: nam quodocunque animal suffocatione perit, sanguis in vasis partium coagulatur & putredinis celerioris causam præbet.

22. HISCE discussis pergimus ad potulentorum genera, hoc autem loco solummodo ac recensere lubet, quæ naturæ nostræ maxime congrua sunt & quorum in ipsa sacra scriptura fit mentio. Primum igitur de aqua eiusque usu agemus, quem ex ipsa sacra scriptura provoco ad *Num. Cap. XX.* vbi Israëlitæ aquam postularunt a Deo per Moysen, quam etiam impetrarunt, cum Moyses petram virga sua percuteret. Huc spectat locus *1. Reg. XVII.* vbi potus Eliæ fuit aqua e torrente. it. *Ecclesiastic. Cap. XXIX. v. 25.* vbi legitur: *præcipua vitæ humanæ sunt aqua & panis.* Primæuos homines & patriarchas vsque ad Noachi tempora aquæ potu vfos fuisse, non obscure iudicatur: nullibi enim ante tempora Noachi vini fit mentio, multoties vero aquæ. Ex hisce adductis satis manifestum videtur, quod iam inde ab antiquissimis temporibus vsus aquæ fuerit cognitus & maximi æstimatus. Est itaque
aqua

aqua potus omnium animantium communissimus & ad vitam ac sanitatem tuendam accommodatissimus. Hoc enim aqueum elementum maxime omnium ad constituendam sanguinis ac humorum vitalium texturam necessarium est. Aqua ad digestionem & extractionem succorum ex alimentis aptissima, hæc minimos corporis meatus quam expeditissime subit, unde ad interiores partium poros nutritium succum aduehit, hæc quoque euahendis e corpore salino-sulphureis excrementitiis partibus quam maxime idonea est, unde optimo iure medicina vniuersalis præseruatiua nuncupari posset: non enim facile datur hac ipsa nobilius a morbis præseruatiuum. Qui solo aquæ potu vtuntur, ii multo robustiores & viuaciores sunt, quam qui aliis liquoribus aut cereuisiis delectantur. Aquæ potus dentes firmiores & candidiores & gingiuas sanas conseruat. Pulchra est obseruatio, quam *Miscell. Natur. Curiosor. Dec. II, A. III. obs. 15.* exhibent de sene centum & viginti annorum, cui adhuc integra dentitio in senectute obtigit, quique nullam aliam longæuitatis causam proferre potuit, quam quod per omne vitæ tempus aquæ potum in deliciis habuerit. De Andrea Tiraquello JCto, auctores referunt, quod solo aquæ potu contentus senex obierit. Inter causas longæuitatis Ægyptiorum aquæ Niloticæ vsus non infima fuit. Diuersa vero aquarum ratione bonitatis est indoles, optimæ sunt pellucidæ, leues particulis heterogeneis calcareis non refertæ, quæ epotæ in hypochondriis fluctuationem non concitant, bene per vrinam & transpirationem secedunt, & sic excretoria aperta conseruant.

23. POST aquam merito quoque vini mentio est iniicienda, cuius inuentor & primus cultor Noachus celebratur ex *Genes. Cap. IX. v. 20.* unde patet, eius vsum itidem esse antiquissimum. *Syracides* eius vsum moderatum egregie commendat *Cap. XXX. v. 30. tanquam vita est vinum hominibus, si moderate illud biberis.* Lætificans cor hominis virtus ipsi tribuitur *Psal. CIV. v. 15.* Denique in omni moerore extollit eius vsum *Ecclesiæ. Cap. XXXI. v. 32. exultationem cordis læ-*

*titiamque animi efficit vinum potum tempestiue, quod satis est, & ibidem v. 33. acerbam animam facit vinum multum potum irritatione & aduersa causa. Et Cap. XL. v. 20. vinum & musica letitiam adferunt cordi. conf. Proverb. Salom. Cap. XXX. v. 6, 7. date potum inebriantem perituro & vinum amaris animo. Bibat, ut obliuiscatur paupertatis suae & molestiae suae non sit memor amplius. Sane vinum temperatum non nimis acidum, nec vaporosum inter remedia nobiliora totam naturam corroborantia facile principem obtinet locum, siquidem eximie circulum sanguinis promouet, ventriculo tonum ac robur largitur, corpus perspirabile reddit, & vires collapsas mirum in modum erigit. Hanc ob causam Paulus Timotheo suo infirmitate ventriculi laboranti vini usum praescribit in Epist. I. ad Timoth. Cap. V. v. 23. Et postea subiungit: *aquas ne bibas, sed vini modicum bibe propter stomachum tuum & propter morbos tuos assiduos.* Quantas enim vires vinum generosum in anorexia seu appetitus prostratione & digestionis vitis corrigendis possideat, vix satis deprædicari potest, quotidiana id testante experientia. Potissimum autem vinum iis conducit, qui temperaturæ corporis sunt frigidioris ac humidioris, qui vitæ sedentariæ addicti sunt & corpus parum movent; calorem enim ipsis addit & spiritualescentiam auget, unde etiam vinum bonæ notæ optimum affectus hypochondriaci & aliorum frigidorum morborum præseruatium iudicatur.*

24. QVEMADMODVM vero sacra scriptura moderatiorem vini usum concedit & commendat: ita vicissim eius abusum & immoderatam in corpus ingurgitationem summopere reprehendit: hinc ebrietas multis in locis novi testamenti ceu vitiorum genitrix & seductrix a via salutis ab Apostolis severe inhibetur. Sapientissimus Salomo in *Proverb. Cap. XXIII. v. 29. & seqq.* genium vinosorum & ebrietatis studioforum cum incommodis tam corporis, quam animi, quæ ex vini nimia ingurgitatione proueniunt, graphice depingit, dum ait: *cui vae? cui eheu? cui contentiones? cui loquacitas? cui vulnera impune? cui rubor oculorum est? immorantibus apud vinum,*
quum

quum rubescit : quum exhibet in poculo colorem suum, indefinenter mouetur rectissime : tandem velut serpens mordebit & velut hæmorrhoids punget. Oculi tui respicient alienas mulieres & animus tuus eloquetur peruersitates. Et eris, ut qui iacet in medio mari & ut, qui iacet in corona carchesii. Ecclesiastes Cap. XIX. v. 1. de vino profert : quod intelligentes seducat. item Ecclesiastic. Cap. XXXI. Ps. XXVIII. in vino ne agas virum : nam vinum multos perdidit : in eodem Cap. V. v. 34. auget animum ebrietas imprudentis ad offensionem : minuit robur & acquirit vulnera.

25. *QUANTAS noxas vina præsertim intemperata vel nimis dulcia, vel acida vel spirituosiora vel sulphur vaporosum olentia, si immodice ingurgitentur, corpori humani inferant, etiam vulgus non ignorat. Dulcia enim vina plethoram augent & morbis ab ea pendentibus ansam præbent. Quæ vero acidum fouent passionibus ex acido & viscido nutrimentum præbent & speciatim calculorum, hysterici ac hypochondriaci mali, podagræ generationem in dispositis corporibus promouent. Deinceps spirituosiora vina, dum mirifice sanguinem & humores exagitant, in iuuenibus inprimis & cholericæ temperaturæ hominibus calorem adaugent & bilem acrem ingenerant, vnde ad hæmorrhagias, febres ardentes, biliosas, spasmos, dolores maxime arthriticos, quandoque etiam conuulsiones inducendas sunt aptissima. Ea denique vina, quæ sulphure vaporoso scatent, nervis infesta sunt & capiti nocent, vnde morbis capitis, quales sunt torpor, somnolentia, cephalalgia, paralyxis & epilepsia viam sternunt. Huc satis apposite transferri possunt, quæ de vino differit VALLE-RIOLA Lib. II. Enarrationum Medicinalium Enarrat. IV. vinum varia in corpus incommoda pro sui natura, ætate, potentia & assumptionis modo infert. Nam vinosiora immodice sumpta caput tentant, nervos implent, fluxiones excitant, mentem labefaciunt, vires corporis vniuersas dissipant ; aquosiora minus alunt, dulcia obstruunt, crassa nigraque difficile perineant diuque in ventre morantur : vetera vehementer calefaciunt : noua turbant*

& fluctuationem miram concitant. Acida lædunt ventrem nervisque sunt inimica. Quicumque igitur sanitatis suæ curam habet, is immoderatum vini vsum ceu corruptelam animi & corporis abhorreat, eoque modico nec excessiva qualitate donato vtatur.

26. A potulentis ad motus diætam transibimus & considerabimus, quid commodi ex illius conuenienti administratione in vitam & sanitatem humanam redundet. Sacra scriptura motus exercitium, quod fit per laborem, ceu somnum a morbis præseruatuum agnoscit, vti videre est ex *Ecclesiastic. Cap. XXXI. v. 25.* verba ita se habent: *In omnibus operibus tuis esto promptus & vlla infirmitas non obueniet tibi.* Hinc etiam Paulus *II. Thessal. Cap. III. v. 10.* his, qui nolunt operari ciborum adsumtionem dissuadet his verbis: *quod si quis non velit operari, neque comedito.* Magnificæ etiam præstantissimorum medicorum hinc inde prostant commendationes motus corporis, qui fit per labores & variis aliis modis. Ex hisce placet allegare HIPPOCRATES *Lib. de diætâ §. 1.* vbi inquit: *homo edens sanus esse non potest, nisi etiam laboret. Contrarias enim inter se vires habent cibi & labores: verum inter se mixti conferunt ad sanitatem.* SANCTORIUS in *medicina statica* ait: *si homines tempore debito exercitio ac labore uterentur, carere possent multis medicis ac medicamentis.* Nihil tam idoneum est ad circulum sanguinis promouendum & humores a particulis impuris liberandos, quam motus externus musculorum; siquidem quandocunque muscoli, qui genuina sunt motus instrumenta pro animæ imperio ope subtilis elastici sanguinis & neruei fluidi vivida ac mobilissima expansione contrahuntur, accidit, vt strictura quadam agilissima non modo vasa præsertim venosa ad constrictionem sicque ad fluidi sanguinis progressivum motum expeditiorem animentur, sed & ipso hoc motu attritui particulae crassiores attenuentur & dividantur. Hoc vero modo intestina motio valde increscit, fluiditas, spirituascentia & calor augetur, vt adeo transpiratio & superflui humidi evaporatio non sine magno cor-

corporis leuamine perficiatur. Hanc ob causam homines laboribus dediti non modo robustioris & sanioris sunt corporis, sed & vitam longævam ut plurimum degunt. Nemo facile ex iis, qui diligenter laboribus incumbunt, calculi, podagræ, arthritidis, affectionis hypochondriacæ, cachexiæ, scorbuti, hydropis malum incurret: contra vero, qui desidiam se mancipant vel vitæ sedentariæ corpus addicunt, frequentissime his morbis patent ac exponuntur, præsertim si genio indulgent & laute vivunt. Hoc enim viuendi more sanguis in vasis accumulatur & ob segniorem transpirationem impuritatem contrahit, spissitudinem lentam acquirit, in visceribus stagnationem subit, eorumque vasa minima opplet & obstruit, sicque dictorum malorum causam præbet foecundissimam. Optime itaque sibi consulunt, qui secundum præceptum Dei *Genes. III. v. 9.* in sudore vultus cibis suis vescuntur.

27. QVEMADMODVM vero moderatio in cunctis rebus naturæ corporis nostri est amicissima: ita motus exercitium, præsertim id, quod per labores fit, non excessivum ac immoderatum, neque continuum, sed moderatum cum alterna quiete interposita sit necesse est. Vtrumque enim horum & motus parcitas, & eiusdem frequentia male afficit corpus illudque mirum quantum debilitat, dum priori modo excretiones retardantur, posteriori vero plus iuste adaugentur. Quare semper, ubi sanitatis scopus nobis propositus est, quies ac motus alternari & se inuicem excipere debent. Et hæc inter eas rationes, quæ Deum permouerant, ut sex in hebdomade dies operibus faciendis destinaret, septimo vero a laboribus omnimodam quietem præciperet, non infima forte fuerit.

28. AD somnum & vigiliam quod attinet, non minus hic, quam aliis in rebus ad vitam & sanitatem corporis necessariis prudentissimum regimen requiritur. Sacra scriptura vsum somni labore defatigatis vires addere confirmat *Ecclesiastic. cap. V. v. 12.* ubi verba textus ita se habent: *dulcis est somnus illius, qui seruit.* Hisce verbis peritissimus morum
(Hoffm. Opusc. varii argumenti.) H rum

rum magister Syracides somnum iis præsertim, quorum vires per diem laboribus plurimis magna ex parte exhaustæ sunt, esse dulcem, id est, vires corporis reficientem adserit. Equidem somnus ad vitæ & sanitatis conseruationem cuius homini summe necessarius est: nullus enim homo absque eius usu diu saluus ac incolumis esse potest. Hic corpori delassato vires collapsas restituit illudque ad consuetos labores subeundos aptius reddit, imo etiam, quod maiorem adhuc admirationem meretur, ipsum animum vegetat eumque ad functiones suas perficiendas alacriorem ac promptiorem efficit.

29. SICVTI autem somnus moderatus damno eidem est & vires refarcit: ita immoderatus damno eidem est & vires potius imminuit, quippe non modo capitis grauitatem & torporem infert, sed & omnibus partibus corporis languorem inducit, sicque agilitatem menti & corpori subtrahit, quia influxum fluidi subtilissimi & mobilissimi in neruos & solidas partes, quæ motum efficiunt, nimium impedit, vnde spiritus ascentia & fluiditas sanguinis perit, humores spissescunt, incrassantur & ad chronicos morbos fit dispositio. Hinc ob tantam noxam, quam immoderatus somni usus corpori humano adfert, diuinus *Salomo in Prouerb. Cap. VI. v. 4.* nimium somnum his verbis dissuadet: *ne concedito somnum oculis tuis aut dormitationem palpebris tuis*: quod dictum de somno intemperato omnino intelligendum, cum moderatus nihil vitii habeat & homini ad vitam & sanitatem sit necessarius.

30. QVODSI igitur somnus moderatus ad vitam & sanitatem est accommodatissimus: facile inde consequitur, vigilias, quarum paucis adhuc attingenda consideratio est, immodicas & longius protractas ingentem noxam corpori nostro adferre. Ex nimis enim vigiliis coctio perturbatur, facies pallorem induit, corpus macie conficitur, oculi fiunt concavi cum austero & tristi vultu. Pulcherrimus huc quadrans locus legitur *Ecclesiast. Cap. XXXI. v. 1. vigilie diuitiarum causa tabefaciunt carnes*. Ex hisce iam omnibus, quæ de somno ac vigilia paucis commentati sumus, sequens elicetur regula diæ-

diætetica : nempe sanitati suæ illum optime consulere, qui omnem excessum ac defectum circa somnum euitat, eoque ipso, quantum ad vires refarciendas sufficit, moderate vtitur.

31. HISCE ad finem perductis pauca saltem de diætâ circa veneris vsum annectere visum fuit. Vti vero venus legitima & moderata nulli culpæ est obnoxia, cum ipsius Dei prouidentissimum sit institutum, eum in finem, vt genus humanum noua subinde generatione conseruaretur & hominum numerus multiplicaretur : ita eadem præpostere & immoderate exercita plurimorum malorum, imo mortis maturioris causa esse potest, quod ex sacra scriptura luculenter satis demonstrabimus. Cum *Salomo* in suis *Prouerb. Cap. VII.* veris coloribus ingenium meretricis impudentissimæ depinxisset, sapientiæ cultori commercium cum eiusmodi ob-scœna adulteria v. 25. seuerè interdicat eam ob causam, *quia nempe, vt v. 27. verba se habent, viæ ad sepulchrum sunt viæ ad domum eius descendentes ad penetralia mortis.* Præterquam enim, quod eiusmodi facinus sit abominabile coram Deo & poenam mortis æternæ mereatur, nihil etiam magis sanitati corporis infensum est ; vires enim destruit & sanguinem spirituascentia orbat veneris vsus immodicus, & subtracto sic sero roscido spirituofo, quo semen constat, quod ad robur partium accedere debebat, necesse est, vt vires labefactentur & suo robore priuentur membra. Maiora vero adhuc mala sunt, quæ ex impuro concubitu corpori accidunt, quod *Ecclesiaste Cap. XIX. v. 2.* satis euidenter docetur, vbi hæc verba leguntur : *qui agglutinatur scortis, est audax, tinea & vermes hereditario iure possidebunt illum & arefiet traductus in exemplum infamiæ maximæ.* Hoc loco luis veneræ natura ac indoles non obscure exprimitur, hæc enim in summa humorum præsertim lymphæ putredine & corporis defœderatione ac contabescencia consistit. conf. *Eccles. Cap. XXXII. v. 21. 22.* Nolumus hac in re esse prolixiores. Qui sanitatis curam habet, is monito *Syracidis florem ætatis suæ conseruabit sanum, nec robur suum meretricibus dabit.*

32. RESTAT adhuc magni momenti diætetica regula exponenda, quam *Ecclesiasticus* Cap. XXXVII. nobis tradit, vbi v. 30. & 31. ita dicit: *fili, dum viuus, periculum fac animi tui ac vide quid sit malum, ac ne des illi. Non enim omnia omnibus conferunt.* His verbis diuinus ille scriptor vult, vt probe nostrum corpus exploremus, quid ipsi in indiuiduo damno vel nocumento sit, a quibus rebus male vel bene se habeat, multum enim differre corpora a corporibus & his sæpe nocere, quæ aliis profint ac vicissim. Equidem, auctore *Celso* & ipsa experientia teste, sanis omnia sunt sana; sed cum naturarum maxima sit diuersitas & unum corpus præ altero robore excellat, hinc alimentorum salubritas atque insalubritas non in genere more vulgi, sed secundum vires & naturam corporum in specie æstimanda est. Quicumque sanissimum corpus habent, illi non facile ab vlla re offenduntur & cibum copiosorem eumque etiam intemperatiorem ferre possunt, eorum enim ventriculus sufficienti robore ad illum subigendum instructus est, & sanguinis motu viuido omnia superuacanea debite excernuntur. Ast qui imbecillius habent corpus, a copiosioribus æque ac intemperatioribus alimentis lædantur necesse est, quoniam eorum ventriculus ad digestionem & intimam adsumtorum resolutionem impar est, nec sanguinis motus adeo viuידus existit, vt superflua debito modo expellere possit.

33. Hoc itaque verissimum est assertum, neque alimenta, neque medicamenta per se & absolute salubria ac noxia vocari posse, neque secundum suam insitam virtutem certum effectum semper exserere, sed prout corpus ratione roboris solidorum & viarum ac humorum conditione dispositum inveniunt, tum demum proficuum aut perniciosum effectum edere. Hoc cum ita se habeat, optime sibi consulit iste, cui vita & sanitas curæ cordique est, si corporis sui naturam & peculiarem dispositionem accuratissime inquirat & insuper solerter obseruet, quænam naturæ suæ amica, quænam inimica sint. Hoc enim pacto, si ad vsum seligit, quæ prodesse
sæpius

sæpius obseruauit, & reiicit, quæ nocere & vim naturæ suæ inferre animaduertit, optima & constanti sanitate perfrui poterit. Profecto si cauta victus ratione vterentur homines & vsu probe explorarent; a quo potu vel cibo se iuuari lædiue sentirent; in paucissimis vel plane non medicorum opera egerent, quoad sani forent.

34. CORONIDIS loco non possumus non omnibus & singulis, quibus sanitas vitæque longæuitas curæ cordique est, sinceram pietatem ceu irrefragabile diæteticæ huius nostræ fulcrum etiam atque etiam commendare. Profecto theologia, quatenus in praxi consistit, nec in nudis tantum speculationibus acquiescit, optimo iure corporis medicina nuncupari potest: adeoque non sine causa etiam naturali in sacro codice probis ac in timore Dei ambulantibus vitæ longæuitas est promissa; improbis autem & in voluptatum cœno se volutantibus vitæ breuitas in poenæ locum indicta. Sic diuinus Salomo de præceptis sapientiæ dicit: *Prouerb. Cap. III. v. 2. longitudinem dierum annosamque vitam cum pace adiicient tibi.* Idem *Cap. IX. v. 27.* ita fatur: *reuerentia Jehouæ adiicit dies, anni vero improborum decurtantur.* Conf. *Prouerb. Cap. III. v. 16. item Cap. IV. v. 22. Cap. IX. v. 10. II.* Pariter *Ecclesiasticus Cap. I. & 11.* hæc verba habet: *reuerentia Domini delectatura est cor & inditura lætitiā gaudiumque & longæuitatem.* Diuus Paulus in *Epistola priori ad Timotheum*: *pietas, inquit, ad omnia utilis est, ut quæ promissionem habeat vitæ præsentis ac futuræ.* Nam quandocunque homo terminum voluptatis suæ Deum constituit, omnes actiones suas ita moderatur, ut mentem sanam conseruet in corpore sano & hac ratione particeps reddatur perfectionum huius & futuræ vitæ. Qui veræ pietati se totum consecrauit ac per preces ac fidem magnum illud Spiritus Sancti donum acquisiuit, animo est tranquillo & omnium commotionum ab obiectis externis vacuo, lætatur in Domino omni tempore, nec vlla re acerba contristatur, omnis generis maledicta, contumelias & iniurias patienter tolerat, laboribus suis so-

lenter incumbit : cibo , potu , somno aliisque rebus ad vitam necessariis utitur in conseruationem corporis , nec curam habet carnis suae ad concupiscentiam. Et hac methodo ingenuus pietatis cultor fructum vitae longae ac incolumis optime consequitur.

35. Si experientiam consulimus , plurima possunt allegari exempla , quod theologi & pii viri , ad senectutem grandaeuam peruenerint vel sola mentis tranquilla constitutione. Quicumque autem a recto pietatis tramite discedunt & sanctissima vitae praecepta negligunt , impetu prauarum cupiditatum abrepti , nulla in re facile moderationem admittunt , variis affectuum fluctibus agitantur & rebus sic dictis non naturalibus , quarum rectus usus vitae ac sanitati amicissimus est , nefarie & contra sanam rationem abutuntur : quippe pax & tranquillitas mentis non est apud improbos ; ingluuiei dediti sunt , potationes saepius in seram usque noctem protrahunt , somnolentiae indulgent & Baccho ac Veneri tantum non assiduo litant. Et isto viuendi more insanum hocce hominum genus complures morbosas sibi accersit afflictiones & vitae filum , quod naturae ordine ac cursu longius potuisset producere , temere ac in optimo saepe aetatis flore abrumpit. Quicumque igitur sanam ac longam vitam magni aestimat , is totus eo annitatur oportet , ut in possessionem diuinæ gratiae perueniat , qua duce & cooperatrice a viis salutis aequae terrenae ac coelestis nunquam sane aberrabimus.



DISSERTATIO III.
DE
SEPTEM SANITATIS
LEGIBVS.

§. I.

Nihil est ad ineffabilem Dei gloriam in toto hoc universo illustrius, quam quod omnia & singula mirabili proportionem sapientissimo ordine & conuenienti tempore perficiantur. Neque vllus in natura notabilis effectus, nisi sub certo causarum ordine atque concursu animadvertitur. Corpora organica suas actiones, motusque secundum certam normam certasque leges constanter absoluunt. Sidera coelestia ad constantes regulas, cursum, iter, ac motum suum in vastissimo coeli spatio conficiunt, quas leges magnus Keplerus accurate notauit. Neque descensus corporum grauium sine legibus fit, quorum obseruationem mathematicis, praesertim Galilæo a Galilæis debemus. Neque percussiones atque impulsus, legibus, quarum inuentionem praecipue clarissimi viri, Hugenus, Borellus & Leibnitius sibi vendicant, destituuntur. Id vero in solertiorum adhuc desideriiis est, vt leges, quibus fluida & elastica obsecundant, satis superque perspectæ atque detectæ essent. Cum itaque in tota rerum natura nihil sine ordine, nihil sine regula ac lege fiat: nullum est dubium, quin etiam vita atque integritas humani corporis certo ordine ac lege naturali quam maxime dispensetur atque administretur. Has itaque leges microcosmicas, hunc, quo natura gaudet, ordinem recte explorare atque intelligere vtique boni medici esse videtur. Hisce enim inuentis postea quam facillimum erit salutaria vitæ & sanitatis tuendæ causa præcepta superstruere, quorum obseruantia inconcussam sanitatem promittat, contemptus vitam miseram atque breuiorem post se trahat. Quemadmodum enim,

enim, qui legum ciuiliū sunt obseruantes in republica, salutem sibi atque tranquillitatem parant: ita etiam, quibus legum medicarum obseruantia non despiciatui, sed curæ cordique est, ii prosperam æquabilem atque perpetuam valetudinem, qua nihil potest esse in vita carius, sibi conciliare poterunt. Duodecim olim tabulis omnium legum iurisque scientiam prisca & sapiens antiquitas complexa est, nos iam sacro septenario vitæ ac sanitatis antiquitas atque leges includere allaborauimus, adeo, vt in compendio, quasi omne illud alias valde diffusum, quod circa sanitatem tuendam obseruandum est, hic reperiatur. Quem laborem neque iniucundum, neque inutilem ad bonum publicum cum iudicauerimus, placuit illum curiosorum oculis atque animis iam subiicere.

2. SEPTEM itaque leges, quibus sanitas incorrupta diu seruari possit, proposituro, primo omnium mihi incumbit, vt fundamentalem microcosmicam legem, secundum quam ceu ad normam omnes actiones corporis nostri neque non vita atque sanitas administrantur, & cui nostræ etiam diæteticae leges insistant, in medium proferam. Est vero ea lex, liber æquabilis ac moderatus fluidorum in circulum abiens motus, per moderatum constantem & æquabilem solidorum pulsum ac tonum; hoc princeps est conseruationis corporis nostri in se corruptibilis fundamentum. Hæc lex omnium actionum, quæ in corpore contingunt, tam naturalium quam animalium norma & regula est. Hic omnis theoriæ siue scientiæ & prudentiæ siue praxeos medicæ amicus & perpetuus est scopus. Hæc exquisiti vitæ regiminis & salubrium diætæ præceptorum præcipua directrix. Hac facta tectaque, in vigore ac sanitate persistit corpus, hac destructa multum in hisce periclitatur. Nullus enim morbus, nulla œconomiae motuum vitalium perturbatio animaduertitur, vbi violatio huius legis fundamentalis microcosmicæ euitatur.

3. HISCE iam perspectis ingeniosa & eximiæ utilitatis emergit quæstio, quænam illa sint, quæ legem hanc ceu fundamentum vitæ & sanitatis constituunt, firment atque corroborent?

borent? nec non quænam hanc naturæ normam violare atque destruere sint idonea? Sicuti enim ab illis longam vitam illibatamque sanitatem, qua nihil potest esse dulcius: ita ab his eius abbreviationem & incommodam valetudinem expectari oportet. Facta autem accuratiori pensatione, machinam nostram & materiam, qua constat, & motum, qui actuat materiam, a rebus mere externis accipere annotamus. Hisce enim per singula momenta eget & conseruatur: iisque deficientibus destruitur. A veteribus hæ res non naturales appellantur, quoniam extra corporis nostri essentiam constitutæ sint. Sunt vero hæc ipsa maxime omnium animi conditio, & præterea vniuersalis ille aëris & ætheris fons, e quo omnia viuentium genera bibere debent; sunt alimenta, solida æque ac fluida; sunt denique actiones ipsius hominis nunquam non necessariae, quæ ad motum, quietem, somnum, vigilias, consuetudinem vitæque genus pertinent. Et quemadmodum ingeniose constructi automatis motus a vi motrice elastica vel pondere alterius dependet, conseruatur atque dirigitur: ita etiam artificiosissimæ atque ineffabili sapientia constructæ machinæ nostræ a corruptione conseruatio, atque regularis & ordinatus motionum successus a rebus memoratis externis vnice pendet, per easque durat atque persistit. Hæc ipsa enim sunt, quæ vigorem, motum & actuationem partibus solidis æque ac fluidis tribuunt: ex quo clarissime intelligitur, vtique in harum rerum prudenti ac decenti vsu præcipuum vitæ & sanitatis nostræ momentum versari, eaque propter hanc curam animo nostro perpetuo esse debere infixam, vt leges, quæ nobis conuenientem earum rerum vsum præscribunt, diligentissime obseruemus. Has vero ipsas sequenti iam ordine promulgabimus.

4. PRIMA itaque lex esto:

Omne nimium, quia naturæ est inimicum, effuge.

Est regula hæc venerandi & primi artis nostræ parentis HIPPOCRATIS, quam *sect. 1. aphorismo LI.* proposuit, eaque valde est vniuersalis, & hinc amplissimæ vtilitatis. Per τὸ omne
(*Hoffm. Opusc. varii argumenti.*) I intel-

intelligit, quodcunque corpus nostrum villo modo mutare, afficere vel alterare potest, siue ex elementorum, alimentorum, medicamentorum classe, siue ad animæ vel ipsius hominis actiones referendum fuerit. Per naturæ vero vocabulum, quod ingenti propter varias in disciplinis significationes obscuritate laborat, quid magnus noster auctor intellectum velit, explicatione paulo planiore opus est. Loca vero, in quibus non modo HIPPOCRATES, sed & alii veterum sapientiores naturæ mentionem faciunt facta prudenti inspectione declarant, per hanc ipsam nihil aliud intelligi, quam existentes in corpore nostro motus, qui physica quadam necessitate ex structura videlicet, dispositione, atque coordinatione mutua partium fluidarum, humidarum & solidarum, quæ nunquam vi motrice destituuntur, perficiuntur. Placuit mihi semper hac in re locus AVRELIANI qui *lib. 1. acutorum morborum pag. 39.* exstat. *Omnia, inquit, fiunt necessitate, & nihil sine causa, neque natura nihil aliud est quam corpus & eius motus.* Igitur hoc sensu accipi etiam debet vocabulum in nostro aphorismo, cuius explicationem hanc esse oportet: omne nimium & immoderatum siue copia siue temperie peccet, corpus nostrum, inque eo vigentes motus, quorum princeps est sanguinis humorumque progressio, lædit, quæ postea, cum omnis secretionis, excretionis, conseruationis, nutritionis atque operationum animæ fons atque fundamentum sit, vehementer functiones corporis alterat atque affligit. Quare vero omne intemperatum & excessiuum motibus œconomix nostræ vitalis inimicum sit, ratio hæc est, quod temperatus ac placidus fluidorum progressus norma ac regula vitæ & sanitatis sit, vti iam supra docuimus, omnis igitur copia peccans materia libero fluidorum progressui resistit. Nimius quoque solidorum impulsus potius ad destructionem quam conseruationem corporis nostri tendit. Porro ex altera parte, si humorum nimius esset defectus, si eorum motus plane deficerent atque elanguescerent; infensæ stagnationes, obstructions nec non corruptiones perquam funestæ inde emer-

mergerent. Quemadmodum enim omne, quod excedit, corpori nostro est infensum: ita moderatum ac temperatum, quod quasi inter extrema medium est, ipsi est amicissimum.

5. SICUTI autem a priori, ut philosophi loqui amant, huius regulæ veritatem demonstraui: ita multo magis ab effectu, siue a posteriori per experientiam res euadet clarior. Obseruatione enim indubitata comperimus, excessuum in rebus non naturalibus vehementer nos lædere. Ita nimia a quocunque cibo facta repletio & contra fames siue alimonix bonæ defectus magnorum morborum genitrices sunt. Omnis cibus excessiuus qualitatibus notatus, qualis admodum falsus, acidus, durus, glutinosus, vel nimis calidus, dulcis, acris, fermentescibilis in copia ingestus, incommodum creat. Omnia enim, ut noster HIPPOCRATIS lib. de vet. med. §. 25. inquit, *quæ edit aut bibit homo, minime de intemperato & dissidente ac excedente succo participare debent, velut sunt panis & maza & his similia, quibus assuetus est homo pluribus & semper uti. Nam robur & augmentum & alimentum per nihil aliud contingit, quam quod probe temperatum est, & nihil habet intemperatum.* Potus siue sit nimium potens, siue acidus, aut valde dulcis minus congruit succis corporis nostri, neque in æquilibrio vitales motus conseruat, vnde minus salubris habendus. Vehemens frigus, intensus calor, diuturna humiditas summopere humorum temperiem & motus corporis lædunt. Et quemadmodum vehemens exercitatio, indefessus labor, assidua vigilia vires frangit easque dissipat: ita diuturna quies, vita sedentaria, diuturnum otium & animum & corpus iners, torpidum, segneque reddunt. Nimia venus, præsertim vna nocte sæpius repetita mire debilitat corpus, ut si quis acuto morbo correptus sit, ex eo vix eluctari possit. Contra vero nimis parcus veneris usus, torpidos & timidos reddit homines, ac capiti membrisque grauitatem affert. Quam perniciosus naturæ nostræ sit ipse vehemens animæ affectus neque minus ipsa valentior medicina, siue purgans, siue adstringens aut motus cohibens, dici vix potest. Et sicuti ex-

cretiones, quando vel excedunt vel deficiunt, morbum futurum nunciant: ita æquabiles, constantes, moderatæ prosperum valetudinis statum promittunt. Auream quippe regulam in diæteticis perpetuo obseruandam censemus: moderata durant, atque vitam & sanitatem durabilem præstant.

6. SECUNDA perquam salutaris lex hæc esto:

Ne subito adsueta mutes, quia consuetudo est altera natura.

Trita & peruulgata satis est hæc regula a physices æque ac moralium professoribus approbata. Vtpote experientia teste consuetudo non minus in naturalibus & medicis quam quoad mores, vitia & virtutes in moralibus multum valet, inque habitum quasi & sic in naturam commutatur. Quapropter malam etiam consuetudinem non esse abiiciendam omnes saniores asseuerarunt. Nam HIPPOCRATE auctore *lib. II. aphor. 50. ex multo tempore consueta inconsuetis minus molestare solent. & aphor. 49. prodidit: asueti debiles ferre possunt ea, quæ inasuetis robustioribus molestiam creant.* Per consuetudinem vero intelligimus hoc loco longiorem & repetitum rerum, quæ corpus nostrum afficiunt atque mutant, usum. De hoc vtut paulo deteriori dicitur, quod continuato usu altera fiat natura, id est, quod demum corpori nostro conformis & amicus euadat, neque amplius noceat vel eius motus turbet, vt potius cum natura eiusque motibus in consymbolismum atque affinitatem abeat. Huius regulæ veritatem non tam ratio quam certa & indubitata experientia comprobat atque illustrat. Vtpote hac magistra discimus, quod etiam immoderata neque adeo amica longioris temporis usu, innocua tandem euadant. Ita exempli causa videmus, durum, quo Westphali gaudent, victum ex pane grossiori furfuraceo, & induratis ac infumatis suillis carnibus constantem ipsorum membris vim ac robur addere; tenues vero, temperatos & facilis solutionis cibos hos populos offendere. Notum est, quam maxime immoderatus usus aromatum, piperis præsertim, item spiritus vini, aquarum vitæ in Polonia & Moscouia vigeat, neque

neque facile asuetos ibi lædat, cum tamen, si nostri idem vellent imitari, in magnum vitæ ac sanitatis periculum incurrerent.

7. INCLEMENTIVS porro atque impurum crassum & nebulis ac vaporibus oblitum cœlum non tam facile iis corporibus, quæ diu ea vñ fuerunt, nocet, ac si sana corpora, quæ puro antea fruebantur aëre, in talem locum fuerint delata, nam hæc protinus ab insalubri aëre admodum offenduntur. Valet id maxime de tenerioribus & sensibilibus subiectis, vtpote quæ ex peregrinationibus, mutatione aeris vel victus plane contrarii facta facile læduntur atque ægrotant. Si quis diu assueuerit vrbano minusque libero aeri, is a puro, salubri, aperto, qualis ruralis saluberrimus est, facile perturbabitur, adeo, vt lassitudinem & grauitatem quandam in capite experiatur. Qui assueti sunt continuis lacoribus & motionibus, si has intermittunt, facile ægrotare incipiunt. Cerevisias qui diu potarunt amaras & lupulatas, dulces postea æque bene ferre nequeunt. Valet quoque hæc consuetudo quoad animi pathemata. Dantur, qui ita adsueuerunt commotioni animi per iracundiam, vt in nutrimentum sanitatis ira cedere videatur: cum contra inadsuetis gravis excarescentia subitam mortem accelerare possit. Qui longiori somno diutius vñ sunt, si parum dormire coguntur, multum debilitantur. Ita etiam meridianus somnus in adsuetis citra noxam & cum commodo melioris chylicationis peragitur, qui minus adsuetis obseruatur noxius. Porro, si quis corporis motionem inusitatam paulo fortiolem suscepit, non modo multum delassabitur, sed etiam plures molestias altera die in membris persentiet. Spectat huc *aphor. 49. sect. II. HIPPOCRATIS assueti consuetos labores ferre, etiam si fuerint debiles aut senes, non assuetis fortibus ac iuuenibus facilius ferunt.*

8. HVC quoque pertinet nimis frequens & immoderata medicamentorum assumptio, quæ multis hypochondriacis perquam familiaris est, nam hoc morbo correpti frequentius pharmacomania laborant, dum medicamenta quotidie inge-

runt, eorumque copiam ac varietatem appetant, quibus tamen ita natura assuescit, ut tandem fere omni effectu destituantur. Porro in vulgus nota sunt exempla, quod ea, quæ veneni naturam habent, diuturno usu non amplius noceant, sicuti familiarissimum exemplum habemus in tabaci fumum potantibus, qui sulphure narcotico naturæ inimico valde caput lædit & acerba symptomata inducit: successiuo autem & longiori usu non modo omnem nocendi facultatem amittit, sed naturæ etiam tandem blandus atque amicus redditur. Simili etiam ratione opio assuescere possumus; quam in rem observationem meretur *Fallopianus*: *Persiani*, inquit, comedunt opium a pueritia incipientes in minore quantitate, & sensim sensimque quantitatem augentes, donec assueverint magnæ opii quantitati, idque faciunt, ut fiant ad coitum promptiores. Puellam napello nutritam legimus, quæ, cum modice atque sensim venenum id deuorasset, eo imposterum absque vlla noxa usa est. Valet hæc regula in omnibus simpliciter consuetis, videlicet alimentis, refrigeratione, calefactione, balneis, tegumentis, motionibus, animi affectibus, venere, somno, imo venenis, ut consueti consuetos minus offendant; qui uti mihi videtur, ex crebra applicatione ad corporis nostri fibras, fluidasque partes ad similes motus, atque materiæ habitum, dispositionem quandam promptam atque facilem tandem adipiscuntur.

9. MAXIMI itaque momenti est consuetudo, neque minus periculi est a consuetis desciscere, eaque in contrarium mutare, præsertim si repente id fiat. Vnde est illud *CELSI lib. I. cap. 3.* *Periclitatur, & qui semel & qui bis die cibum contra consuetudinem assumit. Item neque e subito labore subitum otium, neque ex nimio otio subitus labor sine graui noxa est.* Ergo, si quis mutare aliquid volet, paulatim debet assuescere: omnis enim subita mutatio periculosa est, quod vero paulatim ac successiue fit, id tutum est. Notari autem hoc loco velim, inconsueti æque ac consueti nimio excessu, sicut lege prima deduximus, corporis nostri actiones afficere & vehementer lædere posse.

10. ACCEDIMVS ad legem tertiam, quæ sic se habet:

*Animo hilari ac tranquillo esto: quia hoc optimum
longæ vitæ & sanitatis præsidium est.*

Nihil profecto potentius & celerius œconomix nostræ vitales motus turbare atque peruertere & funestos effectus producere valet, quam illud ipsum, quod in nobis perceptionum, impressionum & desideriorum causa ac fons est. Animaduertimus videlicet accuratiori facta meditatione omnium vniuersi corporis partium mutuam & mirificam inter se esse connexionem atque harmoniam, vt, sicuti in machinis fit, vna parte læsa vel mutata, aliæ mox in societatem trahantur. Operationes sic dictæ immateriales, vt sunt impressiones, inclinationes, cupiditates, desideria, cum sanguinis & humorum circuitu & solidorum impulsu ac tono plane mirabile habent commercium mutuamque harmoniam. Quid enim illustrius, quam pro varia dispositione motus sanguinis varie quoque disponi immateriales sic dictas animales actiones, vnde temperamentum & mores & inclinationes atque animi affectus sequuntur. Quid luculentius est, quam quod ad varia desideria & firmiores impressiones adeo corporis motus turbentur, vt mors vel etiam funestus morbus a sola peruersa & minus rationali impressione ortum suum subinde traxerit? Sique libere fatendum, quod rest est, plures hominum magis animi quam corporis morbis ægrotant ac pereunt. Id quod solertiores practicum accuratiori instituto examine circa morborum originem indies experiuntur, vbi quam maxime animi grauem morbum grauissimorum etiam & longorum pathematum occasionem fuisse obseruatur. Inter morbos autem animi referimus terrorem, metum, diuturnum moerorem, animi angorem, odium, inuidiam, iram, profundam & inquietam meditationem, ingens & flagrans circa aliquam rem desiderium, firmiorem de malo impressionem & immoderatum gaudium: hisce, si animus laborat, corpus sanum esse nequit, vnde iam recte intelligitur dictum illud *Iuuenalis*:

Optan-

Optandum, ut sit mens sana in corpore sano.

Mirabile certe est, quomodo ad solam firmiorem animi in ira commotionem protinus pulsus fiat citatior, respiratio auctior & sanguis cum magno impetu per caput & reliqua viscera feratur, ut graues exinde morbi, inflammationes, sanguinis nimia profluvia, apoplexiæ, epilepsiæ, febres quoque acutæ inde propullulent. Mirabile quoque est a graui & subito terrore protinus a corporis ambitu ad interiora recurrere sanguinem, ubi in pectore non raro syncopen, anxietatem, cordis palpitationem & spiritus angustiam: in cerebro vero epilepsiam & conuulsiones excitat. Sæpius vidimus a terrore simul & semel menstrui fluxum substituisse. Corpora a diuturna tristitia mirum debilitari & vires ventriculi & intestinorum tonicas inde labefactari, ut appetitus & digestio omnis concidat, & alui liberalior fluxus fiat, neque minus ad diuturnos & longos morbos viscera inde disponi, quotidiana proh dolor! docet experientia.

II. QUVM vero oppositorum opposita sit ratio, itaque nihil dubii est, quin sicuti immoderatus animi motus regulares in corpore motiones turbat: ita pacata, tranquilla, hilaris & ab omnibus vehementibus desideriis vacua mens statum corporis reddat pacatum atque tranquillum. Mentis enim sanitas corporis parit sanitatem; hanc vero acquirere, ardui omnino laboris est. Complures frustra remedia, quæ mentis morbis medentur, quæsiuerunt; veruntamen hæc ipsa, quæ menti tranquillitatem restitunt, partim ex illis, quæ corpus nostrum, partim, quæ animum proxime afficiunt, petenda esse arbitror. Illius generis sunt suauior conuersatio cum hominibus iocosus, lusus, vinum, musica, equitatio, venatio, vsus aeris rustici & peregrinatio. Præter hæc etiam sanitatem menti reddunt verum rerum, quæ fiunt & eueniunt, secundum rectæ rationis trutinam examen, item saluberrima Christi & apostolorum, nec non saniorum philosophorum præcepta moralia, studium veritatis ac virtutum, & iucundarum ac salutarium rerum inuentio: denique familiaritas cum
pru-

prudentibus & maxime omnium seria auxilii diuini efflagitatio. Hac enim methodo & via sapientia, humilitas, patientia *αὐταίρεσις*, quæ magna morborum animi præsidia sunt, comparantur. Nullum itaque dubium est, quin veritas atque virtutis studium ad longæuitatem perducatur, quare non sine ratione liber *Macrobiorum pag. 857. longæuis annumerat philosophos, & omnes, qui eruditione & ingenio præstantes fuerunt.* Ita etiam *Plutarchus* narrat, plures corpore alioquin parum firmo philosophiæ præceptis vitam longam affecutos. Neque dubium, quin vera pietas atque obedientia, sacro id confirmante codice, longæuitatem promittat, eo, quod & sæuis in vadis tranquillam mentem præstat. Regum sapientissimus *Prouerb. cap. 14. v. 15. item cap. 17. v. 26. hilarem animum vitam quotidianam iucundam* appellat. Notabile est, quod *Sanctorius* medicus staticus incomparabilis semper post hilaritatem maiorem perspirationem & decrementum corporis ratione ponderis obseruauerit. Idem præstantissimus auctor *sect. II. aphor. 49. scribit, nihil magis reddit liberam perspirationem, quam animi consolatio.* Ante omnia vero mens hilaris utilis est, si quis cubitum eat, sique cibum sumat, ubi perpetuo perturbatus a sæuis affectibus animus corpori est nocentissimus.

12. Legem iam quartam statuere placet, quæ hæc est:

Aerem purum & temperatum vehementer ama; quia ad corporis & animi vigorem multum confert.

Nec quicquam profecto; si ab animi motu discefferimus, ad sanitatem & vitam ac valetudinem prosperam tuendam plus confert, quam superius illud pabulum ac elementum commune, quo omnia animantia continuo opus habent. Quo ipso intelligo aeris & ætheris catholicum illud fluidum, quod veteres spiritum appellarunt, cuius secundum *HIPPOCRATEM lib. de flat. §. 6.* tanta est necessitas, vt, si omnibus aliis abstineat homo, neque cibum sumat, neque potum, possit tamen dies tres vel plures viuere: si vero spiritus viæ in corpus intercipientur breui tempore illi esse pereundum. Hic cer-

(*Hoffm. Opusc. varii argumenti.*)

K

te

te aer, eodem auctore HIPPOCRATE *lib. cit.* motum & sensum corpori administrat, & mortalibus vitæ & ægrotis morborum solus est auctor. Nolumus iam prolixiores esse in usu atque virtute aeris ad vitæ & sanitatis tutelam enucleando; certum tamen illud est, aerem esse præcipuum & princeps corporis nostri quoad solidas & fluidas partes mouens, quod partim viuido suo elatere, partim etiam grauitate ac penetrantia, machinularum motricium elaterem & tonum, neque minus fluidorum intestinam agitationem conferuet, ac reciprocam systolen & diastolen vasorum, qua vitales potissimum motus sustinentur, in conuenienti seruat æquilibrio. Hoc nomine vero aer temperatus & purus commendandus est. Per temperatum vero intelligimus eum, qui nec excessiue frigidus, nec iusto calidior aut humidior est, qui non nimis rarefactus aut leuis, neque nimis compressus vel grauis est, qui non vehementer commouetur, sicut fit in ventis: neque nimis quiescit aut immobilis est, vt fit in conclusis & demissioribus locis. Purus porro aer est, qui serenus, expansus, equo vapores copiosi humidi, vel etiam falsæ, acres, sulphureæque partes præcipitatæ fuerunt. Talis certe genuinum spirituum corporis nostri siue potius virium motricium pabulum ac fomentum est.

13. SELIGE igitur ad salubritatem optatissimum aerem ruralem, liberum, in editioribus locis, quæ orientalis saluberrimus ventus perflare possit. Selige aerem post pluuiam & post solis ortum, qui purus & defæcatissimus est: frueri aere potissimum verno Maiali: & cum autumno mensis September, æstate Augustus, hieme Februarius, vere Maius reliquos facile salubritate superent, hinc præstat, maxime iis mensibus peregrinationes instituere vel in libero aere versari. Maxime omnium vero purum & serenum aerem commendamus in iis locis, vbi somnum capimus; nihil enim insalubrius est, quam cubiculum expositum esse aeri vapido, effoeto, humido, graui, immobiliori, qualis est in locis humilioribus, subterraneis & terræ vicinis, circa aquarum stagna & pa-

& paludes : eiusmodi quippe aer vim, robur, tonum & elaterem corporis nostri valde minuit, ad catarrhales defluxiones, corruptum habitum corporis, languorem, febres catarrhales, putridos morbos, ad hydropem quoque & scorbutum viam sternit paratissimam. Deuita quoque, qua potest fieri solertia, immodicum calorem, qualis est circa solstitium æstiuum, sub climate calidiori & sole meridiano, vento flante ab austro : hic enim non modo vires solidis, sed & sanguini blandum ac tenuem humorem, quo gaudet maxime corpus, suffuratur. Fuge quoque aerem perfrigidum, qualis regnat hieme sub flatibus borealibus, & qualis ordinario est noctis tempore, vtpote, qui liberam perspirationem inutilem impedit, humores tenues incrassat, & angustas vias constringit. Præcipue vero pedes & ventriculi regio a frigore sunt defendendi. Fuge quoque præhumidum aerem, qualis est tempore autumnali, nubilo & pluuioso coelo, vento regnante zephyro & australi; hic enim valde fibrarum tonum relaxat, perspirationem retardat, & hinc ad ægritudines, quæ ex impuritatibus & humorum stagnatione nascuntur, admodum disponit. Quam maxime vero euitabis subitas aeris mutationes, quæ fiunt, quando e loco nimis calido in locum valde frigidum concedimus; & contra, vel vbi corpora exponimus mutationibus tempestatum subitis, quæ a contrariis se insequentibus ventis plerumque proueniunt : tam subita enim aeris mutatio huius est indolis, vt mire fibrarum elaterem destruat, vnde inæquabilis sanguinis & humorum progressio minusque expedita eorum, quæ excerni debent, eiectio subsequitur. Hieme nos Germani summopere peccamus, dum vel in æstuariis nostris corpora valde torrentur, vel sub diu aere frigido & gelu torquentur, cum tamen ab utroque quam maxime cauendum sit. Certissime sanitas ad extremam senectutem inconcussa duraret, si cæteris paribus aere per quatuor anni tempora, puro, moderato & temperato semper frui liceret.

14. PROGRESSVM iam facimus ad quintum sanitatis præceptum, quod ita sonat.

Quam maxime selige alimenta corpori nostro congrua, & quæ facilius solvuntur & corpus transeunt.

Vita nostra, siue integritas machinæ nostræ corruptibilis continuis ingestionibus reciprocis maxime omnium continetur & conseruatur. Opus enim homo habet, quo viuat & sanus sit, vt multa quotidie in corpus ingerat, multa quoque egerat. Parum enim est, quod intra canales corporis nostri remanet, præsertim in corporibus iam factis adultioribus, id, quod exacta ponderatione cognoscitur. Ex quo facile apparet, cum ingesta foras excerni rursus debeant, ea alimenta saluberrima esse, quæ partium sunt tenuiorum, adeoque & facilius solvuntur, & emunctoria corporis celeriter transeunt. Ex siccioribus itaque alimentis sunt maxime huic scopo idonea carnes leuiiores iuniorum animantium, spongiosæ, vt bouinæ Frisicæ & Anglicæ, quæ Polonicas & Russicas leuitate & tenuitate longe superant. Omne ferum quoque animal leuius est domestico, leuior piscis, qui inter saxa & arenam, quam qui in limo & in stagnis vel lacubus degit. Frumentum, quod crescit in collibus, salubrius est, quam campestre. Volucres, qui in aëre viuunt, salubriores sunt palustribus, vt sunt anseres, anates. Panis bene fermentatus leuior & mitior est pane crasso, denso, non fermentato & ponderoso, quæ diu morari solet in ventriculo. Optimæ sunt carnes hædinæ castratæ, vitulorum lactantium, pullo- rum perdicum, phasianorum, auicularum paruarum montanarum. Optima sunt iuscula carniū, quæ valde temperata & gelatinosa, & olera bene cocta, vtpote, quæ succum fouent leuiorem & facile transeuntem, qui minus oneri est naturæ. Quam maxime vero effuge carnes duras compactas, annosiores, induratas, infumatas, pisces marinos, asellos, & qui sunt durioris carnis, conchas, cochleas, caseum, lacticia, oua dura, leguminosa, nimis pingua, postilia, & quæ in sartagine friguntur. Abstine quoque a placentis, quæ ex farina,

na, butyro, ouis, saccharo non satis subactis fiunt: cauendum quoque a nimis dulcibus, fabis, lentibus, milio, quæcunque crassos & difficilis solutionis succos vel compactam texturam obtinent, difficilius quoque per corporis minimos tubulos feruntur, adeoque excretionibus resistunt.

15 In genere vero notandum, panem secalinum similagineo longe esse præferendum, siquidem ille fouet partes magis naturæ & præsertim ventriculo amicas, sulphureas, acidulas: similagineus vero propter lentorem magis obstruit, & ob id ad chronicas passiones viam aperit. Placet hic inferere pulchrum locum, qui extat apud SIMON. PAVLI in *Quadripartito Botanico* pag. 283. *In quodidiana victus ratione, qui similagineo pane vescuntur, nec corpus laboribus validoque opere aliquo exercent, parum sibi consulunt. Nam, cum palato morem gerunt, in varios morbos incurrunt. Confestim enim illis iecur & lien obstruitur, nephriticis, artritidisque doloribus corripuntur, atque hæc est ratio, cur magnates & ditiores calculi & podagræ doloribus assidue viuunt obnoxii. Nocet vero admodum panis, qui a fornace adhuc calet, qua de re quoque elegantem habet obseruationem idem laudatus auctor. Fæmina, inquit, imminentibus mensibus deuorauit unum vel alterum similagineum panem calidum, ex furno extractum: vix horæ spatio intermisso lithyminia corripiebatur, post dyspnœa & tandem intra octiduum orhopnœa ipsam iugulauit. Caro suilla saluberrima est iis, qui valde laborant & exercent corpus; infirmioribus vero & minus exercitatis nocet, propter glutinosum, quo abundat, succum, qui facile apponitur, & in forte nutrimentum cedit: hinc nihil omnino emunctoriorum tubulos tam prompte obstruit, ac frequens carnis suillæ usus: his vero obstructis magnæ impuritates lymphæ & defoedationes atque exulcerationes cutis succedunt. Ab esu huius carnis semper transpirationem segniorem & grauitatem corporis SANCTORIVS l. c. perquam curiose obseruauit. Summopere vero alimenta valde acida lædunt, eo, quod coagulum fluidis facile inferant & ob id difficulter per corporis of-*

ficinas eiusque colatoria transeant. Idem tenendum est de nimis dulcibus saccharatis, mellitis nimia copia ingestis, quæ ob insignem, quo constant, lentorem obstructionibus viscerum gignendis sunt aptissima.

16. PROXIMUM iam est, ut potulentorum etiam habeamus rationem, & quænam salubriora præ cæteris sint, perspiciamus. Valet quoque hic regula, quam supra tradidimus, videlicet ea, quæ facilius digestionum officina, corporis meatus & emunctoria transeunt, pro saluberrimis esse æstimanda. Eo nomine hinc laudem merentur vina temperata, subtilia, tartareo vel nitroso sale foeta ut sunt Mosellana, quæ citius per aluum feruntur & ad vesicam descendunt. Laudem quoque merentur Rhenana melioris notæ, & annosiora, quæ præter virtutem eximiam roborantem & transpirationem & urinam mouent. Multum quoque elogii promerentur nobiliora Hungarica, quæ acidi parum habent & spiritum, cerebro & nervis amicum, in sinu fouent, atque perspirationem egregie promouent, unde hæc vina maxime sunt diaphoretica. Character enim vini boni est, si neque ventriculum, neque caput, neque pedes offendit, sed facilius per emunctoria transit. Ex cereuisiarum genere probatissimæ sunt, quæ cito etiam per urinarias vias feruntur, neque grauant caput, neque languorem relinquunt in membris, neque flatulentias in hypochondriacis pariunt. Tales sunt præsertim tenues, subtili acore notatæ, minus lupulo conditæ & quæ ex subtili & pura aqua decoquuntur. Nobis instar maxime celebres probantur cereuisiæ Hammensis, Mindensis, Falkenhagensis, Moscouiensis Lusatia, & quæ instar omnium est, nostra Loebeginensis, inter diureticas facile princeps. Procul vero absint omnia vina crassa recentia, non satis digesta, acida, sulphure vaporoso & fuliginoso plena, potentia, vel fortiter adstringentia, quorum certe parcior, nisi sanitatis periculum subire velimus, debet esse usus: quæ singula etiam circa cereuisias nimis crassas viscidas, sulphuris vaporosi feraces tenenda sunt.

17. OMNIVM vero saluberrimus potus merito aqua dulcis æstimari debet, modo bona, subtilis, levis & pura fuerit. Hæc ad digestionem & alimentorum solutionem aptissima, hæc minimos corporis meatus quam promptissime subit, vnde ad interiores partium poros nutritium succum aduehit: hæc quoque euahendis e corpore excrementitiis partibus quam maxime est idonea. Obseruatione constat accuratiori, aquæ potum omnes sensus acutiores reddere, vnde gustus & odoratus, in iis, qui aquam ordinarie bibunt, excellens est. Deinde aquæ potus dentes firmiores & candidiores, sanasque gingiuas conseruat. Tum, qui aquam bibunt, eximio etiam gaudent appetitu & membrorum vigore; pinguiore etiam sunt, & diutius secundum FALLOPIVM *lib. de sanit. tuend.* vivunt. Notauimus in praxi, commutato cereuisiæ cum aqua potu insigne robur ventriculo redditum fuisse, & consuetas catarrhales defluxiones, lippitudines & arthriticas passiones cessasse. Satis recte sentit de hac re CELSVS, quem ego vehementer auctorem probo, *lib. I. cap. 5. pag. 38.* *Neque his solis, quos capitis imbecillitas torquet, vsus aquæ frigide prodest, sed iis etiam, quos assiduæ lippitudines; grauedines, destillationes, tonsillæque male habent.* Quorum vero ventriculus aquam crudam minus ferre potest, illis cum pane tosto decoquenda, aut destillanda est, vel portio vini admiscenda.

18. NOCET vero maxime omnium frequens aquarum vitæ vel vini adusti vsus, quod partes solidas inflammando, obstruendo, fluidas vero coagulando ad chronicas & acutas passiones viam sternit paratissimam. Sunt spiritus vini potatores plerumque vitæ breuioris & inflammationibus, vel etiam hectico & hydropico morbo facile pereunt. Perquam curiosa est in œconomicis obseruatio, quod ex porcorum intestinis, qui reliquiis ex fermentatione vini adusti saginantur, propter teneram & facile dilacerabilem texturam non possint farcimina confici. Vltimo loco tenendum est, quod, quæ exposuimus, alimenta salubriora languidis, infirmis, ægrotantibus maxime commendanda sint, cum alias non negandum sit, robustio-

bustiora & exercitata corpora etiam duriora insalubritatis titulo notata sæpe sine læsione ferre posse.

19. SEQUITUR iam ordine lex sexta:

Mensuram semper quære alimenta inter & motum ac robur corporis.

Viuimus tamdiu, quamdiu sanguis & fluida per canales corporis feruntur, valemus quando motus ille liber atque æquabilis secundum ordinem & regulas actiones animæ & corporis dispensat. Eget vero vitalis hic motus perpetuo nutrimento, quod tam ab alimentis solidis & fluidis, quam ab ipso aëre subministratur, desiderat vero, ut ea, quæ immissa fuerunt, maxime ex parte rursus eiiciantur. Vnde hoc fluit, perpetuam debere esse & obseruari, si sanum debeat persistere corpus, inter ingesta & egesta, proportionem, quæ læsa, si nempe plus ingeritur, quam egeritur, materia ad morbos inducendos præsto est, utpote ex excretionibus; earumque conditione, modo ac copia recta sanitatis nota ac ratio ducitur. Si enim multum remanet excrementii humoris, languor & grauitas occupat, elanguescit vis vitalis, appetitus & ventriculi robur destruitur, somnus fit grauis & sic via ad morbos paratur.

20. IAM vero quæstio emergit, quænam præcipue ad necessarias illas egestionem proficiant, easque adiuuent. Non vero excellentius ex naturalibus rebus datur auxilium ipso motu, labore & exercitatione corporis; utpote motus eius est naturæ, ut stringendo solidorum fibras promptissimum fluidorum cursum per omnis generis tubulos efficiat, quo fit, ut motus intestinus calidus humorum crescat, viscidum dissoluitur, humidum diffletur & perspiratio, quæ omnes succos corporis purgat & depurat, liberior fiat. Animaduertimus hinc, vehementiori motu corporis sanguinem abundantem non secus ac pinguedinem consumi. Pinguefacta animantia & volucres motu & cursu macrescunt. Alaudæ, quod mirabile est, nocturnæ pinguiore semper sunt ipsis diurnis, propter quietem & aëris frigiditatem. Quibus perspectis sequitur, ut, qui

qui multum alimentorum ingerit, ille etiam multum exercere corpus, &, qui parum se mouet, otioque deditus est, is parum quoque debeat comedere. Sanitatis itaque præcipua pars est, proportionem inter alimenta & inter motum ac laborem corporis inuenire. Sapienter itaque HIPPOCRATES, cuius auctoritas semper nobis maxima est, *lib. I. de dieta* scribit: *Sin inuenta fuerit ciborum mensura & laborum ad vnamquamque naturam, ita, ut excessus neque infra modum fiat, inuenta erit exacta hominibus sanitas.* Nam addit §. I. *Homo edens sanus esse non potest, nisi etiam laboret. Contrarias enim inter se vires habent cibi & labores, verum inter se mixti conferunt ad sanitatem. Labores enim ea, quæ insunt, consumere solent; cibus autem & potus ea, quæ euacuata sunt, explere solent. Oportet autem mensuram ac proportionem cognoscere laborum ad multitudinem ciborum & hominis naturam & corporum staturas ac ætates & ad tempora anni, & ad mutationes ventorum &c.* Cum vero ordinario ingestioni copiosiori non respondeant corporis labores & exercitationes, hinc fit, ut multæ cruditates in ventriculo & intestinis generentur, sanguis in venis nimium increseat, & halituosum ac subtile cutis excrementum remaneat. Inde foecundo proventu morborum semina prodeunt. Quo casu nihil consultius est, quam ut motum augeamus & subtrahamus quodammodo alimenta, siue per diem abstinendo, siue parum in coena assumendo. Recte enim HIPPOCRATES: *non repleri cibis & impigrum esse ad laborem, sanum efficit corpus.* Comparata vero sunt ad motum ambulatio, vectio, gestatio, equitatio, nauigatio, ludus, corporisque labor. Motus autem in puro, temperato, libero & rurali aëre, in aurora, post solis ortum, ante cibum, nunquam statim post eum instituitur. Talis certe motio cum vniuerso corpori, tum animo quoque conciliabit vigorem. In quiescentibus loco motus fungatur clara lectio, seu vociferatio, quam CELSVS & veterum sapientiores mirifice ad sanitatem commendant, utpote qua sanguinis cursus & transpiratio cum totius corporis incal-

(Hoffm. Opusc. varii argumenti.) L lescen-

lescentia egregie promouetur. De huius vtilitate legi meretur AETIVS *lib. 3. pag. 95.* Vicem quoque motus obeant frictiones in veterum monumentis commendatissimæ. Instituantur vero in dorso, pedibus, hypochondriis & fiant in lecto, calido mollique linteo, mane post somnum; hæ enim egregie humidum iners discutiunt, poros aperiunt, transpirationem iuuant, bonumque succum, quod in equis videmus, ad carnes nutriendas adducunt. Vtlius circa motum tenendum est, ut ille fiat successiue, neque in minus adsuētis statim fortiter. Infirmiores quoque & modicas exercitationes subeant & ab immodicis sibi caueant. Prodest motus maxime iis corporibus, quæ spongiosi habitus sunt, exilioraque vasa habent, inque iis multum sanguinis collecti fouent. Post nimium vero exercitium nunquam statim cibum sumere oportet, sed post semihoram sedata prius corporis turbatione edere præstat. Ex quibus omnibus apparet, quam præstans & simplex medicina corporis sit ipse motus veluti saluberrimum magnorum morborum præsidium, vnde scite scribit SANCTORIVS *l. c.* *Si homines tempore debito, exercitio ac labore vterentur, carere possent multis medicis & medicamentis.* Et GALENVS *Comment. 40. §. III.* *Exercitatio supplet vicem purgationis humorum, qui sunt in profundo corporis.* Et *§. III. Comment. 50.* *Exercitia collecta singulis diebus superfluitates expurgant.* Vnde exercitio corpora leuiora fiunt, ut habet SANCTORIVS *in medicina sua statica.*

21. VTIAMA iam lex esto:

Fuge medicos & medicamenta, si vis esse saluus.

MONTANVS olim, nobilissimus facile Italorum medicus, cum inueterato morbo affectis, tum infirmis æque ac valentibus hanc regulam in consultationibus suis mirifice commendabat. Ad huius imitationem solertissimi Heluëtorum practici WEPFERVS & BRUNNERVS consiliis suis perpetuo fere istud adiiciunt: *Fuge medicos & medicinam.* Valet hoc dictum maxime de medicis imperitioribus, temerariis, quæ non vi-

ctu curare volunt, sed valentioribus aduersus morbos omnis generis pugnant, eosque multis remediis præcauere tentant. Neque vero medici docti, periti & prudentes hunc censum subeunt, quorum conuersatio & familiaritas nunquam non omnibus utilis & fructuosa est. Simili modo per medicinam intelligi debent medicamenta siue pharmaca, quæ secundum HIPPOCRATEM *lib. de locis in homine cap. 55. præsentem statum corporis transmouent*, vel naturæ motus & succos valde alterant. Huius generis maxime sunt validiora euacuantia, aliaque commouentia; quorum vsus rarus & cautissimus esse debet: secus ac plures, qui peruersa persuasione laborant, medicamentorum vsum morbos & mortem vnice præcauere, ideoque ea frequentius esse vsurpanda existimant. Res vero longe aliter sese habet. Admoneo enim, obtestor & repetito, corporis naturam integram valentem & robustam rectius victu & exquisito vitæ regimine, quam medicamentis seruari & a morbis defendi. Vnde etiam sapientissimi veterum præseruationis causa rarius utebantur pharmacis, præsertim validioribus, sed victum conuenientem potius commendabant. *Asclepiades teste CELSO in præfatione lib. 5. pag. 241. vsum medicamentorum ex magna parte sustulit, quia omnia fere stomachum ledunt & mali succi sunt. Potius vero ad victus rationem omnem curam transtulit.* Cui consentit CELSVS, qui scribit, *optima medicina est non uti medicina, seu uti WEPFERRVS dicere solitus est, nullum medicamentum optimum.* Et HIPPOCRATES *sect. II. act. 37. qui secunda fruuntur sanitate, hos purgare graue est.* Item *sect. II. aph. 37. Qui sunt sano corpore, dum pharmacis purgantur, celeriter exsoluuntur.* Et optime GALENVS in *Comment. §. 15. lib. 3. frequenter medicamentis uti non conuenit, dum, quia corpus in prauam consuetudinem adducitur, dum quia nocet plurimum. Si victus rationem mutaueris, plurimum proderit illi, qui tam sæpe euacuare velit & euacuatio eorum, quæ quotidie generantur, minor est, quam ut requiratur medicamentum purgans.*

22. ABSTINENDVM itaque est a crebro purgantium, præsertim validiorum usu, quæ nulli subiecto, nulli morbo ullique ætati congrua sunt, infirmum corpus magis infirmant, sanum vero & robustum labefactant, inque primis ventriculi & intestinorum tonum ac robur exsoluunt. Huic sententiæ omnes circumspicientes medici suffragium adiicere debent. Placet inter plurimos citare PLEMPIVM *lib. de valetudine tuenda pag. 325.* qui ita scribit: vomitum & alui subductiones quæ pharmacis fiunt, ut mala solatia repletionis, nisi gravis exigat necessitas, non oportet experiri, quod tamen vulgus hominum facit, qui ipsum corpus explet, ut possit evacuare, & rursus euacuat, ut possit explere. Optime IOHANNES CRATO in *Consil. 25.* Qui rectam victus rationem tenere nequeunt, iis optimam medicinam præscribere superuacaneum est; nam omnia prius ad valetudinem rectam consequendam tentanda sunt, quam corpus medicamentis laboriose commouendum. Equidem veteres ad sanitatem integram seruandam & morbos a corpore arcendos vernaes & autumnales curas, quæ in venæsectione & euacuationibus per tempus continuatis consistebant, plurimum laudare solent. Neque talismodi curæ de nihilo sunt, attamen & illis penitus supersedere possemus, modo abstinencia, corporisque motu ac labore uti vellemus, quæ superfluos corporis succos longe tutius consumunt atque in vigore sanitatem conseruant, quam prædictæ sanguinis & humorum euacuationes. Nostra sententia circa hanc rem hæc est, plures hominum ob cruditates neque minus superfluos in venis succos, quæ vitia ex intermissione motus ciborum intemperantia quam maxime homines sibi contrahunt, multa in mala incidere, secundamque valetudinem amittere: quorum optima essent abstinencia & motus præsidia. Quod si vero saluberrimis diæteticis præceptis sese submittere nolunt, tunc denique, ubi desinit victus, ibi incipit medicina, & tunc venæsectiones & lenes per epicrisin factæ euacuationes, valde proficient. Neque ad harum usum fiderum aspectus consulere aut certos dies eligere oportet, sed quando necessitas

vrget

vrget & æquabilis aëris & coeli status apparet, sunt opportunissimæ.

23. NEQVE adeo adeo omnia medicamenta præseruationis causa adhibita reiicere animus est, sed repudiamus saltem validiora nimiumque motus alterantia, laudamus vero maximopere ea, quæ naturæ sunt amica, quæ corporis vires roborant, & liberam transpirationem, vtilissimasque euacuationes adiuuant, quo nomine salis volatilis oleosi, vel balsami nostri vitæ aut essentiæ stomachicæ, in ditioribus ambratæ vsum suademus. Item laudamus frequentem infusorum melissæ, veronicæ, corticis sassafras aut aliorum simplicium ex aqua pura & simplici vsum: hæc enim remedia eius sunt naturæ & indolis, vt neglectum corporis motum compensent. Vtui quoque esse possunt cancerorum lapides, si intemperantia acidorum succorum intra primas vias obseruetur. Profunt quoque pilulæ balsamicæ ex extractis amaricantibus & balsamicis temperatis gummatibus paratæ, has valde refracta dosis aloë ingrediatur, laudatissimæ, quæ præeunte BECCHERO, HERMANNO ac STAHLIO, præparantur & passim cum fructu vsurpantur, quibus, præsentē in primis viis cruditate, vel coaceruata ibi viscidorum humorum saburra, cum fructu vel singulis mensibus, vel, urgente necessitate, crebrius vten-
dum est. Pauca certe sunt eaque selecta & tuta ex
remediorum generibus, quibus ad tutelam vitæ
& sanitatis vti necessarium est.



DISSERTATIO IV.

DE

DIÆTÆ VITIO MVLTORVM MORBORVM CAUSA.

§. I.

MOrbos partim ex diætis, partim ex spiritu, quem attrahentes vivimus, fieri, præclare, admodum HIPPOCRATES *Lib. de nat. hum. §. 18.* edisserit. Etenim cuncta animantium corpora, ut vivant, nutriantur atque persistant, continuo opus habent triplici nutrimento, quorum primum est aer, alterum cibus, tertium potus. Sicut enim tria hæc elementa fluidum, solidum & humidum ad constitutionem omnium corporum, quæ in rerum natura consistunt, inuicem mixta contribuunt: ita etiam, ut corpus humanum conseruetur, nutriatur & vitales motus continuet, tenuissimo fluido, quod secundum HIPPOCRATEM mouet & impetum facit, deinde solido, quod structuram & firmitatem corpori adfert, tum humido, quod nutritionem præstat & perpetua in circulum abeunte progressionem, omnem corruptionem avertit, opus habet. Qua de causa nullus homo sine aere, sine cibo & sine potu vitam diu conseruare, vel sano ac integro corpore esse potest. Quum vero aer, neque minus esculenta & potulenta, tum ratione indolis & temperaturæ, tum ratione facultatum & virtutis, mirum inter se diffideant; hinc omnino medicum & naturæ consultum oportet scire, quænam ex hisce tam ratione copiarum quam ratione temperaturæ, corpori nostro congrua vel incongrua aut aliena sint, ne noceant vel detrimentum quoddam atque exitium adferant.

2. QVEMADMODVM vero magnum illud catholicum longe tenuissimum mouens, aer, quando intemperie delinquit, vel alienis inquinamentis contaminatus est, celeriter ac promississime nocet &, cum plures simul inuadat, acutas & populari-

lariter grassantes ægitudines inuehit : ita cibus ac potus, quoniam permanentem ac diutius inhærescentem corpori materiam suppeditat, gignendis chronicis morbis maxime pabulum subministrat. Igitur ad rem pertinet, horum proprietates & vitia nosse exactius.

3. EQVIDEM sanis omnia sunt sana, atque etiam nonnullos homines alimenta & copiosa & intemperata, sine vlla sanitatis offensa, ferre posse animaduertimus ; sed tamen, cum naturæ mirum inter se differant & vnum corpus altero robustius, altero sit imbecillius : hinc vtique alimentorum salubritas & insalubritas non in genere, vt indocti putant, sed secundum vires & naturam corporum æstimanda est. Quibus enim sanum & robustum corpus est, illi nec a copia, nec ab intemperie alimentorum facile offenduntur, eo, quod vigore motuum & nimium facile vincatur ac subigatur & superuacaneum debite excernatur : quod vero minus obtinet in infirmioribus, vbi & nimium & intemperatum subsistit & morbum facit. In medicina enim illud perpetuo seruandum & animo diligenter imprimendum est, quod nec medicamenta nec alimenta in se & sua natura proficua vel perniciofa censerī debeant, neque secundum suam actiuitatem, certum effectum semper habeant, sed demum bonam vel pravam operationem exserant, prout corpus ratione roboris solidorum, ac viarum & humorum conditione dispositum inueniant. Quo magis magnum illud paradoxon, homines quoad indiuidua raro, inter tot occurrentes morbosas causas, ægrotare, facillima ratione solui poterit, cum non vna causa, sed plures simul & naturales & non naturales ad morbum, velut effectum, concurrere debeant. Nostrium itaque iam erit, hæc paulo subtilius agitare & exponere, quomodo nempe & in quibus subiectis & quos morbos alimenta tam esculenta, quam potulenta inuehere ac producere possint.

4. QVEMADMODVM vero rectum est regula obliqui, ita ad sanitatem & integritatem corporis nostri, tanquam regulam

lam cibi & potionis insalubritas æstimanda erat. Vigor videlicet omnium corporis nostri actionum & sanitas in eo merito poni debet, ut primo alimenta adsumta in ventriculo ac intestinis probe digerantur & dissoluantur, atque utile ab inutili separetur, hoc vero excernatur; deinde ut utilis succus ad sanguinem delatus, probeque mixtus cum eo, libero ac moderato solidorum motu per omnes corporis meatus ac canales propellatur & per diuersa emunctoria alienum & superuacaneum excernatur, quo fit, ut non modo corpus bene nutriatur, sed & vigor omnibus actionibus accedat.

5. QVAPROPTER primo ea insalubria nobis dicuntur alimenta, quæ ventriculi & intestinorum virtutem ac motum peristalticum, quo alimentorum resolutio & superfluum egestio celebratur, labefactant vel destruunt. Deinde alimenta minus salubria ea censenda esse arbitramur, quæ sanguinis liberum per omnes meatus progressum ac transitum præpediunt & iuutilium atque superuacaneorum excretionem sufflaminant: hinc enim plethora, cruditates, obstructions, impuritates plurimorum morborum procreatrices resultant. Primum itaque quod attinet ad ciborum quantitatem, eam utique & naturæ inimicam esse & morbum facile proferre adserimus. Præclare enim non minus, quam vere HIPPOCRATES *Sect. II. aph. 4.* prodidit: *neque satietas neque aliud quidquam bonum est, quod naturæ modum excedit.* Et *aph. 17. Sect. II.* clarius id exprimit, cum ait: *ubi cibus præter naturam copiosior ingestus fuerit, morbum facit.* Et optime CELSVS *Lib. I. Cap. II. p. 25.* *ubi ad cibum ventum est, nunquam utilis est nimia satietas.* Recte itaque ciborum exsuperantia & nimia voracitas plurimorum morborum causa habetur: & pulchre FERNELIVS *in Patholog. Lib. I. Cap. XV. pag. 210.* perniciosam admodum sentinam, abdomen insaturabile appellat, quia omnium tum corporis, tum animi vitiorum fons atque origo est, ut non minus acute, quam facete intemperantia nutrix medicorum nominetur.

6. NEQUE vero tantum nimia ciborum copia sanitati officit, verum etiam, si quando nimia auiditate ingeritur. Laborant vero eiusmodi edendi intemperantia maxime pueri, adolescentes & iuuenes, qui adhuc nutritione opus habent; ex temperamentis, qui complexionis sanguineæ vel cholericæ sunt, maiori cum cupiditate cibos adsumunt, quam qui segnioris & phlegmaticæ indolis sunt. Qui ex morbo conualluerunt, ordinario magna edendi cupiditate feruntur & nimis propere stomachum ciborum mole obruunt. Simili intemperantiæ vitio laborant quoque ii, qui diutius inedia vel fame pressi fuerunt, siquidem, vbi ad cibos accedunt, eos in magna copia & ingenti auiditate, non paruo ipsorum damno, ingurgitant. Non minus noxia ad edendum appetentia subinde, qui chronicis morbis detinentur, ferri solent. Ita ex hypochondriacis pathematibus afflicti, febre quartana venati quoque, melancholici & phthisici plerumque edaciores sunt. Idem vitium quoque infantes, qui vermibus laborant vel convulsivis insultibus fatigantur, corripit. Tali vero casu perquam necessaria & utilis in praxi est observatio, quod huius generis morbi, quibus voracitas adiuncta est, difficillime medicina expugnentur, quia natura perpetuo nouo onere alimentorum premitur, vt eo minus contra vim & causam morbi insurgere eamque subigere possit. Tacemus, quod noua semper cruditas proueniens, nouum semper pabulum morbo subministret. Multum vero ad edendi intemperiem & voracitatem sola aduetudo contribuit, vnde, qui tribus vel quatuor vicibus die cibum sumere consueuerunt, ii hora instante vehementer esuriunt.

7. PLVRA vero & graua damna sunt, quæ ex nimio cibo & edendi auiditate corpori accedunt. Nam vbi cibi non bene masticatione comminuti & cum saliuâ permixti, descendunt in ventriculum, non sufficienter dissoluuntur, vnde crudus, nec satis digestus & attenuatus ad intestina fertur chylus, hinc vltiori ibi fermentationi resistens, flatibus mate-

(*Hoffm. Opusc. varii argumenti.*)

M

riam

riam præbet, vnde borborygmi, abdominis inflationes & tensiones variaque tormenta consequuntur.

8. IN imbecillioribus, & qui non multo tempore a morbo sanitatem receperunt, copiose & cum nimia cupiditate ingestus cibus in ventriculo semidigestus hæret, quem flatu implet, distendit, maximasque angustias & conatum ad vomendum efficit. Idem de puerperis sentiendum est, in quibus nimia cruditas adeo ventriculi robur peristalticum enervat, ut ponderis instar, cum misero aspectu faciei, premat & noctes insomnes faciat. Solet quoque multo crebrius in iis, qui modo e morbis & febribus conualuerunt, cibus male concoctus & crudus, lentore suo mucido, plicis & tunicis duodeni firmitus adhærescere & febris lentæ, stomachalis, cardialgiæ, icteri, flatuum, ructuum materiam & causam suggerere. Feminae tenerrimæ & sensibilibioris constitutionis grauidæ, vel quæ hysterice pathematibus patent, quando cibum copiose vel nimis auide deuorant, multas inde molestias, anxietates luunt ac patiuntur.

9. NOCET vero quam maxime avidissime exceptus cibus iis, qui enormes sanguinis profusiones passi sunt; ibi enim ventriculus, tono & robore destitutus, alimenta nec bene digerere, nec apte propellere potest, quare & cardialgiæ, angustia, anxietates, vertigines, dolores capitis & lenti calores subsequi solent. Vel si crudi succi nimium ad sanguinem & vasa feruntur, ob robur naturæ deperditum hinc inde fiunt stagnationes, decubitus, viscerum infarctus, inferiorum partium tumores & via ad cachexiam & morbos chronicos panditur. Periculosissime vero in copia & cum ardore deuoratus cibus nocet iis, qui in castris fame, assidua vigilia & nimio labore naturæ & ventriculi robur deperdiderunt; vnde non potest non corrupta alimentorum massa in infirmo corpore & humoribus in putredinem pronis, graues malignas febres sic dictas Hungaricas contagiosas progignere, quod sæpissime contingit, ubi milites ex castris in hibernis ad plenum victum accedunt.

10. PRÆTEREA tenerrimæ constitutionis infantibus copiosior lactis vel alimentorum ingestio admodum infensa est, utpote quæ nimium ventriculi tunicas distendendo, æstuationes, cardialgias, angustias & anxietates prouocat, a quibus malis egregie liberantur, quando ob sensibilitatem superfluum vomitu reiiciunt, quod sanitati infantum maxime proficit. Vbi vero natura languidior ac segnior est, lac coagulatum & crudum crustam villosam glutinoso suo lentore obstruit, glandulasque mesenterii tumidas reddit, unde atrophix, cachexix, & ingentis tensionis in abdomine fit origo. Nihil vero valetudinem in infantibus æque ac in adultioribus magis turbare solet, quam si aluo adstricta vel segnius procedente nimia lactis vel aliorum ciborum copia accipitur. Difficilius enim, ob vacillantem motum peristalticum, progreditur, sed in tenuibus subsistens, accessu aliorum humorum ex sanguine, corrumpitur & exæstuationibus febrilibus, ventriculi inflationibus, ructibus, in tenella vero ætate convulsionibus occasionem suppeditat. Nam quo liberior & minus obstructa est aluus, minus cibus ingestus incommodo est; sicut etiam contra, aluo diutius adstricta, omnis nimia satietas valde periculosa est. Nouimus aliquot exempla, ubi prægnantes, per aluum nihil reddentes, cibo paulo largius usæ, aliquoties iteratum abortum passæ fuerunt. Neque alia ratione, nisi demto cibo & facta aluo laxiore foetum retinuerunt.

11. PLVS vero periculi illud habet, quando cibi, etiam optime nutrientes & carniū alimentosa iuscula, cum vitello ouorum mixta, in continuis & acutis febribus, & maxime circa excretionem criticas, paulo largius exhibentur. Et, si quispiam in vitæ discrimen ægrum tali casu cibus coniicere potest, certe est alimentosus, eo quod cum naturæ sit oneri, eam in salutaribus excretionibus pessime turbet. Nocet vero quam maxime in acutis & malignis carniū esus, quandoquidem hæ facile putrescunt & sic vim morbi, cuius natura in putredine residet, augent. Neque etiam sine ratione

puerperis, quæ inprimis humoribus impuris scatent, carnosa diæta interdicitur. Et spectat huc HIPPOCRATIS aphorismus 10. Sect. 2. *corpora impura, quo magis nutriuæris, eo magis læseris.* Victus quoque lautus & plenus inimicus maxime est febribus, & ex tertiana simplici quam facile duplicem facit. Rectissime enim HIPPOCRATES Sect. VII. aph. 65. *Si quis febricitanti cibum dederit, quem sano exhibet, valenti robur, ægrotanti morbus fit.*

12. IN genere vero id obseruationem meretur, quod omnes valetudinarii & infirmi, item senes, facile a copia alimentorum, præsertim si prauis succi fuerint & promte in corruptionem abeant, lædantur. Siquidem hæc ipsa non modo placidum somnum impedit, sed & grauitatem corporis & capitis lassitudinem, catarrhum & dolorem in capite accersit. *Neque enim vlla causa, inquit, SANCTORIVS, Sect. IV. aph. 40. somnum magis interturbat, quam ciborum corruptela; id efficit sympathia, quæ est inter stomachum & cerebrum.* Non parum itaque refert scire, quinam homines imbecilli, quinam firmi & robusti sint. Qua de re optimam cautelam nobis reliquit Celsus Lib. II. Cap. XVIII. *imbecilli homines rebus infirmis opus habent, mediocriter firmos media materia optime sustinet & robustis apta validissima est.*

13. VERVM enimvero non tantum cibus paulo copiosior & maiori auiditate, quam par est, sumtus, ventriculo & primis viis molestus varia procreat mala, sed & cibus optime nutriens & probe temperatus, qui aptissimam chyli & sanguinis materiam continet, ubi in copia sumitur, vniuersum corpus præter naturam multis grauibz & longis morbis pabulum præbendo afficit. Dicimus non sine ratione optimum cibum, hoc est, qui optimum & laudabilem præbet sanguinem, ea mala procreare. Iam uero quænam ex omni alimentorum classe optimum nutrimentum & laudabilem sanguinem generent, intuebimur. Inter hæc vero primum merito locum obtinent carnes iuniorum animantium, caro vitulina, bouina, agnina. Omnes enim hæ carnes coctione succum gelatino-

tinofum reddunt, qui proxima sanguinis est materia. Quid enim aliud optime temperatus sanguis est, quam gelatina occluso & continuo calore rubedine tincta? quid aliud est is succus, qui solidas vniuersi corporis nostri partes nutrit, quam gelatina, in quam etiam animantium partes, vel durissimæ, ossa & cornua longiori demum coctione resolvuntur & manet hoc loco id verum, in quod quid resolvitur, ex eo etiam constat. Secundum locum inter alimenta, quæ bonum suggerunt sanguinem & optime nutriunt, frumenta & panificia sibi vindicant. Est enim ea natura ac indoles omnium seminum, ut temperie gaudeant, dum ex partibus terreis, subtilioribus, mucidis & oleoso sulphureis probe mixta sunt, unde cum aqueo liquore trita & cocta ac emulsa albidum instar lactis liquorem constituunt. Quid vero aliud est chylus, quam lac, quo nihil ad alendum est præstantius. Ex quibus intelligi potest, plus alimenti esse in pane, quam in ullo alio, quare etiam solo pane & aqua vivere & sanus homo esse potest. Panis enim, qui ex seminibus tritici, filiginis vel hordei conficitur, cum aqua in emulsionem siue optime temperatum chylum faceffit. Denique & ipsum lac animantium optime nutrit, corporaque robusta reddit, quemadmodum videmus in quibusdam firmis Helvetiæ populis, qui solo lacte vescuntur. Huic postea illa, quæ ex lacte parantur, ut butyrum & caseus succedunt, quæ cum pane mixta robur membris adferunt; eiusdem quoque generis sunt oua volucrum sordilia fluida, quæ ex optima alibili materia animantium constant. Imbecillius vero nutrimentum pisces omnis generis & ex vegetabilibus olera, radices, bulbi & herbæ continent.

14. EQVIDEM hæc omnia probe digesta & subacta in ventriculo sanguinem bonum & laudabilem ingenerant. Attamen si is abundantior, ex nimis largo & lauto victu, redditus fuerit, quantum noceat, exprimere vix possumus. Nam eius copia fibras motrices cordis & vasorum admodum distendit eorumque robur, tonum ac systolen debilitat atque infrigit, quominus expedite & promte liquoris vitalis per vniuersi

corporis tubulos fiat cursus, quo imminuto inutilium partium secretio & excretio tardior quoque fiat necesse est. Quapropter decrescente solidorum pulsu ac impulsu, corporis nativus calor, secundum veterum sententiam, quasi suffocatur, quemadmodum flamma lucernæ a multo oleo opprimitur. Decrescente quoque impulsu sanguinis & humorum conueniens fluiditas ac tenuitas decrescit, hinc spissiores ac crassiores facti, meatus viscerum obstruunt, viasque comprimunt, unde, emunctoriorum tubulis clausis, impurum in sanguine remanet. Tum minore facto solidorum impulsu, sanguis in excrementitias partes, serum nempe falso-sulphureum minus per calorem resoluitur, sed potius ingens sanguinis & humorum in vasculoso genere fit accumulatio, qui status & habitus corporis nunquam tutus, sed suspectus & iuxta *aph. 3. Sect. I.* sine mora soluendus est. Pulchre admodum verissime hanc in rem CELSVS *Cap. II. Lib. II.* scribit. *Si plenior aliquis & speciosior & coloratior factus est, suspecta habere bona sua debet, quæ quia neque in eodem habitu subsistere neque ultra progredi possunt, fere retro quasi ruina quadam reuoluuntur.*

15. ILLVD autem magis attinet scire, non æque & promiscue in omnibus tam facile bonum & laudabilem sanguinem redundare, sed hoc ipsum magis fieri in iis, qui habitu spongioso & laxiori præditi sunt, venas obtinent copiosas & angustas, temperamento sunt sanguinei, vitæ sunt otiosæ & animi tranquilli, vino & spirituosis liquoribus delectantur. Neque ignorare oportet, feminas semper alendo copiosiori sanguini plus esse idoneas, quam viros. Signa vero sunt repletionis ac nimix sanguinis redundantix, quando non modo habitus corporis turget, facies apparet colorata, sed & vasa, præsertim in partibus inferioribus, sanguine sunt distenta & inflata, & si quando motu corpus exercent, facile delassantur inque adscensu difficulter spirant. In quibusdam pruritus, præsertim in pedibus excitatur. Neque vero semper in plethoricis facies rubet, quod tantum in sanguineis euenit, sed macilentiores sæpenumero faciem habent minus coloratam,
vasa

vasa tamen valde sanguine distenta, quæ ideo principale repletionis signum exhibent. Nil vero plus ad generationem superflui sanguinis facit, quam quies seu motuum consuetorum intermissio, præclara enim sunt, quæ hac de re HIPPOCRATES *Lib. 1. de diæta §. 1.* perhibet: *homo edens sanus esse non potest, nisi etiam laboret, contrarias enim inter se vires habent cibi & labores, labores enim ea, quæ insunt, consumere solent, cibi autem & potus ea, quæ euacuata sunt, explent*, siquidem omnis motus & exercitatio corporis celeriores sanguinis per vasa efficit cursum & iter, unde fortior fit calor, quo magis illud, quod est gelatinosum in sanguine, in excrementitium serum dissoluitur. Etenim quam celeriter & vehementer auctus calor succos & pinguedinem corporis nostri consumere & obesos graciles reddere possit, febris continua documento esse potest.

16. Ex copia vero alimentorum sanguinis facta abundantia eos maxime fouet ac sustentat morbos, quos a plethora proficisci in peculiari dissertatione *de ortu & causis morborum* exposuimus. Sunt vero ii morbi, qui ex plethora nascuntur, partim a spasmò & inæquali sanguinis circulo, partim ab atonia & a sanguinis stagnatione deriuandi. In corporibus videlicet agilioris naturæ iuuenibus & temperamentis sanguineo-cholericis sanguinis copia subsistens in abdominis visceribus, ad quæ portæ vena pertingit, facit fortiores stricture, quæ illum cum impetu in pueris & adolescentibus ad caput, unde narium hæmorrhagiæ: in iuuenibus ad pectus, unde hæmoptyses & anxietates & difficiles respirationes: ad ventriculi regionem, anxietates & quandoque cruentæ vomitiones vel ad vterum, unde menstruæ purgationes: in adultioribus viris ad anum, unde hæmorrhoides: in senioribus ad renes, hinc mictiones cruentæ proueniunt, pellunt. At si corpus propter male succedentes has salutare excretionem a superuacuo sanguine non liberatur; tunc ipse decumbens, pro varietate locorum, molestissimas stagnationes, stases, dolores & inde subnascentes graues passionem concitat. Igitur in capite fi-

unt

unt exinde intolerabiles cephalalgia & hemicrania, melancholia, in eius partibus exterioribus ophthalmia, odontalgia, dolores & tumores rheumatici, erysipelacei, otalgia: in pectore, si serosioris constitutionis homines fuerint, tusses & asthma humida, rheumatica scapularum adflictiones, pleuritides spuria, in sanguineis & cholericis pleuritides, peripneumonia, oppressiones pectoris, cordis palpitationes, in regione ventriculi præcordiorum constrictiones, anxietates, flatulentia, cardialgia: in abdomine, colica conuulsua, alui adstrictiones & huius generis plura.

17. IN corporibus vero humidioribus & quæ naturæ obtusioris & segnioris sunt, succorum & sanguinis redundantia, in ætate senili affectus soporosos, paralyfes, hemiplexias parit; in ætate vero iuuenili, ab anno vigesimo primo ad annum trigessimum quintum, præsertim in sanguineis & qui habitus corporis sunt spongiosi in pectore phthises, tabes, apostemata, abscessus, vomicas, exulcerationes, chronicas tusses, hecticas producit. At si copia sanguinis in abdominis visceribus stagnat eaque infarcit, multos graves & longos morbos progenerat, siquidem ex hepate obstructo, infarcto & indurato icterus flavus & niger, cachexia, leucophlegmatia, & hydropes fluunt. Ex liene simili modo se habente ingentes eius tumores, atrophia, vomitiones cruenta & sanguinis nigri per alvum eiectiones, quas atræ bilis nomine antiquitas venditavit, suboriuntur. In utero si subsistit, nec purgatur bene copiosus sanguis polyposas in vasis maioribus efformat concretiones, quæ ad frequentes abortiones aditum præparant. Solent vero huius generis prava accidentia facile contingere in iis, quibus solennes & alias consuetæ a natura factæ salutaris sanguinis excretionis subsistunt, cessant ac deficient: vel iis, qui sanguinis adsuetas missiones per venarum sectiones, scarificationes maxime proficuas multo iam tempore intermiserunt, victum tamen & viuendi rationem non mutarunt. Quocirca in periculoso admodum & ad morbos graues procliu statu femina, quibus ordinarii menses deficient vel quinquagenaria,

nariæ, quando plane quiescunt, versantur, atque viri, quibus olim fluentes hæmorrhoides non amplius feruntur, simili periculo expositi sunt.

18. GRAVIDÆ, quia in statu plethorico atque etiam cacochymico consistunt, ex cessante sanguinis per vterum evacuatione pluribus, ut notum est, patent affectibus, qui nullam aliam habent originem, quam, quod nimis abundans in vasis sanguis hinc inde varias congestiones & decubitus efficiat. Qui status tanto peior redditur, quanto plus gulæ & abdomini indulgent, corpus motu non exercent & aluo dura ac obstructa laborant: præsertim si corpus habitudinis fuerit laxæ & spongiosæ. Ex quibus omnibus intelligi potest, quantum corpori noceat cibus etiam optimus in copia adsumtus, quomodo ille plethoram, foecundissimam morborum matrem, procreet & qua ratione plethoricus status, lauto & copioso victu continuato, semper in deterius, non sine sanitatis & vitæ periculo, collabatur.

19. PLVRA itaque mala sunt, quæ ex ciborum & succorum abundantia in corpus humanum redundant: illud vero quam maxime adhuc debet considerari, quod status plethoricus omnibus ferme morbis addat perniciem, atque difficiliorem, nisi mature solvatur, efficiat curationem. Graues animi affectus in corporibus, quæ plurimum sanguinis alunt, non parum habent periculi, eo quod accumulatus & cum vehementia ad quædam loca propulsus, profundas stases vel, quod peius, vasorum rupturas de facili funestas producit; qua de causa etiam acre frigus plethoricis est inimicissimum. Dein attenta & diligenti constat observatione plus sanguine copioso præditos malis epidemicis esse obnoxios, quam vltimos alios, quare ad grassantes febres suscipiendas valde sunt idonei, eo, quod insensibilis transpiratio læsa, grauiorem noxam eorum succis, ipsique digestionis primarum viarum adfricet.

20. NEQVE vero duntaxat optimus & copiose sumtus cibus nocet, sed quam maxime is, qui temperie destituitur,
(*Hoffm. Opusc. varii argumenti.*) N qua

qua mirifice per omnia natura gaudet, siquidem ad succum, qui nos generat, & qui nos nutrit, & partes corporis nostri constituit, nihil intemperati, nihil excessiui accedere debet, sed omnia, quæ eminenti facultate ac intemperie donata sunt, e corpore, si in id admissa fuerint, debent excludi. Equidem corpori humano tametsi multa insint & amara & falsa & dulcia, attamen ubi temperamentum hæc inter se habuerint moderatum tum facultate, tum copia, & ubi maxime fuerint permixta, tunc sanus est homo; egrotat autem, dum horum quid minus aut amplius sit, aut separatur in corpore & non fuerit reliquis omnibus contemperatum, sicuti præclare & scite loquitur HIPPOCRETES *Lib. de Nat. hum. §. 6.* Quare etiam cibi ingesti nobis incommodi sunt & intemperati nos lædunt, ut sunt nimis amari, falsi acidi, quemadmodum grauitur, idem auctor non minus ac vere *Lib. de vet. Medic. §. 24. & 25.* docet. Et, ut paucis rem explicemus: sicuti in genere omne excessiuum; tam copia, quam qualitate: ita etiam alimentum corpori nostro est inimicum.

21. Si quis vero secundum tres morborum classes, quas in superioribus adduximus, alimenta dispescere velit; non multum errabit. Videntur enim mihi quædam vel nimia tenuitate partium sulphurearum & calidarum excedere, alia vero salino, acri & acido exsuperanti elemento partes nervosas & fibras corporis plus iusto adficere, alia porro nimis compacta, immobili & terrestri substantia humorum fluiditati & progressioni aduersari. Quæ sunt generis primi, ad omnium febrium & caloris, qui præter naturam fit, generationem, multum facere videntur, ut sunt potus vinosi, spirituosæ aquæ sic dictæ vitæ, cibi nimium aromatibus, pipere, zingibere conditi. Alterius generis ea sunt, quæ fibrarum spasmos prouocant, vel dissolutionem continui inferunt, ut sunt cibi nimis sale conditi, omniaque acida, acria, allio accepis condita. Tertii generis sunt, quæ crassum generant sanguinem, minimosque canales ac meatus obstruunt, qualia sunt frumenta, legumina, ut fabæ, pisa, lentes, grana milii, omnes

omnes marini pisces & cibi duri ac valde glutinosi. Denique solidorum relaxationem & robur deperdunt valde refrigerantia, crudis quæ succis abundant, vt sunt omnes fructus horæi, cucumeres, melones, mala persica, ficus, vuæ, cucurbitæ, omniaque dulcia & quæ facile fermentescunt; & hæc morbos ex imbecillitate toni & roboris prouenientes eximie fouent atque sustentant.

22. MAXIME vero omnium quoad alimentorum intemperiem respiciendum esse arbitror, primo ad ventriculi & intestinorum tonum & motum peristalticum, deinde ad sanguinis progressum & circulum, indeque dependentes salutiferas excretiones. Nam quicumque cibi vel potiones ventriculum eiusque tonum & intestinorum robur lædunt ac destruunt, & quicumque porro sanguinis liberum progressum atque inutilium rerum excretionem remorantur: ea non tantum intemperata, sed & noxia censenda esse arbitror. Quapropter in alimentorum salubritate & insalubritate cognoscenda plus ad motum, quam ad materiam respiciendum esse existimauerim. Nam humorum circulo saluo & incolumi, & vigentibus excretionibus, nec quicquam intemperati facile nocet, quia secedit atque corpore expellitur.

23. Ex vniuersa vero alimentorum classe nec vllum mihi videtur naturæ plus inimicum, & quod primarum viarum virtuti ac tono magis aduersum sit, vitales motus ac excretiones magis turbando, quam excessiuum acidum. Primo enim hoc ipsum in copia ingestum chyli elaborationem, quando particulas mucidas & oleosas præcipitat, impedit: deinde nihil tam promte coagulum sanguini & gelatinosis succis infert, quam acidum; quare ad obstructions viscerum atque humorum stagnationem multum omnino facit, eo, quod excessiue acidum valde retardat excretiones, vasa ac poros angustando, fibrasque constringendo. Quin etiam nihil æque acrimoniam bilis, quæ secundum naturam aluum stimulat, obtundit ac intestinales tunicas constringit, ac acidum, quod cum partibus ciborum terrestrioribus mixtum,

austeram indolem acquirit. Neque, quod ad calculi tam renalis & vesicæ, quam eius, qui in cystide fellea & ductibus hepaticis reperitur, nec non ad tophorum inter articulos generationem aptius existat, quam acidum, reperio: quia ferme omnis concretionis tartareæ in corpore nostro causa est. Ulterius, quid partibus neruosis & membranosis ipso acido inimicius esse potest, quando tenerrimas earum fibras ad stricturas & crispaturas spasmodicas ac dolores disponit. Qui fonticulos in artubus gerunt, mox ab adsumto acido dolorem persentiunt. Nutrices, quæ acidis delectantur, lac habent, quod facile tormina in infantibus suscitât.

24. Igitur acidorum abusus vel maxime ad morbos chronicos, ad spasmos, ad infarctus viscerum disponit & solennes sanguinis per menses aut hæmorrhoides, quæ saluti & præsidio corpori sunt, vacuationes intercipit. Experiuntur id fere in dies feminæ, quæ nimium acetosis & acetariis delectari solent, ut etiam acetum quandoque sæpius maximo suo periculo hauriant, quando in graues spasticas passiones incidunt. Et plerumque feminæ, instituto morborum scrutinio, fateri coguntur, se prima adolescentia vel etiam postea nimium acidis cibus indulgisse. Simili ratione in viris hypochondriaca affectio ex nimis acida & crassa diætâ atque intermisso motu corporis ac intempestiua animi fatigatione incunabula sua agnoscit; & nihil æque hypochondriacos offendere, quam acidum, vsus ac experientia, omni futile speculatione superior, docet. Noui quosdam, qui a continuato acidorum vinorum abusu hypochondriacum malum sibi contraxerunt, tunicis intestinorum ab acido excessiuo adeo corrolis, ut continuæ alui deiectiones cum torminibus & flatulentiis eos nunquam non fatigarent: igitur & acidum exsuperans hypochondriacam affectionem progignit; eiusque symptomata acerbiora reddit. Et notabile est, quod omnis generis etiam plane insipida alimenta in hypochondriacorum ventriculo acescant, tum, quod primarum viarum fermentalis succus acidissima celeri fermentatione non spirituosum, sed

sed acidum reddat chylum, tum, quod, ob alui officium retardatum, ingestorum massa diuturna mora fortem acorem contrahat.

25. SOLET vero quam maxime acidum, prima in regione diutius oberrans, capiti esse noxium. Qua de re cum egregius locus apud MARTIANVM in HIPPOCRATEM pag. 382. exstet, placet ipsum inferere: *acidum in ventriculo existens vapores acres huc & illuc diffundit, quotidie observatur in iis, quibus acetum non est conueniens, quemadmodum etiam in illis, in quorum ventriculo cibi acescunt. Nam communiter talibus caput dolet, propter cerebri membranas, quæ ab acetoso vapore punguntur, idque huius humoris adeo proprium est, ut raro caput per consensum a ventriculo dolere inuenias, quin acetosa in eo consistant; & qui epilepticis motibus sunt subiecti, symptomatibus hisce corripuntur, cum acetosa in ventriculo peccant: ita enim vomitiones subsequentes palam faciunt. Et ego observavi, quamplurimos podagricos ab eadem causa a doloribus corripri consuevisse, liberatosque aut saltem mitigatos, ubi acetosa euomuisent, taceo mulieres cum variis uteri symptomatibus conflictatas, quæ a vomitu acetosorum e vestigio liberabantur.*

26. SOLET vero acidum magna in copia primis in viis generari, primo ex nimio usu acetariorum, dein ex potu liberaliori vinorum, quæ multum acidi tartarei principii secum ferunt, ut sunt Rhenana, Mosellana, Franconica & Thuringica. Tum quoque frequentior fructuum horæorum usus, ut prunorum, fragorum, ribium, berberum, persicorum, malorum, pirorum, vuarum copiosissimum acidum, tam in primam regionem, quam in ipsum sanguinem inuehit, siquidem hæc ipsa eminens acidum secum habent, quod maxime per fermentationem, quam in ventriculo subeunt, longe fit fortius. Id vero ructus, vomitus acidissimi, torsiones ventriculi & intestinorum, & albicantes feces satis manifesto produnt. Accidit vero non raro a dulcibus & fructibus nimia copia ingestis, ex occurso bilis acris, præsertim in cholericis, fermentatione adiuuante, tam corrosiuam & causticam acredinem

in ventriculo eique annexis intestinis generari, vt cholericæ inde passio siue creberrima sursum & deorsum deiectione cum periculo funestæ ventriculi inflammationis resultet. Quoniam vero ab adsumto acido tanta sæpius noxa obseruata fuit & contra ab iis, quæ substantia alcalina illud plane inuertunt atque exstinguunt, præsentissimum auxilium secutum fuit: hinc plures medicorum nostris temporibus eo processerunt, vt ab acido exsuperante & variis vitiis inquinato ferme omnium morborum causas deducere ac deriuare annisi fuerint. Alii vero, cum animaduernerent nonnullos hominum, præsertim cholericæ constitutionis & vina acida & cibos aceto conditos & fructus horæos refrigerantes & subacidos impune ferre posse, omne acidum plane insons & morbis inferendis minus idoneum nimis propere declararunt: ita semper, proh dolor! in medicina ab vno extremo in alterum dilabimur. Nos vero in hisce dirimendis asserimus: omnino acidum & sua natura corpori nostro maxime esse infensum, dum fluidos humores facile coagulat, poros constringit, vt viscerum obstructions, excretionum retardationes & pessimæ impuritates inde proueniant. Multo magis vero hoc ad noxam inferendam idoneum est, si phlegmatici & melancholici, & qui corpus motu non exercent & spongiosæ carnis sunt, illud nimium assumant. Vbi vero motu sanguinis tam intestino, quam progressivo intensiori, copia partium sulphurearum & biliosarum in sanguine est, corpus quoque iuuenile & motibus ac laboribus aduetum: tum utique acidum non tam facile nocebit, vt potius ad refrenandum nimium calorem medicinam præbeat. Atque adeo nihil perpetuum est in medicina, quod non respectu indiuiduorum & circumstantiarum sit discernendum.

27. CONSIDERATIS ac præuisis iam iis vitiis, quæ ex intempestiuo acidorum usu in corpus nostrum redundant, nunc descendimus ad victum nimis durum, crassum, falsum, quo non modo ex leguminibus panem grossiorem, fabas, pisa, lentes, milium & quodcunque valentissimum habet alimentum,

tum, sed & omnes carnes sale conditas, induratas & infumatas, præsertim pisces marinos, comprehendimus. Duplici vero ratione is victus peccare videtur, primo propter copiam salis, deinde propter compactam, duriores, qua eiusmodi alimenta prædita sunt, substantiam. Equidem sal commune carniū & ciborum optimum est condimentum, quando eorum digestionem egregie adiuuat, neque minus moderato suo stimulo omnis generis excretiones promouet: attamen ubi nimia quantitate sumitur corpori non potest non esse hostile, siquidem nullum sal sanguinis vel partium solidarum corporis nostri principia constitutiva ingreditur, sed potius omne adsumtum rursus emunctoria subire & per aluum, sudorem, urinam penitus & plane debet excerni: id quod si minus obtingit, sed remanens vitales succos & maxime lympham temperatam & dulcem collutulat; tunc & humorum vitium & fibrarum læsio consequitur. Qua de causa, qui nimium salitis vescuntur, neque ea per emunctoria aperta conuenienter reiciunt; in falsas defluxiones, rheumatismos, dolores artuum & cutis exulcerationes, pustulas, vlcera, scabiem, herpetem, lepram perquam facile incidunt.

28. LONGE magis vero sal nocumentum adfert corpori nostro, quando eius copia cum cibis duris, crassi & visceri succi, quos supra commemorauimus, ingeritur, utpote hi, generando crassum sanguinem & serum, viscerum obstructioni multum velificantur. Nam facto impeditiore sanguinis & humorum per vasa cursu atque itinere, & obstructis excretoriis vasculis, multæ excrementitiæ sordes salino-sulphuræ impuræ in succis remanent, quibus successiue & tota humorum massa inficitur, & solidorum textura læditur atque destruitur. Et hac ratione fit origo pessimi istius, septentrionalibus maxime regionibus & maritimis locis proprii & endemii, mali scorbutici, cuius tanta est tyrannis, ut non tantum plures nationes adoriatur, sed ita corpus omnesque eius partes destruat, ut vix vna salua ac integra suo munere recte defungi possit. Fouetur autem quam maxime a victu eiusmodi

modi duro, crasso, salino, coelo denso & humido, præcipue si corpora motu ac exercitatione carent & insuper spongiosi fuerint habitus. Memoratu dignum est, quod in hoc malo sanguinis etiam color mutetur, utpote qui plumbeus & viridis solet esse, si e vena dimittitur, quod teste *EVGALENO de scorbuto* certum huius morbi, etiam plebis iudicio, solet esse indicium, & quod obseruatur in omnibus crassiori cibo vtentibus & qui cum hoc morbo diutius sunt conflictati.

29. *MVLTVM* quoque ad impuritatem sanguinis & humorum augendam facit creber vsus carnis suillæ, tam recentis, quam sale conditæ. Etenim caro suilla, licet sapidissima, non facile tamen sine noxa adsumitur propter glutinosam ac viscidam, qua pollet, substantiam, qua facile nostræ carni adsimilatur & nimium nutrit ac poros occludit. Nam constanter, qui humanas carnes inscien-ter gustarunt, referunt, quod porcinas sapore fuisse putauerint, vt habet *FONSECA de sanitate tuenda pag. 45.* Solet quoque perspiratio, testis *SANCTORIO*, ab esu carnis suillæ impeditior fieri & omnes, qui vel vlcus vel vulnus in parte quadam solida habent, huius carnis noxam mox percipere possunt. Sicuti vero & caro suilla & omnis dura, crassa & salsa diætâ maxime nocet iis, qui vitæ sedentariæ sunt addicti, parum bibunt, frigido aeri corpus obiciunt: ita eiusmodi diætâ iis, qui ipsi adsu-eti sunt ventriculum habent robustum & labore corpus valide exercent atque humidum congruum debita in quantitate sumunt, minus infensa est, vt potius corpora duriora ac robustiora reddat.

30. *QVIA* vero ex cibo valde viscido, glutinoso ac duro eiusdem naturæ, nempe firmioris, sanguis generatur, hinc non duntaxat illos, qui ex obstructione emunctoriorum & impuritate proueniunt, morbos fouet, sed & ad graues & profundas inflammationes seu stases sanguinis, præsertim peripneumonias disponit, quibus hac de causa septentrionales populi & maritima loca incolentes & qui duro hoc victu & pane grossiori gaudent, valde sunt obnoxii. Tandem etiam ad glutinosum sanguinem & qui obstructionibus & morbis ex
 impu-

impuritate fauent, multum faciunt cibi farinacei ex farina similaginea, triticea, ouis, saccharo, butyro præparati. Ii tametsi palato grati atque accepti sint, nihilominus ad obstructions & infarctus viscerum, & inde consequentes morbos multum contribuunt. Exstat hanc in rem egregius locus apud SIMON PAVLI *in quadripartito botanico pag. 483. in quotidiana*, inquit, *viçtus ratione*, qui assiduo similagineo pane vescuntur, nec corpus laboribus validoque opere aliquo exercent, parum sibi consulunt, nam, cum palato morem gerunt, in varios morbos incurrunt, confestim enim illis iecur & lien obstruitur, nephriticisque doloribus corripuntur, propter similem lentorem & dulcedinem, quibus confusaneus panis magis conducit, ob furfuris enim miscelam minus obstruit, faciliusque per alvum secedit atque hæc est una ex præcipuis causis, cur ditiores & magnates assiduis calculi & podagræ doloribus vivant obnoxii. Ceterum memorandum hoc loco est, quod panis calidus ex furno extractus & deuoratus multum detrimenti adferat & nouimus quasdam feminas exinde flatulentas ventriculi & abdominis tensiones, vt hypochondriacas & hystericas crederes, fuisse consecutas. Et SIMON PAVLI *l. c.* meminit feminæ, quæ vix horæ spatio post lipothymia corripiebatur, dyspnœa & tandem intra octiduum orthopnœa fuit iugulata.

31. INTER hæc quæstio non minimi momenti occurrit: num dulcia, mellita, saccharata morbosa & corpori nostro inimica sint? nostra hac de re sic fert sententia, quod sicuti sanis omnia sunt sana, sic quando ipsos dulcia non tam facile lædunt, sed per congrua euacuatoria rursus e corpore expelluntur, infontia sint. Aliter vero sese res habet cum corporibus infirmis, & quorum ventriculus ac digestio vitio laborat & primæ sic dictæ viæ viscidis ac tenacibus humoribus repletæ sunt, vt ingens ibi fermentatio & acescentia reperiat: vbi hæc ipsa nunquam vtilia, sed potius summe noxia obseruantur. In infantibus, quæ dulcia sunt, generationi & nutritioni vermium admodum fauent, &, quod serum vitio-

(Hoffm. Opusc. varii argumenti.)

O

sum

sum reddant, vel ex eo intelligi potest, quod a nimio dulcium usu dentes facile nigredinem & cariem contrahant. Præter ea experientia clarum est, quod dulcia ieiuno sumta ventriculo, appetitum destruant & vim digestionis infringant, manifesto documento succum illum fermentalem & menstruaalem, qui alimentorum texturam intime soluit, horum efficacia multum debilitari. Et quod ventriculi ac intestinorum tonum dulcia soluere ac relaxare soleant, ex eo cognoscitur, quod non tantum a nimio eclegmatum & pectoralium dulcium usu sensus grauitatis in ventriculi regione enascatur, sed & alius nimis laxa ac fluida reddatur. Quapropter experientia non minus quam ratione suffultus CELSVS *Lib. II. Cap. XXV. & XXVI.* prædulcia, mel quoque, mulsum & mustum inter ea, quæ inflant, & quæ stomacho aliena sunt, refert. Deinde cum omnia dulcia facile, vt notum est, in fermentationem abeant, hinc supra modum nocere solent iis, in quorum ventriculo acris & in acorem degenerans alimentorum fermentatio viget, vt fit in hypochondriacis & qui sunt alui adstrictioris, vbi omnia fere ingesta in liquamen acidum & corrosiuum conuertuntur. Quare illis dulcia nunquam conuenire experientia indies comperimus, dum acidum semper ab horum usu primis viis augetur, interdum non sine cholericæ passionis metu atque periculo. Tum dulcium etiam excessus visceribus non adeo amicus est, vnde CELSVS *Lib. IV. Cap. IX.* omnia dulcia inimica lienosis pronuntiat. Et ORIBASIVS *Lib. IV. Cap. 23.* auctor est: omnia dulcia lienem & iecur obruere & scirrhum producere. Notum enim ex anatomicis est, quod hæc duo viscera ex innumeris capillaribus vasculis sint constructa, quæ facile a sanguine & sero tenaci & viscido coarctari & obstrui possunt. Iam vero dulcia, vbi in prima regione non mutata, salua sua textura ac substantia sanguinem subeunt, propter lentorem, quo constant, non possunt aliter, quin humores glutinosos & viscidos reddant. Quo magis corpora spongiosa, phlegmatica, atque motu & exercitatione vacua a dulcibus læduntur & ad viscerum infarctus,

etus, obstructions & chronicos morbos præparantur. Postremo illud vnicum adhuc est memorandum, quod in morbis pectoralibus ex abusu dulcium & eclegmatum, præsertim in phlegmaticis, ventriculi non minus, quam reliquorum viscerum tonus ita lædi possit, vt ex tussi humida & asthmate diuturno cachexia cum pedum tumore œdematoso, imo ipse hydrops possit produci.

32. IAM tractationis quoque ordo postulat, vt de lactiniis nostram exponamus sententiam, quatenus nempe ad morbos generandos concurrant. Lac alimentorum esse optimum & naturæ amicissimum vel ex eo colligi poterit, quod chylus, qui proxima materia sanguinis est, lac sit & lacte omnis generis animantia iuniora, etiam ipsi infantes, quam optime nutriantur & membra teneriora non modo inde nutrimentum, sed & primum robur accipiant. Solo quoque lactis vsu corpora firma ac robusta reddi & conseruari posse, non nulli Heluetiæ populi id suo exemplo nos docent, qui solo lacte vescuntur. At vero cum non omnium corporum siue naturarum eadem sit ratio, neque ventriculus eodem modo constitutus, lac vero facile in coagulum caseosum abire queat: hinc non omnibus etiam æque vtile est. Sicuti vero lac iis, qui nimis fluidos & salios habent humores, macilentis sunt, & vasa aperta habent, motu gaudent & febre carent, amicissimum est: ita omnibus repletis, pituitosis, viscerum obstructioni obnoxiiis, & qui ventriculi sunt imbecillioris & copiosum acidum in eo fouent, inimicissimum est. Et quoniam ex ventriculi vitio, eiusque ab acidis & corruptis humoribus infarctu, facile caput dolet, hinc rectissime HIPPOCRATES *Sect. V. aph. 64. Lac caput dolentibus & febricantibus & quibus præcordia murmurant, malum pronuntiat*, quocum conuenit ORIBASIVS *Lib. IV. Cap. XVIII.* dum ait: *lac in iis, qui frigido sunt ventriculo, acescit, in iis vero, qui calido sunt, in nidorem transit, ex quo fit vt febricitantibus noceat.* Idem *Lib. III. Cap. XXV.* testatur: *lac renes calculo obnoxios ledere & iecur in dispositis obstruere.* Quare AETIVS *Lib. II. Cap. XCI.* præclare monet, quod ii qui

O 2

lacte

lacte vti velint, latas debeant habere venas & apertos viscerum meatus. Nocet vero lactis vsus maxime iis, qui calculo tam renum, quam vesicæ laborant, quia caseosa, quam lac continet, materia ad calculi concretionem non parum contribuere videtur. Et quod de lacte dictum est, id quoque intelligi debet de vsu ovorum, quæ omnino sanis & robustis, & qui integrum habent ventriculum, optimum nutrimentum, si sorbilia fuerint, præbent: nocent vero quam maxime corporibus repletis & vbi ventriculus scatet corruptis, viscidis & acidis humoribus, vbi facile in corruptionem & coagulum abeunt, quare febricitantibus & hypochondriacis eorum vsus nunquam non malo & detrimento est. Et quemadmodum, secundum HIPPOCRATEM, *corpora impura quo magis nutriueris, eo magis læseris*: ita etiam ventriculum, quo magis nutriueris, eo magis læseris.

33. A cibis veniendum ad potum est, isque vel aqua vel cereuisia vel vinum est. Sicut vero & corpora ratione temperamenti, ratione climatis & coeli, quo viuunt, ratione ætatis & dispositionis ad morbos mirum differunt, ita etiam is vel ille potus magis vel minus ipsis conueniens est & corpus mutat in peius vel deterius. Multum tamen hic facere consuetudinem negari nullo modo potest, vtpote quæ, si subita ab vno potu ad alterum fit mutatio, corpori raro solet esse proficua; ceterum aqua est conuenientissimus omnium animantium potus, cavendum vero, ne dura, tephacea ac gravis in vsum trahatur, siquidem hæc & calculorum generationi & viscerum obstructioni multum lenocinatur, eo, quod difficilius progrediatur & facile in angustis meatibus stagnet. Obseruatum sæpius fuit, quod potus aquæ duræ & asperæ & animantibus & hominibus pernicialis fuerit, de qua militiæ dediti luculentum edere possunt testimonium. Sunt vero maximæ duræ aquæ infestæ visceribus inque primis lienoso & vasculoso visceri, in cuius minimis vasculis, vbi hæret & stagnat, quam facile totum viscus in ingentem tumorem attollit. Scrophulas maximæ molis a duris & asperis aquis incre-
scere

scere in certis montium tractibus, ubi tales fontes scaturiunt, constans est adsertio. Maxime vero omnium cauendum est a stagnantibus, paludosis, putridis aquis, quæ non modo exhalatione prava & maligna aerem inquinant, verum etiam gignendis putridis morbis ac febribus aptissimæ sunt.

34. Ex genere vinorum alia sunt vel dulcia vel acida vel valde spiritiosa. Vbi animaduertendum est, quod omnia dulcia plethoram augeant & pariori manu, ubi sanguis est exsuperans, danda sint; spiritiosa vero, dum nimium sanguinem & humores commouent, calorem accendunt & bilem acrem copiosam ingenerant, progignendis hæmorrhagiis, febribus ardentibus, biliosis, spasmodicis, doloribus, præsertim arthriticis, item conuulsionibus idonea sunt. Quæ vero subtile acidum tartareum fouent, vt Rhenana aliaque, morbis ex acido & viscido incrementum dant, vnde calculi, podagræ, hysterici & hypochondriaci mali generationem promouent, præsertim si iam fuerit ad hos morbos ingens in corpore dispositio, alias si corpora sunt sana & fluxilia, tum bene transeunt emunctoria, nec facile, nisi excessiua quantitate, nocent, vt potius chronicas, quæ ab infarctu viscerum fiunt, passiones, eorum vsus egregie auertat. Quæ vero sulphure vaporoso scatent vina, nervos debilitant, & ad omnes capitis morbos, torporem, somnolentiam, cephalalgiam, hemicraniam, paralyfin, epilepsiam viam præparant.

35. DE cereuisiis id tenendum est, quod quæ nimio lupulo infectæ sunt, caput feriant, dulces vero & non fermentatæ tonum relaxando flatibus torminibusque intestina distendant. Nimium vero alimentosæ plethoram adferunt, excretionem minuunt & viscerum ac præsertim pulmonum infarctibus fauent. At quæ valde sunt spiritiosæ, iis qui ad spasmos, dolores & febres sunt procliuës, minus conueniunt.

36. ILLVD vero in genere adhuc circa potum monendum est, quod eo frigido nihil ad morbos, eosque celeriter procurandos, sit præsentius, cum primis si corpus sudore diffluat & forti motu incaluerit, nihil enim tam cito abit in

sanguinem calidum, quam frigidum humidum, nihil etiam tam subito vascula viscerum obstruere & sanguinem ac serum in motu & circulo sistere idoneum est, quam frigidus. Et hinc verissime scribit CELSVS *Lib. I. pag. 28. illud nosse oportet, quod ex labore sudanti frigida potio sit perniciosissima, atque etiam, cum sudor se remisit, itinere fatigatis inutilis est.* Ex potu itaque frigido liberalius in corpus calidum admissio repente ventriculi ac intestinorum funestæ inflammationes & sphacelationes consequuntur, quæ vel cito vel lentiori gradu, nisi mature medicina succurramus, hominem inter necioni dant. Historias eorum, qui aquæ potu perierunt, legere possumus apud MARCELLVM DONATVM *Hist. mirab. Lib. IV. Cap. VI.* Et certe nihil frequentius in praxi occurrit, quam quod, si primam morbi originem paulo accuratiori cura inquiramus, grauissimæ chronicæ passiones, hæcticæ, phthises, cachexiæ, spasticæ & flatulentæ intestinorum afflictiones, in feminis æque ac in viris, item atrophiciæ ex potu frigido celeriter hausto prognatæ fuerunt. Quam maxime vero aquæ frigidæ potus femellis est noxius circa mensium negotium, quibus sistendis nihil est aptius, ut perite IOH. LANGIVS *Lib. II. Ep. 51. monet.*

37. VTI vero corpori calefacto nunquam expedit frigidum potum copia ingerere: ita etiam illud noxium atque perniciosiale est, si in febribus, aut intermittentibus aut continuis, id fiat. Euenit hac ratione sæpissime, ut adsumto copiose potu frigido in intermittentibus hydropes, abscessus & pedum cedematosi tumores inde fiant. In febribus continuis periculum est, ne singultum, vel etiam ventriculi inflammationem aut sphacelationem producat. In quodam Comite, febre continua laborante, teste *Foresto Lib. I. Cap. XV.* copiosus aquæ frigidæ potus graues pectoris conuulsiones induxit. Nocet vero frigidus potus porro maximopere senibus & omnibus imbecillis & tenuibus, item crassis & valde obesis corporibus, feminis, puerperis, grauidis, infantibus

bus & qui doloribus ex calculo, colica & podagra laborant, quos affectus semper exacerbat.

38. VLTIMO loco de abusu spiritus vini & liquorum spirituosorum, qui aquæ vitæ nominantur, quædam dicenda sunt. Quamvis etiam hic consuetudo sit altera natura ac spirituosus potus adfuetis non adeo nocere soleant, sicut in Polonia & Russia incolis cernimus, nihilominus experientia, optimæ veritatis magistræ, testimonio, nihil ex nocentibus potibus tantum detrimenti corporibus humanis adfricat, quantum a liberaliori liquorum spirituosorum abusu expectandum est. Quid enim naturæ ac fluiditati chyli & sanguinis ipso spiritu vini est inimicius? eo quod promte ipsis coagulum inducat atque adeo & chyli & sanguinis elaborationem impediat. Et quando tenacem ac viscidum producit sanguinem, dum humidum absument & eius solidas partes coagulat, quid ad obstructions & meatus viscerum occlusos adeoque ad cachexiam, ac phthisin, hydropem, hecticam, atram bilem generandam aptius sit, non inuenio? Nocet quoque in omnibus viscerum & capitis morbis & disponit ad epilepsiam, cephalalgias, conuulsiones, tremores. HOECHSTEDTERVS *Dec X. cap. VI.* scribit: *quidam de aqua vitæ Matthioli copiosius bibit & is paralyticus factus est; alter, simili vitio laborans, apoplecticus, tertius, qui cacochymicus fuit ac podagricus, totius corporis pruritum sentiebat ac lassitudinem, cui icterus, dyspnœa ac tandem mors superuenit.* Quando corpora aperiuntur, quæ continuo spiritu vini vsa fuerunt, neglectis carne aliisque eduliis, tunc ventriculus, intestina, omniaque interiora contracta & rugosa inueniuntur, hepar induratum, pancreas aridum, corpus exsuccum & bilis concreta visitur.


39. POSTREMO ex causis non naturalibus, & quæ ad vivendi rationem spectant, maximum momentum in creandis morbis motus & quies, somnus & vigiliæ adferunt. Et sicuti motus atque exercitatio corporis, circulum ac impulsum

sum sanguinis egregie promouet & excretiones, præsertim perspirationem conciliat: ita nimia quies & vita sedentaria ad plethoram, morbos chronicos, viscerumque obstructiones viam parant amplissimam. Nimia vero vigiliæ corpus viribus exhauriunt & capiti maxime nocent. Ex quibus omnibus facile intelligitur, quod varium vitæ genus, quo homines vtuntur, multum ad morbos producendos contribuat. Qui vitam sedentariam agunt, vt professores, studiosi, monachi, itemque fartores, futores, textores, nec non, qui in aere valde humido & vaporibus repleto degunt, vt fullones, olearii, balneatores, piscatores, zythopeptæ, lotrices, ob fibrarum tonum relaxatum, circulum sanguinis tardiozem, transpirationis defectum & feri impuri accumulationem, ad scabiem, scorbutum, capitis dolores, morbosque putridos, vermes, hæmorrhoidum fluxum præparata habent corpora. Qui vero se fortiter motu exercent, vt cantores, cursores, agricolæ, athletæ, baiuli ad inflammationes, phthisin, hæmoptysin, hæmorrhagias & asthmata sunt procliuēs. Quicunque aere fruuntur metallicis vaporibus repleto, vt vitriarii, inauratores, specularii, pictores, figuli, stannarii, lapidicidæ, fabri murarii, gypfarii, ob spasmodicam constrictionem neruosarum partium facile in asthma & colicam conuulsivam, tabem, contracturam, paralyfin incidunt. Milites ob multas aeris iniurias & mutationes tempestatum, quibus expositi sunt, virium prostrationem patiuntur, cutisque tonum adeoque transpirationis negotium plane interrumpunt, vnde morbis epidemicis, febribus castrensibus, dysenteriis & iis, qui ex transpiratione prohibita & corruptione humorum proficiscuntur, sunt obuii. Mulieres sedentariæ vitæ addictæ, adfectus circa mesenterium spasmodicos persentiunt, eruditi ob nimium laborem & meditationem caput debilitant, hinc si morbos patiuntur, caput inprimis adfligitur.

40. Ex iis omnibus, quæ hætenus adduximus, clarissime apparere arbitror non modo aerem, sed & alimenta san-

num

num corporis nostri statum mutandi & morbos varii generis inferendi potentia esse instructa. Quo magis intelligitur, quam necessaria sit rerum naturalium accuratior disciplina cuius, qui solide in artis operibus se exercere velit. Is enim maximam adhibere debet curam, ut secundum ductum HIPPOCRATIS eius loci, ubi medicinam facit, situm, aeris, aquarum indolem atque naturam & victus ac viuendi rationem probe perscrutetur, siquidem hac ratione non modo cognoscet, ad quos peculiares morbos certæ regiones inclinent, sed & medendi rationem certe multis locis peculiarem, nec non fundamentum corpora a morbis præseruandi inde trahet ac desumet quam felicissime. Apparet quoque ex hisce, quam male hi doctores sacris medicinæ initiandis sibi consulant, qui solidam rerum naturalium scientiam nullius vñus ac fructus esse in medicina, sine vlla ratione adseuerant.



DISSERTATIO V.

DE

VINI HUNGARICI EXCELLENTE NATURA, VIRTUTE ET VSV.

§. I.

QUum excellentem Hungarici inque primis Tockauensis vini naturam, virtutem & vsum exponere constituerim, plures fore arbitror, qui rem ab officio medici plane alienam me suscepisse existiment. Nam per-versa illa opinio plurimorum mentibus inhæret & præsertim vulgi animum irrepsit, a medico non nisi medicamenta, eorumque formulas & varias compositiones pharmaceuticas expectandas esse; vina vero & id genus alia inter alimenta magis esse referenda, quorum vsus ad medicum non adeo singulariter pertineat. Verum enim vero quum medicus, qui valetudini & tuendæ & instaurandæ præesse vult, omnia ea ex rerum natura, quæ villo modo prodesse vel etiam nocere possint, scopo suo accommodare debeat; ex ipsius re omnino esse videtur, vt non tantum ex pharmacia, sed etiam ex alimentorum genere & diætetico fonte ea meditationi & perquisitioni paulo subtiliori subiiciat, quæ magnam vim & efficaciam tam in auertendis, quam sanandis morbis atque in integritate corporis conseruanda possident, in quibus vinorum genera propter egregiam, quæ iis inest, virtutem & mirabilem operationem primum omnino ac principem locum obtinere, non est, quod amplius dubitemus. Atque ego quidem in hac sum sententia, medicum, qui aliquid solidi & laude digni in medendo præstare velit, longe tutius & consultius agere, si laborantibus auxilium ferat alimentis & præsidiis diæteticis, quam si ea ipsa ex medicamentis validioribus, magis actiuis & naturæ corporis humani non adeo amicis adhibeat. Nam si antiquissimorum & qui methodicæ im-

imprimis sectæ addicti fuerunt, medicorum monumenta consulimus, hos ipsos suas curationes ex diætâ petitis remediis maximam partem instruxisse deprehendimus. Nam inedia, abstinencia, motu & exercitatione corporis, quiete, frictionibus, balneis, mutatione cœli & aeris, conuenienti victu, aquarum & vini potu contra graues etiam & chronicas passionés non sine insigni successu pugnabant, rariusque medicamentis & rarissime validioribus utebantur. Quâ in re optimos hos artis magistros ac professores nos hodieque sequi & imitari debere persuasissimus sum. Quâ de causâ nobilem hanc materiam de vini Hungarici natura virtute & usu euoluere & explanare in præsentî constitui; ea imprimis ductus ratione, quum eius usum vbique iam inualescere magnique aestimari videam.

2. PRIUS vero, quam excellentes vini Hungarici in corpore sano conseruando & minus firmo, restituendo virtutes ante oculos ponam, historiam physicam de huius vini solo natali, cultu & præparatione hoc loco prætexere commodum mihi videtur. Amplissimam Hungariæ regionem in inferiorem & superiorem diuidi, cuius vel leuiter rerum geographicarum gnaro non poterit esse ignotum. Utraque vinorum nobilium, imo optimorum feracissima est, quæ tamen, quum inter se non parum ratione indolis ac virtutis differant, singula breuiter strictimque considerare oportet. Quod attinet itaque ad Hungariæ inferioris districtus, vbi vites coluntur & vina proueniunt, maxime Soproniensis recensendus venit, qui vinorum est feracissimus, inter quæ tamen palma maxime tribuenda est iis, quæ in lacu Neosidlensi progignuntur, omnium sane delicatissima. Nam soli huius ingenium producendo optimæ notæ vino quam maxime accommodatum est. Siquidem hic locus multis montibus stipatur saxosis, arenosis, copiosa sulphurea terra imprægnatis, e quorum etiam radicibus minerales aquæ subinde scaturiunt. Crescit ibi generosissimum vinum Goldbergense. Minori in pretio habentur vina eorum montium, qui solem occidentem respi-

ciunt atque arborum multitudine vestiuntur. Et tales quidem sunt, qui in terris pago Wohndorff vicinis exstant, quorum vina Goldbergensibus multum sunt inferiora, quoniam hæc terra non tam foecunda est, limoque inertī scatet. Neque pagus circa Gros- & Klein-Höflingen prætermittendus est: atque hinc est, quod incolæ iis loco ordinarii potus vtantur. Nam in genere hoc loco sciendum est, plerosque Hungariæ incolas minus frequenter vina generosa & optima ad quotidianum vsum transferre, quum perpauca calidissima æstate & qui corpus multo labore exercent, sine sanitatis offensione ea ferre possint, præsertim tanta in copia, quanta ad sitim leuandam requiritur. Si vero vtuntur generosis admiscendo aquam iis tale inducunt temperamentum, quod suæ quisque valetudini proficuum arbitratur. Quem morem etiam colī videmus a reliquis gentibus, quas natura faulrix vinis valde generosis instruxit. Nam & Hispani, Itali & Galli rarius illud merum hauriunt, sed pro potu ordinario aqua admixta diluunt atque attemperant.

3. Ex inferioris Hungariæ vinis commemoratione digna sunt ea, quæ trans Danubium in tractu Posoniensi progignuntur, quorum nobilissimum habetur illud, quod in vicinia St. Georgii ciuitatis ex terra ibi valde lapidosa editur, & duplex est; alterum ex vuis selectioribus & maturioribus expressum, saporis delicatissimi, vocatur Ausbruch, & caro admodum venditur pretio; quum illud, quod ex vuis non selectis vulgari modo præparatur, vilius habeatur. Postea vina, quæ natales suos ad terram Rustensem & vicos Besingen, Modern, Razenberg referunt, optimæ notæ sunt, & ob salubrem vsum & præstantem vim ab incolis pariter ac exteris magni æstimantur. Vina Posoniensia, & maxime id, quod vocatur Roster, peculiarem in eo habent proprietatem, quod minus commode aeris liberiores ac diuturniores accessum ferre possint: mox enim inde colorem, qui ex aureo in brunum transit, nec non saporem suum mutant.

4. ACCEDIMVS iam ad generosissima illa superioris Hungariæ

gariæ vina, quæ crescunt in iis locis, quæ appellantur ciuitates submontanæ, in comitatu Zempleniensi sitæ, quarum nomina sunt Mad, Tolezua, Benye, Talya, Schadan, Kereftur, Tarzal, Serensch, & Tokay. Vina omnia, quæ ibi crescunt, submontana κατ' ἐξοχὴν Tockauiensia appellantur, quoniam in eo præiudicio mercatores versantur, vt a popularibus fide dignissimis accepi, vinum, quod circa Tockay prouenit, reliquis submontanis esse præferendum, quum tamen omnia fere sint æqualia, vtut non negandum sit, quod spectans ad meridiem certa pars huius promontorii, ex 600. passibus constans, excellentissimi vini genetrix sit. Deinde celebris est ille districtus vinearum in territorio ciuitatis submontanæ Tarzal, qui se extendit in latitudine ad 3000. passus, in longitudinem vero circiter 9000. passus patet. Hæc duo loca sibi vicina vocantur der Zuckerberg, & quamuis hæc vina, in Zuckerberg Tarzalensi & Tockauensi nata, habeantur præstantissima, non tamen huius vini adeo parua quantitas est, vt secundum vulgarem & usu receptam opinionem Augustissimi Imperatoris mensæ tantum inferuiat, quum rex præter vnâ vineam non possideat, ceteram autem vinearum partem comites, nobiles, harum ciuitatum incolæ, imo rustici in possessione habent. Præter hæc loca sunt multæ aliæ ciuitates hisce vicinæ, in quibus vinum etiam valde potens ac generosum, optimi saporis & egregiæ salubritatis crescit, vtut Tockauensi & submontano paulo inferius, cuius naturæ est, quod in vinetis Zackmariensibus producit. Nec inglorium est Mischkotienſe, cuius præstantia in famam dedit mediocre oppidum, Mischkocz dictum. Tockauensium præstantiam æmulari etiam videntur Tarnauiensia, & quæ circa Groswarden satis benigno solo educantur.

5. PROPOSITIS sic vinorum inferioris & superioris Hungariæ optimorum natalibus, sequitur iam, vt de vuis earumque indole, quæ suauissimum hoc nectar proferunt, quædam inferamus. Has fere omnes satis commode duas in classes dis-

pesce posse existimo, quæ quidem differentia maxime in Soproniensibus & Posoniensibus animaduertitur, quarum una vuas valde nobiles comprehendit. Inter illas eminent, quarum succus saporis dulcedine delicatiori palato mirifice blanditur, & quas incolæ vocare solent *Augster-Muscateller-Meyer-und Geysdutton-Trauben*. Ad ignobiliore referendæ sunt vuæ albæ & coeruleæ, quarum succus non tanta dulcedine gaudet, sed sub æstate non adeo feruida austeri quippiam in lingua relinquit. Præstantissimæ sunt illæ vuarum species, quæ *Augster* vocantur, & mutuatur nomen suum partim ab insigni magnitudine baccarum, quæ sæpius pollicem adæquat, partim etiam a tempore maturationis, quod plerumque in principium mensis Augusti incidit. Nulla enim regio inferioris Hungariæ vuas tam cito & expedite maturat, quam terra Soproniensis, maxime ea, quæ lacum Neosidlensem ambit. Hinc etiam Senatus Soproniensis harum vuarum primitias quotannis primo die Augusti Romano Imperatori offerre solet. Incolæ has vuas semipassas dicunt *Manchele*, iisque vtuntur loco passularum maiorum, quarum saporem mira similitudine exprimunt. Cæterum de hisce vuis illud notari meretur, quod quædam ex illis baccas obtineant paulo minores, & quæ vix seminis cannabini magnitudinem superant. Sed tamen earum paruitas generositati nihil detrahit, nam si ad maturitatem perueniunt, saporis suauitate non cedunt maioribus. Ad nobiles vuas, præstantioris vini genetrices, pertinent etiam *Moschatellinæ*, quæ nomen suum debent succo, quem alunt, delicatissimo, qui & sapore & odore nucem moschatam æmulatur. Magnitudinem præ se ferunt coccorum orientalium & colore leuiter rufescente tinctæ sunt. Quod ex iis paratur vinum, germanice *Muscateller-Wein* vocari solet. Ad has proxime accedunt eæ, quas dicunt *Meyer-vel Meyran-Weintrauben*, quoniam succi, quem intus fouent, sapor & odor herbæ maioranæ valde similis videtur. Velantur baccae tenui, tenaci tamen tunica, cui puncta nigricantis coloris interspersa sunt. Vinum præbent spiritu & oleo

leo plenum palatoque gratissimum. Sequuntur tandem uvæ, quas vocant Geysdutten Trauben, quarum baccæ crassa & viridescente teguntur membrana, & formam habent papillis caprinis similem. Succo abundant copioso, qui maxime dulciariorum vsui inferuit.

6. QVOD vero attinet vuas vilioris notæ, harum in numero sunt albæ & pallidæ, quibus a tunica, qua vestiuntur, pellucida & alba nomen obtigit. Succum fouent copiosum, subdulcem, virtute tamen debiliorem. Huic generi viliori etiam adscribendæ sunt rubræ seu cœruleæ, quarum prouentus maxime in terra Soproniensi & Budensi exuberat. Nomen gerunt ab exteriori rubra seu cœrulea pellicula, vnde vocantur die blauen oder rothen Wein-Trauben. Succus earum paulo adstringens est & acidiusculus.

7. RECENSITIS iam variis vuarum, quas Hungaria superior & inferior alit, speciebus, proximum est, vt quomodo varia ex iis præparentur vini & multi species, paulo clarius exponamus, præsertim, quum perpauca hic conficiendi modus notus sit, quem a fide dignissimis popularibus accepimus. Primum & delicatissimum præparant ex vuis, quas vocant Augster-Trauben, quod ab incolis vocatur essenz. Colligunt figillatim vuas, vltra consuetum maturationis gradum excoctas & semipassas, quas etiam interdum, si solis calore non satis siccatae fuerint, mitissimo furni calori committunt, vt magis flaccescant, easque a racemis reuulsas torculari subiiciunt, cuius forti pressione succus elicitur, nectaris suauissimi æmulus, qui exacto despumationis tempore vinum præbet generosissimum, oleosum, quod diu dulce manet & spatio vnus anni demum defecatur, caroque venditur pretio & magnatum mensæ inferuit, quod mercatores pro aliis vinis perficiendis emunt. Secundum genus dicitur Ausbruch, quod paratur ex vuis nobilioribus inuicem collectis, ex quibus, separatis racemis, torculari identidem exprimitur succus dulcissimus, cui post aliquot dies feruefacto adiiciunt vuas semipassas, ita feruente musto dulcedo vuarum passarum extrahitur; vinum fit dul-

dulcissimum, oleosum, saporis gratissimi, cuius dulcedo valde diu immutata durat. Tertium genus est, quod conficitur ex puro musto nobilium vuarum, quod fermentatum dat vinum valde spirituosum, minus dulce, limpidum. Sequitur postea quartum genus, quod ex diuersis vuarum speciebus, nobilibus & ignobilibus, parant, & sic mustum copiosum acquirunt, quod peracta fermentatione vinum præbet mediocre, quod nec nimis aquosum, neque etiam nimis generosum aut dulce est, præstantia tamen vino Rhenano palmam dubiam reddit. Ex vilioribus pallidis parant mustum, quod fermentatum cedit in vinum cibarium, quo maxime incolæ vtuntur, quoniam liberalius haustum non adeo facile ebrietatem inducit. Ex rubris seorsim etiam parant vinum, dum succus ex contusis vuis exprimitur, qui rubris pelliculis per aliquot dies stat superfusus. Ex musto fit vinum rubrum, saporis quodammodo adstringentis. Hæc omnia vina quo diutius seruantur, eo præstantiora fiunt & fortiora, & odore quodam naturali & proprio prædita sunt.

8. VERA sic & speciali vini Hungarici historia descripta, liceat nobis iam in peculiare vites, proprietates ac virtutes eorum inquirere, quibus ab aliis vinorum generibus distinguuntur, eorumque, quæ in supra memorata historia continentur notabilia, genuinas rationes inuenire ac reddere. Primo vero omnium essentielles huius vini characteres & notæ enumerari merentur, quæ sunt primo, quod hæc vina præ omnibus aliis valde sint spirituosæ; secundo, quod quædam, præsertim generosiora, vt fere sunt die Essentz und der Ausbruch, diutius seruent suam dulcedinem, alia vero non ita: tertio, quod peculiari aromatico odore & sapore prædita sint: quarto, quod vim habeant diaphoreticam, roborantem, & liberalius etiam hausta nullum dolorem in capite vel languorem in artubus relinquant, sed potius totam corporis naturam robovent: quinto, quod generosiora non vappam contrahant, atque in vitris clausis optime per multos annos conseruentur.

9. PRIMVM itaque dispiciendum venit, vnde tanta vini Hungarici, præsertim quod in superiori tractu crescit, excellentia dependeat, vt plurimorum, Italici etiam, Hispanici & Gallici vincat præstantiam: quod vero in inferiori Hungaria prouenit, Germanicis omnibus palmam reddat dubiam. Cuius rei causam altius inuestigare, non adeo difficile vel operosum erit, si considerate ac diligenter nobiscum reputemus, Hungariam regionem esse ita a natura comparatam, vt omnibus iis præsidiiis instructa sit, quæ ad generosi ac potentis vini essentiam vnice requiruntur. Sita est fertilissima hæc regio in illo orbis terrarum spatio, quod gradu eleuationis poli quadragesimo & quinquagesimo describitur, imo posita est in eius medio, quod tabulas geographicas vel leuiter inspicienti in oculos incurrit. Jam vero perpetuæ obseruationis res est, certoque experientiæ suffragio compertum habemus, has regiones, quæ intra quadragesimum & quinquagesimum gradum eleuationem poli habent, vinis nobilissimis progignendis maxime esse idoneas. Nam si vniuersam Europam per omnem ambitum vsque ad eius fines perlustramus, oculorum sane iudicio constat, hanc lætissimam coeli regionem sibi subiectam habere Portugalliam, Hispaniam, Galliam, Italiam, magnamque partem Germaniæ, Austriam, Styriam, Carinthiam & fere totum tractum Rhenum, Hungariam, Transyluaniam & eximiam partem Græciæ, quas terras, continuo & cohærente tractu exporrectas, vina omnium præstantissima proferre animaduertimus. Cuius rei ratio non abstrusa videtur; nam sub hac poli eleuatione sitæ terræ foecunditate fere omnes superant, propter maximam temperiem, qua gaudent, quæ omni propagationi, foecunditati & augmento eorum, quæ e terra nascuntur, est accommodatissima. Hæc vero consistit in abundantia subtilioris humiditatis & efficacia caloris solaris: illa ad nutritionem & augmentum, hæc vero ad crescentium rerum perfectionem, coctionem & maturitatem confert. Est enim hisce in regionibus efficacior solis operatio, quam in reliquis,

(*Hoffm. Opusc. varii argumenti.*)

Q

qua-

quarum situs in septentrionem declinat, quæ parcissimo solis calore fouentur.

10. EA nimirum in varianda vinorum indole solis vis est & efficacia, vt in reliquis causis, quæ ad nobilitandam & exaltandam eorum virtutem conspirant, primum ac principem locum tueatur. Quemadmodum enim eius calor vniuersale quasi naturæ instrumentum est, quo in augmentandis & perficiendis vegetabilibus vtitur, quo foecunda reddit animalia, eorumque vitam custodit: ita maxime eius calor paulo penetrantior in excoquendo & dulcificando vuarum acido succo fere omne fert punctum. Sol enim paulo altior & perpendiculariter positus aëris & ætheris fluidum in vorticosum & celerrimum motum abripit, & nobilissimum nutrimentum succum ita attenuat atque expandit, vt tenuissima radicum ora subire possit. Deinde eundem, ostiis radicum susceptum, per angustias filamentorum & tubulorum, quibus vitium compages contexta est, vi propellit mirifica, eiusque progressum ad diffusas racemorum propagines insigniter adiuvat. Denique etiam succum intra vuarum folliculos collectum amplius resoluit, torquet, attenuat, pleniusque elaborat ac perficit, vt tandem sublata cruditate plane dulcescat. Quo fortior itaque solis est in succum vitium nutritioni destinatum operatio, eo perfectiorem eum fieri nullum est dubium. Patet ex hisce facile ratio, quare in regionibus, septentrioni valde vicinis, vuae non facile dulces fiant & maturecant, nec vinum generosum ibi possit produci, & cur sub æstate frigidiuscula vina debilia, acida & languida, sub æstate autem calidiori generosa & spirituosae euadant.

11. NEQVE vero solus calor solis, licet sit feruentissimus, progignendis optimis vinis aptus est. Adspiciamus iam tantummodo eas regiones, quæ intra trigesimum quintum & decimum quintum eleuationis poli gradum sitæ sunt, in quibus Barbariam, Lybiam Indiamque hoc loco nominasse iuvat, quibus intensior solis æstus grauitèr incumbit. Nihilominus ibi admodum rarus vini est prouentus, aut si quæ pro-

proueniunt, non tanta excellunt virtute, quantam ea obtinent, quæ sub temperatiori cœli ingenio nascuntur, cui Hungariam aliasque regiones subiectas esse commemorauimus. Neque deficit ratio; nam calidissimis hisce in regionibus rarius cadunt pluviæ, & si cadunt, per multos menses continuant, grauesque fiunt inundationes, quibus irrigatæ terræ quandam foecunditatem concipiunt. Iam vero inter omnes constat, potissimum esse pluuias aquas, quæ vegetantibus, maxime etiam vitibus, genuinum pabulum & nutrimentum præbeant; si itaque eæ deficiunt & vites conuenienti nutrimento defraudantur, hæ solis vehementiori calore quasi torrefiunt: si vero pluuiæ adsunt continuæ, deficit æstuans solis calor, neque etiam nimia humiditas foecundationi & perfectioni vegetabilium idonea est, sed potius humiditatis & caloris temperamentum ad eam requiritur. Quapropter in locis temperatæ zonæ subiectis, vbi temperies caloris & humiditatis non deficit, omnes plantæ, vegetabilia & vites optimos ferunt fructus. Quare etiam non mirum est, Hungariam fere omnes regiones foecunditate superare & optimæ notæ proferre vinum. Regio quidem hæc torquetur sæpius certis temporibus, imprimis interdiu, incredibili calore, qui incolis multam creat molestiam. At diem calidissimum nox sequitur paulo frigidior, qua sub forma roris aqua in forma vaporum in atmosphæra contenta & solari calore valde attenuata descendit, qui totam terram mira foecunditate imbuit, atque in vitium sanguinem & succum convertitur.

12. NEQVE vero solus est cœli calidioris fauor solisque benignitas, cui adscribi debeat vini Hungarici excellentia, sed etiam in eius societatem venit ipsius soli natalis indoles & conditio. Nimirum ad generosioris vini efformationem non sufficit blandum cœli ingenium, nisi conspiret conueniens terræ temperamentum, & quo ingens vinorum differentia proficiscitur. Quemadmodum enim frumentorum semina, licet etiam vegetissimum solis calorem experiantur,

lætam in messem ægre efflorescunt, nisi opportuno solo excipiantur: ita etiam ad efficiendam vini præstantiam ac nobilitatem parum valet conuenientissima coeli inclinatio, nisi a fauorabili terræ genio secundetur. Quando autem viuidor solis operatio folique opportunitas conueniunt, admirabilem sane in amplificandis vini dotibus exserunt efficaciam. Ante omnia igitur illud animaduersione dignum est, quod nobilissima Hungariæ vina, quæ maxima in celebritate sunt, & reliquarum virtutem longissime exsuperant, nascantur in summis montium iugis, solem orientem vel meridianum respicientibus, inque fluuiorum confinio positis, quorum etiam terra admodum arenosa & copioso sulphure imprægnata est. Hæc autem locorum positura, hæc soli indoles ita omnino comparata est, vt generosissimo vino perficiendo quam maxime inferuiat. Primo enim scire oportet, montes altissimos, quorum facies in orientalem vel meridionalem plagam directæ est, vini feraciores esse aliis locis humilioribus vel etiam montosis, quorum situs ad solem occidentem propius accedit. In illis aer spirat purissimus, nullisque peregrinis effluuiis contaminatus, illi ab omni ventorum septentrionalium iniuria immunes sunt, dumque præruptis iugis viuidiore solis radios excipiunt & versus se invicem reflectunt, calorem augent, conceptumque diutius retinent. Aer autem purus, vegetus & solis calore extenuatus succo nutritio vuarum se intime miscet atque insinuat, ipsique subtilitatem & quandam spirituascentiam conciliat, vinaque maxime salubria reddit, vt promptius minimos etiam corporis humani tubulos tam secretorios, quam excretorios transeant. Subtile & æthereum hoc principium vinis admixtum efficit in partibus nostri corporis solidis quoddam robur ac vigorem, vt sanguinis & humorum circuitus faciliatur. Nam tenuissimum & æthereum hoc elementum quo maiori in copia liquidis & potulentis inest, eo maiori salubritate ea aliis præstant, quod ipsis etiam in aquis animadvertimus fontanis, maxime vero mineralibus, acidulis, thermis,

mis, quæ efficaciam suam in medendo & a salibus & maximam partem a principio aereo æthereo, quod accedente vel leui calore vel motu bullarum copiosissimarum auctor est, quæ vitri parietibus adhærent & foras erumpunt. Quo spirituofo principio si priuatae fuerint, longe inertiores euadunt, & saluberrima earum virtus multum elanguescit. Præterea & aër purus ac defœcatus & solis æstus efficacior in causa est, quare omnia ea, quæ in editioribus & montosis locis succrescunt ac germinant, & teneriori habitu & nobiliori virtute splendeant, quam quibus solum natale humilioris valdeque depressum & planum obtigit. Plantas in montibus & altioribus locis crescere saluberrimas, roborante & aperiente virtute præditas, artis medicæ periti optime norunt. Frumenta, quæ ibi nascuntur, tenuiori cortice esse donata, ac meliorem & copiosiore farinam dare, fœnum quoque & gramina ad nutrienda iumenta & nobilioris lac præbendum esse aptissima, in re œconomica versatis perquam notum est.

13. EGO vero hoc loco & occasione egregium illud argumentum, quod videlicet ad præstantiora vina generanda loca montosa & decliua, & vbi in eorum radicibus flumina feruntur, sint aprissima, paulo explanatius euoluendum esse arbitror. Nam si loca natalia eorum vinorum, quibus naturæ benignitas Germaniam nostram fortunauit, consideramus, obseruare licet, nobilissima vina in tractibus montanis, maxime soli orienti vel meridiano oppositis, circa flumina, quæ infra transeunt, prognasci, & aliis etiam propter nobilissimam virtutem vulgo proferri. Ecquis enim nescit, in Franconia Würtzburgense, Wertheimense, Klingenbergense, quæ omnia in montibus Moeno vicinis proueniunt, ceteris esse superiora? Quorsum etiam spectant vinum Nierensteinense, Hochheimense, Muchelbachense, Cocheimense, quæ non procul a Moeni fluuio producuntur. In montibus circa fluuium Rheni positos proueniunt Bacheracense, Ruedelsheimense, Laubenheimense, Iohannesbergense & huius

generis plura. Circa fluuium Mosæ quæ crescunt, ex his celebrantur Dufemundense, Selleri; circa fluuium Kocher proveniunt etiam nobilissima Neccarina; in montibus, quos transfluit fluuius Albis, optima vina, quæ suppeditat Bohœmia & Misnia, proferuntur. Eodem modo res habet cum vinis Austriæ, quorum præstantiora in locis montanis circa Danubium exstant. Patet hinc etiam ratio, quare vinorum circa lacum Neosidlensem optimorum sit prouentus, & loca illa superioris Hungariæ submontana, ubi generosissimum & Tockauense vinum abundat, superius enumerata, in confinio fluuiorum præsertim Teyffe posita sint.

14. SEQUITVR iam, vt huius salubritatis & excellentiæ vinorum, quæ in montibus fluuiis vicinis producuntur, causas, & quare in locis planis & humilioribus non tanta bonitate gaudeant, inquiramus. Nos in ea sumus sententia, præstantiam & salubritatem vinorum præter solis efficaciam etiam nutrimento vitium teneriori & subtiliori deberi. Quum vero omne plantarum alimentum ex aqueis & tenuioribus sulphureis pinguibus partibus sit compositum, facile inde iudicare licet, quæ ad subtilem reddendum nutritium succum & præbendas particulas aqueas sulphureas pingues tenuiores, leuiioresque conferunt, ea etiam ad nobilitatem & salubritatem vinorum præstandam esse aptissima. Iam vero quum montes expositi sint nocturnis roribus, qui circa confinia fluuiorum sunt abundantissimi, & subtilissimam & æthereo principio intermixtam aquam fouent, non mirum est, rorem optimum esse nobilissimarum vitium nutrimentum. Faten- dum quidem est, rorem nocturnum per se ad nutriendas vi- tes non sufficere, sed pluuiæ vt accedant necesse est, quæ plenius nutrimentum toti vitium compagi afferant. In eo tamen posita est differentia, quod copiosæ pluuiæ, in locis planioribus collectæ & diu stagnantes, situm & putredinem contrahant, valdeque crassum & impurum nutrimentum red- dant. Vbi vero post humectationem terræ, quæ vites alit, citius delabuntur, nulla harum stagnatio, nulla corruptio locum inuenire potest.

15. DIXIMVS etiam supra, ipsius soli naturam atque indolem diuersam multum facere ad differentis vini, nobilioris vel ignobilioris, prouentum, quod iam plenius & accuratius euoluendum erit. Constat nempe ipsius experientiae & oculorum testimonio, nobilissima vina, vbicunque terrarum crescant, natale solum habere terram non valde pinguem, crassam, lutosam, nigram & viscidam, sed potius saxeam, arenosam, calcaream, vel scissilem lapidem. Videtur quidem primo intuitu eiusmodi terra valde infœcunda & sterilis, & progignendis ac fœcundandis plantis & fruticibus minus idonea; sed tamen res aliter habet cum vitibus, quæ si nobilissimum succum ferre debent, vtique talis terræ indoles huic rei aptissima est, & quidem eas ob causas, quia arenosæ, calcareæ & saxosæ eiusmodi terræ diutissime retinent solares radios, qui hic concentrati radices blando suo calore fouendo efficiunt, vt nutrimentum per omnes eius poros facilius transeat. Deinde dum per huius generis terras quasi per filtrum humiditates & pluuias aquæ transmittuntur, has ipsas non modo attenuant, inque minimas partes dissoluunt, sed & crassiores & rudiores partes separant ac detinent, vt longe subtilior succus nutritius euadat. Ubi tamen notandum venit, quod eiusmodi terræ vinarum & montium fimo & stercoracea materia singulis fere tribus vel quatuor annis probe imbui debeant. Nam hæc ipsa vtique pingue & sulphureum principium, sine quo nulla fit fœcundatio, suppeditant; sed tamen ad purificationem & subtilitatem etiam huius sulphureæ & oleosæ materiæ solum arenaeum & calcareum multum confert. Vbi vero terræ sunt valde pingues, lutosæ & viscidæ, ibi nec depurantur satis aquæ pluuias, nec sulphur soli satis subtile redditur, sed integrum & minus defecatum canales & poros plantarum ac vitium subit.

16. IN diuersissima igitur soli natura, & quidem non sine ratione, diuersi saporis, quo vina prædita sunt, eorumque salubritatis & insalubritatis causas positas esse existimamus.

mus. Neque enim ignotum est, mirifice inter se ratione saporis & odoris differre vina Rhenana, Franconica, Hungarica, Mosellana & alia etiam aliis esse salubriora; quam differentiam solo natali si quis adscribere velit, is utique non multum errabit. Dici enim vix potest, quam dissidens planeque diuersa sit natura atque indoles soli & terræ, quod vel ex colore, odore, textura, consistentia, porositate, crassitie, imo ex destillatione aliisque laboribus mechanicis & chymicis satis superque cognoscimus. Mirum itaque est, quod vineæ, quæ habent eundem solis adspectum, quæ etiam in eiusdem altitudinis montibus positæ sunt, & eiusdem generis vites alunt, vina tamen ratione præstantiæ, salubritatis, saporis ac penetrantiæ admodum diuersa proferant. In cuius rei illustrationem ut saltem vnicum adducamus exemplum, notum est, vina, quæ circa pagos Hochheim, Kochheim & Cassel, e regione vrbis Moguntiaë producuntur, nasci ex vnius generis vitibus, quæ etiam eodem modo tractantur, eodemque prorsus sole fouentur; nihilominus præstantia mire inter se differunt, ut longe etiam cariori pretio Hochheimense præ Kochheimensi & hoc præ Cassellano ematur. Quum vero nihil fiat sine ratione, valde credibile est, huius differentiæ causam referendam esse ad soli diuersitatem, quæ non adeo aperte in sensus incurrit. Et quum etiam vinum Hungaricum ratione saporis & odoris aliquid habeat præ aliis vinis peculiare sibi que proprium, & spiritus etiam ex iis destillatus saporem & odorem exhibeat singularem, nullum sane dubium est, quin hoc soli natalis peculiari naturæ sit adscribendum.

17. ACCEDIMVS iam ad virtutem vini Hungarici, præsertim Tockauiensis, explicandam, quæ etiam quodammodo peculiaris est. Nam plura vinorum genera dantur, ut Rhenana & Mosellana, quæ virtute diuretica & aluum soluente eminent. Hungarica vero diaphoretica, imo sudorifera virtute præ omnibus aliis excellunt quod quisque sanus homo experiri poterit. Nam si quis illud paulo liberalius atque etiam

iam ad ebrietatem usque hauserit, mane totum corpus sudore diffuere obseruabit, si modo vinum bonæ notæ & purum fuerit. Quemadmodum vero liberior transpiratio & sordium in corpore superfluum excretio, quæ per corporis corticem, nempe cutim fit, omnium excretionum est præstantissima, quoniam totum corpus & vniuersam sanguinis & humorum massam a sordibus depurat; ita vina diaphoretica saluberrima esse, quilibet facile iudicabit. Liberior enim & vel ad sudoris eruptionem aucta transpiratio intensiorem & expeditiorem sanguinis motum sequitur, cordisque & partium solidarum sanguinem impellentium, robur ac vigorem indicat, quod vtique ad tuendam valetudinem, eamque a morborum causis atque insultibus præseruandam plurimum valet.

18. PRÆTEREA vinorum Hungaricorum salubritas eo manifestatur, quod nullum fere acidum in se custodiant, neque illud in primis viis relinquant, quemadmodum omnia fere Germaniæ vina id faciunt, adeo, vt ab iis omnes, qui imbecillum habent ventriculum, qui affectu hypochondriaco laborant, & vbi alui est segnities, plane abstinere debeant. Quam nocuum vero sit acidum, ex alimentis in corpore relictum atque ad massam sanguinis traductum, res iam satis clara & inter medicos decisa est. Quis enim nescit, eam esse acidorum indolem, vt tunicas nerueas ventriculi & intestinorum arrodant, extractum ex alimentis succum præcipitent, aluum constringant, sanguinemque & reliquos humores ad crassitiem, spissitudinem & coagulum disponant, & arthritidis, rheumatismi, calculorum frequentissimam causam constituent, in foeminis vero, dum saluberrimum mensium fluxum retardant, innumeris malis, quibus affligi solent, occasionem præbeant, quæ omnia a vinis Hungaricis non expectanda sunt incommoda. Alia vina, si destillantur, præsertim quæ in Germania proueniunt, tertiam circiter partem spiritus inflammabilis præbent, tres vero sui partes in cucurbita relinquunt, saporis valde acidi & austeri. Hungarica vero vini, quæ fermentationem subierunt generosiora fere

(Hoffm. Opusc. varii argumenti.)

R

dimi-

dimidiam partem spiritus vini grati odoris exhibent, dimidia parte relicta subacidi dulcis saporis. Vina autem generosiora, oleosa & dulcia superioris Hungariæ, item der *Musbruch*, non quidem tantam copiam inflammabilis spiritus suppeditant, sed præter phlegma insignem copiam magnatis visceri dulcis præbent, quod siccatum & igni iniectum flammam concipit.

19. Ex his elementis & ingredientibus vini Hungarici iam expositis quisque peritus medicus facile iudicare poterit, quas alat in medendo virtutes, quibus corporibus, ætatibus & temperamentis conueniat, & quibus in morbis usurpari possit. Qua de re etiam, ut scopo nostro medico satisfaciamus, paulo fusius & distinctius agendum erit. Diximus in superioribus, ipsa vina Hungarica diuersis modis præparari, & inter se quoque ratione nobilitatis differre, hinc etiam virtutes singulorum non esse easdem, sed differentes facile apparet. Nonnulla enim valde generosa & dulcia sunt, suamque dulcedinem diutius seruant. Alia sunt tenuiora & spirituosiora, minoris dulcedinis. Dulcia maxime sunt recentia, & quæ in Hungaria superiori ex nobilissimis uuis proueniunt. Sed placet hoc loco, priusquam ulterius progrediamur, ante omnia inquirere, quare vina Græca, Hispanica, Italica, aliaque in regionibus calidioribus, etiam ex uuis optimis parata, dulcia non diu retineant suam dulcedinem, sed eam mox deponant, ita ut vel in fortia aceta degenerent, vel in valde spirituosiora vina convertantur; vina vero Hungarica, præsertim quæ ex urbibus submontanis superioris Hungariæ ad nos veniunt, & quæ vulgo dicuntur *Musbruch*, eam diutius seruent. Etenim omnia musta, siue succi ex uuis recentius expressi singulari dulcedine linguam afficiunt, quæ tamen mox post fermentationem perit. Deinde omnia musta destillata parum vel nihil dant spiritus inflammabilis, post fermentationem vero, quum iam omnis fuerit finita, multum spiritus phlogisti exhibent, acido & tartareo phlegmate remanente. Quare vero vina Hungarica non ita deponant suam
am

am dulcedinem, sed eam feruent, & cum vetustate generosa euadant, res scrutinio non erit indigna.

20. SUPRA iam memorauimus, diuersis modis tractari & præparari vina Hungarica; ex qua peculiari tractatione erit etiam petenda ratio durantis illius dulcedinis. Nam vbi succus ex vuīs nobilioribus & maturis semi passis & exsiccatis elicitur, qui essentia dicitur, diutissime manet dulcis. Deinde quando musto subdito calore feruenti immittuntur vuæ passæ vel aliæ adhuc recentes, dulcia identidem vina emergunt, quorum dulcedo diutissime durat. Quæ vero non exsiccatis vuīs vel ex musto feruetacto proueniunt vina, ea utique, non secus ac alia vinorum genera effervescentia, gratum ac dulcem suum saporem amittunt; idque etiam fit in nostris regionibus. Nam si quis musta recentia calori vel igni admoveat, ut ex parte ebulliant, quemadmodum additis herbis, vina v. g. cochleariæ, enulæ, absinthii, melissæ parantur, non amplius ita effervescent, sed dulcedine diutius linguam afficiunt. Eadem encheiresi in insulis Canariensibus vina, quæ dicuntur *Sect*, item Hispanica, vina de Tint, de Alicante incolæ parare solent. Causa igitur durabilis illius dulcedinis non est a natura, sed dependet ab artificio, ab igne nempe & calore, qui hunc peculiarem effectum producit, quod fermentationis actum præpediat, qua unio dulcium dissoluitur ac destruitur, ingensque mutatio ipsi musto ratione qualitatis inducitur. Fermentatio vero est nihil aliud, quam motus intestinus aeris & ætheris partiumque aquearum in musto contentarum, qui partes, quæ mixturam dulcium corporum constituunt, dissoluit, particulasque acidas & sulphureas terreasque, quæ inter se commixtæ dulcedinem formant, a se invicem separat, adeo, ut acidum incipiat in sulphureum ac terreum principium agere, unde fit ebullitio, spumescentia & euaporatio partium sulphurearum, nec non partium crassiorum terrearum in fundum deiectio: qui motus ebullitionis dum diu durat, acidum cum subtiliori sulphure & phlegmate sese intimius coniungit rursus, & vinum inde sur-

git, siue liquor acido spirituosus. Quod si vero per calorem mustum ferveat, & ex parte ebullit, particulae aereo aethereae subtiliores aquae, quae prima ac praecipua motionis illius intestinae fermentativae causa efficiens sunt, ex intimis musti poris exturbantur atque aufugiunt, unde necessario sequitur, ut partium liquoris dulcis salva & integra maneat textura ac dispositio, & inimica earum separatio impediatur. Quum vero non omne principium aereo aethereum & subtile humidum per feruefactionem euaporet, sed quaedam pars eius remaneat, impeditur quidem vehemens fermentationis actus, sed tamen remissior & lenior species fermentationis adhuc manet, a qua etiam defoecatio successiva & spirituascentia blandior horum vinorum dulcium producitur.

21. EXPLICATA sic dulcedinis, quae vinis Hungaricis inest, ratione, iam longe felicius & clarius vires & virtutes horum vinorum peculiare deducere ac determinare licet. Vina itaque dulcia generosa, quum nihil fere in se habeant acidi, nec valde spirituosae, sed temperata sint, corporis humani naturae admodum amica & blanda observantur; eo quod omne dulce & temperatum nutritioni & succorum deperditorum restorationi valde aptum sit: quare etiam lac, quod sensu medico dulce est, multum nutrit. Hinc haec vina ad succum nutritium chylosum temperatum blandeque spirituosum reddendum multum valent, unde si moderatori dosi usurpentur, nullum dubium est, quin succos nutritioni aptos reddant, & corpora exsucca & arida, imbecillia etiam, alant ac nutriant, viresque simul restaurent. Rectissime igitur eiusmodi vina a medicis & sapientissima antiquitate lac senum vocantur, qui virium restoratione valde indigent. Deinde etiam eorum usus admodum salubris & utilis est iis corporibus, quae vel ex nimia sanguinis profusione aut diuturno morbo, praesertim acuto, aut fatigatione corporis & animi succos & vires amiserunt, viriumque amissarum & nutritionis reparationem expetunt, si nempe inter cibum pariori manu, sed crebrius sumantur. Porro ubi digestionis vis est diminu-

ta, vbi acidorum humorum est colluies, aliusque stipata & adstricta, suppetias hæc vina ferunt desideratissimas. Nam subtili suo spiritu adaugent calorem, viscidaque dulcedine acidum contemperant & lubricas intestinorum tunicas reddunt, vt excrementorum progressus ac transitus fiat facilius. Quapropter summo cum fructu hypochondriacis, arthriticis, podagricis, quibus omnibus acida vina valde infensa sunt, illa exhibentur, quippe qui inde magnum levamen, quotidiana id testante experientia, persentiunt; siquidem hos morbos valde pertinaces ex tartareis salibus inuicem concretis prognasci extra dubium est. Quum igitur acidum prima in regione collectum attemperent, atque impedian, quominus cum particulis sanguinis coire & congregari possit, utique tartari generationem eiusque causas præuertunt & remouent. Accedit etiam, quod intestinorum & ventriculi tunicis valde nerueis & exquisitiori sensu armatis multum faueant, dum blanda sua visciditate eas oblinunt, vt a succis acidis corrosiuis ibi stagnantibus non offendantur, vel earum læsio ab hisce iam inducta emendetur, partesque corrosæ demulceantur ac deliniantur. Denique etiam paulo liberalius sumpta, modo non crebrius, non facile nocent, nec corpora, vt alia vina, ad morbos disponunt, sed eos potius, præsertim chronicos, præcauent. Nam quum circulum sanguinis strenue promoueant, atque insuper perspirationem reddant auctiorem, corpus a multis sordibus excrementitiis liberando id agilius & alacrius reddunt.

22. QVEMADMODVM vero nihil eminente quadam virtute agendi præditum in tota rerum natura existit, quod incongrue atque immoderate vsurpatum non noceat, licet sit sua natura optimum: ita etiam cum optimæ notæ vinis, Hungaricis quoque, comparatum est. Nam parcius vti eo debent, qui nimium abundant succo & sanguine, & vbi vasorum ingens est angustia, eaque succis referta, quoniam non modo eorum augent copiam, sed & dum in motum intestinum calidum eos coniiciunt, ex ingente sanguinis turgescen-

tia calores, anxietates, sanguinis congestiones, imo ad inflammationes viscerum internas dispositiones, febresque synochæ & sanguinis profusiones fieri possunt, præsertim si quis ea crebrius & immoderatus in usum velit recipere. Infusa etiam sunt iis, qui ex motu & calore æstuant, vel ad cholera & vehementem iram proclives sunt. Vidimus ab eiusmodi vinis dulcibus & spirituosiss, in actu iracundiæ fortius haustis, inflammationem ventriculi subortam, quæ emetico imprudenter a medico exhibito adaucta intra paucas horas mortem induxit.

23. ACCEDIMVS iam ad vina Hungarica spirituosiora, quæ motum fermentationis sustinuerunt; ea prioribus calidiora esse, nemo facile in dubium vocabit. Hæc utique corporibus humidioribus, & ubi multum crassi phlegmatis in partium tubulis subsistit, sub moderatiori tamen semper usu, valde conueniunt. Hæc etiam digestionem primarum viarum labascenti calore & spirituascentia sua valde succurrunt, inque morbis chronicis, qui ex atonia & nimia laxitate fibrarum proueniunt, in alui fluxibus, flatulentis, in dispositione cachectica, affectibus paralyticis, colicis, opem ferunt exoptatissimam; sed ut moderatior eorum sit usus, providendum est. Et quemadmodum omnia calidiora sanguinem in vehementem motum coniiciunt, eumque valde exagitant: ita sanguinei & choleric, plethorici atque ad vehementiores animi affectus proniores, iis ut parcissime utantur, necesse est, si ardentes febres, sanguinis profluvia, congestiones & inflammationes itemque nimios conatus & motus ad hæmorrhoidales venas euitare velint. Nouimus, quosdam plethoricos & vitæ sedentariæ addictos, qui iis frequentius vsi fuerunt, in dorsi graues dolores incidisse, quos passiones calculosæ & ischiadicæ sequutæ sunt, quibus deinde sanguinis missiones in pede, neque minus diluentia ac nitrosa profuerunt. Habent vero vina Hungarica generosiora id commodi secum, ut correctionem acidis & ponticis humoribus, si prima in regione stabulentur, dulcificantem medicinam præbeant.

beant. Nam corrosiuos etiam mineralium spiritus vini re-
ctificati additione sufficienti temperari inque blandam & dul-
cem naturam conuerti, spiritus vitrioli, nitri & salis dulcis
præparatio chymica luculenter demonstrat. Et quum sæpius
ex cruditatibus acidis in senibus vel imbecillibus capitis do-
lores, ophthalmiæ, dysuriæ, hemicraniæ, stranguriæ, eructa-
tiones & vomitiones acidæ eueniant, certe hi conuenientissi-
mum præsidium in vinis Hungaricis, tam dulcibus, quam spi-
rituosis inuenire possunt: hæc enim inter vina stomachum con-
fortantia principem sibi locum vindicant.

24. CÆTERA Hungariæ vina, quæ non tam spirituosæ, sed
temperatiora sunt, quod attinet, præstat iis vti loco vini Rhe-
nani vel Franconici, si quis cum molestissimo illo hypochon-
driorum malo aut podagrico affectu conflictetur, quia non
tam subtile acidum ac tartareum principium, nerueis parti-
bus valde inimicum, quod iis se altius insinuat, secum ferunt,
& transpirationem etiam melius adiuuant, quæ his in morbis
excretio est desideratissima.

25. CONVENIENTI sic usu & viribus vini nostri traditis,
exposita etiam eo male vtendi ratione, iam breuiter strictim-
que proponere placet, quam opportunum in nonnullorum me-
dicamentorum præparatione illud locum habeat. Igitur pri-
mo optimo inseruit destillationi aquarum spirituosarum ex
speciebus aromaticis vel sale volatili oleoso pollentibus. Se-
renissimus Rex Prussiæ, Fridericus, Augustissimæ memoriæ,
frequenti in usu ad flatulentias deprimendas habebat aquam
carminatiuam, quæ ex corticibus aurantiorum recentium, po-
morum Chinenſium & citri cum vino Tockauensi per destil-
lationem præparabatur, cui ad dulcificationem pauxillum iu-
lapii rosarum additum fuit, quæ odoris fragrantia, saporis
suauitate, & eccellente virtute vtique se commendabat. Ex
vino Hungarico destillatus spiritus aliis ex vino vel fecibus
vini paratis spiritibus longissime præferendus est; non modo
enim sapore & odore aromatico, sed & viribus differt. Præ-
ter virtutem enim confortantem & calefacientem blandum
somnum

somnum placidamque quietem, si circa lecti ingressum sumatur, inducit, ob sulphureum, quo gaudet, principium, quodammodo vaporosum, sed blandum, & neruorum texturæ eorumque fluido amicum.

26. PRÆTEREA Hungaricum generosum, præsertim Tokkaiense, optimi menstrui vicem gerit, quo in elixirio stomachico & antihypochondriaco præparando felicissime vtor, cuius præparatio hæc est: fumo corticum aurantium recentium vnam vnciam, qui in mortario contunduntur in massam, cui extracti cardui benedicti, centaurii minoris, salis tartari æquali portione drachmas duas admisceo, & postea olei macis, olei de cedro guttas viginti adiicio; affunditur vini Tokkaiensis libra vna medica, extractio fit in Mariæ balneo: post subsidentiam clarus liquor decantetur, qui ad cochleare dimidium cum conuenienti vehiculo datus in morbis, qui ex praua digestionem nascuntur, & prima in regione sedem habent, & maxime in molestissimo illo hypochondriorum malo, si quod aliud remedium, præsentissimi vsus est. Eodem modo elixir proprietatis præparationem, vt loco spiritus vini sumatur vinum Hungaricum, & loco spiritus vitrioli sal tartari, in feliciorum vsum institui posse, nemo facile inficias ibit. Postea etiam hoc vinum optimum præbet vehiculum ad assumenda medicamenta, quæ saporis paululum nauseosi sunt; ita enim gratia iis conciliatur. Species aromaticæ & neruinæ si cum eo infundantur & cum hoc infuso partes externæ, si qua læsio aut contusio, tumor aut impotentia motus eas obsideat, calide foueantur, nihil potest esse præstantius. Corticis chinæ vncia vna, & florum chamomillæ vulgaris vncia semis, addita salis tartari drachma vna, si decoquantur cum libra vna vini Hungarici, medicina fit antifebrilis, quæ si ventriculus nimia imbecillitate laborat, in febre intermittente & chronica, præsertim vbi vires morbo vel ætate fractæ sunt, virtutem habet excellentissimam.

27. ULTIMO loco de adulteratione horum vinorum quædam adiicienda sunt, quæ nostra tempestate & vltatissima; maxi-

maxime eam ob causam, quia hæc dulcia vina ob eximiam virtutem magno in pretio habentur. Solent eam tentare, dum multo recenti dolci cuicunque vel etiam calefacto adiiciunt vuas passas Hispanicas vel saccharum etiam, & parum ex fecibus cerevisiæ albæ addunt, ita in loco temperato fit ebullitio, & liquor gratus, suavi dulcedine præditus emergit, quem incautis parumque vinorum naturam intelligentibus pro Hungarico vendunt, & ut naturalem saporem hoc vinum æmuletur, portionem vini Hungarici inferioris admiscent. Sed sapor & odor, maximeque virtus ab iis distinguitur, qui frequentius genuinis vinis usi fuerunt. Certissimum tamen vini Hungarici genuini indicium illud est, si liberalius haustum nullam capitis grauitatem inducit, sed potius corpori alacritatem affert. Nam licet artificialia dulcedine placeant, valde tamen insalubria sunt; caput enim statim occupant, & immodice hausta mirum languorem ac grauitatem toti corpori inducunt. Spirituosum enim & subtile illud elementum, quod salubritatem vinis ingenerat, & ex vitium, solis, soli & nutrimenti natura peculiari affertur, in eiusmodi arte factis plane deficit.

28. CORONIDIS loco id prætermittere intactum non possumus, quod salubris & præstantissima vini Hungarici præsertim superioris indoles communiter, imo ab ipsis incolis etiam solo, ubi vites crescunt, aurifero adscribi soleat, eo quod terra Tockaviensis roborans in se auri sulphur copiosum contineat. Quinimo variæ circumferuntur historiæ & litteris etiam mandatæ sunt, de quibus legi possunt IACOBI TOLLII epistolæ itinerar. In ipsis botris & acinis compactas sæpius auri atomos mire splendentes fuisse repertas, ita ut etiam membranulæ exteriores auro quasi obductæ fuerint. Et aiunt, in Tockaviensi tractu, ubi generosissima nascuntur vina, videri non raro aurum instar funiculi rotundi simul e terra enasci; quas tamen historias in medio relinquimus, ut non de earum fide dubitandi prægnantes habeamus causas. Id saltem dicimus, nec aurum, nec alia metalla ad fecunditatem terræ, multo minus ad succos vegetabilium nobilitandos, & salubres reddendos quicquam conferre posse.

(Hoffm. Opusc. varii argumenti.)

S

DIS-

DISSERTATIO VI.
DE
NATURA ET PRÆSTANTIA
VINI RHENANI IN MEDICINA.

§. I.

COMMUNIS, sed pernicialis non tam vulgi, quam ipsorum quoque medicorum est opinio, ad sanitatis tutelam ac restitutionem copia diuersissimorum remediorum opus esse, quamobrem nullus finis est subinde noua & sexcenta inueniendi & componendi pharmaca, quæ, si verum fateri licet, magis in confusionem medentium, inque ægrotantium damnum, quam in eorum salutem conquiruntur. Et enim, si quis curate, vnde vitæ sanitatis & morborum ratio pendeat, scrutetur; perpauca esse, a quibus sanitas pendet, & quæ eam labefactatam restitunt, clarissime perspiciet. Nosse autem hæc ipsa & exquisita prudentia iis uti, præcipua, quæ medicum ornat ac constituit, sapientiæ pars est. Ego semper, postquam in ima medicinæ penetralia admissus sum, constanter hac fui in sententia, ad sanitatem custodiendam & morbos auertendos non opus esse pretiosis & magno labore & subtili ratione excogitatis remediis, multo minus eorum copia, sed sufficere huic scopo ea, quæ omnibus nota, vulgaria & ad cuiusuis manus & potestatem sunt, per quæ ego speciatim intelligo v. g. aërem, aquam, motum, somnum, cibum & animi regimen, quorum tanta vis est & potentia, vt seruare corpus idque destruere & graues quoque morbos recto ac debito vsu tollere possint. Optandum igitur vehementer esset, vt quisque medentium in res sic appellatas a medicis non naturales maiori studio ac industria animum ac cogitationes suas dirigeret, earum vires in sanandi negotio penetrando, quam vt ex remotissimis locis & materia humanæ naturæ plus inimica quam amica tot remediorum classes peterentur. In præfenti

senti igitur id laboris suscepi, vt præstantissimum vini & maxime Rhenani vsum in medicina solida experientia non minus, quam exacto ratiocinio suffultus demonstrem, nec non, qua ratione omnibus celebratissimis, quæcunque vel natura vel ars largitur, medicamentorum speciebus vinum longe superius sit, & quemadmodum vniuersalis medicinæ, inprimis præseruatoriæ titulum optimo iure mereatur.

2. EQVIDEM animus est Germaniæ nostræ vina & inter ea princeps Rhenanum eiusque indolem ac vires scrutinio medico hoc loco euoluere atque vsum in medendo ostendere; nihilominus non alienum ab instituto neque iniucundum fore iudicauimus præcipua, quæ ex Europæ locis ad nostras terras feruntur, vina recensere & perpauca de eorum virtutibus quædam differere. Ex omnibus autem regionibus delicatissima & valde generosa nobis offert Italia, ex quibus maxime eminet illud vinum, quod ad Vesuuii radices nascitur & lachryma Christi nuncupatur, alii quoque virgineum illud denominant. Huius denominationis ratio ex eo desumpta videtur, quod ex selectis vuis e tima, antequam calcentur, more lachrymarum emanet. Est valde potens, rubro colore splendens, odore suaue, sapore subdulce & salubre, vrinæ enim vias propter suam, qua imbutum est, tenuitatem mox inuenit. Laudem deinceps meretur Verracia, a calore Verre nigro nomen obtinens, colore nigrum, palato gratum & stomacho minus graue est. In pretio quoque habetur Albanum, ad Albam ciuitatem crescens, quod ægrotis non minus quam sanis commodum ac salutare est, transpirationem & vrinam mouens, de quo album & rubrum prostat. Inter primæ & optime notæ vina numeratur quoque muscatellinum Falsicorum, Vin di Monte Fiascone & notum est de hoc vino epitaphium cuiusdam bibuli, positum a famulo suo: propter est, dominus meus mortuus est; gustu est sapidissimum. Merentur etiam hic recenseri vina del Monte Bolzano rubrum & moschatellinum Perusinum, quæ ambo non

sunt incelebria, & e ciuitatibus eiusdem nominis quotannis in magna copia Romam transportantur.

3. ORDO iam tangit Pucinum, antiquitati etiam notissimum. Largitur illud saxeus collis nomine Prosec in sinu Adriatici maris, hodie Capo d' Istria. Dicitur etiam Proseker Rheinsall. Dulce est, caput non petit, nec mentem percellit, odore suaue, fuluo nitens colore. Huic Plinius adscribit, quod Liua Augusta LXXXII. annos attigerit, cum alio vino non fuerit vsa. Excellens quoque vinum est, quod non adeo procul a Vicentia progignitur & Marciminum dicitur, quod podagricis præ cæteris innoxium esse perhibetur. In districtu Aquilensi a Rosacio ciuitate Fori Julii nomen accepit Rosaceum, Rosazer, nobile & præstans vinum. Nec silentio prætereundum est Vernacium, vinum generosum, quod nomen obtinuit a Monte rubro Vulnetia in Liguria, nunc Vernacia dicto, non modo in Italia, sed apud Gallos & Britannos notum. Spectant huc similiter Rhætica vina, Germanice Bestliner, quia in valle Telina crescunt, quibus Augustum delectatum fuisse referunt. Est vinum instar sanguinis rubrum, dulce, & subausterum in lingua relinquens saporem.

4. NOTATV huc venit dignum, plurima Italiæ vina & generositate & dulcedine superare alia. Dependet autem dulcedinis nec non virium causa potissimum ex eo, quod in more habeant vel ex vuis maturis selectis in aere parumper exsiccatis ea præparare, vel ipsa recentia musta igne leni aquositate in auras emissa inspissare & tunc fermentationi exponere. Hoc artificio vina maiorem acquirunt dulcedinem, quandoquidem mustum, quo dulcius & spissius est, eo minus vehementem subit ebullitionem, quæ alias plerumque aciditatis nimiae genitrix est. Causa porro tantæ in vino nobilitatis est ipse situs Italiæ solique sulphurei natura: feruens enim solis ardor, & insitus terræ calor non potest non ad perfectam maturitatem & dulcedinem vuas perducere. Verum enim vero dantur in Italia etiam austeriuscula vina, dicta asciuti, quæ ex crudo parantur musto & proferuntur iis in locis,

locis, quæ septentrionem spectant. Utuntur his magno cum fructu æstate feruentissima, in morbis quoque præcalidis ad immodicum ardorem restinguendum.

5. ACCEDIMVS iam ad Galliæ vina, quorum præstantia & nobilitas nemini nostris temporibus obscura esse potest. Omnium autem nobilissimum habetur le vin de Champagne, quod etiam in pretio magno habent magnates, ipseque rex eo utitur. Laudem meretur, quod gratum sit stomacho, capiti & nervis non inimicum citoque per urinam transeat. Colore rubellum est, delicati saporis propter acidi subtilis & spirituosæ temperatam mixturam. Huic secunda sunt Burundiaca, ex quibus optimum Beaunense generosum coloris oculi perdicis du couleur de perdrix saporis grati, minus vaporosum & melius tolerat aquam quam le vin de Champagne. Non etiam incelebre est le vin de Paris, præsertim ex maturis vuīs confectum. Tenue est, sed gustui acceptum, aquæ mixturam non bene suffert. Ex Burdigallensi districtu optimum habetur Grauianum, vin de Graue, Claretwein. Dicitur vin de Graue, quia solum valde arenosum, Graue enim Gasconibus est arena. Saporis est austeriusculi, caput & mentem minus percellit, nec non stomachi & intestinorum tonum egregie roborat. Æstimantur similiter in Gallia Aurelianensia, quorum alba dantur & rubra. Sunt vina generosa, ventriculo proficua, sed caput ferire solent. Notissima quoque sunt Pictaviensia alba, quæ multum conueniunt cum Germanicis nostris Rhenanis, tantum, quod sint crudiora. Denique etiam excellentissima inter Gallica sunt Frontinianum & vinum Muscat de Lion, illud dicitur ab oppido Frontiniano, tribus milliaribus Monspelio distante, in prouincia Languedocensi & delicatissimum est, moschi saporem & odorem referens: hoc ita appellatum est, quia Lugdunum defertur. Est rubrum, generosissimum, saporis austeriusculi suauis moschatellini, aquæ mixtura indiget ob nimiam generositatem. Tandem ex Gallicis quoque vinum saluberrimum censetur vinum Eremiticum, vin d' Ermitage.

Est rubellum subausterum & baccarum myrtilli saporem referens.

6. HISPANIA nobiles quoque alit vites, quæ ob maturitatem vuarum vina largiuntur pretiosissima. Canarinum, quod hodie ex insulis Canariæ, maxime Canaria magna apportatur, circa urbem Dellen generosissimum crescit. Spectat huc quoque Maluasium, quod ex grandibus rotundis vuibus magnæ præstantiæ exprimitur. Vinum hoc diutius durat & ubi-vis gentium per mare deuehi potest, quod non omnia vina perferunt. Vinum Malacense, siue vinum Secco, Germanice Sect, forte quod in saccis vel vtribus in Hispania circumferatur, vino Canarino est pinguius. Petrisimonis dictum, præcipue ad urbem Gualdalcazar nascitur, ex palmitibus Germanicis per Petrum Simonis ante ducentos annos in Hispanicum solum deductis ibique transplantatis. Memorabile enim est, vites vnius regionis in alias traductas ob diuersi soli naturam & aeris solisque statum fructus diuersæ naturæ producere. Ita vites Germanicæ in Hispania vuas producunt longe dulciores, fracta nempe & emollita ibi eorum asperitate. Ita etiam vites Maluaticæ ad nos delatæ multo delicatiora vina exhibent, quam in Italia. Ager Andalusie prope Xenos admodum vini ferax est, sed hæc vina Xenena sunt austeriuscula, minus dulcia & citius etiam acescunt in calidis locis. Huius generis sunt etiam, quæ circa Madrit proueniunt. Alconense, siue Alicante in regno Valentie rubrum est, sed crassum, palato quidem acceptum, at stomacho minus utile. Huic non dissimile est genus illud, quod nostratibus dicitur vin de tinte.

7. CVRIOSVM & perquam dignum obseruatione est, dimidiam Germaniæ partem boni vini esse genitricem, eam videlicet, quæ plagæ australi propinqua est, quæ vero ad septentrionem spectat, vel plane vinorum expers est, vel ea valde acida & tenuia profert, sique consulimus geographicas tabulas, speculari ibi iucundum est, eas omnes ferme regiones ad alendas vites & bonum vinum producendum inidoneas esse,

esse, quæ ultra 51. gradum elevationis poli sitæ, ita nempe, ut, quo magis remotæ sint a polo septentrionali, & meridionali vicinæ, generosius & fortius vinum producant, imbecillius autem acidoque magis prægnans, quo plus a meridie sunt auersæ. Ratio observationis hujus merito debet ab eo desumi, quod loca septentrioni vicina non tantum a sole æstum experiantur, neque aër tam tenuis & subtilis, terraque minus spongiosa tenera sulphureque vegetabili turgida sit, quæ omnia ad foecunditatem vegetabilium in genere, & maxime vuarum maturitatem requiruntur, quam in meridionalibus calidioribus regionibus, ubi non modo plantæ, sed & ipsa animantia tam domestica quam sylvestria ob auctiorem nutritionem majori incremento majorique perfectione, sapore quoque gratiori eminent omnibus iis, quæ tellus septentrioni obversa profert.

8. QVEMADMODVM vero Hungaria præ foecundissimis Germaniæ regionibus primas tenet, & tam vegetabilium, quam animantium fertilitate atque nitore celebratissima est; ita etiam vites fructum ferunt, qui nobilem & generosum largitur potum, vinis Italicis & Hispanicis non postponendum, Germaniæ autem vinis merito præferendum. Eorundem mentionem perpaucis facere instituimus, enumerando ea, quæ celebritate vndiquaque feruntur. Est autem primi ordinis Tokauiense, quod in cacumine alti montis, qui in sinu auri mineras fouet, non adeo insigni copia provenit, sed delicatissimum, & hinc tantum ad aulam Augustissimi Imperatoris defertur. Huic non secundum est, quod in oppido sancti Georgii singulari artificio parant, & vocatur Sanct Georger-Ausbruch: maturiores ibi & semi passos a minus maturis separant ex vuīs acinos, ex quibus, non secus ac Italia cum lachryma Christi, exprimunt non magno pondere succum, qui promanans & afferuatus gustum summa suauitate afficit, & propter gratam nervis & spiritibus generositatem totius œconomiae animalis vires & functiones egregie recreat ac sustinet. Vilioris autem sunt conditionis imbecilliora nempe
& sa-

& saporis paululum acidiusculi, nec non adeo caro pretio venduntur, quæ ex reliquiis vuarum in dicto Sancti Georgii oppido conficiuntur. Deinceps laudem etiam merentur Edenburgensia vina, quorum præcipue sunt circa Rustum & Neosidlensem lacum, quæ in arenosis locis proueniunt. Præterea magna adhuc copia vinorum in Hungaria existit, diuersisque in locis vitis colitur, neque incelebre est vinum illud Hungaricum rubrum, quod circa urbem Budam, Ofen, terra largitur.

9. QVOD attinet ad naturam & virtutem Hungariæ vinorum, certe ea pereximia est: nam generositate & salubritate non cedunt Italicis vel Hispanicis; paucam enim acidi tartarei falis quantitatem obtinent, præsertim ea, quæ superius laudauimus: spiritu autem sulphureo grato eoque aromatico abundant. Equidem non eam, quam merentur famam, hætenus obtinuerunt, fallax enim non modo vulgi, sed & medicorum fuit persuasio, vinum Hungaricum insalubre morbum Hungaricum progignere: cum tamen potius dira hæc lues pauperes, imo peregrinos exerceat, & ab aquarum impuritate, æris inæqualitate & intemperantia longe rectius ejus genesis deriuetur. Potius vinum hoc saluberrimum iudicamus, ipsa teste experientia: neque enim etiam liberalius haustum dolore caput gravat, modo non fuerit adulteratum, neque nervos afficit, ut potius affectibus spasmodicis, podagræ, scorbuto, hypochondriaco malo præ Rhénano aliisque, quæ multum acidi in mixtura admittunt longe sit accommodatius. Tandem, quod boni vini character est, agilitatem, vigorem & leuitatem largius potum in toto corpore relinquit, manifesto documento, ex ejus usu spiritus, nec non vitalem circulum excitari & insensibili modo hoc, quod grauat, quodque molestum est sanguini, euacuari.

10. Cum igitur vinum Hungaricum præ aliis quam plures peculiares proprietates gerit, de iis etiam paucis mentionem injicere hoc loco allubescit. Singulare vero illud est, quod non bene æris accessum ferre queat, mox enim, si
aut

aut vitra aut dolia ad aliquod spatium fuerint vacua, colorem & cum eo saporem mutat atque amittit. Protinus nimirum ejus color albus ipsi quasi proprius transit in flauum seu fuscum, & clarum, quod erat, vinum, turbidum euadit, idque sæpe paucis diebus. Experiuntur talem inuersionem maxime vina ignobiliora, acidum admixtum fouentia, & quæ recentia sunt: immunia autem ab hac labe persistunt generosiora Toccauiensia, sancti Georgii Nusbruch, item Rustianum, præsertim si soboles boni autumnii fuerint. Hæc non diminuto sapore, colore & virtute longos annos perdurant, tantum quod dulcedinem, quæ recentibus est propria, cum senio quodammodo deponant; quare non opus est hæc vina sulphuris famo imprægnare vel dolia repleta seruare. Memorabile autem est, quod ab admixtione vini Rhenani aut alterius acidi omne Hungaricum illico non tantum alteretur, sed & ab indole sua plane deflectat & corrumpatur: quinimo obseruauimus, vinum ipsum Hungaricum vetus paululum acidum non esse nouo addendum; vnde, cum tanta difficultas sit pro implendis doliis vina exacte similia in promptu semper habere, nisi periculum, præsertim in ignobilioribus Hungariæ vinis subire velimus; elegans stratagema inuentum fuit: filicibus mundis replentur dolia loco vini, quod elicitur, ita quælibet Hungarici vini species salua & incorrupta usque ad vltimam guttam diutissime permanere solet. Ratio autem, quare hæc vina præsertim acidum in mixtura fouentia, ignobiliora puto, ad aëris accessum tam subito mutantur, neque acidi vini vel alterius heterogenei miscelam tolerare queant, nulla alia est, quam, quod acidum in sulphureum vini principium agere soleat, adeoque hoc pacto crasin, texturam (ex qua proxime resultat sapor, color & virtus) penitus inuertat ac destruat: actio autem & reactio acidi sulphure per liberioris aëris aditum, qui intimius admissus actiua sua expansiua virtute diuersas partes, quibus fluida constituuntur, varie inuicem agitatur, multum promovetur. Quamobrem etiam spiritus tartari, mellis, mannæ, qui acido & oleoso prin-

(Hoffm. Opusc, varii argumenti.)

T

cipio

cipio constant, item liquor ex spiritu vitrioli, nitri dulci & spiritu cornu cerui compositus, si per tempus libero aëri exponantur, induunt protinus colorem ex flauo rubicundum. Denique vina Hungarica hoc habent peculiare, quod melius conseruentur & successiue generosiora euadant, si tantum a primis facibus crassioribus liberentur, postea vero illis non amplius spolientur, in fundum secedentibus particulis tartareis, sie sollen über der Mutter liegen bleiben.

11. PROGRESSVM jam etiam facimus ad nobiliora Germaniæ vina, inter quæ principem locum tenent ea, quæ ad fluuium Rhenum, Moenum, Mosellam & Neccar proueniunt in locis præsertim montosis, soli meridiano obuersis: hæc enim longe salubriora iis, quæ in planitie & a fluminibus diffitis terris proferuntur, annotantur, vnde celebria sunt vina Rhenana, Moenana, Neccarina, Mosellana. Quemadmodum autem vina inter se etiam vnius ejusdemque districtus differunt (nam quæuis terra distinctas suas mineras, cereuicias, ingenia hominum varia, nec non vina cuius loco progignit) ita Rhenanum per longam & constantem annorum experientiam & consensum tam phylicorum quam medicorum & gratia & salubritate reliqua omnia exsuperat: vnde Germanicorum vinorum princeps non immerito debet censei. Intelligimus autem per Rhenanum illud, quod ad Rhenum nascitur. Ex hisce palmam refert Hocheimense, quod a principibus & magnatibus maximi æstimatur. Nomen suum adeptum est a pago Hocheim, cujus soli partus existit, e regione vrbs Moguntinæ non vltra dimidium milliare ex altera Rheni parte sito. Et notabile est, quod vina, quæ non procul ab hac vrbe cis Rhenum reperiuntur, reliquis Rhenanis sint meliora. Secundum locum obtinet Cocheimense, a pago Cocheim ita appellatum, bonitate non multum inferius Hocheimensi. Cæterum Rhingauia nobilis & delicati vini abundat copia, non tamen ejusdem in quolibet loco virtutis. Præstantissimum habetur Rudesheimense, a pago Rudesheim prope Bingam nomen adeptum, quod spirituositate, &

te, & ob acidi defectum gratia reliquis Rhingauia vinis præcellit: exprimitur enim ex vuis speculiaris speciei dictis Orleans, quæ tantum in hujus pagi certo monte & in nullo alio Rhingauia loco perfectam maturitatem & dulcedinem acquirunt. Hæ vuæ Bufflingensibus sunt majores & dulciores. Laude quoque eximia extollitur Iohannesbergense, & id, quod vineæ Erbacum inter & Hattenheim prope fontem, dictum Marck-Brunn, elargiuntur. Subsequitur postea Rauenthalense & Neuendorffense. Hæc magis quam recensita, sua aciditate palatum excitant & jure merito inter meliora numerantur. Reliqua vina, quæ Geissenheim, Winckel, Oestrig, Elfeld, Ober- & Vnter Wallef proferunt, etiam encomio digna sunt, prædictis tamen aliis Rhingaviensibus prærogativam cedunt. Pleraque titulo Moguntiacorum insignita vina & Rhingauientia aciditatem præ se ferunt, & memorabile est, quod maxima pars ex vite acinos proferente exiguæ dimensionis, Germanice *Rußling*, dictam originem suam trahant. Hæc intensiori solis eget feruore, vt vuæ perfecta donentur maturitate, & vinum palato gratum ac spirituosum porrigant: secus enim ob non depressam sufficienter aciditatem vsui & sanitati minus conueniunt. Illud autem commodi habent hæ vuæ, quod vina dent valde durabilia, quæ sub annis semper meliora & generosiora euadunt, & grata aciditate gustum feriunt, id quod huic effectui assueti magni æstimant. Dicta hæc loca quotannis mille quingenta plus minus dolia, vulgo *Stück Faß*, quorum quoduis capit XVI. amphoras (*Eimer*) elargiuntur: nihilominus bonum Rhenanum caro emitur pretio, neque vix in his terris, præsertim Misnia, Thuringia, Saxonia, Marchia, Silesia venale prostat: vetus enim Franconicum pro veteri Rhenano venditur. Maxima vero pars vini proprie sic dicti Rhenani jam descripti, Coloniam, in Belgiam, Angliam, Hamburgum, Lubecum nauibus excepta Rheno & mari transfertur. Causa etiam, cur tam rara auis in his terris sit verum Rhenanum, hæc videtur, quod hujus districtus homines blando & dulci sapore

plus, quam grato acido delectentur. Hinc etiam venopolæ egregie fallunt, dum sub nomine Rhenanorum Franconica, quæ gratiora existimantur, non sine culposo lucro imperitis diuendunt.

12. POST Rhingauientia descendimus ad Baccharacensia. Hæc illis sunt imbecilliora, nec tam diu durant, nihilofecius gratia & salubritate sese commendant. Procreſcunt ex solo valde nigro, ſciſſili, qui egregie radios ſolis concentrat, repleto. Inualuit mos hic locorum gratiam quandam hiſce conciliare vinis, dum nempe vaſtis doliis, muſto repletis, ſubdunt carbonem viuos, quorum calor dolium, cuius partes mirum in modum exterius ob ſiccitatem dehifcunt, penetrat, nulla tamen in terram prolabente guttula ob humiditatem, a qua ſuperficies interna concava doli protegitur, ne aſſerculi doliarii aridi ſe deſerant. Hoc labore efficitur, vt muſtum non tanto impetu efferueſcat, quo pacto aciditas auertitur & gratus ſapor reſultat, Germanice vocant, geſeuerte Weine. Salubritati tamen vinorum ita minus conſulitur, & ea, quæ liberæ fermentationi fuerunt commiſſa, ſanitati magis amica exiſtimantur. Notari meretur, quod vina Rhenana hæc omnium excellentiſſima in terris ditioni ſubiectis ſereniſſimi & virtute incomparabilis electoris Moguntini, ex Illuſtriſſima familia lib. BARONVM de SCHÖNBORN, domini noſtri clementiſſimi, benigna natura ex ampliſſimo penu ſuo diſpenſet. Cæterum circa Rhenum & non procul ab eo terra etiam per belle vineis luxuriat, ex quibus non ignobilis notæ vinis cellæ ditantur, vt ſunt Hambachica, Pfeddershemica, Riderbergica, Affenſteinensia, Oppenheimensia.

13. DICENDVM etiam aliquid eſt de Palatinis: creſcunt magis in terris planis ex vuis variarum ſpecierum ſapidis ſuculentis: ætate fiunt multum ſpirituosa, ſed ſulphure vapoſo caput grauunt. Huius generis ſunt Wormacensia, & præcipue die lieben Frauen Milch, Forſtiana, Edinghofensia, Ambacensia Roteriana. Neque ſilentio transmittenda ſunt, quæ in amoeniſſimo diſtrictu inter montes & hortos, vulgo Berg,

Berg-Strassen succrescunt. Hæc prædictis sunt tenuiora, oligophora, ob acoris & spirituositatis mixturam non ingrata, propter celeriores etiam per renes & alia emunctoria transitum caput & nervos minus afficiunt, & salubritate præstantissimi usus sunt, minus tamen ferunt ætatem: nam post sextum annum ad summum spirituascentiæ gradum deueniunt. Optima ex istis sunt Auerbacense, Bensheimense. De Mosellanis & Neccarinis illud notari velim, quod ob temperaturam acidi & spirituosæ principii copiamque aquæ pura sint, suauiora, tenuia tamen, & quælibet petant vesicam, hinc calculosis & podagricis valde appropriata existunt, dum horum effectuum elementum, nempe tartarum, egregie ex sanguine eliminant: facile tamen vapescunt, situm contrahunt, præsertim Neccarina, ætate viribus spoliantur: unde ad loca diffusa non multum transportantur. Pessimus mos quibusdam est illa sulphuris fumo imbuere vel spiritum vini illis affundere, quo sæpe contingit, a Neccarinis & capitis dolores & ventriculi tormina suscitari.

14. FRANCONIA insignem alit vinorum abundantiam, hæc autem Rhenanis quoad salubritatem multo sunt inferiora, hinc quoque viliora. Sulphure gaudent spiritibus corporis nostri minus amico, ut largius pota capitis grauitatem relinquere & torporem membris imprimere soleant: nihilominus quædam generosa sunt & magna vi actiua prædita. Ex spirituosæ autem eminet illud, quod crescit in monte, dicto der Stein, prope Herbipolim, qui aspectum cum vicinis sibi continuis obtinet tam pulchrum, ut dubitare fas sit, an ullibi in Germania sit reperire similem montium tractum, qui in vna recta linea superficie nullibi magis depressa aut eleuata exhibeat vinearum seriem adeo amoenam, longam & altam, & quæ ita oculis simul sese præsentet, virescens eos alliciat, detineat ac recreet. Vinum, quod exhibet, Stein-Wein appellatur; hoc potest esse viliorum acidorum correctiuum & medicina, unde illi, qui callent artem miscendi vina, pauca quantitate genuini Steinensis, ignobiliora Rhenani vel Pala-

tina egregie non sine magno foenore fortificant, & palato delicatorum sapida reddunt. Ex monte, cuius cacumini arx Herbipolensis superstructa est, qua ille meridiei obuertitur & vulgo die Leisse nominatur, colligitur vinum, quod bonitate Steinense adhuc vincit, sed in sola cella huius arcis, vinis optimis refertissima, gustandi illud occasio quærenda. Magnæ etiam æstimationis sunt Sommerhausana, Randesakeriana, Frikenhausana & plura alia in hoc districtu, quem Mœnus alluit. Vini Iphoffiensis Redelseensis magna etiam copia in Bohemiam Saxoniamque transfertur. Præterea iuxta Moenum fluuium & suauitate & salubritate sese commendant Wertheimense & Klingenbergense. Hoc ad saporem Mosellani multum accedit, capiti minus est offensum. Pertinent etiam huc magnam affinitatem cum Klingenbergensi alentia, quæ habentur ex vineis non procul ab Hanouia cultissimis. Michelbacense, Hirschheimense, Nierensteinense, Hochstattense, quæ vina propter tenuitatem & faciliorem per sanguinem transitum & gratum acorem vsu quotidiano inter cibos sunt sanissima & tertio demum vel quarto anno euadunt optima: ætate autem illorum spirituositas magis decrescit, quam increscit. Aliam vero obtinet naturam, quod prope Franfortum, vulgo Sachsenhausen habetur, quod sulphure quodammodo vaporoso, caput afficiente constat: terra enim Franfurtensis admodum sulphurea est, & scaturiunt ibi fontes, qui purum sulphur olent.

15. ANTEQVAM de salubritate & virtute medicamento-
sa hætenus recensitorum Germaniæ vinorum & præcipue
Rhenani verba faciamus, ratio ipsius ordinis postulat præmit-
tere ea, quæ ad cognitionem exquisitiorem virtutum scitu
prius necessaria sunt; vnde prius elementa sive principia &
ingredientia vini, ex quibus naturam ac indolem eius per-
noscemus, paulo accuratius exponere tubet. Quod si vero
vllò in mixto famosa illa quinque chymicorum principia of-
fenduntur, certe ea clarissime conspicua fiunt in ipso vino:
inest enim ipsis sulphur, sal & volatile, quod spiritus vel
mer-

mercurii nomine insigniunt. Prostat quoque in ipsis aqua & terra, & ab horum principiorum indole, propotione & mixtione tanta vinorum diuersitas ratione consistentiæ, ponderis, saporis, odoris, coloris & virtutis dependet. Per sulphur intelligimus illud, quod concipit flammam, & cum fluoribus corporis nostri nuptum calorem excitat. Est autem vnum altero tenerius, subtilius, alterum contra crassius, viscosius, terrestrius. Vnum effluuia odore gratissima emittit, alterum graui & ingrato vapore caput replet. Vnum per fermentationem magis attenuatum, clarum & subtile redditum flauo & aureo colore mixturam tingit, aliud densius est minus fermentatiuo motu euolutum, vnde & consistentiam crassiorem, colorem nigrum, pondus quoque grauius vinis largitur.

13. DIFFERVNT quoque, quæ vinum ingrediuntur, salia, & quemadmodum omnium vegetabilium, ita & vuarum sal tartareæ prosapiæ est. Tartarus constat ex terra, oleo & acido: hæc enim iuncta tartariforme sal producunt. Inesse autem vinis talis generis sal, vel ex eo clarum fit, quod omnia vina si supra sint, neque adulterata & fermentationem sustinuerint, si destillentur in vase relinquant magma quoddam acidi tartarei saporis. Demonstrat hoc quoque aceti genesis: nullum enim datur vinum etiam generosius, quod non longiori & moderata digestionem transeat in acetum. Conspicitur autem ipse tartarus ad oculum in lateribus dolii, quem non modo recentia, sed & vetera successiue dimittunt: ipse autem sapor acutus & austerus, qui ferme cuius non adulterato puro minus arte præparato proprius, luculentus testis est. Equidem dantur pure dulcia vina, quæ etiam post destillationem non nisi dulcissimum magma dimittunt, vti Hispanicum, quod hic locorum diuenditur: sed artificialia hæc esse vina ex melle rob passularum & spiritu vini parata, plura sunt, quæ nos conuincunt credere, vel si gemina fuerint vina, non sufficienter passa sunt fermentationem, quæ, dum multum nimis arte concentratur, impeditur & ita tartarus, qui

qui matrem dulcedinem habet, & formam ex fermentatione nanciscitur, parcius generatur. Sicuti autem tartarus non vnus eiusdemque indolis est, dum vel acidum exsuperat, idque magis fixum vel volatile, vel terra, quæ pariter vel ad lapidis, luti aut calcis naturam accedit, ita etiam in nonnullis vinis tartarus est valde subtilis, volatilis, in aliis crassus, fixus, terreus, calcareus, in quibusdam tartarus copiosus, in nonnullis rarus & paucus.

19. TERTIVM adhuc restat principium spirituosum seu mercuriale. Per hoc non aliud intellectum volumus, quam aëreo-æthereum: subtile enim illud aëro-æthereum principium, sicuti omnia corpora pertransit eorumque poros & interstitia occupat, ita & illud in vinis in quibusdam in maiori, in aliis in minori copia videtur. Ad oculum illud demonstratur, quando vinum ex vno vase in alterum transfundimus: globulos enim aëreos copiosos ex fundo in forma bullularum in altum ascendentes ipsumque aërem petentes non sine iucunditate & oculis & naribus senties, Germani vocant *lufftige Weine*. Gaudent hoc elemento tenui & reuera salubri vina, quæ liberam fermentationem passa fuerunt: tunc enim rarioris fiunt texturæ & copia aëris & ætheris intermixti ipsa leuia, subtilia & rara reddit, vnde salubritate ea antecedunt, quorum fermentatio de industria fuit cohibita, quod fit, si dolia semiplena firmissime obturantur, vina quidem hoc pacto fortiora sed ob defectum subtilitatis & spiritus aërei minus sana evadunt. Efficit etiam hic internus vini motor, vt vinum celerius venas corporis nostri & emunctoria pertranseat, vnde recentia vina vtut maiorem præ veteribus copiam terræ & sulphur minus subtilisatum contineant, nihilominus ob copiam incolentis ætheris salubritate antiquis sæpenumero sunt præferenda.

20. DE principio aqueo, ut longius edisseramus, non res erit magnæ operæ: est enim illud necessarium cuiusuis vini ingrediens & vehiculum substantiæ actiuæ vini, quam pro diuersa proportionem quantitatis in actiuitate & vehemen-
tia

tia sua vel mitigat vel auget : vina enim, quo tenuiora sunt, id est, quo maiorem aquæ copiam admittunt imbecilliora & minus calida existunt; quo autem minor humiditatis ea ingreditur quantitas, fortiora sunt, vnde etiam magis inebriantia: consistentia enim, imo pondus vini aqueo elemento & terreo vnice debetur.

21. TERRÆ elementum num ad vini constitutionem etiam concurrat, merito iam in quæstionem venit. Equidem non facilis erit laboris res, chymica aut quæcunque alia analysi ex ipso vino solidum terreum principium elicere nihilo-fecius quodocunque lentorem & viscositatem, quam vina, præsertim recentia, sæpenumero induunt, nec non illum mucum tenacem, qui, circa orificia vasorum ex vino aeris ministerio generatur, consideramus; fateamur necesse est, hæc ipsa effecta non nisi solido terreo principio, quod fluiditati contrarium est, deberi. Deinceps nulla aqua est, quæ non sit particeps terræ, vnde omnis aqua etiam fluidissima sub quavis destillatione repetita in fundo relinquit terræ portionem: neque vllum in rerum natura datur oleum vel sulphur vel sal, quod non in mixtionem suam terram recipiat, sicuti encheirisi chymica ex oleo etiam calidissimo caryophyllorum insignis fixæ terræ educitur copia, quod fit, si cum spiritu flammifico meo, cuius præparationem vide *in observationibus meis physico chymicis lib. II. observ. 3.* ad solam mixtionem accenditur. Vt itaque vnum sal tartareum vel oleum & sulphur præ altero magis vel minus terrestre est; ita etiam non tantum aquæ, sed & sali tartareo & sulphuri vinorum terreum quoddam adjunctum esse principium, nemo penitus reuocabit in dubium.

22. Ex his præmissis facillimum erit concludere, vnde tanta differentia & varietas vinorum, non tantum ratione saporis, odoris, coloris, consistentiæ, sed maxime virtutis pendeat. Nolumus hic in diuersas vinorum species inquirere & horum elementorum naturam vel proportionem scrutari, quod nimis longum pertractare foret: nobis saltem hoc loco me-

(Hoffm. Opusc. varii argumenti.)

V

mi-

minisse Rhenanum, & de quo nobis iam sermo est, salubre temperatum Germaniæ vinum quoduis, in sinu suo fouere non multum crassi terrestris minus resoluti vel intestina agitatione subacti sulphuris, sed potius ipsis inesse sulphur valde subtile, gratum, delicatum, fermentationis actu solutum & attenuatum, vnde colore & odore suaue se sistit. Valet hoc maxime de vinis veteribus. Notabile est, recentia colore esse vt plurimum diluto, minus flauo, consistentiæ turbidioris, quæ tamen temporis & annorum successu claritate, suauitate & saporis gratia, nec non colore aurum æmulante cuiusuis palato se commendant. Præterea Rhenana vina magnam copiam acidi, non tamen fixi terrestris, sed teneri & subtilis admittunt. Patet hoc ad oculum, quando hoc vinum destillationi committitur, tunc acidi penetrantissimi insignem quantitatem in vase relinquit. Principium spirituosum æthereum nostra quoque vina magna in copia ingreditur; quod maxime in vinis recentibus ex numerosis bullulis, ex vino in altum sese eleuantibus post factam agitationem vel ex vno vase in alterum transfusionem visitur. Præsens quoque est aqua ceu vehiculum substantiæ actiuæ in vinis Rhenanis satis copiosa, quæ partim per destillationem factam oculis sistitur, partim etiam ex tenuitate vini colligitur. Paucis: elementa, quæ fluida & quæ subtilia lenis, tenuis & raræ sunt substantiæ nostra vina constituunt: illud autem, quod graue, densum, terrestre & viscosum tenax est, ab eorum mixtura est remotum.

23. CVM autem & Germaniæ salubria vina ipsaque Rhenana, non quod omnia vnus eiusdemque indolis vel virtutis sint, sed quæuis ferme loca, imo in certo loco certus quidam districtus vina peculiaria inter se differentia producat, merito hujus causa inquirenda venit. Dicimus autem specialem cuiusuis vini naturam, facultatem & vim a sole ceu patre, & solo ceu matre, nec non specie vitis diuersa vnice dependere. Sol, sicuti in vniuerso caloris spirituscentiæ & sulphurei volatilis elementi in mixtis causa & auctor est, ita etiam

etiam actiui calidi spirituosi sulphuris in vinis genitor & parens existit. Patet hinc vera ratio, quare eæ regiones, quæ magnum & diuturnum solis æstus experiuntur, valde generosa exhibeant, nec non ea loca, quæ a vento septentrionali & maxime aquilonari ceu frigidissimo defensa sunt solique meridiano libere patent, vti sunt montes, qui austrum spectant, grata & fortia vina largiantur, opposita autem cæteris plagis loca vinum longe ignobilius progignant. Dilucescit & porro ratio, quare æstas & subsequens autumnus serenus & feruidus dulces vuas & generosa vina, nebulosus, nimbosus & frigidus e contra immaturas vuas cruda vero & acida vina proferat.

24. VERVM enimvero ad differentiam vinorum non sufficit sol habemus enim compertum per experientiam, in locis eodem sole respectu situs gaudentibus, diuersæ tamen indolis ratione spirituascentiæ, imo salubritatis vina prouenire. Exemplo nobis sit tractus cis Rhenum Moguntinæ vrbi obuersus, vbi pagus Hocheim, Cocheim & Cassel situs identitate & propinquitate gaudent: nihilominus Hocheimense multis parasangis vincit Cocheimense & hoc Cassellanum, quod vilioris conditionis est. Cuius differentię causam merito derivandam esse cenleo ab ipso solo. Obseruauit id iam suo tempore antiquissimus naturæ scrutator HIPPOCRATES, qui lib. IV. de morb. ait: *Considerandum, quantum locus loco etiam valde vicino ad vini suauitatem præstet, quamuis sol æqualiter sufficiat, cum in hoc terræ humor sit, qui vinum suauē exhibeat, in illo vero minime. Sunt quoque non agrestia pauca in loco nascentia, quæ ad vlnæ spatium translata non amplius produci comperias. Neque enim terræ eiusmodi humorem translato accommodatum habet, qualem illa agrestibus plantis suppeditabat. In his enim sunt quedam magis virulenta, quedam magis humida, quedam dulciora, sicciora quedam, asperiora etiam quedam aliaque sexcenta aliter se habent; & hæc summa ratione a diuino sene sunt producta. Terra enim mater istius humoris est, qui ad nutritionem vegetabili-*

um pertinet, & quamuis omnes plantæ aqua fluuiatili ceu catholico & accommodatissimo nutritio succo alantur, nihilominus diuersæ naturæ terra, per quam ad radices transit, naturam & genium singularem cum ipsa communicat, neque dubium est, ipsa effluuia earum rerum, quæ sub certa terra custodiuntur, eam mirifice disponere & alterare, & hac ratione etiam vegetabilia ipsumque vinum certa qualitate imbueri. Curiosum est, Hocheimenses vineas maxima ex parte intus alere fossiles carbones; qui aliquid conferre possunt, quod illud vinum ad succinum accedentem odorem & saporrem præ se ferat.

25. DISTINCTA tandem natura vinorum ex differenti specie vitis non sine ratione ducitur ac deriuatur: multum enim differunt inter se vites & vuæ. Ita quædam vuas copiosas, quædam paucas, quædam succulentas maiores, hæ parvas gerunt, nonnullæ vuæ citius ad dulcedinem & maturitatem, aliæ tardius ad eandem perducuntur. Ex paruarum vuarum numero, quæ exilia grana fouent, sed tardius ad dulcedinem perueniunt, sunt illæ, quæ dicuntur *Rußling*, carnosæ & succi plenæ sunt, die *Heinisch*, quæ copiosum mustum, sed minus forte vinum efficiunt. Istæ autem species, quæ vocantur *Gutedel*, *Elbing*, facilius ad maturitatem perueniunt, dulcedine quoque se commendant &c. Notatu quoque hic dignum venit, quamuis speciem vitis suam peculiarem culturam, nec non sectionem conuenientem requirere. Hæc, qui non probe callet & intelligit, vitem foecunditate sua facillime priuare potest.

26. QVEMADMODVM vini omnis qualitas, videlicet sapor, odor, color, virtus & consistentia vnice a crasi, mixtione & proportionem elementorum certum vini genus componentium dependet; ita etiam eius conseruatio, quæ non nisi duratio quoad easdem facultates & qualitates est, ex conseruatione eiusdem craseos ac mixtionis proficiscitur: salua enim mixtione & vnione elementorum certum corpus constituentium, mixtum in sua natura conseruatur: illa destructa perit & de-

& destruitur color, sapor non minus quam virtus. Exploratum autem per attentam observationem est, nihil magis fluidorum texturam ac crasin custodire, eamque fartam rectam immunemque ab omni corruptione & immutatione seruare, quam spiritus, qui nihil aliud sunt, quam sulphur mixti intestino motu resolutum & subtilisatum: sulphur enim per vnanimem philosophorum sententiam balsamum est corporum, ea ab omni corruptione defendens: sulphur custos & conservator cuius corpori propriæ craseos est, neque in regno animantium datur aliud in sanguine, quod eum totumque corpus præservat a putredine, quam spiritus, qui est in sanguine sulphuris motu intestino resoluti soboles, qui, quamdiu præsens est, vitæ particeps corpus efficit. Ex eo iam clarum fit, quod omnia spirituosa, & generosa vina, nec non antiqua haud facile suscipiant muscositatem, situm, vel colorem aut saporem mutant: ex aduerso cuncta recentia, tenuiora, imbecilliora, multum aquæ & acidi tartarei, sed parum sulphuris complectentia, vti Neccarina, Mosellana facillime alterentur & vappam Ræan suscipiant.

27. Ex iam dicto fundamento intelligi quoque ratio poterit, cur sulphuris vulgaris fumus vel solus, vel cum aromatibus mixtus, Germanice *der Einschlag*, a multis sæculis per constantissimam experientiam tanquam præsentissimum remedium ad conseruanda vina adhibeatur: quare in usu habent, dolia, antequam ipsis immittant vinum, sulphurare vel sulphuris vapore imbuere, quinimo ipse fumus adhibitus vacuis doliis, ex quibus vinum emissum fuit, ne vappescentiam vel situm noxium contrahant, ea per longum tempus præservat. Quoniam vero promptissime vinum vappam colligit, quando ad aliquod spatium euacuatum fuerit, ut liber pateat aeri ingressus, quare ut hanc impedian, sulphuris fumo vacuum spatium implent. Præterea sulphur & hanc virtutem medicamentosam custodit, vt vina turbida clara reddat, heterogenea deiciens in fundum, nec non acidum saporem temperet, hinc euenit experimento quotidiano, vina, quo crebri-

us transuafantur & sulphurantur, eo mitiora euadere. Ex quo intelligitur, sulphur esse veram vini animam eiusque vitam, non aliam ob rationem, quam, quod spiritu suo penetrantissimo minima interstitia fluidi vinosi occupante, intestinum partium fluidarum motum, qui genuinæ & nativæ crasseos conseruator est, tueatur. Verum enimvero vehementer dolendum est, non adeo istum sulphuris vaporem amicum neruis & capiti deprehendi, vnde plures capite imbecilles a vinis sulphuratis pessime sese habent: quamobrem nonnulli vel plane ab omni sulphuris fumo abstinent, & loco huius accenso thure vel succino, aut spiritu vini aromatizzato accenso dolia implent; quæ res non est de nihilo, sed maximopere commendanda: nihilominus monendum est, si vina fuerint vetusta & generosa, illud procedere, non autem quando imbecilliora & recentia fuerint: in his enim sulphuris fumus, qui tamen aromaticis effluuiis condiri potest, longe multumque aliis præferendus. Vltèrius commendamus hanc encheiresin, vt vas impregnetur vel accenso floris maccis, aut frustuli nucistæ in spiritum vini aromatizzato intincti fumo, quando ipsum vinum depromere solemus, wenn es zum Zapffen gehet, hoc enim modo vappescencia auertitur, & saluus ac integer manet sapor. Porro quoniam spirituositas vini est præseruatric corruptionis, nonnulli spiritu vini ex ipso vino parato sufficienti quantitate in vasa infuso ipsa eluunt, & postea vino replent, neque felicius, si in superficie procliue vinum est ad vappam ipsa tollitur, ac si aliqua cochlearia spiritus vini vinosi infunduntur.

28. CONSIDERATA hætenus causa, quæ vinis integritatem & durabilitatem præstat, perutile quoque esse arbitramur, si ortum & causam corruptionis inquiramus. Sicuti autem illud, quod conseruat motum intestinum partium certum mixtum constituentium, spirituosæ naturæ est, ita vicissim & illud principium, quod motum mixturæ huic contrarium internum introducit, siue labis & immutationis causa est, agilissimæ & tenuissimæ mobilissimæ indolis est: estque illud, vt
cla-

clarius mentem nostram exprimamus, aeris nostri atmosphæ-
rici fluidum. Dicit enim vix potest, quanta potentia aer al-
terare, ac mixtorum crases destruere soleat. Quantum vul-
neribus & vlceribus, item abscessibus aer intromissus noceat
res inter chirurgos est notissima. Ipsæ acidulæ & salubres
omnis generes aquæ, quæ nostra sententia ex principio spi-
rituoso minerali operantur, protinus cum sapore omnem su-
am virtutem, si liber aeri accessus concedatur, amittunt; olea
& spiritus chymici ad aeris communicationem successiue quo-
ad colorem & consistentiam mutationem subeunt. Pluribus
hanc assertionem experimentis, quæ etiam in promptu essent,
corroborare possemus, si instituti posceret ratio. Illud au-
tem dicimus, nil vere vinis tam inimicum & contrarium esse
ipso aere, vnde omni studio omnique modo a liberiori eius
aditu illud defendere debemus qua causa intellecta, non dif-
ficilis est ratio, cur repleta semper debeant esse dolia, quod
communiter affusione eiusdem generis vini solent efficere: at
vero, cum sæpius detrimentum capiat & non leuem immu-
tationem, si vinum non sit eiusdem ætatis vel loci, quod fre-
quenter obtineri nequit, curiosiores alium excogitarunt mo-
dum: nempe filicibus mundis implent dolia, eosque loco
vini absumpti siue per aerem siue emissionem substituunt, quod
non tantum ad Hungarica, sed commode etiam ad omnis ge-
neris vina non sine magno commodo & lucro potest appli-
cari. Alii, ne aer in vinum operetur, doliis quantitatem
olei oliuarum infundunt, vt superficiem eius obtegat, id,
quod reuera non vilipendendum: apprime enim vappam im-
pedit, quæ mox ad aeris liberi sufficientem attactum ingrato
odore non modo vasa, sed & contentum replet. Et quoni-
am aer tam infensus mixturæ vini est, hinc spiritum vini vel
sulphura vina in doliis vacuis accendunt, & hoc pacto, quæ
secunda sulphuris virtus est, per flammam omnem ex vase ae-
rem expellunt. Curiosum autem est, quando aer vappidus
vel mucidus, qualis sit a vino vappido, stagnat in vase, nec
sulphur, nec spiritum vini in dolio flammam concipere, sed
statim

statim exstingui, cuius rei ratio nulla alia videtur quam aeris crassi resistentia: tunc opus est, vt orificiis apertis, beneficio follium aerem cum impetu impellamus, impurum eiiciamus, vel apertum falsa calida, item frigida aqua vini receptaculum eluamus ac purificemus.

29. NON omnis vero aer æquali virtute & facilitate corruptionem in vino suscitatur, sed, sicuti calidus & humidus ad efficiendam putredinem in animantibus efficacissimus est, ita & hic ipse maxime vini texturæ est infestus. Testatur id experientia: non enim lubentius damnum experiuntur vina, quam tempore autumnali vel etiam æstiuo, si tempestas diu fuerit pluuialis; contra frigidus, siccus & serenus aer non ita nocius vinis deprehenditur, quapropter in cellis, quæ non satis profundæ sunt, quæ humiditate scatent, & diurni caloris participes fiunt, vina non diu subsistunt integra, præsertim recentia, & quæ supra fæces, Mutter, jacent. Optima autem ea sunt loca subterranea ad conseruationem vini, quæ septentrionem spectant, profunda, sicca sunt, æstate frigida, hieme autem temperata: quapropter ob cellarum bonarum defectum non omnes vrbes bona vina possident. Deinde experientia a longo iam tempore confirmauit, ad ventorum flatum & tempestatum statum varie sese habere vina. Ex omnibus autem venti calidi & humidi & tempestas humida ac calida vinis minus fauuet, vti auster & africanus, quia atmosphæram copiosis similibus corpusculis implent: septentrionalis vero & orientalis ipsis magis est amicus. Suo jam tempore magnus medicinæ parens HIPPOCRATES austri noxam notauit, qui *lib. de morbo sacro p. 91.* scribit: *Cuncta corpora ventum austrum sentiunt, & ex siccis humida, & quæcunque in domibus vasa sunt juxta terram cum vino ac alia copia liquorum, ea omnia austrum sentiunt & formam in aliam speciem transmutant.* Optimum itaque consilium est, cellas ab æstiuo calore, a flatu austrino præseruare, firmiter obturatis cellarum spiraculis. Ne autem aer ibi stagnans putrescat, circa tempus nocturnum vel matutinum die existente sereno, vento

vento flante vel orientali vel aquilonari eadem aperire convenit, vt pertranseundo ventilent & insitum aerem purificent.

30. Hoc loco quoque silentio non prætereunda est trita & vulgata obseruatio, de mutatione vini in vasis circa tempus, quo vites florent. Curiosiores nempe annotarunt, tunc temporis recentia & dulcia quoque vina quandam experiri fermentationem & transmutationem imo eadem ex do-
liis effluere, vel si eorum orificia nimis arcte clausa sint, ipsa vasa magno cum damno disrumpere. Huius effectus ratio certe non in florem reiicienda est, sed potius in talem aeris statum, qui tunc temporis, nempe circa solstitium, quando vitis floret, penetrantissimo & mobilissimo calore agitur, vnde non mirum, tales subsequi effectus; & certissimum est, quod tunc temporis probe vasa eorumque circuli debeant custodiri ne disrumpantur: si enim a subtili aeris calidi rarefactione, vti in thermometris vel aliis vasis spirituofo liquore repletis videmus, aliquid rarefit, & majus affectat spatium ipsique hoc non conceditur, non aliter fieri potest quin vim suam exerceat in ipsa receptacula. Experimus clarissime talem disruptionem in lagenis vitreis densissimis, si enim illæ spiritu vini aut vino generoso Italico vel Gallico fuerint totæ repletæ & obturaculo firmatæ, tempore æstiuo vel sub calore externo facillime diffiliunt, vnde necessaria cautela hæc est, ne vnquam spirituosos liquoribus in totum vasa repleamus. Videtur, si rem paulo exquisitius trutinemus, ipsum aeris fluidum, sicuti cum totius vniuersi fluoribus & animalium sanguine, ita & cum vino quandam communicationem habere, quod vel exinde euincimus, quoniam ad impetuosos ventos, ad aquilonares etiam flatus, præsertim si luna simul existit plena, ex orificiis ipsa vina exsurgunt & effunduntur: vnde tunc temporis semper madida eo in loco advertuntur. Humidus quoque & calidus aer, vtut non immediate attingat vina, causatur tamen in ipsis quandam alterationem, turbulenta enim ipsa facit & graua, pendula.

(*Hoffm. Opusc. varii argumenti.*)

X

tum-

tumuis enim aer externus non immediate vinis permisceatur, nihilominus æthereum illud principium, quod ab ipsis excludi nequit, intrinsecam alterationem sentit; non secus ac id contingit in homine, cujus spiritus in sanguine & nervis secundum aeris externi conditionem varie sese habent. Perquam dignum autem observatione est, ab aere vino crasin ac texturam ab intestino vini motu alienam induci, ac situm, dispositionem partium vinum constituentium plane transmutari. Videmus id ex vappa, ex mucro, qui glutinis sæpe naturam acquirit, quique apparet in embolis, si per ea vinum transfudat, nec non ex viscositate pendula conspicitur: aer enim suo motu e sede sua ætherem vini disjicit, qui in fluiditate & tenuitate illum conseruat, & gravitate sua particulas inter se compingit & coniungit: quapropter pendulum vinum mox fluiditatem suam, vehementi facta agitatione & conquassatione cum ferulis, recipit.

31. TANDEM non solus aer, sed certi generis corpusculis actiuis naturæ penetrantis imbutus noxiam vinis mutationem inducere idoneus est, quare a fulgure & tonitru insignem viam, præsertim recentia, non secus ac cerevisiæ experiuntur noxam, facile enim in acorem degenerant. Postea aer frigidus, vappidus vel morbidis effluviis contaminatus, ea statu, crasi & sapore exuit: ideo non sine ratione foeminas menstruas a tractandis vinis arcere, neque vltos odores fortes ex allio, cepis, vel cadaueribus admittere solent. Præstat quoque eum in finem singulis septimanis probe ab omni situ dolia, embola & orificia purgare & polire; cauendum quoque, ne morbosus vel foetidus halitus per siphonem cum vino communicetur. De Rhenano vino illud adhuc monendum esse duximus, hoc omnium optime conseruari, nec facile a statu suo desciscere: non tantum enim ad centum annos durare potest, sed & non facile ab admixtione alterius vini generis, modo non sit dulce fermentescibile, atteratur: cum e contra vina Italica, Gallica pleraque, Hungarica, Neccarina, Mosellana ex facili de crasi ac indole sua deflectant, nec

nec omnem vinorum admixtionem ferant: dulcia enim ad acidi mixturam mox acescunt.

32. POSTREMO gelu penetrantissimum brumali tempore non minus crasin, quam mixtionem vinorum lædit, præsertim si ea fuerint recentia, imbecillia, tenuia, minusque generosa; tota enim massa tunc congelascit, quo fit, vt sapor & penetrantia multum imminuatur; gelu enim vnionem partium mixtum constituentium plane disturbat ac destruit: semel autem immutato situ partium, pristina mixtura ægerri- me restituitur. Manifesto id videmus, quando vinum leni tantum calore in spiritum destillatur, qui reaffusus substantiæ illi, quæ remanet in destillatorio, nunquam ejusdem saporis & qualitatis vinum producit. Minus autem nocet frigus generosis, spirituosus & inueteratis, quia potius hæc ipsa reddit fortiora, quandoquidem phlegma tantum vertitur in glaciem, quo remoto actiuum & spirituosum concentratur, & a fide dignissimis ceu rem exploratam & certissimam habemus. In multis locis Galliæ, etiam prope Geneuam, vina dicta Vrenginer, saluberrimæ indolis per totum annum hiemem- que aperto aeri in vasis exponi, dum existimant, frigoris ve- hementia asperitatem attenuari, & spirituositatem vinis con- ciliari.

33. MEDICVS, qui imperator vitæ & sanitatis est, curam- que corporis humani gerit, eo maxime respicere debet, vt vinum feligat & commendet tam sanis, quam ægrotis, quod sit præstantissimæ & virtutis saluberrimæ. Quodnam autem hoc nomen mereatur iam perspiciendum est. Salubre autem dicimus illud vinum, quod, non lædit, sed potius sanitatem iuuat, quod minus crasin & circulum sanguinis vitalem vio- lat vel labefactat, nec viscerum & membrorum munus ac officium inuertit, sed potius confirmat ac roborat, adeoque digestionem promouet vires reparat, capiti, neque neruis nocet, artubus, præsertim pedibus nullum torporem vel las- situdinem inducit. Ex horum autem censu sunt primo ra- tione natalis soli ea, quæ in locis præaltis & sublimibus,

montosis nempe, in solo, fabuloso, omnis sulphurei & falsi contagii experte, probe tamen culto & foecundato, circa fluuios currentes nascuntur, & meridiani solis actionem libere & diu experiuntur. Talismodi vina in genere sunt saniora iis, quæ in planis locis & a fluminibus dissitis subnascuntur. Cuius rei ratio in eo consistit: solum si firmum, porosum tamen solis radios diutius detinet, cuius vinifico calore succus vitis mirifice attenuatus & subtilisatur. Deinde per solum arenosum pluuialis nutritia aqua egregie filtratur, ipsaque filtratione subtilior & purior redditur: montosa loca autem præ humilioribus aptiora sunt bono vino generando, quoniam a tergo frigidos septentrionales ventos auertunt, qui incrementum vuarum & vegetabilium multum morantur. Insuper purior ibi & magis elasticus aer est, & sol quoque liberius terram radiis suis ferit. Accedit & illud, quod superflua pluuialis aqua, cum non omnis impenditur nutritioni, grauitate sua iterum dilabatur, nec circa radices vitium stagnet, quod in humilibus profundis locis, non sine magno detrimento, accidit. Exoptatissimus quoque vinearum situs circa aquas fluentes est, quod atmosphæra prope illas tenuibus effluuiis aqueis referta est, vnde etiam circa fluuios agri solent esse foecundiores, quia humidiores, ros enim desideratissimus ex vaporibus collectus, de nocte dilabens, subtili suo succo laudatissimum vegetabilibus præbet nutrimentum.

34. SECUNDO loco salubritatem vini ex temperatura eorum accersimus, adeo, vt temperata vina omnium sint optima. Ipsa sanitas nil nisi harmonia & temperies diuersæ naturæ partium, nec non sanguinis temperatus & æqualis humorum motus est. Tuentur itaque maxime sanitatem tam ex alimentorum, quam medicamentorum classe, quæ temperie gaudent, quæ omnis excessiuæ qualitatis sunt expertia. Temperata autem ea dicimus vina, in quibus conueniens proportio elementorum, nempe sulphuris, spiritus, tartari, terræ, nec non phlegmatis cernitur, siue vt rem clarius exprimamus, quæ non nimis sunt spirituosæ, neque nimis crassæ, nec

nec porro nimis cruda tartarea, acidi saporis, non nimis saturati, nec nimis diluti coloris, sed mediæ naturæ. Ex temperata autem elementorum commixtione & legitima proportionem temperatus etiam & naturæ amicus in corpore nostro nascitur effectus. Si vero vllum vinum commendandum est propter temperaturam, & ex eo proficiscentes salutare qualitates, certe vinum Rhenanum hac gaudet prærogatiua. Primo enim est illud spirituosum, nam sub destillatione, vna mensura spiritus inflammabilis dephlegmati saltem vncias duas largitur. Testatur id quoque inebriatiua & analeptica virtus, nec non productio aceti fortissimi ex ipse hoc vino, nam loco regulæ hoc tenendum est; quo generosius vinum, eo fortius acetum, & e contrario penetrantia aceti testatur de spirituositate vini, nam tenuia & quæ carent spiritu debito, vti sunt v. g. hic locorum crescentia, in debilia mutantur aceta. Neque enim putandum est, acetum tantum acidam vini portionem spiritu destitutam esse, cum potius hic ipse subjugatus tantum & depressus ab acido eminentiori & extricatori reddito mixturam ejus adhuc incolat; quod vel spiritus aceti destillatio ex saccharo saturni & ex crystallis viridis æris abunde testantur. Tacemus quandoque saccharum saturni sub destillatione nimis calide tractatum, aere accedente, in flammam verti. Iam vero celebratissimum est, quod Francofurti ex vinis Rhenani præparent acetum, propter suum acorem fortem & penetrantem, cum vna vncia plus præstet virium non solum in medicina, sed etiam in œconomia, quam vnciæ quatuor hujus loci.

35. PRÆTEREA inest Rhenanis vinis sulphur probe extractum, non crassum, crudum, rude, sed subtile, præsertim in antiquis. Crassa & cruda sulphura ingrati sunt odoris, vaporosa sunt, grauant caput, minime autem id de Rhenano dicendum est. Hoc gratissimi & penetrantissimi est odoris, vnde exterius admotum saltem naribus, si vllum, certe hoc analepticum est, iucundissime spiritus immediate afficiens, quod morbo languidi & reconualescentes summo cum fru-

ctu experiuntur. Tenerum etiam hoc sulphur est, quoniam a nimia etiam hujus vini ingurgitatione non facile vini assuetis dolet vel male sese habet caput, seu grauitas vel lassitudo quædam in membris relinquitur, ut potius agilitas & alacritas tam animo, quam toti corpori cum transpirationis laudabili promotione concilietur, id, quod maxime generosa & spiritiuosa, non nimis recentia præstant.

36. TERTIO acidum tartareum subtile vinum Rhenanum constituit, quod ex sapore non minus, quam ex eo, quod a destillatione remanet, cognoscitur. Verum enimvero ob acidi valde copiosi ingressum medici non minus, quam imperiti vina hæc communiter improbare & rejicere solent, dum existimant, acidum non modo sanguini ob metum coagulationis, sed & ipsis nervis esse hostile, quod verum est de acido sibi relicto, præsertim crasso, fixo, at longe alia virtus & efficacia ex mixtura hujus acidi cum sulphure spirituosissimo resultat. Nihil enim est, quod tam egregie contemperet ac demulceat acidi stimulantis & vellicantis naturam, & quod tam gratum saporem & odorem ipsi foeneret, quam spiritus. Habemus clarissima hujus rei testimonia in destillatione spiritus nitri, salis, vel etiam vitrioli dulcis. Quanta corrosiuitas, quam foetus & in gratus odor reperitur in aqua forti? si vero vna ejus pars cum parte tertia spiritus vini rectificatissimi miscetur & per destillationem vel calorem ambo intime junguntur, perit sapor iste corrosiuus, perit odor teter, & inde suauissimi saporis & odoris resurgit spiritus, in medicina ob egregias vires non satis de prædicandus. Dicimus potius, Rhenana eam ob rationem esse sana, quoniam subtile acidum hæc ipsa ingreditur, nam hac ratione sulphur eorum, quod valde calidum & igneum existit, egregie temperatur, ut minus ferire caput, vel præternaturali æstu sanguinem afficere possit, quale quid expectandum a vinis fortibus, quæ acidi parum in mixtione agnoscunt.

37. TEMPERIES & consequenter salubritas vini nostri in eo quoque versatur, quod non multum crassæ terræ vel viscosita-

fitatis, sed copiam tenuis aquosæ substantiæ possideat, crassa vina, dulcia hoc habent incommodi, quod liberalius & frequentius hausta crassum & copiosum sanguinem corpori ingerent, vno verbo, plethoram accersant, nam illud, quod crassioris molis est, non pertransit emunctoriorum tubulos, sed in vasis remanet ibique humores auget, quot autem maiorum genetrix fit plethora peritioribus medentum optime notum est. Damnat dulcia vina HIPPOCRATES *de ratione vitæ in morb. acut. p. 62.* eam ob rationem, quod tumores hepatis & lienis augeant, quod fit, dum sanguine crasso & copioso has partes infarciunt, porro crassa, dulcia & pingua substantifica vina insignem copiam biliosi in sanguine & humoribus producant principii, vnde etiam & acutas & biliosas, nec non lentas hecticas febres immoderato usu disponunt, ea autem vina, quæ tenuia sunt, per angustissimos emunctoriorum canaliculos sine vlllo impedimento feruntur, hinc rursus e corpore eliminantur, nihilque heterogenei, quod vel copia vel peruersa qualitate nocet, in sanguine relinquunt, vt & ob hanc rationem Rhenana aliis salubriora esse facile iudicandum fit.

38. VT autem eo melius, quænam ex Rhenanis & aliis quoque corpori humano proficua & salutaria, sint quisque cognoscere possit, certas quasdam notas & characteres boni vini vt constituamus res erit magnæ utilitatis. Primo itaque salubre vinum est, quod grato & reficiente odore præditum, 2) quod receptum & detentum in ore relinquit in lingua blandam adstriktionem & ob penetrantiam nares & caput peruadit, 3) si transparens & clarum est & aureo præditum colore, 4) quod citius pertransit renes & altero die madorem vel sudorem quendam in corpore causatur, vel alvum quoque lubricam reddit, 5) quando nullum dolorem vel lassitudinem in capite aut membro quodam relinquit, 6) quod appetitum excitat & concoctionem adiuuat, 7) liberalius & frequentius haustum, non ad calculum vel podagram disponit. Secundum has characteres, ceu ad lydium lapidem, si
vina

vina examinemus, deprehendimus ex Rhenanis saluberrima esse, vinum Hocheimense, Cocheimense, Rudesheimense, Ioannesbergense, Rauenthalense, Neuendorffense & Rhingauica pleraque, dummodo non sint nimis recentia, sed ad minimum octo vel decem annorum, quæ etiam ad victus sanorum & ægrotantium accommodatissima laudat DIOSCORIDES *lib. 5. cap. 5.* Baccharacense ætatem mediam dum attingit, conuenientissimum est.

39. INTER vina Moeni corpori apprime conueniunt Klingenbergense, Hirsteinense, Michelbacense, Nierensteinense, quod maxime ii, qui illis vinis perfrequenter utuntur, testari possunt, siquidem ea sanitati vtilissima deprehendunt. Nec Mosellana virtute medicamentosa & salubri destituuntur.

40. CÆTERA, quæ hic non recensemus, neutiquam corpori inimica proclamamus, tacemus potius ea & quæ nobis maxime nota sunt ac salubritatis fama, ob egregium commodum, quod corpori conferunt, eminent commemorare hic volumus: sicuti neque exotica vina contemnimus, quæ non vnius cum laudatis indolis sunt, potius asserimus ex Italicis, Gallicis &c. vina deprehendi, præstantissima, medicamentosa etiam excellunt virtute. Rhenanis solum prærogatiuam præ aliis tribuere eamque probare nobis iam modo constitutum est, quod horum vsus sit vniuersalior & ob egregium elementorum æquilibrium omnibus ætatibus, temperamentis, morbis etiam cuiuscunque generis rectius respondeant, cum aliorum vinorum vsus sit limitatior eaque non indiscriminatum & sine cautione adhiberi possint.

41. EX vinis Franconiæ vero illa ad vsum quotidianum iudicamus conuenientiora, quæ nimiam ætatem non dum redolent, cum qua tartarum deponunt, secus quam Rhenana, quæ eundem conseruant & propterea (quod contra vulgarem opinionem statuimus) corpori nostro etiam plus solatii afferunt tartarus, quippe blando suo stimulo omnia emunctoria animat & sui admonet officii, alium puta ac partes vrinæ secretioni destinatas &c. cum alias reliqua vini substantia destitu-

stituta hoc stimulo diutius in sanguine subsisteret, hic etiam blandam, subadstringentem virtutem vinis foenerat, quæ totum non modo ventriculi, sed aliorum pariter viscerum valde roborat, quò rite se habente circulus humorum & totum excretionis negotium felicius & promptius peragitur.

42. VLTIMO non possumus elegantissimi loci HIPPOCRATIS, in quo boni vini notas & differentias exprimit, his mentionem facere, qui exstat lib. 2. de ratione victus morb. acut. p. 62. *Vinum dulce vinoso minus caput grauat & minus caput ferit, magisque sanum quam alterum intestinorum deiectiones mouet, viscerum tamen tumores, hepatis nempe & lienis auget. Neque igitur his, qui amaram colligunt bilem conuenit, nempe quod hic suum facit. Quin etiam in superiore intestino flatum excitat, neque tamen inferiori intestino pro flatus ratione est aduersum, & si non valde penetrat a dulci vino flatus circa præcordia immoratur. Et certo hoc minus vrinas prorsus mouet quam vinosum album, sputum tamen potentius educit alterum, quod dulce est. Vinum autem vinosum album ad vesicam altero magis penetrat & cum vrinam prouocet, & semper perrumpat, multum in his morbis contulerit. Quamvis enim ad alia altero sit minus idoneum, quæ tamen ab ipso sit per vesicam purgatio, liberat, si vii debet, impellatur. Bonæ hæ sunt notæ de vini utilitate & noxa, quæ sanioribus incognitæ fuerunt. Fuluo vino vero & nigro austero in his morbis ad hæc vii possis, utique capitis grauitas non insit, neque mentis percussio, neque sputum sursum ferri prohibeatur, neque etiam vrina inhibeatur, sed alui egestionem humentiores & ramentosiores fuerint. In his sane vel maxime ex albo mutationem facere conuenit, & quæcunque iis similia existunt. Istud autem insuper nosse oportet, si dilutius fuerit vinum, superiores omnes partes & quæ circa vesicam sunt, minus ledere: meracius vero iis, quæ circa intestina, magis prodesse.*

43. PVLCHRE CARDANVS de rerum varietate lib. 8. cap. 23. ait: in vno hoc liquore tot salutaria recondita remedia sunt, ut quicquid saluberrimarum virium natura cæteris plantis indi-

(Hoffm. Opusc. varii argumenti.) Y dit,

dit, illud omne facillima participatione vino & in vino homini ad diuersissima valetudinum genera communicauerit. Et veteres haut iniuria propter summam & incomparabilem, qua imbutum est vinum, virtutem, nomen vini exinde deriuarunt, quasi dicatur diuinum. Alii ex vi originem eius duxerunt, quoniam vim seu virtutem animo & corpori inducere aptum est. Et profecto si rem ex æquo ponderare licet, nulla in tota rerum natura, tam ad tuendam sanitatem, quam ad valetudinem infirmam domandam, datur & inuenitur præstantior & accommodatior medicina, quæ tot tantisque fulgeat virtutibus, quam quæ in vino residet, quo olim veteres pro summo medicamento vti fuerunt.

44. A multo iam tempore anxie desudarunt & quæsiuerunt mortales securum remedium ad longam & sanam vitam, quo omnes generis afflictiones a corpore arceri, & sanum ac robustum illud in multos annos conseruari posset, sed, an melius & accommodatius quoddam ipso vino excogitari possit, equidem non video? Constat & aliis remediis sua laus & gloria, cum vino tamen nunquam comparanda; quandoquidem vinum non tantum in corpus agit, sed & in ipsam animam, quam reficit, sanat eiusque functiones mirifice promouet.

45. ANTEQVAM autem vltcrius progrediar, breuiter saltem strictimque, quomodo vinum in animam exserat operationem, explicabimus. Nullum dubium est homines ingeniosos, imo sapientes & acutos a vini potu euadere. Sic Italos, Gallos, Germanos etiam, vbi bona vina crescunt cæteris septentrionalibus, maxime populis vino destitutis & cereuisiam bibentibus longe esse ingeniosiores, ipsa veritatis magistra experientia patefacit. GRYLLVS *de sap. dulc. lib. 1.* existimat, Græcos ob præstantiam vini olim fuisse sapientiæ parentes, qui nunc cum vitibus a Turcis extirpatis ingenii & doctrinæ gloriam simul amiserunt. Gentiles Palladem & Bacchum in vno simul templo collocarunt, in signum, vino prudentiam augeri. Fictum a priscis est, Deos sapientiores esse hominibus, quia fruuntur & ambrosia & nectare. Ingenium

nium quod excitet vinum ex eo clarissime intelligitur, quod ad poësin, quæ res ingenii est, mirifice disponat. Perpetuo ab antiquitate creditum fuit & ipsa res ita docet, vini calore poetarum furorem & impetum excitari, & Apollinis vnum eundemque esse furorem. Quamobrem OVIDIVS vino carens in exilio de se conqueritur:

Impetus ille sacer, qui vatum pectora nutrit.

Qui prius in nobis esse solebat, abest.

Et, vt NICARATVS scribit, *vinum magnus est poetarum equus*, aqua namque haud bonum facere versum perhibetur, nec durabilia illa dicunt esse carmina, quæ ab aquæ potatoribus conduntur. Homerus, Ennius, præstantissimi poetæ, vinosi celebrantur.

46. VINVM dein hanc mirabilem possidet virtutem, quod omnem metum & tristitiam ex animo expellat, hominesque animosos, cordatos, audaces, alacres, hilaresque reddat, eam ob rem quoque antiqui Bacchum cordis præsidem pronunciarunt. Et horum effectuum testimonium perhibet non ipsa modo experientia, sed & plurima in sacro textu satis nota loca, & ex eo saltem colligi potest, dum *Syracides* scribit: quid vita hominis sine vino? Vniuersale autem esse vinum præseruatium a morbis ferme cuiuscunque generis non sine ratione affirmare sustinemus: quandocunque enim morborum, qui humano corpori infesti sunt, speculamur originem, eam ex imbecilliori sanguinis circulo petendam esse nullus rerum medicarum peritus in dubium vocare poterit. Quemadmodum enim æquabilis liber & expeditus sanguinis per sua vasa progressivus motus ab omni labe & corruptione morbo corpus vnice conseruat & tuetur; ita ex imminuta inæquali & tarda sanguinis progressionem ad morbos fieri dispositionem, ex facili iudicandum. Sanguis sufficienter motu circulatorio per omnis generis tubulos corporis circumpulsus, fluidus fit, subtilisatur & a sordibus diuersæ naturæ & indolis per congrua sua emunctoria depuratur, & ita ad functiones omnes rite celebrandas aptus redditur. Ex motione ve-

ro segniori & debiliori densus, crassus, immobilis fit, & ea, quæ excerni debebant, in corpore remanent, unde non modo copia, sed & qualitate peregrina imbutus, plethoræ, impuritatis, obstructionum, stagnationis, infarctus viscerum & exinde productorum spasmodum foecunda mater fit. Iam autem, eas causas consideremus, quæ ipsum sanguinis circulum imminuunt eæ potissimum in ipso principio motus sunt quærendæ quod subtiles nobilissimæ siue spirituosæ impetum facientes corporis partes constituunt. Hæ si deficiunt, vires ad motum debitum non adsunt sufficientes, vel tardioris circuitus ipsa sanguinis & humorum moles, culpa est ex intemperantia vel aliis causis nimis adaucta, & respectu virium motricium corporis nostri siue spirituum minus proportionata reddita.

47. Ex his iam dictis liquido constare arbitror, illud, quod ad morbos tam breuioris, quam longioris naturæ varii-que generis auertendos, & corpus ab iis defendendum adhibetur, sanguinis progressum excitare, intendere & promovere idoneum esse debere, quo fit, ut sanguineus latex ab omni crassitie, impuritate, stagnatione, infarctu liberetur, qualis enim sanguinis est circulus, talis est eius fluiditas, talis excretio impurarum & superfluarum fordium, ex quarum retentione prima morborum ponuntur fundamenta. Iam vero cogitet quisque prudens & cordatus, num in tota rerum natura detur conuenientius remedium ad excitandum, augendum & promouendum circulum sanguinis ipso vino, præsertim tali, quale nos laudauimus, nempe temperato. Hoc amico suo naturæ gratissimo spirituosissimo sulphure efficacissime vires motrices videlicet in corpore nostro resuscitat, & impetum facientes partes adauget omniaque membra ad vigorem & motum disponit. Postea illud tenue acidum tartareum, spiritu vinoso dulcificatum elementum, summa aperiendi, nec non roborandi, incidendi, stimulandi & obstructiones reserandi facultate præditum est, ut hac ratione longe felicius motus progressius procedere possit, Accedit & illa
tenuis

tenuis aquea vini pars, quæ diluendo, attenuando humorum crassitiem non leuem ad promptiorem motum operam collocet. Id omne ostendit ipse effectus, a vino enim bonæ notæ epoto mox intenditur calor, pulsus citatior & validior fit, sanguis a centro ad circumferentiam mouetur, facies fit rubicunda, vasa turgida, augetur transpiratio, vrina pellitur & totum corpus cum ipso animo reficitur & excitatur. Quis itaque non perspicit, ad vitam longam & sanam tuendam ipso vino nobili albo aptius dari prælidium.

48. VETERES a vini potu tanta commoda redundare in corpus experti, commendarunt eum in finem ebrietatem, non quidem frequentem & intensam, sed leuem & raram. Arabes medici, inter quos *Auicenna in magn. sui oper. lib. secti. 3. cap. 8.* quouis mense semel aut bis ebrietatem mirifice laudat ad proliciendum sudorem, ad resoluenda ea, quæ superflua sunt. Ipse DIOSCORIDES ait: *vinolentia non omnis noxia, sed sæpe necessaria est ad sanitatem conseruandam.* SENECA stoico supercilio grauis vir inquit: *convictus & liberior potio vigorem dabit, & non nunquam usque ad ebrietatem veniendum, non, ut mergat nos, sed, ut deprimat curas, eiicit enim tædia, & ab imo animo mores, atque ut morbis quibusdam, ita & tristitiæ medetur.* HOMERVS auctor est Nestorem, qui tertiam hominum ætatem viuendo compleuisse fertur, magnas vini pateras exhausisse. At vero hæc omnia intelligenda sunt cum grano salis, minime enim nostra mens est, ut ebrietatem, quæ potius abbreviatrix vitæ est, nec non ingenii & corporis destructrix, collaudare velimus, sed e contrario eam valde dissuademus. Hoc tamen non negandum, nonnunquam liberaliorem potum vini & ordinario maiorem concedendum esse, non vero talem, ut inde male, sed potius bene sese habeat corpus. Dicimus, vinum esse præstantissimum medicamentum, & omnibus ob homogeneitatem & cum corporis nostri spiritibus affinitatem antefendum, sed, uti generosa & optima remedia abusu, & non debita dosi ac tempore adhibita nocentissima sunt, ita etiam

vinum summam pernitiem corpori inducere aptum est, ideoque non secus, quam aliud medicamentum cautione & medici consilio eget.

49. VT autem clarius paulo mentem nostram hac de re aperiamus, certo conuicti & persuasi sumus, vinum ex medici consilio vsurpatum plus præseruare a morbis posse, quam omnis generis acidulæ, thermæ aliæque sulubres aquæ præstant. Non quidem inficiandum est, thermas & acidulas a morbis præsertim chronicis egregie corpus custodire, verum non alio agunt modo, quam circulum sanguinis & humorum augendo, nec non pondere atque elemento spirituosissimo minerali euacuationes per aluum, per vrinam, quandoque etiam vomitum excitando, obstructions, vbicunque consistunt, referando & aperiendo: at vero cum principium agendi habeant minerale, quod non adeo homogeneum naturæ nostræ est, neque reparare vires, neque spiritus ingenerare aptum existit. Deinde cum magis quantitate & copia aquæ operentur, non quivis autem ventriculus, seu viscerum ac intestinorum tonus tantam aquæ copiam ferre queat, & frigidus acidularum potus serosis, phlegmaticis, & qui imbecillos ad spasmos proclives nervos alunt, utilis esse nequeat, ideo nos in hac sententia sumus, vini salubris potum debito regimine a medico præscriptum ad certa tempora, plus efficaciam & virium ad præseruandum ac medendum custodire, quam ab omnibus dictis illis aquis possit expectari. Vinum enim, uti antea dixi, est vniuersale euacuans, nam per aluum, vrinam & sudorem pellit, vinum est analepticum, nil enim vino citius vires reparat, est optimum stomachicum, sacra enim scriptura teste ad calorem & tonum ventriculi concurrit, est optimum aperitiuum sanguinem depurans, quoniam per intensiorem sanguinis motum, emunctoria recludendo, scorias cuiuscunque naturæ & generis excrementitias separat: unde nullum dubium, quin in malo hypochondriaco, in debilitate ventriculi, cachexia, hæmorrhoidum suppressione, tumore & obstructione hepatis & lienis, in calculo renum & vesicæ,

ficæ, in arthritide frigida, catharrhosis variisque defluxionibus, rheumatismis, lassitudine & grauitate corporis, ingenio & memoria debilitata, auditus grauitate, visus hebetudine, sensus ac motus ex defectu spirituum & neruorum imbecillitate, in venere virorum depressa ac sterilitate foeminarum, & quacunque frigida morbose corporis intemperie, senes, pituitosos & serosos exercente, vini cura præseruationis causa instituta omnibus thermis, acidulis aliisque remediis & curis longe multumque sit præferenda. Certe, si mortales scirent, quantæ virtutes medicamentosæ a benedicto naturæ parente inditæ essent huic liquori, non ita in morbos inciderent, neque tanta pharmacorum ingratorum vel etiam medicorum copia egerent. Memorabilia sunt, quæ hanc in rem WHITAKERVS, insignis medicus, Tr. de sanguine vix p. 33. scribit: *Vinum medicamentum est, ac si mea experientia esset tanti, varias & mirandas operationes usu huius medicamenti in me ipsum & in alios complurimos, silentio non possum præterire (scilicet) corpora extenuata ad sarcositatem reducta & exsiccata ad humiditatem oleaginosam, quando cereuisiæ debilis vel aquarum potatores complexionibus simiarum potius quam hominum obtinerent.* Et ipsi allegare possemus exempla, vbi post bonum & conuenientem & Rhenani usum per aliquod septimanas abstinendo ab omni alio potu, plures mutato quasi toto temperamento, insigne robur & virium augmentum quoad omnes actiones experti fuerunt.

50. VT autem nonnulla perquam vtilia præcepta ac monita circa talem vini curam adiiciamus, dicimus primo: præparata prius corpora esse debere, nempe, si plethora adest, ea venæsectione tollenda est, si alius est obstipata & multæ viscosæ cruditates ac sordes primam regionem occuparunt, eæ per salina abstersiua & laxantia debita sunt auferendæ. Secundo: vina optima, temperata tamen, Rhenana, & ex Moenans imbecilliora, olygophora, Klingenbergense, Michelbacense, Hirsteinense in usum hunc trahenda sunt. Tercio: abstinendum est ab omni alio potu cereuisiæ, spiritu vini,

ni, cibi autem liquidi & boni succi, non crudi, non falsi, nec acidi, non calidi aromatici tunc temporis vsurpandi, sed iuscula ex vegetabilibus alimentosis parata optime tunc conveniunt, & vini energiam augebunt. Quarto: potio hoc modo instituenda: ægrotantes si ferre possunt matutino tempore vinum cum aqua Schwalbacensi aut Dinsteinensi vel Wildungeni ad dimidium mixtum ad mensuram bibant; in prandio autem & coena purum vini pro siti non modo extinguenda, sed & paulo ultra, nunquam tamen ad nauseam & fastidium vsque & ad minimum in principio de die duæ mensuræ vel tres sunt impendendæ, ita tamen, vt in initio dosis minor, postea successiue augeatur. Quinto: si corpus a vino nimium calefit vel somnus impeditur, acidulæ dictæ vino in coena & prandio sunt miscendæ. Sexto: alvus, si exsiccetur, prunorum, pomorum Borsdorffianorum, passularum, ficuum decocto, adiecta portione salis nitrosi, vel arcani duplicati est lubricanda. Septimo: tempore vernali seu autumnali cura hæc debet institui, & per sex septimanas continuari. Octauo: caueant autem ab ea omnes, quorum sanguis copiosus & impurus, falsis, sulphureis scoriis scatet, vti sunt scorbutici calidi biliosi, arthritide vaga laborantes, ad phthisin, hecticam, hæmoptysin, soporosos affectus & epilepsiam dispositi.

51. PERLVSTRATO hætenus præseruatorio vini præstantissimo effectu, sequitur iam, vt disquiramus, in quibusnam morbis eorumque paroxysmis illud sit proficuum. Fatendum est in præseruando eius vires esse vniuersaliores, in medendo e contrario magis limitatas & circumscriptas; certissimum tamen est, etiam in ipsis morbis sanandis diuinam medico porrigere manum. Et quidem in febribus malignis vino nil datur excellentius; quarum malignitas ex eo dignoscitur, motuum & virium defectus adest nec non valde depressa sanguinis spirituscentia, & tardior eiusdem circuitus, quæ cuncta quandam cruoris sanguinei ad putredinem designant dispositionem in iis igitur morbis vires restaurare, spiritus erigere, circulum sanguinis magis liberum reddere, transpira-

tio-

tionem mouere expedit: in quo etiam omnem alexipharmacorum virtutem versari notum est. Quod autem vinum has omnes in se reconditas habeat virtutes pluribus auctoritatibus, quibus practicoꝝ libri pleni sunt, confirmare nolumus confugimus ad solam experientiam, qua nobis constat, plures ex malignis solius vini moderato vsu evasisse.

52. PRÆTEREA quoque in illis morbis, vbi ad peripheriam corporis virulentum quid expellendum est, videlicet in petechialibus, variolis, morbillis, si nempe natura est imbecillis, motus cordis ad expellendum insufficiens, vel etiam retrocessio exanthematum ob debilitatem virium contigerit, vinum conuenit, cæteroquin si magnus æstus & humorum ebullitio, pulsus citatior hosce morbos comitantur, merito abstinendum.

53. FEBRIBVS continuis laborantibus non modo ipse HIPPOCRATES *lib. 2. de morb. acut. §. 61.* vinosum vinum album & aquatum commendat, sed & innumeri in artis exercitio versati viri, inter quos *Forestus lib. obseruat. 1. obs. 1.* Rhenanum aquosum album subtile laudat. HELMONTIVS *de feb. cap. 12. pag. 772.* scribit: *quotquot medico vino in febribus vtuntur, facilius conualescunt, vires conseruant & in pristinum ocyus restituuntur.*

54. MVLTTO magis autem hoc ipsum in febribus intermittentibus procedit, quæ ex cruditatibus, euacuationibus præsertim transpiratione suppressis maxima ex parte oriuntur, ea tamen cautione, vt die intermissionis liberalius, parcius autem vel plane non in paroxysmo nisi in declinatione, & corpore ad sudorem iam disposito porrigatur. Ratio vero, quare in omnibus ferme febribus non sit prohibendum, hæc datur: febris enim intensior sanguinis est commotio, eum maxime in finem excitata, vt motu hoc fortiori illud remoueat & expellat, quod corpori minatur interitum; facile iam patet, quodsi motus ille valde est intensus & nimis auctus, vinum parcius admittendum sit, quodsi autem debilis & languidus existit, natura deficere vel succumbere vide-

(Hoffm. Opusc. varii argumenti.)

Z

tur

tur, excitari debet, & promptissime vinum album olygophorum, vt sunt a nobis commendata, offerenda, vt imbecillior facta natura restauretur.

55. IN syncope viriumque prostratione nil vino præstantius est; hinc GALENVS *lib. 3. de medic. facult.* omnibus syncopizantibus vinum suadet, substantia tenue, colore fuluum ac vetus potius, quam nouellum vel mediæ ætatis, quod vires recreet, quia spiritus mire refocillat, cum exterius odore tenuis exhibitum vel cordi, pulsibus applicatum, omnibus aliis confortantibus & analepticiis longe sit superius.

56. DVM nausea ventriculum molestat, imbecillitas, digestionis adest defectus, inflatio, vino nil vtilius reperitur: hinc diuus Paulus Timotheo dyspepsia laboranti vinum suasit *Timoth. 1. vers. 19.* & GALENVS *lib. 4. de sanit. tuenda c. 6.* perhibet colore fulua aut alba, odora, substantia autem tenuia, nobilissima esse stomachica, præsertim si leniter subastringant; & talia sunt Rhenana, quæ in appetitu excitando, in roborando stomacho, & resolutione ciborum promouenda, ob subtile acidum spirituosum adstringens eximia.

57. IN fame canina HIPPOCRATES *sect. 6. aphor. 21.* vini potum commendat, neque res destituitur suo fundamento; hic autem aphorismus non de quouis vino, sed generoso merito antiquo intelligendus est: huius enim affectus acidus corrosiuus humor in ventriculi sinu hærens causa est, qui ab huiuscemodi vino egregie temperatur, non aliter ac spiritus nitri vel vitrioli corrosiuitas ab admixto spiritu vini, vel tartari aciditas, quamdiu cum vino iuncta est, ita contemperatur, vt palato iucundum exhibeat saporem.

58. AD sitim sedandam vino aqua diluto nil est præstantius, hoc pacto enim longe promptius sitim exstinguit, quam si sola aqua fuerit exhibita, quandoquidem sitis ex obstructis & constrictis glandulis, quæ saliualem laticem plorant in faucibus easque ac oesophagum humectant, exoritur: has autem vinum dilutum melius referat, quam aqua pura, eapropter ipse

HIPPOCRATES non veretur in febribus quoque acutis talem vini & aquæ mixturam præscribere.

59. IN vomitu idiopathico, vel quando febribus jungitur, præstat vino tenui uti, quam alio humido. In colico affectu, præsertim si ex cruditatibus viscidis, flatibus profiscitur, veteri Rhenano nil magis se commendat. Ipse HIPPOCRATES *lib. 2. epidem. 6.* vinum meracum commendat, quia cruda reddit apta ad concoctionem, attenuat crassa, flatus discutit. Laudat quoque dicto in affectu Rhenana. CRATO *cons. 169.* dissuadet Morauica & Austriaca, improbat Maluatica dulcia, crassa, turbida.

60. IN diarrhœa & dysenteria, quæ acutis etiam morbis iungitur, vinum Rhenanum, tenue vel cum ptisana mixtum aut solum indicatissimum est, virtute enim pollet substringente, qua tonum intestinorum & laxatam glandulosam intestinorum tunicam roborat: Et cum hisce in morbis sanguinem a centro ad peripheriam mouere, transpirationem augere & urinam ciere vtilissima res sit, eapropter vinum, quia tales præstat effectus est, optatissimum. Laudant vulgariter melioris adstrictionis causa vina rubella, quæ, si bonæ notæ sint, utique possunt admitti. In obstructione hepatis & lienis, in ictero quoque, in cachexia vinum optimos exhibet effectus. SOLENANDER, celebris practicus *sect. 1. cons. 12.* vinum album, maturum, purum, non potens aut vehemens, transparens aqua martiata dilutum, ut sunt Rhenensia & Mosellana ceu admodum grata hepatis & quæ sua adstrictione viscera roborant, magnam attribuit laudem; dulcia autem, quia sanguinis copiam adaugent, non modo HIPPOCRATES *lib. 2. de morbis*, sed & GVARINONIVS *cons. 117.* maximopere dissuadet. In hydrope HIPPOCRATES *lib. de internis affect.* vinum austerum magnificat, item aquosum *lib. 5. epidem. §. 37.* Notauit EPIPHANIVS FERDINANDVS *hist. med. 38.* asciticos solo maluatici vini usu curatos. Affectus hypochondriacus, an vinum admittat, in controuerliam merito vocatur. Semel sed sæpius nos in artis exercitio ab acidis, maxime Rhena-

nis vinis symptomatum exasperationem subsecutam obseruauimus, cuius rei ratio, quod minus vina ad aciditatem inclinantia ferre possint hæc mihi videtur & attendenda venit. Ob segniorem peristalticum motum, qui in hypochondriacorum intestinis contingit, contenta non rite promouentur, familiaris enim ipsis est alui adstrictio, sed stagnant & ipsa mora acorem contrahunt, vnde vinum in talismodi subiectis ipsa stagnatione in acetum forte, neruofas partes ad consuetos spasmos suscitans, conuertitur. At vero, cum hypochondriaci egeant viribus, ventriculus quoque robur & calorem exposcat, vinum non penitus ipsis est prohibendum. Quapropter vetus Rhenanum vel bonum Hungaricum inter ipsos cibos modice assumtum reliquis omnibus præfert in dictis affectibus BRVNNERVS *conf. 9.* Abstineant autem a rubris, austeris, dulcibus, & ab omni usu immodico.

61. IN scorbuto salium tartareorum fixorum ferace Rhenanum egregium est, quia valde diureticum, vnde scribit SACHSIVS *de vite vinifera p. 314. vina Rhenana in scorbuto utilissima sunt ob vim diureticam, quia tartaream expurgant saburram*, quod ex Hollandia Rheni ripam legens & Francofurtum tendens obseruauit, in talibus scorbutici vini Rhenani usu crassissimas vrinas tartaro copiosissimo scatentes cum fructu redditas fuisse. REISNERVS *lib. de scorbut. pag. 533. vinum potens generosum idque meracum scorbuticis commendat, sed paucum, quod, si calor intendatur, aqua passulata diluendum sit.*

62. IN calculo renali vina dulcia & generosa oleosa CRATO *in conf. 53. recte improbat, genesis enim calculi plerumque fit ex copia sanguinis, viscera abdominis ipsosque renes infarciens, primo inflammationem, postea læsionem substantiæ renalis calculumque producente: plethoram autem a vino dulci augeri superius iam dictum est. Ingenerant porro renibus calculum turbida, austera, & quæ facile fiunt pendula, vti sunt huius terræ Naumburgensia. Laude autem digna sunt Rhenana, quia valde diuretica Neccarina laudat*

SCHOLZIUS *conf.* III. & olygophora euacuato prius corpore moderate pota VNZERVS *de nephrit. cap.* 13. MONTANVS *conf.* 229. vinum olygophoron purissimum maturum, colore album dicto in affectu magni æstimat. Vrinæ stillicidium auctore HIPPOCRATE *sect.* 7. *aphor.* 28. vini potus soluit. Maxime hic aphorismus de vino generoso debet intelligi, vtpote stranguria ex prohibita transpiratione plerumque nascitur: hanc autem eiusmodi vini potus restituit.

63. IN affectu arthritico & podagrico num vinum sit concedendum quæstio maioris momenti existit. Communis est persuasio hos affectus Bacchi esse sobolem & solo aquæ potu & a vino abstinencia curari. Equidem indubitatae veritatis est, hos affectus pro causa tartarum subtilem membranas lancinantem agnoscere, vnde vina, quæ huius principii copiam obtinent, valde nocere videntur. Verum enim vero tartarei hi morbi ex obstructione emunctoriorum progignuntur & viscositatem ac densitatem humorum pro fundamento agnoscunt: vinum autem per renes, qui congruum tartari euacuatorium constituunt, morbificam materiam egregie educit, hinc non apparet ratio, quare eorum vsus non debeat admitti, præsertim cum plerumque etiam a ventriculi debilitate, spiritusascentiæ sanguinis defectu eiusque circulo segniori natales suos arthritidis agnoscat, quapropter vinum cum debito regimine & ex medici consilio præseruare potest a truculentis hisce malis, si nempe extra paroxysmum vsurpetur. At vero, cum magna sit inter vina, nec non inter naturas differentia, hinc prudens medicus hæc probe inter se distinguere debet, nonnullis indiuiduis magis quadrant acido destituta vina & generosa, nempe Hungarica. CRATO in *consilio* 253. podagricis parum vini Hungarici vel Maluatici inter cibos commendat. Et SOLENANDER in consiliis ob imbecillitatem ventriculi parum vini vsus collaudat. Egregius locus apud SOLENANDRVM *sect.* 4. *conf.* 24. meretur huc adduci: *Videndum, inquit, quid terre ventriculi dispositio, quid reliqui corporis possit, non cuiuslibet temperamento, constitutioni, ætati,*

consuetudini omnimoda abstinentia iniungenda est, magna corporum varietas: si modice vino utamur mediocri potissimum leniter adstringente suoque id tempore debito non obfuturus, sed profuturus eius usus. Et videmus, pergit ille, ab exiguo sumto vino declinante iam paroxysmo podagricorum dolores, discusso ab excitato calore & spiritibus qualicunque humore leniores fieri, modo, ut ante dictum, in principio abstineatur.

64. CÆTERVM mentio facienda hic loci est singularis methodi, qua HIPPOCRATES in ischiadico malo & arthritico fixo & vago curando & in principio penitus profligando utitur, & memorabilia sunt, quæ scribit de internis affect. sect. 5. pag. 120. *Ex renum morbo inuadit magnus venarum cauarum morbus, venæ autem cum sanguine refertæ sunt, si quid alieni ad eas peruenerit, male afficiuntur. Sic igitur afficitur, si dextra parte morbus est, per exordia ad coxendiceis acetabulo dolorem exhibere incipit: Quo autem longius tempus processerit & productum fuerit, eo grauior dolor ad inferiora descendit, cumque ad malleolum pedis externum & pollicis intermedium peruenerit, rursus ad caput fertur, ubique in eo vlcus constiterit, vehementer urget sibi que caput disrumpi videtur, oculi pituita totumque corpus implentur. Et paulo post: Si morbi initio accesseris vinum Mendæum album dilutius quam plurimum per diem potui exhibere oportet. Et inebrietur quoad sanguis e naribus plurimus erumpat: cum autem fluere cœperit, minimum tredecim diebus fluit: ubi vero hi præterierunt, non amplius inebrietur, neque ubi semel fluere cœperit. In cibo tamen paulo plus vini bibat, ut sanguis fluat. Grauiissimus hic auctor affectus hos ex plethora & optime deducit, cum experientiæ consentaneum sit, hanc nititur tollere narium hæmorrhagia, quam vini largo potu prouocat. At verò, an non consultum sit, vel venam vel hæmorrhoides aperire, & superfluo sanguini exitum dare, peritiorum iudicio relinquo.*

65. EXPLORATO sic ad sanandos internos morbos vini usu, pauca quædam iam ut annectamus circa eius noxam, quam eius abusus in quibusdam ostendit, res postulat. Experientia
autem

autem & ratio docet, quod in omnibus affectibus, vbi sanguis magna copia congestus hæret, sicuti in inflammationibus & in plerisque morbis capitis, nominatim in eius dolore a causa sic dicta calida orto, phrenitide, insania, vertigine, epilepsia, lethargo & cunctis soporosis affectibus, vinum quoduis valde noceat. Cum enim dictis in morbis sanguis cum copia & impetu vasis partis affectæ infusus ibique congestus impeditius circuletur, non potest non a vino, quod spiritu suo petit superiora, nempe caput & sanguinem expansiva virtute ulterius rarefacit, nec non maiori cum vehementia illum in partem obstructam largius e corde eo pellet, dictorum morborum exasperatio subsequi. Consentientem in eo habemus maximum nostrum HIPPOCRATEM, qui *lib. 2. de morb.* in cerebri repletione dolorosa vini abstinentioniam commendat, & ibidem: *Sideratus a vino penitus abstineat*, & *lib. 4. de morb.* in cerebri sphacelismo penitus a vino est abstinendum, item in lethargo a vino abstinendum: phreneticum calefacere oportet calefactoriis humidis & potionibus excepto vino. Et *lib. de insomniis*, qui insania laborant, vinum non bibant. Deinceps vinum nocet in tussi, in phthisi: aspera enim arteria minus acres stimulos ferre potest, nihilominus vinum dulce cum ad expectorationem iuuet, modice haustum non est nocuum, neque vetus Rhenanum, si tussis ad declinationem vergat, prohibendum, sed potius commendandum est.

66. VLTIMO loco sint illa, quæ habet TIRELLVS in *historia vini* pag. 60. *Vina sustentant firmos, erigunt lapsos, cohibent cadentes: vina edunt miracula, non extracta, non lapides, non quintæ essentiæ, nomina fabulosa, non boli, non pilulæ argenteæ, aureæ, aut gemmæ plebis deceptiones, incantamenta marsupii, vituperia sapientiæ, medicinæ opprobria, vina autem calidi innati vera pabula sunt certissimaque alimenta: hæc ideo celebranda elogiis vestris encomiastico cantu, hæc seueriori disciplina in usum vitæ percolenda in ægrotantium commodum danda. Atque hæc circa hanc de vino maxime Rhenano traditionem sufficiant.*

DISSER-

DISSERTATIO VII,
DE
ANNIS CLIMACTERICIS EO-
RVMQVE RATIONALI EXPLICA-
TIONE.

§. I.

ANTIQVISSIMAM esse, & per tot sæcula celebratam anno-
rum climactericorum efficaciam in scholis philoso-
phorum & medicorum vel leviter versato obscurum
amplius esse nequit; nostris vero temporibus non modo a
plerisque medicis dictorum annorum vis in dubium vocata,
sed etiam pro commento superstitioso & fabuloso astrologo-
rum figmento fuit habita. Verum enim vero, sicuti illud,
quod tam diuturna & constanti experientia pro vero habi-
tum fuit, non rationibus euertendum, neque ob id maxime,
quod inueniri rationes non possint, temere negandum; nam,
quando de rebus, quæ facti & experientiæ sunt, agitur, prius
de re facti ac specie certi esse debemus & dein rationes sunt
quærendæ, ita id ipsum imprimis de annis climactericis vale-
re arbitror, ii num habeant fundamentum in ipsa re & expe-
rientia, prius perspiciendum, postea eorum explicatio est e-
voluenda. Et, cum fuerint prisca, etiam inter medicos sa-
pientissimi viri, hinc illud ipsum, quod constantis fuit expe-
rientiæ apud ipsos, imo traditionis, non statim propter ra-
tionis, qua explicatio fit, inconuenientiam, figmenta ad-
mixta, vel propter abusum in dubium vocandum vel ipsa res
aut fides & veritas rei perneganda, sed potius semper veritas
facti inquirenda & melioribus explicationibus saluanda est.
Quapropter etiam diu circa hanc sententiam hæsi, annos hos
climactericos non plane reiiciendos esse reputans, quos
tantopere animaduерterunt veteres, sed potius vindican-
dos

dos & veram eorum naturam perscrutandam. Sumfi itaque hunc laborem & conabor ostendere vtique fundamentum ipsis inesse, eorumque naturam atque cognitionem medicis esse valde necessariam.

2. ACTVRVS itaque de annis climactericis eorumque existentiam & potentiam vindicaturus, primo omnium, quæ sit vis & significatio huius vocis, vnde originem habeat, & quænam eius sint synonyma circumspicere debeo. Climacteres itaque siue vocabulo græco ad indolem latinæ linguæ flexo climacterici, originem suam petunt ἀπὸ τῆς κλίματ[©], siue, quod rectius, ἀπὸ τῆς κλίμακ[©], quod scalam vel gradum significat, vel interprete COLVMELLA *lib. 5. cap. 1.* certam quandam mensuram, vsu autem, optimo interprete, climacterem certum vitæ humanæ tempus, vitæ fortunisque periculosum dixerunt, qua de re consuli potest VARRO *de hebdomad.* item GELLIVS *lib. 3. cap. 10.* Certus itaque annus, isque a natiuitate septimus, habitus vel dictus fuit climactericus, siue scalaris, fatalis, decretorius, quoniam nempe successiue quasi per scalas ad hunc ipsum annum ascendimus, vbi mutatio vitæ & periculum quoddam imminet. Ex hisce vero septenariis annis periculosus maxime æstimatus & magnæ considerationis fuit annus ætatis quadragesimus nonus, quinquagesimus sextus & sexagesimus tertius, qui heroicus, quoniam ipse maxime validus & aptus est ad mutationes instar strenui herois efficiendas. Græce etiam dictus fuit ἀνδρόκλας, vti SALMASIVS vult, a græco ἀνὴρ vir in genit. ἀνδρός & κλάω frango, quoniam virum frangit & debilitat.

3. VERVM, ne nimius sim in nominis origine perscrutanda si um hic abrumpo, & illud potius, eo tamen, quo fieri potest, compendio, dicam, quamnam veteres de hisce annis foverint sententiam quiduetribuendum sit climactericis, quod ex mea sententia ex locis quibusdam eximiis veterum satis superque depromi potest, inter quos ille maxime eminet, quem PLINIVS habet, quando *lib. 7. cap. 49.* climacteras appellat *scansilem annorum occidentiam legem*, i. e.

(Hessm. Opusc. varii argumenti.)

Aa

legem

legem mortis. GELLIVS *libr. 15. Atticar. cap. 7.* in hæc verba prorumpit: *obseruatum in multa hominum memoria, exper- tumque est in senioribus plerisque omnibus sexagesimum terti- um vitæ annum cum periculo & clade aliqua venire, aut cor- poris animique morbi grauioris, aut vitæ interitus, aut animi ægritudinis.* Memorabilia etiam sunt, quæ de Augusto im- peratore scripta leguntur: *Caue, quem semper medi- us fidus desidero, cum a me abest, sed præcipue diebus talibus, qualis est hodiernus, quem spero lætum sexagesimum quartum natalem meum, nam, ut vides, climactericum communem seni- orum omnium sexagesimum tertium euasimus,* vid. CASPARVM CLADERVM *de heredia in tribunali medico pag. 348.* & SALMA- SIVS *in lib. de anno climacterico pag. 2.* scribit: *conuenit inter omnes, climactericos dici annos vitæ, quibus periculum immi- net, aut alicuius casus, quem vix euitare datur.* IVLIVS FIR- MICVS *lib. 14. cap. 14.* scribit: *sane, extra cæteros climacteres septeni anni ac noueni per omne vitæ tempus multiplicata ra- tione currentes, naturali quadam & latente ratione, variis hominem periculorum discriminibus semper afficiunt, unde & sexagesimus tertius annus, quia vtriusque numeri summum pariter accipit ἀνδρόκλας appellatus fuit.*

4. QVAMVIS vero ex veteribus nonnulli & nouenarios annos pro climactericis habuerint, vniuersaliter tamen ma- gisque omnium vnanimi consensu numerus septenarius habi- tus fuit. Deinde & hoc notandum est, quod ab omni ætate diuisio horum annorum fuerit adornata, ita, vt in leuiore, periculi expertes, temperatos, transitorios & grauiore, nem- pe periculosos, formidolosos, difficiles, imo quandoque le- thales distinguerant, ex illis annus VII. XIV. XXI. XXVIII. XXXII. XXXV. habitus est: hos vero XLIX. LIV. LXIII. LXX. statuerunt.

5. ENERGIAM horum annorum ferme concordi suffragio sapiens antiquitas ex impari septenario numero deducere la- borauit. Et quanta huius numeri olim apud omnes philoso- phos fuerit veneratio neminem eruditorum latere potest. Py- tha-

thagoras, princeps philosophorum, qui scientiam suam ab ab Ægyptiis, Chaldæis, Phoenicibus traditam accepit, primus fuit, qui numeris ad diuinarum & naturalium rerum cognitionem tantam adscripsit efficaciam. Medicinam & musicam ante omnia sanitati conducere prædicabat, quia in hisce bella numerorum esset consonantia, qua animi, item corporis alias insanabiles ægitudines possint persanari, quinimo afferebat, quod sacra per certam numerorum proportionem efficacia ad operationes reddantur, maxime autem septenario numero assignauit diuinam efficaciam. Peripathetici hunc numerum virgineum nuncuparunt, alii regem, & perfectissimum, quia constat ex tribus & quatuor, qui ambo totum sunt sui numeri, & perfectum in suo genere, eius autem perfectionem inde eliciebant: numerus inquit impar indicat spirituale, par autem corporeum: continet enim impar vnionem & indiuisibilitatem, adeoque durationem & æternitatem, vt etiam diuinæ essentiæ symbolizet, vnde Deum impari numero gaudere asserunt: numerus vero par, quoniam diuidi incipit, materiam & creaturarum materialium essentiam demonstrat, causaque corruptionis est. Hic itaque numerus complexus creditus est perfectus, qua de causa veteres Poëtæ ipseque HOMERVS sapientissimus, dum felicitatem prædicare volebat, dixit:

O terque quaterque beatus.

6. COLVERVNT maxime & celebrarunt prisca hunc numerum, quoniam nimirum diuinis mysteriis Deus ipso vsus est, hincque in gubernatione & œconomia rerum humanarum septimo numero multa notabilia continentur: ab ipso Deo septimus dies sanctus statutus est. Veteres ætates diuiserunt in septem. Lunæ facies, septimo die, semiplena, bis septimo, rotunda, ter septimo semi defecta, & quadriseptimo defecta nascitur. Septem plagas, septem epicicli, septem planetæ, septem metalla, septem dies in hebdomade statuti sunt, nec ipse zodiacus septenario caret, in septimo enim mense fit solstitium æstiuum a bruma, in septimo bru-

mæ ab æstate, in septimo æquinoctium vernale & in septimo autumnale. Præterea ex VARRONIS sententia antiquissima septimo die conceptus fit, bis septimo figuræ redditur capax, ter septimo spina & caput formatur, ter septimo spina & caput informatur, ter septima hebdomade fit motus infantis & animæ vis sese exserit, sex septima nascitur, quin imo PLATO in TIMÆO dicit, Deum animam ex septem portionibus conflasse. Dein septimus dies, teste magno nostro HIPPOCRATE & experientia, criticus & decretorius est dies in febribus præsertim acutis, quo mutatio & solutio morbi fit vel in melius vel in deterius. Constantissimæ enim obseruationis res est, quod in natura morborum solutione ac curatione, ni lacescita & impedita aliunde sit, obseruare soleat stata ordinataque tempora & quidem septimum diem, si legitimæ & tutæ sint crises, nam, si in altero numero vel nono vel duodecimo accidit singularis mutatio vel excretio, plerumque imperfecta vel mala esse solet crisis, quæ in septimo & decimo quarto semper bona.

7. Ex hisce præmissis non infimi momenti argumentis septenarii numeri potentiam & energiam monstrantibus, defendere etiam veritatem conamur annorum climactericorum, qui in annum septimum incidunt. Verum enim vero constanter asserimus, nullam vim vel occultam quandam efficaciam inesse numeris agendi in corpus humanum, cum quantitas nullius effectus productiua, nec quicquam addat rebus numeratis, & tempus per se nihil aliud sit, quam certi motus duratio, quæ certis terminis intellectus clauditur, ad dimetiendos aliarum rerum motus vel durationes: deinceps virtus sequitur essentiam rei, a qua dimanat, & diuersitas vel identitas virtutis diuersitatem vel identitatem denotat essentialis principii, sed hæc annorum climactericorum vis, quæ mutationem inducit, non prouenit a numero, numerus enim caret forma. Porro numerus secundum sui rationes abstractus ab omni materia est quoddam mathematicum, hinc nec actiuum nec passiuum esse potest: hinc causa efficiens siue effectuum

ctuum fons, qui annis climactericis adscribi solet, neutiquam septenario numero ut numero assignari poterit. Denique & experientia quotidiana docet, quod & alii anni vitæ periculum ipsamque mortem adferant; quapropter mascule & christiane olim Maximilianus II. imperator cuidam gratulanti, quod climactericum annum transcendisset, respondit: omnes vitæ suæ annos sibi esse climactericos & ipsum sexagesimum quartum & alios deinceps se magis æstimare quam sexagesimum tertium decretorios climactericos maleficos, quia mortis diei sunt propinquiore.

8. PLVRIMI, qui non contenti sunt hac explicatione, climactericorum virtutem ex ipsis astralibus potentiis & malignorum planetarum coniunctionibus, præsertim ipsius saturni deducere allaborant. Afferunt nempe, hoc euenire, quando saturnus singulis septem annis ad quadraturam, vel saltem ad contrarium suæ naturæ signum perueniat. Hæc omnia autem, quæ de stellis adferunt mathematici, imprimis astrologi, certe inania sunt & futilia figmenta, quæ refutare fusius non attinet; hic enim ipsa ratio simul & experientia repugnat: videlicet vitam nostram & sanitatis fortunæque rationem dependere ab astris, vel ex quadam necessitate fatali nos viuere aut mori. Ante diluuii vixerunt annos non-gentos, quod stellarum decretis minime tribuendum fuit, hinc etiam nostra vita, quæ hoc tempore breuiata est, ab astris minime provenit, nec tamen operatio solis vel cuiusdam planetæ mutata est. A dispositione autem parentum hæreditaria, a coeli ac soli varietate, locorum ac climatum diuersa indole, variaque victus ac potus ratione discrepare hominum corpora & ingenia, & ad ægrotudines has vel illas ipsa disponi, vitamque ipsis esse vel sanio-rem vel longio-rem, res apud medicos & philosophos constantissimæ experientiae & veritatis est, quinimo obseruamus, gemellos vno quasi puncto editos, diuersæ naturæ ac temperamenti gaudere corporibus, illorumque mores & dispositionem ad morbos,

illorum quoque fortunam, animum, actiones etiam sub accessu annorum sic dictorum climactericorum mirum differre.

9. Ex dictis itaque apparebit, mutationes, quæ contingunt humanis corporibus circa annos climactericos non esse ipsis astris adscribendas vel a coelo petendas, neque numero seu causæ efficienti, cum potius hic signum sit mutationis, non autem causa, tribuendas; eapropter, cum efficacia horum annorum non penitus sit neganda, aliud fundamentum merito inquirendum est. Sapientissimum enim Numen rerum omnium naturam mirabili artificio coagmentavit, ac singula suis quibusdam numeris, mensura, pondere, ordine, harmonia vinxit, ut in tota oeconomia rerum corporearum omnes operationes staticæ, mechanice, certoque tempore perficiantur. Corpus humanum certum requirit tempus, ut formetur, ut ad exitum ex vrtero disponatur; certis temporibus corpus ad perfectionem debitam peruenit, certo temporis progressu fiunt morbi, & temporibus quoque certis sanantur: nam causæ morbificæ, antequam potentes sint ad agendum & ad morbum producendum, antequam etiam corrigantur & expellantur, certa exposcunt tempora. Cum enim omnis effectus in toto rerum corporearum vniuerso, omnis mutatio non nisi per motum debitum, certum, sufficientem fiat & absoluator, tempus autem non nisi mensura & duratio motuum sit, facile adparet, alterationem & peculiarem mutationem, quæ in corporibus visitur, certis temporibus sese manifestare, non, quod tempora, dies vel anni id causentur, sed, quia certi ad effectum vel mutationem necessarii & determinati motus requiruntur, qui tempus constituunt.

10. CORPVS nempe nostrum mirabili ordine ad perfectionem summam, ad quam potest pertingere, ex sapienti conditoris voluntate successiue peruenit, inque omnibus viribus augetur. Et cum hominibus semel mori statutum sit & etiam corpori talis interitus causa est innata, quæ etiam ordine & tempore fit, huius vero perfectionis, item defectionis & dispositionis ad interitum vis statis temporibus annisque maxi-

maxime septenariis visitur, vbi magna vel ad perfectionem vel ad defectionem mutatio accidit, quoniam sapientissimus rerum creator ex liberrimo beneplacito causarum physicarum operationes & effectus notabiles certis alligavit motibus, & temporibus & maxime numero septenario inclusit. Cum igitur veteres deprehenderent, quod sub singulis septem annis cuius corpori singulares accidant mutationes, istos annos nominarunt climactericos, quibus homo quasi per scalam transit vel ad suam perfectionem vel defectionem, i. e. vires hisce annis vel augentur vel imminuuntur. Sunt enim hi anni velut gradus humanæ vitæ corporisque durationis; hoc namque non in eodem semper permanet statu, sed secundum illud notum *Auerrhois* dictum, a generationis puncto tendit homo ad corruptelam. Pulchre scribit *SENECA* in epistola 28. *nemo nostrum idem, qui fuit iuuenis, nemo mane, qui pridie, corpora nostra rapiuntur fluminum more, quicquid vides, currit cum tempore, nihil ex his, quæ videmus, manet, ego ipse, dum loquor ista, mutatus sum.* Corpus humanum transit ad perfectionem, transit etiam rursus ad interitum, hinc indita corpori nostro talis causa, cuius necessitate in viribus augetur, deficit & etiam interit. Et hæc est illa mortis & interitus pernicies, vt inquit *VERVLAMIUS lib. 3. cap. 10. de diæta* hæc intestina illa calamitas, quam nulla ars, nulla humana industria effugere, sed ne reprimere quidem possit, etenim si cui ab ortu temperato vel *Æsculapius* præsit, qui illum ab iis, quæ foris sunt, aut quæ intro sumuntur, causis saluum & incolumem sic tueatur, vt nullum inde corpus detrimentum capiat, is tamen a semet ipso suaque sponte magis magisque conficietur, consumeturque, donec extremum vitæ spiritum edat, illuc, dum contendit, plurimas hoc interim spatio mutationes necessario sustinet, has, qui annorum spatiis & interual-
lis dimensi primum discreuerunt, simul ætates appellarunt: vt sit ætas id vitæ curriculum, quo luculenter corporis constitutio per se suoque nutu mutatur.

II. CONTINGIT itaque hæc mutatio, vti diximus, septimo

mo anno, ob quam mutationem ætas etiam aliud accipit nomen. Talismodi mutatio accidit quibusdam non sine periculo ætatis, quædam turbatio in motu sanguinis & humorum contingens, aliis est tuta, aliis non, prout nempe corpus sanum vel debile est, vel iam dispositio aut causa quædam ad morbos latet, vel immoderata animi passio, aut insalubris diuturna tempestas præcesserit vel morbus quidam in corpore delitescat. Tales itaque causæ externæ, si in corpora incidunt, quæ annos agunt climactericos, in quibus sensibilis ad defectionem corporis fit mutatio, sæpius lethum inferunt: quodsi vero corpora fuerint robusta, temperata & diætæ regulas bene obseruent, corporisque & animi bonus fuerit habitus, sicco pede per medios transeunt climacteres: paucis, sub ætatibus transmutatio temperamentorum accidit, mechanismus corporis nostri, solidæ & fluidæ partes aliam accipiunt crasin ac motum. Omnem autem temperamenti mutationem secundum GALENUM *lib. 6. Epidem. sect. 3.* periculum insequitur.

12. RATIO autem postulat, vt mutationes, quæ singulis septem annis in corpore notabiliore accidunt sub certis ætatibus, in medium adducamus. Nempe ter septima hebdomade infans sese in vtero mouere solet, in sex septima hebdomade paratus est ad exitum, septimo mense incipit dentire, septimo demum anno, cum prima ætas infantiae clauditur, dentes decidunt, corporaque per hanc ætatem sunt humidissima. Sequitur post hanc pueritia, quæ ad decimum quartum extenditur, qua foeminis menses erumpunt, mammæ increscunt, pili in pube visuntur & potentia fit generatiua. In masculis testes incipiunt separare semen a sanguine, quod titillationem efficit. Huic proxima est adolescentia, quæ clauditur vigesimo primo anno: nomen inde habet, quoniam corpora tunc ob humoris vbertatem plurimum adolescunt, corpus tum debitam acquirit longitudinem & barba apparet in mento. Adolescentiam iuuentus excipit, quæ duplicato septenario absoluitur, & durat ad trigesimum quintum annum:

hæc

hæc ætas dicitur florida, cui propria est venustas, agilitas, & in hac secundum HIPPOCRATEM homo ad auctiorem totius corporis debitamque staturam peruenit, membra, præsertim ossa acquirunt legitimam soliditatem ac firmitatem. Sequitur postea quinta ætas, nempe virilis, a duplici septenario ad septies septem perdurans, recte dicitur a vi & viribus, quoniam tunc vis & robur animi & corporis maximum est, iudicium in summa excellentia, & qui tunc non peruenit ad prudentiam, sapientiam, ille nunquam eius fit particeps: dicitur etiam ætas perfecta, matura, consistens: Germani dicunt: *Funffzig Jahr stille stahn*. In foeminis circa quadragesimum nonum annum, cum iam incipiat vis corporis deficere, cessat potentia generatiua, ordinario tum menses, non sine magna motuum sanguinis turbatione desinunt. Sexta ætas dicitur prima senectus, quæ per bis septem extenditur ad sexagesimum tertium: deficit tunc roscidum nutritium humidum & siccior natura euadit & contabescit corpus, caro fit dura, rugæ apparent in facie, memoria valde debilitatur, hæc enim habitat in humido, cura, sollicitudo, auaritia incipit, iudicium autem & prudentia crescit. Veteres hanc ætatem consiliariam dixerunt, quia senes ad consilia sunt aptissimi. Antiqui melancholiam crediderunt sedem esse sapientiæ, hinc orbis heroes melancholici, Alexander in bello & pace, Socrates quoque melancholicus. Et Seneca *de tranquillitate c. 15. lib. 3.* scribit: *nullum magnum ingenium sine dementia fuit*, i. e. melancholia. Melancholici optimi fuerunt poetæ, futura etiam prædicentes. Et bene Heraclitus: aridus animus sapientissimus, siue etiam anima sicca sapientissima.

13. ALTERA senectus debilis, imbecillis, decrepita dicta, vitam claudens, vltimum, ordinario ad septies decem, i. e. septuagesimum annum, etiam Dauide regio psalte teste, sese extendit, ibi maxime est virium corporis & animi decrementum ac defectus, morbida debilitas & senectus ipsa morbus. Clauditur ordinario hic spatium vitæ humanæ, & paucissimi octogesimum primum annum viuendo attingunt. Optime

(Hoffm. Opusc. varii argumenti.)

B b

dixit

dixit *Salomo* Ecclesiastes cap. ultimo a vers. 2. vsque ad 7. tunc anni displicent, nulla pars suum facit officium, intellectus obscuratur, manus & pedes vacillant, dentes labuntur, oculi caligant, aures obsurdescunt, in capite fit caluities crinesque decidunt, sanguis exsiccatur, imbecillior fit circulatio, motus cordis tardus languidusque fit, neruorum robur perit. Omnes itaque ætates mutant temperamenta & actiones humanas. Merentur hic legi sequentia, quæ habet *CASPARVS CALDERVS* de hæredia, in *tribunali medico* loc. *supr. cit.* ubi dicit: *oriuntur & manant temperamenta, tum a primogenia natura, tum ab ætate, quæ illi comes est indiuidua, cumque id, quod a natura prodiit, comparate duntaxat, quod vero ab ætate, simpliciter dici soleat: consequitur, æstimandis temperamentis ætati quam naturæ vim tribui maiorem, & eam, qui ex ætatum decursu fit, temperamenti speciem, ei tum victoria, tum nomine præferri, quam natura ortusque contulit.*

14. Ex hisce dictis clarissime patebit, non sine summa ratione a veneranda antiquitate septenarium anni numerum obseruatum atque magni æstimatum fuisse, quoniam infinitus rerum conditor sapientissime voluit, vt sub certo tempore & septenario numero, non quidem ex eius natura & operatione, quæ nulla est, sed ex necessitate harmoniæ & ordinis causarum corporearum, naturalium & mechanicarum peculiaris mutatio corpori & animo inferatur, nempe vt ipsis vis increseat, & ad perfectionem perueniat, inque in ea ad tempus maneat, postea vero successiue decreseat. Hæc ipsa coordinatio & complexus incrementi & decrementi hominis sub certis ætatibus & temporibus maxime apparens, luculentissime indicat ac deprædicat sapientiam, ordinem, symmetriam, summum artificium ac regimen creatoris, quibus totum hoc vniuersum eiusque partes & maxime in eo corpora organica & viua gubernat.

15. Ex præcedentibus etiam clarum fit, non in numero necessariam quandam fatalitatem certumque periculum ratione vitæ metuendum, multo minus ipsum annorum numerum

rum in casus fortunæ vel infortunii aliquod ius & potentiam habere: hæc enim pure a prouidentia diuina ab externis accedentibus causis vt sunt accusationes, insidiæ malitiosorum hominum, peregrinationes periculosæ, damna, incendia, naufragia, vulnera, dependent, hæc enim aduersa ex naturali illa per septenos aut nouenos annorum circuitus, graduum ætatis distinctione neutiquam possunt prouenire.

16. QVARE autem sub sexagesimo tertio anno plures finem vitæ suæ claudant, ratio etiam non in numero quatenus est numerus quærenda videtur, sed quatenus circa hoc tempus virium præsentissimum sit decrementum & vltima senectus incipit. Si itaque humor morbidus præsens, si virium debilitas etiam ex aliis causis, si animi passio vehemens adsit, utique hisce concurrentibus, facile ad interitum ruit corpus. Nam experientia loquitur, quod hoc anno plures etiam egregii viri exstinguantur. Insuper huius rei hanc pronunciamus causam, quando existimant, hunc numerum esse periculosum & imminere malum corpori, inquieto & perturbato sunt animo, timent, tristantur, anguntur, idemque periculum semper subesse cogitant, sique vel leuiter valetudo offendatur, diem fatalem imminere putant. Cum autem nihil efficacius in corpus nostrum agat eiusque vires destruat inque morbum præcipitet, quam grauis animi affectio, ideo fit, vt eo anno multi ægrotationem quandam experiantur & eo maiorem, quo grauius animo adficiuntur.

17. CAETERVM obicere quisquam posset, quod mutationes, quæ fiunt ab ætate ad ætatem, non sint insignes, quoniam non subitæ, sed paulatinæ & intra limites sanitatis fiant adeoque tutæ, cum repentinas non tolerare possit natura. Verum enim vero utique mutationes sunt maxime insignes, annon enim insigne? quod certo anno dentes decidant, quod pubertas accedat, menses præsto sint, deficient, corpus in longum adolescat, & certo tempore dentes erumpant. Insuper respondemus etiam successiuas & paulatinas mutationes, uti

videmus in phthificis, hec̄ticis, magna febre laborantibus, certis diebus vel horis ad ἀκμὴν periculi accedere. Potest hæc res eleganter illustrari æquinoctiorum & solstitiorum natura. Notum est, quod successiue sol feratur ab vno cœli puncto ad alterum, nililominus tamen, quando ad æquinoctiale & solstitiale peruenit, mox insignes mutationes visuntur in macrocosmo inque corporibus nostris. In vernali natura accipit robur & morbi diuturni vel in melius vel in peius mutantur: phthifici hec̄tici euadunt vel moriuntur: intermittentium paroxysmi ad tempus desinunt. In solstitio æstiuo diuturnæ quartanæ citra vsum remediorum vel plane exspirant, vel si persistunt adhuc, post hoc tempus totum autumnum & hiemem perdurare solent. In æquinoctio autumnali multæ commotiones sanguinis & humorum fiunt, consuetæ excretiones sanguinis, v. g. per hæmorrhoides, per arteriam asperam reuertuntur. Circa solstitium hibernum natura est imbecillissima, vbi omnes morbi acuti valde sunt periculosi & chronici paroxysmis grauissimis stipati. Quibus manifesto perspicimus, vtut paulatim & accedat & recedat sol a solstitiorum & æquinoctiorum punctis, nihilominus ipsis in punctis, quando consistit, præsentissimas fieri mutationes.

18. ULTERIVS videmus in corpore nostro, ægroto etiam, certis temporibus fieri, v. g. in variolis & morbillis, excretiones, febres maxime inflammatorias die septimo vel in peius vel in melius desinere, mensium quoque fluxus statto die vel mense accedentes in foeminarum corporibus, varia suscitare pathemata. Ex quibus patet dispositionem ad mutationes fieri quidem successiue, sed ipsam mutationem in instanti. Eodem modo se res habet cum annis climactericis, siue annis ætatum, vbi anno septimo accedente notabilis visitur vel in incremento vel decremento corporis humani mutatio. Quicquid autem sit, negandum non est, vim horum annorum etiam sese exserere in quibusdam anno præcedente, vel etiam proxime subsequente.

19. PORRO dubium quoddam, quo infringere volunt virtutem horum annorum dilucidandum est, nimirum dicunt, mutationes has fieri intra limites sanitatis, adeoque absque periculo. Verum neutiquam valet consequentia, nam & intra limites sanitatis graui inœrore & terrore homo potest corripī, qui affectus mox grauem morbum, vel etiam mortem inferre potens est. Equidem non aliquis moritur sanus, sed intra limites sanitatis mors disponitur.

20. NEC a ratione instituti alienum esse existimo per paucis subiicere, quibusnam maxime incommodis vel ægritudinibus circa singulas ætatum mutationes homines sint obnoxii. Et vt auspicemur a septimo mense circa dentitionem, vti notum est, grauissima pathemata sese exserere; comitantur enim dentium eruptionem sæpissime vigiliæ, febres, pauores in somno, diarrhoeæ, asthmata, epilepsiæ, alui adstrictiones, tormina, quæ, si non prudenter, iuuante natura, a medico tractantur, facile infantes iugulant. Decimo quarto mense plerumque canini dentes prodeunt, qui, quoniam longiores & acutiores sunt, gingiualem carnem magis dilacerant & vellicant, hinc magis periculosa & lethifera suscitant symptomata. Dimidio septimo numero, nempe intra tertium & quartum annum molares vt plurimum exitum affectant, vbi lentæ febres sæpius non sine periculo sese associant. Septimo anno, quando dentes decidunt, ob nimiam gingiualem carnis laxitatem, os foetet, vel dentes fiunt nigri, cariosi, complicantur quandoque diarrhoea, appetitus prostratus, febres stomachales, a deglutita vitiata saliva, lumbrici quoque circa illud tempus vberius sese exserunt. Circa annum decimum quartum in foeminis ante mensium eruptionem varia symptomata sese manifestant, macilentæ nempe fiunt, cephalalgiiis vexantur, nauseosæ sunt, appetitus prostermitur, liuidi coloris fiunt, lassitudo & grauatiuus dolor adest in pedibus & lentus accedit calor. Eodem hoc tempore crescit corpus in longitudinem, quapropter multæ tensiones dolorificæ hinc inde in artubus sentiuntur. Vigesimo

primo & vigesimo octavo accedente foeminae fiunt multum salaces, amatoriis febribus corripuntur, circa hoc tempus quoque mares insolentiores sunt in appetenda venere, unde facile gonorrhoea, aut contagio venereo inficiuntur, corpus fit siccius calidius, hinc frigidus potus & aerem frigidum amant, unde pleuritides, peripneumonias & alias febres inflammatorias, nec non ventriculi inflammationes incurrunt. Tunc quoque temporis usque ad trigessimum quintum annum iuvenes ad hæmoptysin & phthisin inclinant. Viri anno quadragesimo secundo & nono, cum sanguis eorum sit feruidissimus, nisi sese moderentur in calidorum potuum assumptione, in ardentes, biliosas febres, tertianas continuas & causum incurrunt. Annus etiam hic quadragesimus nonus maxime infensus est foeminarum sanitati, penitus enim tunc cessare solent menses, unde varii pathematibus hypochondriacis, & hystericis cum lento calore per aliquot annos adficiuntur. Sexagesimo autem tertio anno, item septuagesimo, cum iam insignis adsit virium debilitas, morbi chronici, cachexia, asthma, hydrops, apoplexia, quartana febris, icterus niger & hæmorrhoides coecæ minari solent periculum. Subsequens ætas, ob humidi benigni defectum, spirituum imbecillitatem, nervorum & fibrarum densitatem, ad visus, auditus imminutionem, vertiginem, paralytin, tumores oedematosos pedum, marasum, stranguriam, vesicæ calculum, tremorem artuum, vacillationes pedum facile inclinant.

21. AT vero non tantum septimo anno ætatis accedente dispositio fit ad morbos, verum etiam per singularum ætatum annos, peculiaris morborum vis sese manifestat, quæ de causa cum hæc ad doctrinalem praxin multum conferat, pauca saltem adhuc hac de re monere allubescit. Primo omnium notatu perquam dignum est, dispositiones ad morbos successiue per ætates fieri, maxime secundum regiones corporis, adeo, ut infantes & pueri morbis capitis, adolescentes & iuvenes affectibus thoracis, viri & senes morbis abdominis &c. decrepita ætate constituti vitiis artuum & extremarum partium

tium maxime pateant. Ita videmus quod infantes & pueri corripiantur achoribus & tinea capitis, tumoribus paroditum, oculorum acribus defluxionibus, panno oculi, gutta serena, exulcerationibus & hæmorrhagiis, coryza, amygdalarum tumoribus, capitis doloribus, quinimo epilepsia, ceu morbo capitis infantibus maxime familiari. Adolescentes & iuvenes experiuntur facile fittas tusses, cordis palpitationes, luxationes, vertebrarum, peripneumonias, hæmoptyses, phthisin, apostemata, in pectore hecticam. Iuvenes etiam & virilis ætatis homines valde proclives sunt ad omnis generis febres intermittentes, tertianas, quartanas, inflammatorias, biliosas, acutas, deliria, phrenitidem, febres arthriticas: sunt enim hæ febrium species maxime cordis & arteriarum affectiones, quæ partes locatæ sunt in thorace. In consistente virili ætate & senectute prima cachexia, morbus niger, hydrops, dolores in lumbis, colicæ spasmodicæ, infarctus lienis, vomitus, præsertim in foeminis, cruenti, tensiones circa os sacrum, calculosæ passiones, internæ hæmorrhoides magis sese exserunt. Vltcrius procedente senectute in partibus extremis visuntur morbi & hæc ætates maxime adoriuntur stranguria, urinæ stillicidium, calculus vesicæ, artuum tremores, dispositio ad sphacelum, podagra, & apoplexia. Ratio, quare natura hoc ordine gaudeat, vt a capite incipiendo, disponendo partes ad morbosas constitutiones vsque ad extremos artus, hæc proxima est: natura semper in ipso formando foetu primum elaborat caput, deinde thoracem & abdomen: ita etiam intendit primo in nato homine principales partes, nempe caput perficere, idque ad debitam firmitatem & robur deducere, vnde maior ad eam partem in pueritia & infantia humorum & sanguinis fit affluxus. Cum autem facile vel ob quantitatem vel qualitatem vitiosam, vel ob alias concurrentes etiam externas causas, circulatione debita impedita, stagnant & sistantur humores, fit, vt dicti propullulent affectus. Sub ætate adolescentiæ & iuventutis natura aggreditur elaborationem & perfectionem thoracis, & in

& in eo contentas partes nempe pulmones & cor, cui fini etiam affunditur copia largior sanguinis, & quando etiam hic non inuenit suum debitum circulum, sed sistitur & stagnat, inde affectus circa has partes maxime nascuntur. In virili ætate & senectute prima amplius fit abdomen, deinde etiam, quoniam natura non habet tantam efficaciam ad motum, colligitur in vasis venosis abdominis magna quantitas sanguinis, quæ impeditius mouetur, & ibi stagnans commemorata producit pathemata. In extrema vero senectute ob defectum boni succi, neruorum rigiditatem & ineptitudinem ad motum, spirituum etiam & caloris defectum in extremis partibus, vbi semper tardissima circulatio, facile stagnat sanguis & serum, coagulatio fit, pororum & neruorum obstructio, vnde adducti morbi originem suam nanciscuntur.

22. CORONIDIS loco perpauca addam quasi superpondii loco de moribus, ad quos singulæ ætates inclinant, nempe puerili & adolescenti ætati familiares sunt somnolentia, negligentia, securitas, petulantia, otium delectatio dulcium, vsus variarum voluptatum. Iuuenes magis sunt præcipites, loquaces, rixosi, iracundi, audaces, impatientes, ambitiosi, agiles. Viri euadunt constantiores, vigore agendi instructi sunt, vigiles, ambitiores. Senes sunt pertinaces, diffidentes, auari, superstitiosi, pensitabundi, solitudinem amant magisque taciturni. Et hæc sunt, quæ de annis climactericis dicere in præsentī placuit.



DISSERTATIO VIII.
DE
PRÆSTANTIA REMEDIO-
RVM DOMESTICORVM.

§. I.

VTcunque hac nostra ætate ars, quæ agris sanita-
tem & sanis vitam longam promittit, longe subti-
lius, quam superioribus temporibus exulta sit, cum
ex nobilissimis pariter & vtilissimis anatomicis, physicis, me-
chanicis & chymicis inventis magna cœperit incrementa; ni-
hilofecius, quominus huius artis opera & exercitia feliciter
& ex voto adhuc succedant, complures remoræ atque diffi-
cultates observantur, ex quibus immensa illa medicamento-
rum farrago ac silua, quibus medicorum libri & pharmaco-
polia repleta sunt, præcipuum locum sibi vindicat. Antiquis-
simi medicorum perquam paucis utebantur remediis, sed vi-
ctu potius curabant & cuius morbo & corpori accommoda-
tam viuendi rationem præscribebant, atque de origine ac
causis morborum avertendis plus erant solliciti, quam de iis
curandis. Et quia animadvertabant præposteros animi mo-
tus pernitiales maxime affectiones suscitare, salutaribus po-
tius morum præceptis animum magnis desideriis intentum
componere & sanare omni studio laborabant paucis herba-
rum infusis vel decoctis contenti. At vero postquam Gale-
nus & eius sectæ addicti, atque Arabes doctrinam hanc sa-
lutarem maiori labore excutere & agitare cœperunt, tanta
compositionum, medicamentorum & materiæ medicæ copia
ac cumulus ortus est, vt si medicinæ initiandus libros, qui
hisce repleti sunt, introspiciat, ingens artis addiscendæ fasti-
dium eum teneat necesse sit. Et postquam superiori seculo
chymici caput in medicina attollere cœperunt, rursus magna

(Hoffm. Opusc. varii argumenti.)

Cc

&

& pene mirabilis ab eorum manibus atque experimentis per ignem factis remediorum maxima ex parte vehementium copia in praxin medicam redundauit. Quapropter nostro tempore omnes fere sic dicti practicorum libri arcanis chymicis & immensis compositionibus fere luxuriant, quibus incomparabiles & pene diuinas in morbis, cuiuscunque etiam generis fuerint, sanandis laudes adscribere non erubescunt. Si quis vero sine vlllo præiudicio adeoque libero animo solidaque attentione earum vires ac virtutes in tot differentibus morborum & corporum aliarumque circumstantiarum statibus accuratius explorare studeat, ea omnino spem suam penitus fallere, neque expectationi ullo modo respondere eorumque vires maxima ex parte non modo inertes ac steriles, sed etiam naturæ morborum infestas esse certissime deprehendet.

2. QVARE, vt libere sententiam nostram profiteamur, tanta medicamentorum farrago meræ ignorantiae filia est. Qui enim vitæ ac sanitatis rationem & genuinas morborum origines & causas & principia, quibus agunt omnia remediorum genera, cognita perspectaque habet, is facile diiudicabit, tanto remediorum apparatu in præseruando & sanando non opus esse, sed pauca selecta, vsu frequenti probata & simplicia magis, quam composita sufficere. Plures certe compositiones ineptissime ex variis ingredientibus, sæpe sibi inuicem contrariis, confarcinatae sunt, vt ex centum vix vna laudem & vsum in praxi mereatur. Eodem modo comparata sunt chymica, quibus identidem optime, paucis tantum exceptis salibus, oleis destillatis & ex metallicis dextre præparatis quibusdam, carere possumus. Nam remedia hæc longe actiuiora naturæ animantium, quæ temperata maxime desiderat, minus sunt amica, & vel vehementes motus tantum suscitando vel eos validissime deprimendo agunt, aut infesta corrosiuitate vel adstrictione solidorum texturam lædunt. Deinceps ignis, cuius beneficio chymica eliciuntur, destruendis potius simplicium texturis, a quibus eorum facultates & vir-
tutes

tutes vnice dependet, idoneus est, quam vt earum virtutem acuat, vel meliores infitis vires inducat. Denique tantæ compositionum veterum & arcanorum chymicorum multitudinis e medicina removendæ causa potissimum hæc est, quod veteres & veras morborum causas & remediorum genuina principia, quæ causis profligandis opponi debebant, plane ignorabant, quare vix quicquam solidi aut boni de eorum compositionibus sperandum esse, quisque medentum prudentior perquam facile diiudicabit. Atque etiam experientia per plures annos certa & attenta suffulti confidenter adfirmamus, vernacula, parabilia & domestica omnibus nota, viribus, vsu atque vtilitate, varia composita pretiosa & magno labore conquista arcana chymica longissime antecellere inque sanando longe certiore & tutiore efficaciam illis promittere. Qua re permoti præsentī hoc specimine domesticorum & parabiliorum remediorum præ illis præstantiam adstruere annitemur.

3. ANTE vero, quam ad specialiore huius thematis tractationem & ad explicationem eorum, quæ in auxilium morborum prompta ac parata sunt, descendamus, non incommodum fore iudico, si præmittamus, quænam eorum nomine intelligamus. Iam vero mihi facile persuadeo, vnumquemque leui labore adsecuturum, ea me vocare remedia domestica, quæ & plebi nota & in quavis re familiari facile profant, in culinis ad manus sunt, quæ in hortis, siluis, pratis crescunt, aut quæ natura omnibus non denegauit. Nolumus itaque peregrina accersere, sed ea saltem, quæ nostra patria profert, quæ omnibus & singulis usui esse possunt, enarrare nobis constitutum est. Supersedebimus autem tædiosas & difficiles ex iis præparationes indicare, omnesque vires & facultates simplicium & domesticorum a medicis annotatas late ac diffuse commemorare, quia dissertationis angustiae tantum laborem capere non possunt; sed suffecerit ex domesticis selectiora & quæ nobis vsu spectata, viribusque in

morbis cognita atque probata sunt, delibasse, iisque in medium prolatis nostram subiecisse sententiam.

4. PRIVS vero, quam hæc enarremus, quædam argumenta pro euincenda simplicium & domesticorum præstantia in medium adducere nobis consultum videtur. Et ut ab auctoritate rem ordiamur, summus & antiquissimus medicinæ auctor HIPPOCRATES vulgaria & plebeia remedia non spernebat, sed potius maximo habebat in pretio, quare *Lib. de præceptionib.* scribit: *ne pigeat ex plebeis sciscitari, si quid ad curationem utile sit.* Et apud eundem multa recensentur remedia vulgaria, per experientiam nota, quæ procul dubio a mulierculis partu defunctis aut hysterice affectibus detentis didicerat & annotauerat, *mulieribus enim*, inquit *Lib. de Septimestri partu, fides habenda est, uti de iis, quæ circa partum accidunt, loquuntur.* Eiusdem quoque sententiæ fuisse GALENUM, ex *libro de simplicium facultatibus* patet. Nam ipse plebeios & imperitos, piscatores aliosque infimæ sortis homines consulere non erubuit. Hic grauissimus post HIPPOCRATEM auctor cum Alexandria in patriam rediret, in illo itinere incidit in quendam villicum, graui tonsillarum, vullæ & colli dolore ac inflammatione laborantem, qui suffocationis metum incutiebat. Is destitutus aliorum remediorum apparatu viridia iuglandium tegmina circumspiciebat, adeoque iubet ex illis succum exprimere & cum melle miscere, eoque percolato ægrum fauces crebro perluere, quod remedium cum animaduerneret celerrimæ operationis fuisse, sæpius illud in tali modo adhibuit.

5. NEQVE dubium est, quin medicina augmentum suum maxima ex parte debeat experimentis a plebe sæpius factis: nam rustici & plebei homines opibus destituti sine medicamenti singulari artificio paratis & etiam sine medicis diutius viuunt & felicius ex grauibus morbis euadunt, quam diuites, nec vero aliis, quam simplicibus, parabilioribus, domi natis vtuntur, & Deo, naturæ ac tempori reliqua committunt. Et quemadmodum illi sine eiusmodi arcanis & ma-

gno labore conquisitis in morbis conualescunt, & antiquissimi quoque hominum hisce inuentionibus & artificiis destituti e morbis, qui nunquam non genus humanum affligerunt, eluctati sunt, ita & sine iis nostris temporibus non sanitatem integram conseruare & reparare possimus, equidem non video. Sicuti enim diuina sapientia omnia in tota rerum natura & quæ maximæ admirationis sunt, facillima & simplicissima via peragit & paucissimis alimentis animantia conseruantur, causæque morborum sua natura paucae & simplices sunt; ita recte concluditur, pauca facilia & simplicia quoque remedia ad causas has morborum remouendas sufficere. HELMONTIVS, grauis alias Galenicorum censor, in *Dispensatorio moderno* ingeniose prodidit: Deum iam perfecte & sufficienter ex simplicibus remedia composuisse, vt in iis perfecta cura & sanatio omnium morborum sit, atque exstimat, Deum ex sapientia & prouidentia sua æterna simplicibus vires ad destinatos vsus sufficientes iam indidisse, & per consequens scribit eos, qui dispensatoria volunt componere &nectere plurima, occulta quasi blasphemia insufficientiam diuinæ sapientiæ accusare & supplere velle. Neque hæc solida ratione est destituta sententia: nam Deus sapientissimum chymicum suum & compositionis artificium non potuit perfectius exprimere, quam per tot infinitas texturas ac crases triplicis regni corporum, quorum quæuis peculiaribus proprietatibus, dotibus ac viribus donata sunt.

6. VLTERRIVS maximum diuinæ sapientiæ argumentum inde elucet, & quod nos satis ad æstimationem vulgarium remediorum perducere debeat, quod iis plantis, quæ ubique & in semitis ac campis crescunt, maiorem iuuandi efficaciam indiderit, quam rarioribus, pretiosis & quæ magno labore ac studio ex regno minerali vel marino comparantur, in quibus sæpius exigua vel plane nulla medendi virtus animaduertitur. Quo magis eorum stultitia manifestatur, qui magnæ virtutis auxilia in pretiosis illis, auro, argento, perlis, gemmis, coralliis & exoticis rarioribus quærent, quasi Deus, quæ

summa est erga genus humanam misericordia, pro diuitibus & magnatibus huius mundi tantum præstantissima remedia in eiusmodi rebus constituerit. Ego sancte adfirmare possum, me superioribus temporibus mirifice inhiasse & delectatum fuisse chymicis & actiuioribus ex mineralium regno petitis remediis, & vbiuis fere arcana conquisiuisse. Postea vero longe aliud ipsa in veritate & per attentam experientiam expertus sum, pauciora, nempe selectiora & viliora longe promptiora in auxilium esse & maiorem in medendo efficaciam custodire ipsis iam dictis magno pretio & labore præparatis chymicis arcanis.

7. IAM vero, vt ad ipsam rem progrediamur, singulatim quædam ex ferme vulgaribus & quæ ad vsum medicum valde apta sunt, excutiemus, initium facturi ab aqua, vino & pane. Hæc tria sola sicuti hominis vitæ ac sanitati diu conseruandæ idonea sunt, siquidem panis solidam sanguinis substantiam, aqua liquidam, & vinum illam fluidissimam, quæ corpori vires & robur addit, materiam ministrat: ita certe non sine magna ratione factum est, quare sapientissimum Numen hæc tria ceu elementa sacramentorum etiam ad vitam spiritualem conseruandam & corroborandam accommodauerit. Neque etiam mediocria sunt commoda, quæ ab iis ad præseruationem & medelam multorum affectuum suggeruntur. Simplex aquæ puræ potus cum debito regimine tantæ est in tollendis & præseruandis morbis efficaciæ, vt cetera medicamenta multum superet. Quia vero de hac nobili materia, videlicet aquæ medicina uniuersali iam peculiarem tractationem adornauimus; nolumus esse prolixiores in iis repetendis, quæ ibi satis enucleate & copiose proposita fuerunt. Vinum generosum & optimæ notæ principem locum inter omnia confortantia ventriculi & omnium corporis partium obtinere, etiam in peculiari dissertatione adstruximus, quo lectorem breuitatis studio remittimus. De pane itaque quotidiano secalino, qui omnibus in promptu est, restat vt agamus. Illud quidem in antecessum hic in genere monendum

dum duximus, quod in hac tractatione non omnia, quæ vsui inferuire possunt ex domesticis & simplicioribus, sed pauca saltem & quæ multoties experta sunt & aliorum medicorum fide corroborata, depromere nostri instituti sit.

8. ITAQVE tractationis initium a pane secalino faciemus. Ab hoc iam HIPPOCRATES *Libr. de Salubr. dieta §. XI.* medicinam] desumfit suasitque hominibus laborioso vitæ genere vtentibus, si alui profluvio corripiantur, ac recrementa cruda ciborum speciem referentia secedant, vt loco securioris medelæ assatum panem vino intritum adsumerent. Neque ignotum est, quantum ad vires reficiendas præsidii insit pani similagineo tosto & vino generoso imbuto, cui quidpiam cinnamomi vel sacchari additum fuerit. Hoc sane analeptico præstantissimo illi vti maximo cum fructu possunt, qui ab ingenti defatigatione aut sanguinis enormi a vulnere profusione celeri virium refectione opus habent. Quare huic simplicissimo refectionorio Propheta regius vim cordialem diuino plane encomio tribuit, quippe *Pf. 104. vers. 5.* scribit, quod *vinum letificet cor hominis & panis illud fulciat.* Vtroque horum analepticorum HENRICVS ab HEER, vti in *Obs. Med. 18.* prodidit, maritum, a veneris immodico vsu pene exanimem, viribus & vitæ reddidit, quem alius medicus, qui venæ sectionem suaferat, procul dubio morti dedidisset. Clarissimus medicorum Batauorum, BOERHAVE in *Materia medica*, non ita pridem edita, decoctum panis præstantissimi analeptici vsus in febribus & aliis affectibus commendat, quod hunc in modum paratur: recipe panis triticei cum furfuribus fermentati biscocti vncias octo, aquæ putealis purissimæ libras tres, coque in vase figulino recenti clauso, per spatium vnius horæ, deinde cola per setaceum, adde decocti præscripti libram, succi citrini semiunciam, aquæ stillatitiæ cinnamomifatæ drachmas duas, vini Rhenani uncias quatuor, sacchari sufficientem quantitatem ad gratum saporem conciliandum. Memorabilis est *observat. 10.* REVSNERI vbi meminit femina aliquoties abortu periclitatæ, quæ sub medium gestatio-

tionis tempus coepit quotidie panis frustulum vino maluatico imbutum ieiuno ventriculo adsumere sicque malum casum feliciter euitavit. Huic auctori accedit etiam VELSCHIVS, qui septimum in vna femina abortum, reliquis medicis frustra laborantibus, hoc potissimum euporisto auertit. Panis butyro illitus mane ieiuno ventriculo sumtus excessuum in prima regione stabulans acidum contemperando præcordiorum anxietatem, vertiginem, capitis dolorem & virium exsolutionem feliciter sustulisse, non semel a nobis obseruatus fuit. Idem ientaculum in constitutione epidemica morbosa, vbi aer effluuiis & vaporibus naturæ infestis refertus est, non sine ratione & experientia commendari meretur.

9. QVEMADMODVM vero panis interne sumtus insigni gaudet virtute analeptica & confortante: ita eandem etiam externe mirifico plane modo exserit. Probe hoc cognouit summus ille philosophus, DEMOCRITVS, HIPPOCRATI æqualis, qui referente DIOGENE LAERTIO in *Libr. de vit. Philosoph. IX.* instantem extremo senio vitæ finem sentiens, in gratiam sororis suæ odore panis recenter cocti ad triduum mortem remoratus est, quod etiam LAVRENTIVS IVBERTVS experientia confirmat, qui panem naribus admotum a lipothymia liberare auctor est. Neque omittendum est, quod panis cum carui semine coctus & ex furno recenter extractus atque dissectus & auri calide fomenti loco adplicatus maximum etiam nostro experimento sit remedium euporiston aduersus surditatem, quod etiam RIVERIVS in *Praxi Med. Lib. III. Cap. II.* insigniter commendat. Similiter id suo calculo confirmavit HIERON. REVSNERVS *Obs. Med. 55.* qui Henricum Comitem a Stolberg, cui ex fragore & sonitu tormentorum bellicorum surditas obtigit, pane recenti cum baccis iuniperi cocto & auri mane adplicato magno cum emolumento se leuasse scribit. Superior panis domestici crusta in orbem discissa & mediocriter excauata & aceto probò vini tepidiuscule calente conspersa, additis aromatibus caryophyllis, nucista, ventri adplicata in torminoso eius profluuiò vel etiam vomitu præ-

præsentissimum fructum adfert. Pane quoque tosto & vino bonæ notæ imbuto additis aromaticis, si umbilico imponatur, ad abortum præcauendum non facile felicius datur remedium.

10. DIMISSO pane, farina nobis cum furfuribus considerata est, secalina nempe; hæc probe exsiccata & cum sale communi remixta erylipelati calide imposita cum floribus sambuci insignem discutientem efficaciam exserit, si vero eadem farina cum melle misceatur, maturandis apostematibus multum conducit, nec absque singulari fructu quotidie adhibetur. De furfuribus id maxime laudandum est, quod absterfua vi polleant & remouendis sordibus capitis egregie profint. Balneum vero ex furfuribus & aqua dulci paratum ex quacunque causa debilitatos corporis artus egregie reficit, sique flores chamom. addantur, ceu euporiston, vbi balneis opus est, adhiberi potest. Vidimus, quibus frictio capitis cum furfuribus triticeis calefactis grauitatem capitis tensiuam & aurium tinnitum abstulerit. Hordeum quoque familiarissime in vsum cedit medicum, dum cum aqua ad crepaturam vsque decoquitur, quod decoctum additis radicibus scorzonæræ & pulpa citri ad æstum refrænandum & sitim leuandam in febribus præsertim biliosis longe expertissimum est: quinimo in omni fere morbo acuto iuuat, & in pectoris affectibus, vbi humorum acrimonia peccat & expectoratione opus est, eiusmodi hordei decoctum, si caricæ addantur, singularis est efficaciam. Præterea ex hoc hordei decocto cum amygdalis nonnulli egregiam faciunt emulsionem, quæ in variolarum etiam confluentium genere magno solamini est & proxime ad hydrogalam accedit, cuius largiorem potum SYDENHAMIVS in opusculis pag. 257. in confluentibus variolis, vbi saliuæ largior fluxus ab initio iungitur, optimum deprehendit. Longe vero efficacius euadit decoctum hordei in variolis aliisque acutis, si cornu cerui vstum & syrupus de succo aurantiorum adiiciantur. Quanti olim ptisana ab HIPPOCRATE in acutis sanandis æstimata fuerit, ex eius

(Hoffm. Opusc. varii argumenti.) Dd monu-

monumentis & quidem ex *Lib. de victu acutorum* satis abundeque patescit, vbi hunc in modum scribit: *ptisana recte omnibus frumentaceis eduliis prælata esse videtur in morbis acutis & laudo sane eos, qui ipsam prætulerunt. Nam viscositas ipsius levis est & continua & iucunda & lubrica & moderate humida & sitim eximit & facile eluitur, si forte & hoc opus sit & neque adstrictionem habet neque malam turbationem, neque in ventre intumescit.* Apparet hinc satis, quantum a ptisana fructum veteres in morbis acutis sibi promiserint. Adhibebant autem illam non vno modo, nec eadem ratione præparatam: interdum enim hordeum decorticatum sufficienti tempore decoctum exhibebant, quod totam ptisanam vocabant; alio tempore colaturam siue, vt Celsus loquitur, cremorem ptisanæ sorbebant, imo etiam aluum infuso hoc cremore ducebant. In præparatione eius ita se, auctore Galeno, gerebant, vt decem aquæ portiones ad vnâ ptisanæ partem adsumerent, peractaque coctione aceti momentum oleique exiguum admiscerent cum pauxillo salis. Veruntamen hic veterum ptisana vtendi modus fere inter res omissas & obliuioni traditas referendus est. vid. LANGIVS in *Epist. Med. Lib. 1. Ep. 57.*

II. QVOD attinet ad auenam, eius decoctum cum aqua, adiectis radicibus cichorii cum nitro & floribus papapaueris, itemque melle tantæ est efficacæ pro potu in omnibus acutis, in doloribus præcipue podagricis, atque ad sanguinem purificandum in scorbuto, vt viribus suis magnæ famæ remedia longissime exsuperet. Exstat de hoc disputatio sub præsidio nostro habita, ad quam lectorem remittimus. De cetero decoctum ex auena excorticata paratum, vulgo Habergrütze, si vllum, certe hoc præstans est inter domestica remedia in multis morbis vsurpandum præsidium, siquidem in omnibus iis morbis, vbi humorum in primis viis veletiam in sanguine peccat acrimonia, vt in tussi, catarrho, coryza, febre purpuracea, variolis, morbillis, febribus biliosis cholericis, in alui quoque a bilis acris redundantia, deiectionibus inque inte-

intestinorum erosione commodissimum pro potu locum inuenit. Nos sæpius huic decocto innoximus aliquot pugillos florum chamomillæ vulgaris adiectis, saccharo & oleo amygdalarum dulcium, & cum summo fructu in prædictis morbis ano iniiciendum non sine summo emolumento suasimus, optime enim sua viscositate acrimoniam humorum obtundit.

12. A frumentaceis transitum ad legumina facimus. Inter legumina illa, quorum apud nos frequentior in re familiari esse solet usus, maxime pisa & lentes eminent. Brodium pisorum non solum aluo referendæ egregie inseruit, sed etiam, ut lochia liberius in feminis profluant, efficit. Idem decoctum nephriticis prodesse aduersus eos, qui negare ausi sunt, defendit medicorum nobilissimus, SIMON PAVLI in *Quadrupartito Botanico*. Nonnulli etiam pisorum decocto ad abstergenda cutis vitia & eminentias persanandas cum fructu vtuntur. Lentium vero decoctum cum caricis & semine fœniculi plebeii vtuntur maximo cum fructu in variolis, morbillis ad exanthematum eruptionem; materiæ enim morbidæ acrimoniam mitigando spasmos & dolores sistit & hac ratione eruptionem promouet. A medicorum Arabum principe, *Auicenna* in praxi medica huius decocti usus primum fuit receptus. Cicerum decocto plures nouimus in calculo minuendo non sine fructu usos fuisse, & est sane vna cum millepedibus præparatum inter medicamina calculum depellentia præcipuum, cuius diutino & patienti usu HORATIVS EVGENIVS vesicæ calculos comminuit, & GVIL. LAVRENBORGIVS iam ultra sexaginta tres annos natus in se ipso impetrauit, ut durum vesicæ malum per frustula sensim discederet, ut ipse de se peculiari dissertatione epistolari commemorat.

13. A leguminibus vltcrius progredimur ad alia, quibus res familiaris instrui solet. Hic maxime locum inueniunt rapæ præsertim exsiccatae Germ. welcke Rüben, quæ utilitate plane singulari se commendant, quippe quarum decocto nihil est laudabilius in pectoris affectibus ac tussi pertinacissima, si præsertim illud ad magni CRATONIS consilium 81. adorne-

tur. De eodem CRATONE auctor nobis est CASP. HOFFMANNVS in *Institut. Medic. Lib. V. Cap. XI.* eundem in curatione quartanæ contumacioris, nec non aliorum affectuum, vbi multa & longa humectatione opus est, tantum non pro secreto habuisse raparum exsiccatarum brodium semine foeniculi alteratum. Et de SCHERBIO idem nobis auctor est, quod præceptorum CRATONIS & ERASTI exemplo rapas exsiccatas in vfu frequentissimo habuerit puerorumque tabem, quam die Mitesser vocant, sæpe cum multo successu hac medicina sustulerit. Idem quoque raparum decoctum in tenesmo, in diarrhoea infantum contumaciori, quæ plerumque ab acri humore intestinis crassis inhærente fouetur, remixtum cum butyro insulso, vel oleo amygdalarum dulcium clystere per diem aliquoties iniectum præsentissimam opem attulisse non semel vidimus. Neque externo vfu rapas destitui ad sanandas partes frigore tactas, in vulgus fere cognitum experimentum est.

14. INTER radices edules vtilitate quoque commendanda sunt pastinaca satiuæ, radix asparagi, petroselini, graminis, foeniculi, cichorii. Quodsi illæ probe decoquantur in brodio caponis vel gallinæ veteris, & hoc decoctum singulis diebus mane bibatur, hypochondriaci & qui scorbutto, phthisi, tabe, hepatis ac lienis vitio laborant, insigni solamen inde sentiunt, quemadmodum etiam infantibus tabe confectis eiusmodi decoctum frequentius vsurpatum summo pere prodest: aluum enim moderate fundit, vrinam mouet, obstructions referat & acrimoniam ac viscositatem humorum diluit. Petroselino nihil in culina fere frequentius est & hoc ipsum serositates per vrinam potenter educit. Optime in infuso loco thee folia eius recentia mane sumuntur, quod & sapore, colore, odore ac virtute se commendat, siquidem in iis affectibus, vbi feri abundantia est, in cachexia, inque mensibus etiam suppressis, & vbi metus calculi in renibus vel vesica est, non sine insigni fructu vsurpatur. Atque etiam notabile est experimentum RIVERII, quod ipsi communicauit quidam chirurgus veteranus, vbi femina quædam,

dam, nescio cuius vetulæ suasu, ad propellendum hydropem quotidie petroselini foliorum quantum manu capere poterat, linteo madido inuolutorum sub cineribus calidis affabat expressumque succum vino albo exceptum bibebat simulque ossium quorumlibet ad liberum aërem ficcatorum & comminutorum drachmam in eodem adsumebat vehiculo, quo per integrum mensem factò feliciter sane conualuit. Herba petroselini cum lupulo ex cereuisia cocta & exterius regioni pubis calide admota, in urinæ suppressione præclarum exserit effectum. Raphanorum magna apud veteres existimatio fuit, quibus succo radice sumto vomere quotidianum erat: etiam nostrates vidi raphanis in taleolos dissectis saccharum adspergentes & hoc liquamen pueris præbentes, vbi vomitu opus erat. Ad calculosam concretionem in vesica prohibendam raphanum in taleolos discissum & cum sale conditum nouimus non sine fructu adhibitum fuisse. In febris maligna putrida CRATO adplicationem raphani in pedibus mirum quantum æstimat & ita inquit: *misso sanguine pedibus adplicetur raphanus comminutus & sæpe is mutetur.* Plurimum ex adplicatione raphani adiumenti esse, in pluribus aduerti, vbi materia omnibus modis a corpore ad superficiem est trahenda.

15. ACCEDIMVS iam ad allii & ceparum genera, visuri, quænam parabilia & in auxilium prompta possint inde depromi remedia. Rusticorum theriacam allium vocat GALENVS, cuius vsus inter multas nationes adeo inualuit, vt nobiles pariter ac plebei, nihil morati eius graueolentiam, eo delectentur, rati vires illo excitari. Infantibus verminosa colluie infestatis nihil æque prodest ac allium, quod vermium mors est lacti incoctum & adsumtum, hoc enim modo infesta illa progenies ex ventre feliciter proicitur. Obseruauimus etiam solo foru lactis cum allio cocti ad anum admissis vermes ad exitum prolectos fuisse. PARACELSVS in morsu canis rabidi & contra omne venenum tam interne, quam externe, contra pestem, bubones, carbunculos allium cum

stercore humano mixtum egregie commendat. Bulbuli allii tres aut quatuor feliciter ab iis, qui calculo laborant, cum haustu spiritus vini sumuntur semel singulis septimanis eo die, qui proxime quadras lunæ præcedit. Nouimus hoc remedii genus a multis in vsum vocatum felicissime. Ad febres intermittentes contumaciores, imo ad ipsam quartanam feliciter profligandam, omnibus aliis irritis, allium contusum & ad carpum manus vel etiam ad articulos digiti adplicatum cum dolore magnam facit vesicam, qua aperta serosa materia effluit: liberantur quidem hac ratione a febribus, sed quia grauius allium inflamat has partes, prudenti cautela grauiora symptomata præcauenda sunt. conf. *Misc. Nat. curios. Dec. II. Ann. IX. obs. 127.* quo loco etiam in scholiis mentio fit a medico viduæ, quæ dolores dentium alligato allio ad cubitum & inde excitata vesica sopiebat. In doloribus pedum scorbuticis frictio cum raphano rusticano vel etiam allio inciso & aceto immerso eorum remissionem, incassum aliis adhibitis, procurauit. Meminit etiam PLATERVS in dolore dentium allii contusi carpo dextro, si dolor in dextro latere, vel sinistro, si dolor in sinistro latere vrget, adponendi. *vid. eiusd. Libr. II. obs. pag. 371. & 375.* Cepis singularem quoque medendi efficaciam inesse, multiplici experimento didicimus, præsertim quoad externum vsum: cepis enim assis ad tumores duros emolliendos & bubones venereos maturandos, præsertim si cum ficibus adplicentur, nihil est efficacius: eadem assatæ pubi adplicatæ in infantibus, si nihil quicquam vrinæ emittunt, præsentem opem ferunt. Inest etiam omni alliorum & ceparum generi sal quoddam causticum tenue, vesicatoriæ indolis penetrantissimæ, quod neruosis partibus immediate adplicatum graues dolores, imo inflammationem parit. Ceparum succus monente CASP. HOFFMANNO *Institut. Med. Lib. V. p. 677.* si in vulnera influat, illa consolidari non permittit ipsosque cultros & ferramenta tanquam leni veneno inficit, quod notari meretur, vt caueamus: at vero intra corpus sine noxa quotidie adsumuntur.

16. HISCE discussis descendimus ad gratissima nemini non nata semina, qualia sunt sem. foeniculi, anisi, cymini, anethi, quibus identidem magnas vires inesse ad concinnanda hinc remedia parabilia domestica, plurimis experimentis habemus compertum. Nolumus de singulis peculiarem sermonem instituire, sed in genere notare, quod ea quinque semina, siue in formam pulueris redacta, seu cum cereuisia decocta, aut cum aqua calida infusa, ob sulphur & oleum blandum naturæ amicum ac vaporosum insignem qualitatem possideant humorum acrimoniam & viscositatem temperandi & resoluendi partesque vniuersi corporis quocunque modo laessitas & commotas placandi & sedandi, vnde egregie omnibus affectibus spasmodicis & conuulsivis succurrunt. Spasmos enim optime sedant, flatus discutiunt & simul edulcorationi humorum patrocinantur. Commendamus igitur hæc remedia in colica, in diarrhoeis & torminosis intestinorum cruciatibus, quibus infantes præsertim lactentes sunt obnoxii ob acrimoniam causticam lactis, quam excrementa viridia aluo emissa produnt. HIPPOCRATI semen anisi fuit vsus non infrequentis, & profecto ob amicas ventriculo & intestinis dotes insignem meretur commendationem, vnde non inconcinne illud HELMONTIVS intestinorum solamen adpellauit. Decoctum horum quinque seminum cum floribus chamomillæ & oleo amygdalarum dulcium & pauxillo saponis Venetiano infantium in eorum atrocissimis affectibus infusum, a flatuum torminibus eosdem egregie liberat. Hæc quoque quinque semina seu in forma sicca seu humida sumta menses cient, sudorem mouent, singultui medentur, abortum præcauent, in vomitu & singultu ventriculum roborant, flatus discutunt, vrinam & calculos pellunt fauciumque rauedini succurrunt, neque minus partum facilitant, præsertim, si vapor eorum admittatur ad vterum, specificè vero vapor decoctionis foeniculi mire oculos mundificat & visum confortat; in surditate quoque confert, de quo inter alios testatur GABELCHOVERVS *Centur. 1. Curat. 60. in annotatis.* Decoctum item foeniculi
miri-

mirifice lactis defectui conducit, de quo *Cent. VI. Curat. 86.* potissimum AMATVS LVSITANVS videndus est. Cumino nihil præstantius dici potest ad tonum intestinorum nimis relaxatum restituendum flatusque discutiendos. *Est etiam mirabile, inquit REINERVS SOLENANDER Consil. Lib. 35. p. 329. ex Serapione, in confortando matricem & auferendo eius ventositatem ac constringendo menstrua alba & rubra.*

17. IPSA brassica rusticorum rubra, vulgo Braunfohl, tota medicamentosa est, & succo scatet nitroso, dulci, emolliente, laxante ac insimul blanda vi aperitiva, fundente ac stimulante instructa excretiones saluberrimas adiuuat, & hac ratione non modo a morbis præsertim chronicis egregie præseruat, sed etiam eorum sanationi multum patrociniatur. Eximie sunt laudes, quas recenset de hac BARTHOLINVS in *Libr. de medicinu Danorum domest. Diss. 1. p. 24. ipsa brassica rusticorum ceteris oleribus antistat, tam cruda, quam cocta omnibus pharmacopolis palmam dubiam reddit, ut non sine causa, illa in hortis omnium rusticorum visa, sterilem sibi messem in Dania præfagiuerit olim medicus peregrinus: facit aluum bonam ac obsequentem, quam si deicere voles, superioris cymæ decoctæ succus tantum bilis pituitæque eiiciet, ut miraturus sis, nullam rem tam bene purgare, neque helleborum neque scammonium & sine periculo & cito salubrem esse corpori. Est enim in brassicæ rubræ nostratis caulibus, si autumno præsertim adultiori eos secundum longitudinem feces, succus quidam instar mellis vel mannæ, qui exsudat, si aliquandiu in loco non calido relinquant, cui experientia suffulti vim illam aluum laxandi confidenter adscribimus. Nostris in regionibus male sibi & suis matresfamilias consulunt, quando cum aqua prius hocce saluberrimum olus decoquunt, deinde exprimunt brodiumque effundunt & postea noua aquæ simplicis adfusione iterum incoquunt & ad cibum præparant. Hac enim methodo succus ille medicamentosus nobilis maxima ex parte perditur. Laudandus hanc ob causam iure meritoque est mos eorum, qui in Westphalia & Ducatu Brunsvicensi*

censi degunt: hi enim brassicæ brodium extracto nobilioris virtutis probe imbutum non auferunt, sed addito sale & pinguedine, ita præparant, ut non modo gustui fiat acceptior esca, sed etiam in alimentum corpori nostro longe saluberimum cedat. Ex comis brassicæ rubræ, quando nasturtium aquaticum, hederæ terrestris, spinachia, asparagus, radix cichorii, vrtica mortua adiiciuntur & in brodio carnis bubulæ vel caponis excoquantur, cibus paratur in dispositione phthifica atque scorbutica omnibus aliis medicaminibus vel pretiosissimis multum sane præferendus. Betæ rubræ radices quod attinet, earum recentium succus rubicundus subtili quoque, nitroso & colliquatiuo sale imbutus est, qui naribus vlcere vel lenta materia obsessis egregie confert tam humectando, quam aperiendo. Huius radicis siccæ pulvis naribus attractus pituitam e sinibus capitis euocando cephalalgiam, quæ ab impacta ibi materia oritur, tollit.

18. DEVENIENDVM est iam ad herbas in re familiari satis cognitæ, quarum insignis ad medicinam parabiliorem poterit esse vsus. Primas vero teneat ruta, cuius magna olim fuit existimatio; exemplo esse potest rex mithridates, cuius antidoti præcipua basis est. Scatet hæc herba oleo admodum acris & penetrante, quo fibras a motu deiectas stimulat & novo vigore acuit. Eius folia cum recenti butyro mixta & cum pane secalino mane sumta iis, qui pituita abundant & aeri vappido ac humido corpus oblicere necesse habent, neque minus ad auertenda a corpore infensa in grassantibus morbis miasmata, eximie conferunt. Eius folia cum pipere, sale communi & aceto penetrantiori contusa atque carpi arteriis imposita ad febrilem impetum, si modo materiæ morbidæ aliis prius prospectum fuerit, egregie sufflaminant, & plus sæpius minorique periculo, quam interna constringentia & famigeratissimus chinæ cortex in contumaciori etiam quartana sistenda præstat. Nos præterea acetum vini forte rutæ succo bene imprægnatum non modo in contagio infestis grassantibus morbis, si nari adplicetur & ori admoueat, valde

(Hoffm. Opusc. varii argumenti.)

Ee

adpro-

adprobamus, sed & ad lipothymias auertendas eius odorem longe efficacior omnibus spiritibus cephalicis & pretiosis balsamicis apoplecticis deprehendimus.

19. Ex herbis polychrestis & cephalicis nunc prodeat salvia, quæ in omnibus fere hortis prostat & ab orientalibus populis nunquam non maximi æstimata fuit, cuius exsiccata folia etiamnum plus æstimant, quam herbam thée. Propter oleum subtile, & vaporosum & sedatiuum eius decoctum vel potius infusum in affectibus spasmodicis, in contracturis, in epilepsia etiam chronica loco herbæ thée non mediocrem efficaciam exserit, quæ, si vsus eius externus per balnea accedat, additis aliis neruinis, vt sideritide, origano, serpillio in membris paralyticis vel tono vteri restituendo, ad feliciorum conceptum, valde augeri potest. Chirurgi eius decoctum cum passulis & nitro ad faucium inflammationem delinientem, ad dentium quoque & alios oris affectus facta collutione mitigandos magno habent in pretio. Ex herbis porro cephalicis & euphoristicis mentha tam crispa, quam saracenica, melissa quoque tam nostras, quam Turcica egregiam laudem & commendationem merentur. Mentha subtili, confortante & neruis amico ac sedatiuo oleo abundat, quo tamen non solo, sed subadstringente terreo principio vires suas in confirmando tono ventriculi præsertim & intestinorum exserit, quare hæc herba in substantia aut infuso cum aqua, aut vino vel spiritu vini incompscendo, singultu, vomitu nimioque alui fluxu aut colicis tormentis sedandis vix par sibi habet remedium usuque tam interno, quam externo sese mirifice commendat. Aquam eius siue cum vino aut aqua simplici paratum ad vsum domesticum omnibus singulisque commendatam habere volumus. Vidimus sola aqua menthæ spirituosam, decenti vsu & purgantibus præmissis, inueratas gonorrhœas fluoremque album feliciter sublata. Eandem fere cum mentha virtutem suauissima illa herba, quæ melissæ nomine venit, custodit. Oleum gratissimum naturæ valde amicum continet, cuius aqua cum vino additis corticibus citri, destilla-

stillata edulcorata facile omnes aquas vitæ, balsama embryonum, aquas apoplecticas, analepticas & odore & viribus exsuperat.

20. MELISSÆ ulterius floribus Turcicis in conservam cum saccharo redactis si spiritus eiusdem herbæ adfunditur, essentia prodit, quæ & odore, sapore ac virtute magnatibus ac divitibus ad ventriculum maxime & genus nervosum roborandum commendatissima esse debet. PARACELSVS arcanum ad vitam longam in hac herba reconditum esse adferebat. *Mul-
ta adhuc, scribit BAGLIVVS Libr. de fibra motrice pag. 214. la-
tent in herbis ad citri naturam accedentibus, ut melissa, sed
sapienti sat.* Huius herbæ infusum cum aqua egregie iis vte-
ri vitiis succurrit, quæ ex eius tono ac robore deiecto proue-
niunt, ut sunt difficilis retentio foetus & facilior ad abortum
dispositio, perpetuum seri putridi sine sanguine vel etiam
cum ipso mixti ex vtero stillicidum & inde profecta sterilitas.
Idem decoctum eo tempore, quo menses fluunt, usurpatum,
feliciorem horum fluxum promouet. Melissæ in substantia
pulverem ad drachm. 1. singulis diebus per mensem usurpa-
tum in melancholia hypochondriaca ad maniacum fere affe-
ctum inclinante valde proficuum annotavi.

21. IN herbis cephalicis & quæ in hortis coluntur atque
omnibus fere obuiæ ac notæ sunt, non infimum sibi locum
spica vindicat, quæ, si vlla, certe hæc oleo scatet subtili,
balsamico & aromatico quod in maiori copia, si destilletur,
quam vix alia herba, præbet. Ab eius floribus, si spiritus
saltim frumenti aliquoties abstrahatur, spiritus cephalicus,
aquam reginæ Hungariæ si non superans, tamen ipsi æqualis
producitur, qui in affectibus capitis a causa sic dicta frigida,
& a nervorum debilitate subnatis, in apoplexia, paralyfi, au-
ditus grauitate, cephalalgia, vertigine, usu interno & exter-
no spiritibus & balsamis apoplecticis iure meritoque antefere-
ri debet. Exterius in doloribus, rheumatismis ad eorum
discussionem, ad roborandos quoque artus, podagra vel chi-
ragra declinante egregium adfert solamen. Præterea in o-

mnibus vlceribus, præsertim antiquis fistulosis & quæ partes tendinosas tangunt, læsionibus eiusmodi spiritus balsamicus decenter adplicatus ad eorum consolidationem, mundificationem plus certe opis præstat, quam ingens emplastrorum, & unguentorum farrago. Rosmarinus, quia valde ratione virium spicæ & lauendulæ affinis est, & oleo quoque penetranti balsamico abundat, in iisdem capitis affectibus eius spiritus non secus ac spiritus lavendulæ cum fructu adhibetur. Eius infusum cum aqua vel etiam cum vino in fluxu mulierum albo & exinde proficiscente sterilitate, in molesta raucedine, asthmate, oris foetore egregie se gerit. Cancros, gangrænas & fistulas, ex spiritu vini infusiones rorismarini sæpius collutas fuisse exsiccatas, & quæ alias omne medicamentorum subsidium eluserint, ad perfectam sanitatem peruenisse, se plus semel vidisse ac expertum esse perhibet *Arnoldus de Villanova*. Vinum rorismarini membra corporis principaliora roborat & ab omni putredine præservat, ita, vt nullum venenum ipsis nocere possit. *Est vicarium theriacæ*, inquit, *Arnoldus de Villanova*. Quibus vero pauperioribus non plantæ hæ hortenses ad manus sunt, hi ex serpillio origano vbiuis obuiis, eadem remedia petere & concinnare possunt. Balnea quoque ex his parata in omni externarum partium debilitate atque languore subigendo, præsertim si quis ex diuturniori morbo, vel femina ex puerperio conualluerit, præsentissimum solamen adferunt.

22. DEVENIMVS iam ad herbarum virtutem bene singularem commendandam, quæ vbique haberi possunt & quarum largissimum prouentum benigna natura non sine singulari ratione ac consilio nobis concessit. Primum itaque in considerationem nostram veniat millefolium, quo omnia præta, omnes ferme vici luxuriant, cuius flores destillati oleum saphirini coloris, insigni sedatiua, blanda & antispasmodica virtute donatum, largiuntur. Horum florum cum aqua infusio in omnibus doloribus & affectibus spasmodicis egregiam
am

am exserit efficaciam, siquidem non sine magno fructu atque vtilitate in hæmorrhoidum coecarum dolore, in colica, doloribus post partum a lochiis suppressis, & quæ ex hæmorrhoidum suppressione nascuntur, acerbioribus tormentis, in cardialgicis quoque anxietatibus, affectu spastico ventriculi & diaphragmatis aqua cum millefolio destillata vel eius infusio cum aqua, aut essentia cum spiritu vini saltem vulgari facta vsurpantur. Quum vero enormiores sanguinis siue per vterum siue per sedis venas aut fistulam bronchiale profusiones acerbioribus spasticis viscerum vel aliarum partium contractionibus suam originem suaque incunabula debeant: euporista illa ex millefolio parata in iis compescendis vix ulli alii remedio efficacia cedunt. Et quia flores chamomillæ vulgaris etiam propter oleum, quod per destillationem identidem saphirinum, temperatum & sedatium prodit, millefolio penitus ferme similes & ipsi affines vires alunt, eorum quoque virtus non dispar, sed vna eademque in commemoratis iam affectibus obseruatur. Qua de causa opportune admodum in horum morborum curatione hi duo flores coniungi & in vnum medicamentum, vt in infusum, vel decoctum aut in clysterem vel cataplasma recipi possunt: siquidem hic flos in omnis generis doloribus, spasmis quoque & hæmorrhagiis sistendis fere incomparabilis est. Id vero habent maxime peculiare præ millefolio, quod flores illi, qui flauī sunt, ad drachmam vnā aliquoties die vacuo sumti pertinaces febris intermittētis insultus ac impetus potenter sistant atque compescant longe tutius, quam ipsa tantopere commendata china, quæ ex remoto Peruuiano regno ab aliquot inde iam annis tanto pretio redempta fuit. Nullum vero simplex in rerum natura reperitur, quod tam amicum sit intestinis, quam flos chamomillæ. Qua de causa etiam non sine consilio & singulari fructu huc vsque solos flores chamomillæ ad clysteres, in omnibus fere affectibus loco aliorum ingredientium recipiendos, curauimus & suauimus, addito, si opus fuit, oleo amygdalarum dulcium & in pau-

peribus oleo lini vel raparum vel ad feces deiciendas sufficienti salis communis copia, quod in stimulando meliorem usum habet, quam varia extracta vel electuaria lenitiua aut purgantia, quibus omnibus inter clysteres carere possumus. Inter externa, quæ discutiunt, emolliunt vel maturant abscessus, cataplasmata primas etiam hi flores tenent, & vel foli vel cum floribus sambuci, maluæ, millefolii, croci mixti & cum lacte decocti inque vesicam inditi & partibus affectis adpositi in sedandis doloribus atque emolliendis tumoribus omne punctum ferunt. Spiritum vini abstractum a summitatibus millefolii, floribus chamomillæ, semine anisi, cymino æthiopico, vulgo Kram-Kümmel, in discutiendis flatibus plus certe valere, quam alia tantopere laudata curminatiua & antispasmodica longiori usu atque experientia didicimus.

23. IN absynthio, quod omnis facile terra gignit, eximia efficacia atque virtus recondita est, ut vix medicina domestica eo carere possit. Certe multarum chronicarum passionum præservatrix non modo, sed & curatrix est: at quia est vulgaris, non magni æstimatur, ut verum sit Plinii editum: *nos plerasque herbas pedibus conculcare, quarum si nobis virtus spectata esset, eas in cælum laudibus efferremus.* Gaudet absynthium principio amaricante balsamico & oleo vaporoso, sedatiuo ac fixiori sulphureo sale alcalino. Ob oleum vaporosum ac sedatiuum dolores & spasmos compefcit, ob amaricans vero principium & sal alcalino-sulphureum bilis naturam æmulatur & id fere omne præstat ac supplet, quod alias bilis balsamo in corpore humano efficere competit. Quamobrem etiam in omnibus morbis frigidis, qui ex defectu bilis, ex nimio acido & viscido, obstructione & infarctu viscerum fiunt, vel ex putredine nascuntur, tam curatiue, quam præservatiue opem fert acceptissimam. Propter amaritiem alium quoque stimulat, febres intermittentes aufert, vermes enecat, atque in cachexia, tumore oedematoso, obstructione viscerum conuenit, neque minus iuuat concoctionem & in obstructione hepatis, inque ictero cum fru-
ctu

ctu sumitur. Optime decoquitur cum aqua & redigitur in extractum, quod solutum in spiritu vini ad drachmam vnam vel ultra propinari potest: istiusmodi enim decoctione absynthium priuatur oleo suo vaporoso, capiti & neruis non semper amico. Experimento vulgari tota herba plantis pedum imponitur ad tumorem ibi decumbentem dispellendum.

24. FVMARIA vti notissima est herba, ita eadem saluber-
rima iure optimo celebratur, scatet enim succo non tantum amaricante, sed etiam sale copioso, tartareo, nitroso. Si in decocto cum cereuisia vel etiam fero lactis bibatur, aut si in extracto in forma pilulari adsumatur, omnibus morbis chronicis, præsertim iis, qui ex lymphæ & fero corrupto oriuntur, quales sunt cutis variæ defœdationes, lepra, scabies, scorbutus, lues venerea & plurimi alii, egregie subuenit & circulum sanguinis promouendo infarctum viscerum amouet, obstructions reserat, excretiones salutare æque per aluum, ac vrinam & transpirationem secundat, atque lymphæ cum sanguine hoc modo optime depurat. Et sane vix præstantior datur herba ad sanguinis & humorum massam depurandam viscerumque tonum roborandum, vt quidem nostra fert sententia, quam iam laudata hæc diuinæ virtutis fumaria. Eosdem effectus cum fumaria in circulo sanguinis promouendo, in obstructionibus & infarctibus viscerum auferendis atque excretionibus adiuuandis exserit nasturtium aquaticum, quod omni tempore viret & iuxta riuulos & in locis paludosis natale solum habet. Specificum maxime audit hæc herbula in scorbuto; præterea etiam ventriculum, omniaque viscera & totam naturam corroborans virtus ipsi encomio non falso adscribitur. Hæc planta adhuc recens sumi potest cum butyro vel etiam cum aceto & oleo oliuarum loco acetarii, aut cum brodio caponis coqui aut vino vel spiritui vini infundi, & ita frequentius in vsum vocari potest.

25. DE charefolio illud tenendum est, quod ad sanguinem coagulatum resoluendum, & in asthma ad expectora-

etorationem in iusculis egregie conferat. Gaudet quoque hæc herba virtute traumatica, resolvente, diuretica & emmenagoga. Sequitur iam veronica herba valde temperata aperiente & roborante virtute instructa, cuius infusum cum aqua illud, quod ex herba thee paratur, longis intervallis post se relinquit, unde optimo iure dici potest der teutsche Thee; siquidem non tam præservando in omnis generis morbis, qui ab impuritate humorum ac viscerum intarctu oriuntur, sed & in iis sanandis, in phthifica maxime & nephritica affectione vires exserit longe æstumatissimas. Conf. hac de re nostra dissertatio *de infuso veronicæ præferendo herbæ thee*. Quoniam mentio facta est calculi, in memoriam nobis incidunt aliarum herbarum etiam notissimarum virtutes, quæ cum aqua calida infusæ loco herbæ thee calculosis exoptatissimam opem attulerunt. Sunt vero hæc herba equiseti, hederæ terrestris, baccae alkekengi, iuniperi tostæ, semen dauci. Noui plures, qui multis abhinc annis misere ex calculo laborantes non præsentius solamen, quam in horum decoctis, quotidie ea bibendo, inuenerunt.

26. Ex floribus in vsum quoque domesticum quosdam decerpere liceat. Atque in his primum locum inveniunt rosæ, quarum aqua propter oleum fragrantissimum, naturæ amicum & dotes plane singulares in erigendis viribus, in doloribus & inflammationibus leuandis inque omnibus sic dictis calidis morbis tam externo, quam interno vsum longe utilissima est. Rosarum conserua ob vim confortantem & leniter constringentem peculiariter phthificis & hæcticis dicata est. Acetum rosaceum cum spiritu & aqua rosarum commixtum, adiecto nitro & pauxillo camphoræ epithema constituit, quod capiti admotum in sistendis doloribus, auertendis deliriis & compescendis immodicis narium hæmorrhagiis multiplici nostro experimento virtutis est incomparabilis. Flores acaciæ plenior & saturata infusio cum sero lactis vel etiam cum vino diluto, verno tempore leniter aluum subducit & in scabie aliisque ex impuritate humorum proficiscen-
tibus

tibus morbis, in subiectis maxime tenerioribus, magnæ virtutis laude insignis est. Floribus cheiri eorumque expresso succo nihil ad menses pellendos vel foetum mortuum aut secundinas propulsandas, item ad obstructions hepatis in inueterato etiam ictero recludendas, vix quicquam dari potest præstantius, si cum cereuisia calida bis de die medicamentum porrigatur. Hyperici flores, nusquam non satis obuii, etiam peculiare ad domesticum vsum commendandas custodiunt vires, in dispositione videlicet phthifica, in enecandis vermibus, inque affectibus spasmodocis, & melancholia hypochondriaca alleuandis. Vsus poterit institui in infuso cum aqua, vel cum aqua leniori inspissatione in extractum redigi possunt, quod cum aliis pilulis sumi potest.

27. NEQVE vero violarum flores prætermittendi sunt, quorum infusio ex aqua, addita sufficiente sacchari quantitate, lenissima coctione in syrupum transit gratissimi coerulei coloris, quo ad expectorationem in omnibus morbis pectoris, & ad expurgandas in infantibus sordes aluinas, siue ore adlumatur siue ano infundatur, vix vllum datur excellentius ex domesticis remedium. Flores bellidis siluestris vulgo Käse-Blümlein, quorum passim magnus in pratis & pascuis provenus est, mirabilem vulnerariam & specificam, quæ cruorem resolvit & per insensibilem transpirationem euocat, virtutem exserit, vnde omnibus læsionibus, quæ ab externa causa fiunt, horum decoctum in aqua vel melius cereuisia quam maxime accommodatum est. MINDERERVS eius efficaciam in hydrope & aliis morbis, qui ex potu frigido corpori calefacto immisso suam originem trahunt, non satis prædicare potest. Cyani florum decocto in vrinæ suppressione, ad eius fluxum promovendum, nihil datur potentius, præsertim si semen vrticæ commixtum fuerit.

28. ORDO nos jam ad arbores deducit, quorum copia nullibi non omnibus, & ex his quoque parabilia auxiliorum in morborum curatione genera petere volumus. Prodeat vero primum omnibus fere notissima abies siue Tanne,

(Hoffm. Opusc. varii argumenti.)

Ff

quæ

quæ ob balsamicum resinofum suum succum perpetuo viret & singulares in omnibus excretionibus promouendis sanguineque depurando possidet facultates. Huius summitatum vel turionum fumantur manipuli tres & aquæ fortanæ ac vini ana mensuram vnam, coque in diplomate per horæ quadrantem, postea exprime; huius dosis sunt vnciæ duæ vel tres, quod certe omnibus decoctis ex lignis exoticis paratis ratione virtutis præferendum est. Siquidem in scorbuto, huiusque contractura, vaga quoque arthritide efficacissime sese exferit, si eius vsus ad mensis spatium protrahatur. Balneum vel infusus ex fructibus abietis ad paralyfin & contracturam scorbuticam a pluribus peritissimis medicorum cum fructu vsurpatum nouimus.

29. ARBOR iuniperi tota medicamentosa est, quia tota balsamica. Lignum eius efficacia non cedit lignis exoticis guaiaci, vel sassafras, vt commodissime eorum in locum substitui possit, imo iis præferendum existimamus in omnibus morbis ex impuritate humorum ortis. Baccæ propter oleum, quo scatent, copiosum, balsamicum, siue in substantia fumantur, siue in rob redactæ, vel si tostæ cum aqua loco coffeæ infundantur, medentur omnibus iis morbis, qui ex obstructione viscerum, & sanguine lento & crasso proveniunt. Quare in asthma, in cachexia, ictero, mensium suppressione, colica, calculo vesicæ & renum, in ventriculi quoque cruditatibus magno sunt præsidio. Lixivio ex cineribus huius arboris cum vino sumto multos hydropicos sanatos esse, non infimæ conditionis medici memoriæ prodiderunt. Junipero non inferior est sambucus, in qua, iudice BARTHOLINO *de medic. Dan. Dissert. I.* plus medicinæ latet & tutior omni tempore salubritas, quam in pomposis antidotis, quæ patrem theriacam & matrem mithridatum habent. Flores & rob sunt vulgatissima illa euporista, quibus non facile plebeius vel rusticus caret. Ipsi flores externe in omni tumore erysipelaceo odontalgia, podagra impositi, ad emolliendos quoque abscessus & duros a lacte coagulato tumores cum fructu adhiben-

bentur. Eorum aqua ob vim anodynam fere polychresta est, inque omnibus morbis, siue acuti siue chronici sint, non sine fructu vsurpatur. Conuenit maxime in iis morbis, vbi expulsionem opus est, vbi dolores vrgent, vbi inflammatio internarum partium adest. Rob ex baccis paratum rusticorum panacea & theriaca est, quod vel in cerevisia calida vel aqua florum sambuci datum vniuersale fere præseruatorium & tutum remedium in omnibus ingruentibus morbis constituit; siquidem excretionem per aluum & per cutim promouet & anodyna simul virtute fulget. Quidam ad diaphoresin movendam addunt cornu cerui vsum ad drachmam vnam. Cum sachari canti anatica portione rob si misceatur & superfundatur spiritus vini isque accendatur, facta probe agitatione, in diuturna tussi & ante paroxysmum intermittentium ad cochleare vnum datum insigniter prodest. Rob frequentiori vsu impetum harum febrium egregie mitigare, imo sistere solet, modo cruditatibus primarum viarum laxantibus & corrigentibus probe antea prospectum fuerit. Medius fruticis cortex, si coquatur in cerevisia vel aqua aut vino, & urinam & sudorem, menses quoque fortissime pellit, vnde cachecticorum optima est medicina. Externe si tumoribus cedematosis, item erysipelaceis imponatur, & dolorem & tumorem abigit.

30. Acacia quoque nobis suggerit probata remedia, florum iam supra facta fuit mentio. Aqua ex iis destillata fere polychresta est & omnibus commendanda, suauissimi est saporis, roborat & vim quoque anodynam habet. De cortice radice illud tenendum est, quod is infusus cum simplici vini spiritu mirabilem virtutem foueat & calculosis, qui hoc malo inueterato procul dubio ex substantia renum prorsus læsa laborant, opituletur, si bis de die pro vna dosi cochleare vnum exhibeatur.

31. Ex arbore tilie nonnulla etiam in nostrum vsum vocanda sunt & quidem flores, quorum infuso in aqua theiformi noui olim chronicam epilepsiam diuturniori vsu persana-

tam. Aqua florum in omnibus affectibus, vbi spasmi vel dolores regnant, specifica est, hinc ceu polychrestum remedium vtique commendari meretur. Medius huius arboris cortex cum aqua in mucilaginem redactus incomparabili virtute gaudet dolorum, inflammationem & ardorem mitigandi, vnde cum præsentissimo fructu in ambustionibus, in podagricis doloribus adhibetur.

32. NEQVE aromatum vsus prætermitti debet ad elicienda in scopum nostrum quædam parabiliora. Pipere non facile carere possumus in re domestica. Hoc sale scatet alcalino fixo, valde acri, siquidem, quod notabile est, piper in puluerem redactum cum acido affuso efferuescit. Ratione huius salis fixi alcalini aperit, incidit, viscidos humores resoluit, cruditates ventriculi corrigit, & ad concoctionem promouendam nihil datur facile efficacius, cum primis si ventriculus ob cruditates collectas nihil appetit & gravativum dolorem circa præcordia causatur. Optime sumitur in granis integris ad decem vel duodecim, præsertim si ante cibum vel etiam circa tempus somni deglutiantur. Extra paroxysmum in quartana piperis integra grana plures per dies deglutita cubantes hac febre liberaffe, plerique autores adfirmant. Eiusdem cum pipere virtutis est zingiber, quippe & hoc non volatili per destillationem eliciendo oleo, sed tantum sale acerrimo fixo imbutum est, ratione cuius pulvis eius ad drachmam vnâ sumtus digestionem ventriculi ex cruditate viscidorum humorum deprauatam penitus restituit, sique cum melle misceatur ac in electuarium redigatur, in asthmate, tussi, in calculo quoque, item ad excitandam venerem, menses mouendos & visum abolitum restituendum vtilissime singulis diebus adsumitur, cui specificum infusum superbibi potest. NATHANAEL HODGES in *Loimologia Sect. VII.* commendat eximie zingiberis puluerem in morbis putridis & ipsa peste, quam diaphoresi sua, qua operationem perficit, & præseruat & optime quoque sanat.

33. DE nuce moschata etiam medico domestico usui apta in medium proferenda sunt. Propter oleum, quo gaudet, aromaticum & simul anodynum in spasms & doloribus, vomitu, colica, diarrhoea, dysenteria eius pulvis ad drachmam semis sumtus non sua caret laude; maxime omnium vero hoc remedium grauidis earumque affectibus quadrare multiplici experimento cognouimus. Eas subinde primis mensibus pertinaci nausea, vomitione, quin etiam tussi corripitur constat, quibus incommodis subleuandis nuce moschata cum saccharo mixta in puluere non certius auxilium inuenimus. In alui nimio fluxu compescendo, in soda siue ardore ventriculi leniendo vna pars nucis moschatæ cum tribus partibus lapidum cancrorum non sine fructu exhibetur. Eadem nux æquali portione cum alumine crudo remixta febrium intermittentium paroxysmos potenter sistit, hac tamen cautione adhibita, vt non nisi prius præmissis euacuantibus & cum regimine diaphoretico, cum infuso nempe calido vel sub motu corporis laborioso propinetur.

34. NEQVE vero crocus in præteritis relinquendus est, qui propter insignes in medendo vires nonnullis philosophorum aroma, aliis rex vegetabilium, quibusdam etiam anima pulmonum appellatur; siquidem ob sulphur blandum anodynum ac vaporosum, doloribus & spasms mitigandis, propter sal acre autem & volatile incidendis humoribus & obstructionibus reserandis egregie inservit. In contumaciori tussi & in respirationis difficultate infusum croci in aqua veronica, adiecta sufficienti sacchari canti quantitate insignis efficaciam deprehenditur. Eodem infuso cum aqua cinnamomi parato ad menses promouendos, laboriosum partum facilitandum, ad secundinas expellendas, ad lochia mouenda nihil est præstantius, præsertim quando olei amygdalarum dulcium vsus interpoletur. Exterius crocus cum floribus sambuci, chamomillæ, lacte & mica panis similaginei coctus & instar cataplasmati partibus arthriticis impositus mirifice dolores lenit. Idem remedium etiam cum effectu nouimus adhibi-

tum in dolore hæmorrhoidum cœcarum. Crocus cum aqua rosarum addito pauxillo camphoræ oculorum inflammationi in morbillis & variolis medetur. Cubebæ ore masticatæ peculiariter caput confortant & mirum in modum vertiginem auertunt, teste CRATONE in *Cons. Med.* pag. 182.

35. SPECTANT huc quoque mala citria quorum vsus in re domestica & in medica quoque satis notus est. Horum acetositas cum saccharo in syrupum redacta & ptisanis addita sitim & æstum immodicum egregie fedat. Cortices cum saccharo contusi & spiritui vini infusi liquorem stomachicum & qui flatus egregie discutit, præbent, quod etiam de corticibus aurantiorum tenendum. Taleoli mali citrii pulsibus manuum vel plantis pedum adplicati in omni febre ad æstum deprimendum non inutiliter adhibentur.

36. ANTEQVAM a vegetabilibus discedamus, paucis verbis dicendum est de amygdalarum dulcium oleo, remedio certe ad plurima vtilissimo. Non tantum clysteribus ad alvum ducendam siue solum, quod SIMON PAVLI in *Quadripartito Botanico* suadet, siue decoctis emollientibus mixtum convenit: sed etiam interno vsu varis præstat easque insignes utilitates. Nam venenum, si quis incautus adsumeret, a noxa inferenda lubricitate sua, qua ventriculum oblinat, prohibet. Egregium insuper est antispasmodicum atque sedativum, si iis, qui torminosi alui fluxibus vexantur, propinatur. In faucium raucedine, ut tussi, asthmate & pectoris quibusvis affectibus, in phthisi etiam admodum prodest, præsertim si cum spermate ceti, & saccharo canto misceatur. In colica spasmodica, in dolore ex renum calculo subinde atrocissimo, atque in torminibus, quæ lochiorum fluxum, præsertim suppressum, comitantur, magno & præsentissimo auxilio hoc oleum est, si ad aliquot cochlearia cum brodio carnis sumatur. At vero in uniuersum hoc tenendum est, quod recens & ex recentibus amygdalis, non rancidis expressum & quod clarum ac pellucidum, non turbidum est, hac virtute gaudeat.

37. DEVOLVIMVR denique ad regnum animale, ex amplissimo eius sinu quædam in vsum nostrum delibaturi. Et hic primum se nobis offerunt cancri, quorum succus cum succo semperuiui mixtus & capiti adplicatus in grauioribus doloribus capitis, qui delirium minantur, mitigandus aptus. Eorum quoque succus iusculis restaurantibus & nutritiuis in tabe, in phthisi vtilissime adiungitur. Maiori vero utilitate ac laude splendent horum lapides, quorum puluis solus vel cum testis ouorum aut conchis præparatis mixtus & quarta parte nitri adiecta tantarum est virium, vt in omnibus fere morbis chronicis & acutis, præsertim, quibus immodicus calor iunctus est, ad drachmam vnâ cum maximo fructu adhibeatur, & est fere puluis amplissimi vsus, qui ad acidum primarum viarum absorbendum, in hypochondriacis & scorbuticis, in æstu contemperando in omnis generis febribus, item vbi diaphoresi opus est, egregium facit officium. Iidem lapides, si cum aceto destillato offerantur, longe magis eximia virtute pollent, dum potenter coagulatos humores resoluunt, vrinam & diaphoresin mouent, inque omnibus febribus, etiam ipsa in peste & malignis aliis morbis, in pleuritide, peripneumonia, in omnibus inflammationibus insigni cum fructu vsurpantur. Lumbrici terrestres exsiccati & in puluerem redacti, conuenienti dosi aliquoties repetita exhibiti, in epilepsia chronica & omni dolore arthritico laudatissimæ sunt virtutis, item lumbrici vivi partibus dolentibus adplicati egregio solamini sunt. Cochleæ dant puluerem, quo ad præseruationem calculi renalis, si aliquoties in septimana adhibeatur, nihil secundum nostram obseruationem deprehendimus efficacius.

38. PLVRA dicenda etiam essent de lactis vsu, quod omnibus fere remediorum generibus in medendo palmam dubiam reddit. Optimum iudicamus asininum, postea caprinum, cum quibus cura si instituat per mensem & vltra, abstinendo ab omni ciborum & potus genere, arthritis, podagra, phthisis sub debitis cautionibus & conuenienti regime-
mine

mine felicissime sanari possunt. Illud præterea etiam tenendum est, quod contra venena adsumta validissima corrosiua, vt sunt mercurius sublimatus, cobaltum, arsenicum, antimonia, emetica fortiora, quo etiam spectant acriora & drastica purgantia, non detur præsentius auxilium mortem & funesta symptomata auertendi ipso lacte copiosius hausto.

39. DE nitro, quod vili constat pretio & vbique haberi potest, illud vltimo loco inferendum arbitror, quod id ipsum depuratum vel cum absorbentibus exhibitum sit fere vniuersale remedium, quia omnibus morbis, quibus interna vehementior commotio vel æstus iunctus est, quadrat, eamque ob causam in omni febrium, inflammationum, dolorum, hæmorrhagiarum genere interne vtilissime adhibetur, alium quoque laxat, vrinam ac diaphoresin mouet, sitim sedat, dolores lenit, cuius incomparabilem & diuinam virtutem si plebei noissent, multis sumtibus atque expensis, quas pharmacopoliis insumere debent, parcere possent.



DISSERTATIO IX.

DE

VALETUDINE SENVM
TVENDA.

§. I.

FINEM velle, nolle tamen media, peruersa plurimorum & tantum non omnium fert assuetudo, nullibi frequentior, quam vbi de præcipua felicitatis humanæ parte, sanitate scilicet, consequenda agitur. Etenim nemo certe non, diu sospes & incolumis vitam transigere ardentem percipit: sed vix vllus admittit subsidia, hoc est, præceptis obtemperat, quæ ad obtinenda hæc bona deducunt, vt nempe ex præscripto saluberrimarum sic dictarum diætetarum regularum, omnem plane suam viuendi rationem institueret, seruando exactum moderamen & æquale temperamentum, tam quoad tempus quam ipsum adhibendi modum & vsum, in iis, quorum ope vita sustentatur, & ad quæ præter aerem, cibum & potum, corporis alimoniam potissimum dicata, referenda sunt ea, quæ ad placidum & moderatum somnum inducendum, corporis motum & exercitationem, nec non ad legitimum excretionum vitæ ministrantium successum pertinent, non neglectis iis, quæ ad mentem compositam, sedatam & ab impetuosis affectuum exagitationibus immunem seruandam, apta sunt atque idonea. Hæc autem curiosa salutarium eiusmodi legum obseruatio, omnibus quidem, qui vitam longam & morbosarum afflictionum expertem viuere gestiunt, cuiuscunque ætatis, temperamenti corporisque constitutionis sint, & sub quocunque cælo degant, summopere est inculcanda & excolenda: attamen infirmi potissimum sunt, debiles ac præsertim senes, imbecillimis merito accensendi, qui earundem omnium exquisitissimam habere debent ratio-

(Hoffm. Opusc. varii argumenti.)

Gg

nem;

nem; eo quod facillime ab incongruis læduntur & leue tantum contra normam admissum delictum grauissime luunt, quod robustioribus & ætate vigentibus nihil plane noxæ infert. Quia vero ætate prouectiores, quo magis viribus & corpore labentibus annis deficiunt, eo magis per longiorem experientiam rerum gerundarum peritia atque prudentia augentur aliosque ipso vsu longe antecedunt: nihil vtique æque necessarium ac salutis publicæ vtilius excogitari & suscipi potest, quam ex artis, quæ sanitati præest penu, salutaria monita & consilia hunc in finem depromere, quo veneranda eiusmodi, habilia & exercitata capita, diutissime animo æque ac corpore valentia supersint, reique publicæ consiliis suis profint. Quod quidem negotium, licet iam dudum nonnulli tractare exorsi sint, ipsa tamen argumenti dignitas & utilitas nos allexit, vt nostras etiam de eodem meditationes in publicum producamus & sequenti tractatione salutaria præsidia ipsamque rationem valetudinis senum conseruandæ, vberius paullo ac peruestigatius exponamus.

2. DE senum itaque sanitate & integritate, per diætam salubrem & conuenientem victus rationem conseruanda, dum curatius acturi sumus: primum opus est, vt eam ætatis humanæ periodum, quæ senectutis nomine effertur, exactius determinemus, & ab aliis annorum terminis rite distinguamus. Diuiditur autem senectus, secundum receptum in scholis ordinem, plerumque in tres periodos, quarum prima a quinquagesimo sexto ad sexagesimum tertium vsque ætatis annum porrigitur, & viridis communiter, siue vegeta, vocari solet; eo quod hac decurrente, vires plerumque satis constant parumque imminutæ obseruantur. Secundam sexagesimi tertii & septuagesimi anni termino includunt, qua actionum & functionum vigor notabile patitur decrementum. Et tertia denique, quæ decrepita audit, a septuagesimo ad octogesium annum & ultra prorogatur & cum ipsa vita terminatur, ita, vt eadem robur sensim mirifice atteratur, vires consumantur, corpus animusque vacillent, donec mors omnia exstinguat.

3. CON-

3. CONSTITVTIS his ipsius senii diuersis terminis, iam facile patet: per senectutem, quæ ab HIPPOCRATE ipse morbus nuncupatur, & pro vltima vitæ periodo & prona ad interitum via iudicatur, nullam aliam esse intelligendam, quam consummatam illam & decrepitam. Sunt enim & nouimus plures senes sexagenarios & septuagenarios, integris sensibus, tam externis, quam internis pollentes, vegetos, cibos probe adhuc appetentes, concoquentes somnumque longum adhuc & quietum capientes, neque tam facile ab externarum rerum, aëris, cibi & potus usu, nisi quoad genus, modum & tempus excessus accesserit, detrimentum patientes. Sed hi omnino sunt, qui a parentibus ipsaque natiuitate, stabilem, firmam & ad diutius sustinendum ac protrahendum sanguinis cursum, solidorum nacti sunt structuram: neque elapsa ætate, per intemperantiam vitæ & affectuum, luxuriam aliaque voluptatum lenocinia, languidum, imbecille & effoetum corpus reddiderunt, & iam attritum senectuti tradiderunt.

4. HINC etiam est, quod sapientissimus noster *senex Sect. II. aphor. 39.* disertis verbis edicat: *senes minus, quam iuuenes egrotare*, eos nempe, qui bonam corporis obtinuerunt naturam, temperanter vixerunt & in viridi, vel media etiam, senii periodo versantur: quum contra idem grauissimus auctor, *lib. I. de diæta*, morbosissimos dicat eos, qui maxime senes sunt, hoc est, qui decrepiti & a Græcis *πρεσβύται ἤδη γέγοντες* nuncupantur, siue, qui senium & insignem virium imbecillitatem, non tam ob ætatem ingrauescentem adepti sunt, quam ob intemperantiam suam & admissa in rerum sic dictarum non naturalium usu, delicta, sibi contraxerunt. Etenim quo magis iuuenes ac viri incontinentiæ indulgent nihilque moderati habent, eo magis & citius vires corporis profundunt, illud caussarium reddunt, & sic ante tempus senes fiunt, miseram, infirmam multisque morbis obnoxiam vitam ad extremum vsque halitum trahentes. Ex quo quum pateat: senes non tam annis, quam virium constitutione æstimandos esse: ytique nos etiam, de valetudine senum tu-

tanda differentes, per senes non solum eos, qui ob grandio-
rem ætatem, sed etiam qui sua ipsorum culpa ac vitio, anti-
cipato termino, senium, siue præcipitatum vigoris decremen-
tum, incurrerunt, volumus intellectos.

5. VT autem certa ac rationali methodo incedamus in
enumerandis iis, quæ ad conseruandam senum valetudinem
faciunt; necessarium est, vt prius dilucide exponamus: quæ
illa sint mala, quæ in senio constitutos potissimum infestant
ipsisque quasi propria sunt, nec non a quibus causis hæc ipsa
dependeant? In genere igitur tenendum est: ingentem in
senectute virium defectum & roboris imminutionem ingruere,
quæ tamen ad vitam sustentandam sanitatemque seruan-
dam summopere sunt necessariae. Quodsi enim functiones,
quæ recepta in scholis voce animales dicuntur, pensitamus,
ingrauescente ætate, memoria & acumen quoque ingenii de-
bilitantur & languescunt, oculi caligant, somnus est brevis,
non placidus, interruptus, viresque minus reficit. Quoad
actiones, κατ' ἐξοχήν sic dictas vitales, & quæ a viribus de-
nominationem fortiuntur, lassæ sunt & languida senilia cor-
pora & ad laborem & exercitationem minus prompta, per-
quam facile ad languorem dantur, pedes nutare incipiunt,
pulsus tardius, vtut durius, micat & omnes partes, inque
primis pedes, a frigore facile afficiuntur & inhorrescunt. Et
tandem ad actiones sic dictas naturales quod attinet, vniuer-
sus corporis habitus contabescit, facies rugas contrahit & li-
uido colore perfunditur, tempora collabuntur, oculi fiunt
concaui, cutis exsucca & arida, dentes vacillant & decidunt,
ciborum appetentia prostermitur eorumque digestio minui-
tur.

6. IAM si specialius paullo morborum, quibus senilis æ-
tas solenniter affligi solet, considerationem & censum ini-
mus, lustrando omnes corporis a capite vsque ad calcem
partes, in illo frequentissime sedem figunt capitales affectus
senum, apoplexia, lethargus, paralyxis & vertigo, vnacum
tinnitu aurium, incipiente surditate visusque hebetudine. In

narium & faucium confiniis coryzæ, acres in laryngem destillationes, tusses, pituitæ viscidæ screatus, quin ipse catarrhus suffocativus, sæpe scenam ludunt. Cor vñacum arteriis, lenta febre, quæ marasmus dicitur, infestante, crebrius pulsatur, & succi laudabiles cum ipsis viribus paullatim absumuntur & dissipantur. Digestionis officina, ventriculus scilicet & duodenum, nec non organa alimentorum solutioni, chyli elaborationi seruiencia, & ductus recrementitiorum eliminationi dicati, alui maxime secessus & vrinariæ viæ, tantopere a pristina indole defecisse observantur, vt cibi ingesti facile acescant, in ructus & flatus explicentur, stomachum & intestina inflent, caput torpore grauent, dolores ac tormina pariant, aluus plerumque solutior sit & crebrior ad desidendum stimulus, vel plane lienteria & coeliaca passio infestet, vrina vtplurimum cum difficultate ardore, vel dolore reddatur, & saturate tincta, nonnunquam etiam sanguinolenta, prodeat. In corporis cortice vniuerso, & maxime ano, molestissimus percipitur pruritus. Denique pedes leui de causa occupant inflammationes erysipelaceæ, vlcera mali moris, quandoque etiam iisdem exquisitus dolor insidet, cum tophis & subsequente ambulandi impotentia. Quin omnes morbi interni & externi, omnia vlcera, vulnera ossiumque fracturæ, in senili corpore difficillime sanationem admittunt, & vix ac ne vix quidem coeunt ac consolidantur.

7. ET hos modo enumeratos morbos, non solum in nostris oris nostroque tempore senibus familiares esse, ipsa experientia luculenter confirmat: sed idem etiam in quibusvis plagis contingere & prisco etiam æuo obtinuisse, antiquissimorum auctorum fide vberius constat. Ipse enim grauissimus medicinæ parens HIPPOCRATES, plurimas in senili ætate solennes ægritudines integro *aphorismo XXXI. Sect. III.* fuse commemorat, quem clarus olim in Academia Ienenſi Medicinæ Professor, ANDREAS ELLINGERVS, in *paraphr. aphorism. poet.* ita numeris latinis reddidit:

*Dyspnæo, tussis, cum catarrho, urinaque
 Seu difficulter, siue guttatim exiens,
 Renumque acutus, insuavis & dolor
 Nexus reuinctorum ossium quo vapulant,
 Vertigo, apoplexia, habitusque corporum
 Mali, vigilæ, alvus soluta & humida
 Nares oculique, totiusque corporis
 Pruritus, acies luminum reusior
 Glaucedinesque, auditus & grauis, senum;
 Τῶν γεσθῶτων, sunt morbi & arrostemata.*

HIPPOCRATI accedit CELSVS, qui *lib. II. cap. 1. p. m. 46.* senectutem longis magis morbis, adolescentiam acutis patere asserit, & *lib. V. cap. 28.* vlcera, & præcipue cancrum, in senibus maxime fieri perhibet. Vt prætereamus alios, qui idem conceptis verbis testantur.

8. VERVM enim vero non satis est medico, qui ratione & demonstratione certa cuncta assequi & metiri nititur, vt tantum sciat, quæ fiunt; sed necesse etiam est, vt causas, quare sic & non aliter quid contingat, & sigillatim vt quam ob causam senectus hisce potissimum morbis pateat eruere & clarius sistere possit. Primo itaque loco altius paullo rimandæ & exponendæ erunt genuinæ ac veræ rationes, quibus tribuendum, quod in ætate proVectis tanta virium iactura & imminutio fiat, & sensim paullatimque sic successiue increseat, vt tandem ex plenaria earum defectione ad mortem fiat aditus. Veterum quidem placita si arcessere hanc in rem velimus, ad vnum fere omnes edixerunt: senectutem esse inuitabilem quandam caloris natiui humidique radicalis diminutionem & absorptionem, & inde quoque causas languoris & functionum læsarum in hac ætate deriuarunt. GALENVS autem eiusque dogmatum sequaces ac æmuli, nimiam abundantiam humidi excrementitii in senibus, & partium solidarum nimiam frigiditatem, siccitatem & ariditatem accusarunt. Recentiores in spirituum, tam vitalium quam animalium, qui virium inspirarent defectum, causam reiecerunt. Ac

recen-

recentissimi quidam inevitabilem hanc senii ipsiusque mortis necessitatem, ita ex facili explicari posse crediderunt, si supponerent principium vitale mouens, quod a summo rerum conditore certis quibusdam limitibus ac terminis circumscriptum, quos si attingeret, deficeret & ab opere suo in regenda ac sustentanda machina desisteret, & sublata eius in corpus actione, sic omnes in eodem functiones collaberentur.

9. AST qui notiones claras, distinctas adæquatas, a confusis quæque minus concipi possunt & intelligi, reales conceptus, a speciosis verbis, & remotas quoque nimis quandoque causas a proximis & veris discernere nouit: is certe omnibus his verba tantum dari, non rationes, perspiciet; quum ex iisdem neque morborum senilium explicatio deduci ac perspicue explanari, neque congrua ad arcendos eos præsidia depromi & ad vsum impendi possint. Quin potius, quum quilibet homo, temperatissime etiam & ex præscripto, exquisitissimarum regularum diæticarum vitæ rationem adornans, ingravescente ætate, insignem in omnium functionum exercitio persentitat debilitatem & notabilem virium lapsum, quem tandem mors excipit; in procliui est iudicare: verum huius defectus & languoris causam, in ipsius corporis compage eiusque partibus inquirendam esse, ita quidem, vt primo & principaliter non tam in natura ac temperie fluidarum consistat ibique quærenda sit, quam potius in solidarum, quæ iuxta ætates valde differunt, mutata structura & textura, fundamentum & originem obtineat. Nam si solidarum corporis partium, ossium nempe, neruorum, tendinum, musculorum, membranorum & tunicarum in annosioribus, & animantibus & hominibus, intuemur constitutionem & habitudinem: certe hæ omnes longe densiores, duriores, aridiores, rigidiores & compactiores esse, quam in tenerioris & iuuenilis ætatis, animaduertimus.

10. IAM vero omnium omnino animantium nec non hominum corporum fabrica ita concinnata est, vt mere sint hydraulica, quoad vasa ipsaque viscera, ex tubis maioribus, mino-

minoribus & minutissimis capillaribus, conflata, per quas varii generis fluida jugiter ire, redire, fluere, secerni iterumque excerni debent, si rite & ex æquo functionum in corpore successus sperandus. Increfcente igitur fibrarum & tunicarum, e quibus vasa exilia æque ac ampla coagmentantur, duritie & crassitie, necessarium utique est, ut ipsi canales angustentur, quin minima illorum plane concidant & collabantur, ut transitus humorum ipsiusque sanguinis, per eorum alveos vel tardius succedat & sufflaminetur, aut plane præcludatur & denegetur. Eo facilius autem eoque maiori cum detrimento in arctius adducuntur & oppilantur vasorum caua, in organis, quæ ex congerie minutissimorum tubulorum conflata, & potissimum fluidissimis succis spirituosiss, & secundum HIPPOCRATEM impetum facientibus, partibus separandis dicata sunt, cuius generis sunt cerebrum, nerui & tubulosa testium substantia, in intestinis crusta villosa cum lacteis, nec non canaliculi, qui succum roscidum nutritium in musculis fecerunt. Quod si enim exiles meatuum in his partibus cavitates procedente tempore & ob ipsam ætatis rationem in angustum magis coeunt & sicciiores fiunt, nec subtilior sanguis & lympa, nec succi, qui potentia & viribus mouendi instructi sunt, ab alimentis & sanguine nec separari, nec in organa, sensibus & motibus ministrantia, influere possunt; non possunt utique non vires ac vigor, tam in sensuum quam motuum exercitio, mire labefactari ac deieci; quandoquidem omnis tonus, robur, vigor & motus reciproci systoles & diastoles nec non peristaltici, qui in canalibus maxime secretoriis & excretoriis viget, potentia & administratio, a tunicis musculosis & nerueis, nec non subtiliori sanguine arterioso & fluido nerueo, penitus duci debent ac deriuari.

II. Si porro, specialiori disquisitione morborum quibus infestatur senectus, natales rimari velimus: certe præcipui eorundem a copia & impuritate sanguinis & lymphæ viscida falso tartarea, & a naturali blanda ac dulci sua schesi deficiente humorum natura petendi sunt. Inde enim tusses, coryzæ,

ryzæ, atrophizæ, defluxiones acres, vrinæ difficultates & stillicidia, cutis pruritus, originem sortiuntur; inde exulcerationes & difficiles in partibus læsis consolidationes, cum cachexia, siue malo habitu, senibus familiarissimo, incunabula trahunt; inde calculosæ in renibus, vesica vrinaria & fellea concretiones, nec non tophaceæ, in artuum iuncturis excluduntur; inde quoque vigiliæ, gingiuarum putredines, dentium vacillationes ortum nanciscuntur. Quin eadem quoque causa subest, quare nulla ætas tam facile pateat sphacelationibus & cancriosis exulcerationibus, præsertim in corporis exterioribus, quam senilis. Summa enim eaque foeda & corruptiua humorum impuritas, cum virium defectu, siue cacochymia, quæ communis & fere perpetua est senibus & quam ipsa hæc ætas progignit, corruptionis huius, quæ in partibus extremis prodit, vera causa, origo & fons est.

12. VNDE vero tanta humorum sordities in extremam ætatem incidat, ipsique quasi propria, vel familiaris admodum sit, vt etiam nonnulli senectutis vitium cum malo scorbutico comparare permoti fuerint; iam erit euoluendum. Nos, vt omnis impuritatis in humoribus causam, in organorum, quæ excretionibus vacant & fœculentas ac alienas materias a succorum vitalium consortio segregant, vitium reuicimus: ita idem etiam in senili cacochymia gignenda animaduertere licet. Etenim libera & sufficiens per cutis meatus perspiratio, omnium, quæ corpus a putredine & interitu vindicant excretionum saluberrima est atque præcipua; ita, vt hac imminuta, plurimæ recrementitiæ sordes multaque inquinamenta in corpore remaneant & vitæ seruiantes humores conspurcent. In decrepitis autem & senio confectis, hæc per corporis corticem succedens euacuatio, propter aridam & ficcam cutim, porosque ac tubulos subcutaneos coarctatos & contractos, valde minuitur ac supprimitur; quo fit, vt dulcis alias & saporis expers nutritius succus, peregrinæ & falsæ indolis humore inficiatur, vrina multo acrior & salibus onustior cum dolore reddatur, corpus minus recte alatur, vl-

cera difficilius coeant, fracturæ ægre consolidentur, & quæ huius generis plura sunt. Et quia biliosi pariter & lymphatici humores, a suppressa cohibita sordium per cutis perspiracula eliminatione, acrimoniam & alienam indolem contrahunt: neutiquam certe mirum videri debet, si ob eandem lientericæ, coeliacæ passiones & alui crebriores deiectiones senes quam maxime impetant ac detineant.

13. AD mictum denique cruentum quod attinet: cur is tam crebro in decrepita ætate conspiciatur, & quare vesicæ morbi senilia potissimum affligant corpora; ex facili reddi posse rationem existimamus. Id enim crebriori observatu compertum habemus; eos, quibus antea per ani venas sanguis secessit, postea vero substitit, vel non sufficienti in copia stillavit, sanguinolenta mictione tandem infestari & vesicæ vitiis quam maxime laborare, dum cruor, prohibito per hæmorrhoidales venas exitu, restagnans, ad ramos earum vesicam versus excurrentes defertur, ibique perrumpens, in eius cavum effunditur & cum vrina emittitur. Quando tamen facile contingit, ut perforata sic interiori vesicæ tunica, factum vulnusculum ob perpetuum vrinæ acrioris appulsus iterum non consolidetur, sed in vlcus transeat, aut ipse sanguis altius & firmitus tenerrimis furculis impactus, eosdem nimium distendat, inflammationem pariat, corrumpatur & sic vlcus suscitetur, non solum ex secedentibus apospasmatibus ulcerosis, ex vrina præcipitatis & concrecentibus calculus generatur, sed ipsa etiam vrina turbida, pultacea & cum magna difficultate ac ardore stillat, donec tandem læso sphinctere, eius oriatur incontinentia.

14. ADDVTIS sic atque perspectis causis morborum, qui senilem ætatem frequentissime adoriuntur summamque ingenerant infirmitatem: paratiori nunc via accedimus ad præsidia quæ vires senum, pari cum vita passu ambulantes, fulciunt, difficiles istas morbosas afflictiones arcent. Quum vero prima in medendo sapientiæ pars sit, ea nosse, quæ nocent, utile non minus, quam necessarium visum fuit ea præmittere, quæ

quæ ætate provec̃tis aduersa sunt & inimica, quæ naturale virium robur frangunt ac deiiciunt & alendis, quin augendis, morborum causis fauent: quo maiori postea cura & sollicitudine, qui in senio processerunt, sibi ab iis cauere possint. Ordiamur proinde ab iis, quæ subito & potentissime vires conuellunt & singularum fere partium robur prosternunt, quo nomine potissimum notanda sunt ea, quæ animum percellunt, impensius affligunt & sollicitant, quibus merito diuturnum moerorem & gravem angorem annumeramus, quo plures senes subito e medio sublato nouimus. Et sane pro re satis effari nequeo, quam graui & perniciali noxa longius protracta tristitia animique sollicitudo, tam firmos & valentes, quam multo magis senio fessos, infirmos ac imbecilles, mactet. Inde enim ciborum appetentia perit, somnus fugatur, languor & imbecillitas totum corpus occupat, vigor ingenii & corporis atteritur, extrema frigesunt, alius fit solutior, sudor ex pedibus ob inductam debilitatem, noctu copiosius manat. Quapropter in decliui hac ætate omni certe studio & cura euitandæ sunt quæuis occasiones, quæ ægritudines anxias & acerbis importare, aut moerorem & terrorem incurrere possunt. Nam sicuti ad difficiles & chronicas passionnes excludendas ipsamque scorbuticam sanguinis impuritatem ingenerandam, auctore EVGALENO, nihil magis quam tristitia animique moeror confert: ita omnino alendis & augendis senum afflictionibus, quæ natales ex crudis potissimum & impuris humoribus trahunt, exitialis hic affectus quam maxime seruit & velificatur.

15. PORRO omnes, qui ætate graues sunt, solerter animum ab immoderatiore ira continere debent. Hæc enim si incidit in corpora impuro sanguine oppleta, aut si inferiores partes spasmis ac doloribus torquentur, perquam facile apoplecticum aut hemiplecticum insultum, vel inflammationem erysipelaceam, aut ventriculi, inducit. Non minus senibus infirmioribus exitiosa adeoque fugienda est Venus. Nam licet, forsan ob lymphæ seminalis maiorem falsedinem, stimu-

los eandem persentiant : attamen, si vim naturæ inferentes, hos promouent & ad ipsum exercitium descendunt, certissima virium subsequitur iactura, quæ nonnisi ad difficiles morbos, quin ipsum interitum, aditum pandit. Maxime omnium vero ii, qui eam ætatis periodum attigerunt, vt, præstolante ex præscito foedere morte, mox transactæ vitæ ratio ipsis reddenda sit, id potissimum per Dei gratiam agere debent, ne peccatis sese polluant, quæ conscientiæ suffragio, ipsos iniecto metu redarguant, animumque lacerent, & ipsi sic grassante in vires angore, easdem disperdant corpusque morbis obnoxium reddant.

16. POST animi turbas, in eorum, quæ senibus euitanda sunt, sensu, secundum vtique locum ex rerum non naturalium classe meretur, frigus. Nam si quid aliud, certe hoc, naturæ corporis senilis infensum est atque aduersum; quia, dudum notante HIPPOCRATE, *Sect. 11. aph. 20.* cutim obdurat eamque rigidam & pallidam reddit, quæ iam tum in annosioribus dura, arida & contracta, sordium ex subcutaneis tubulis exhalationem prohibet & ad plurimas ægrotudines viam sternit. Hinc est, quod admissio ad partes inferiores vel etiam ipsum corporis habitum paullo intempestius frigore non modo cutis inhorrescat & subito humorum ad interiora conversio oriatur, grauedines, tusses, destillationes & rauedines, cum languore, inappetentia & inquietudine suscitentur, sed etiam apoplexiæ metus ingruat. Et hæc etiam ratio subest, quare senes æstate optime valeant & hieme pessime habeant, adeo, vt auctore eodem HIPPOCRATE, senes hieme bis senes sint. Eo igitur studiose allaborandum est senioribus, vt corpus, maxime pedes, exquisite vestibus aduersus auræ perfrigeratæ allapsum muniant, neque eidem, post somnum maxime & sub linteorum mutatione, accessum præbeant, ac præterea nunquam non eiusmodi regimini studeant, ne corpus ventis borealibus, aut pluuiosæ ac procellosæ tempestati exponant, neque hiemali potissimum tempore ex calidiori hypocausto, mox in frigidum locum, vel ex hoc, confestim
in

in valde calefactum conclaue concedant. Similiter quum in locis depressioribus, humilioribus aut subcauis, in terram altius demissis conclauib, quæ liberiori aeris transitui minus patent & vappidis terris exhalationibus referta sunt, ob inspirationem aeris minus puri ipsamque perspirationem sufflammatam, degere vel dormire insalubre admodum sit & sanitati dispendiosum: vtque eadem curiose vitare, & saluberri-
ma semper senes seligere debent domicilia.

17. ACCEDIMVS nunc ad ea, quæ in victus ratione ætate grauioribus fugienda sunt. Hæc inter inprimis connumeranda nimia & auidior ciborum ingestio. Quod si enim simul & semel largiori alimentorum copia infarcitur ventriculus, is iam tum ob ætatis rationem solutior, ingestorum molem non debite subigere, comminuere & in laudabilem succum conuertere potest, neque chylus, ex indigesta massa extractus, a sanguine intimius absorbetur, & hinc perspirationi parum idoneus est. Quin potius, dum cibi diutius in stomacho moram nectunt, cruditates, inflationes ac tensiones ventriculi, flatus, nec non somni perturbationes, excludunt, aliaque incommoda inducunt. Vnde scite non minus quam vere CELSVS *lib. 1. cap. 2.* fatur: *ubi ad cibum ventum est, nunquam tuta est satietas.* Cuius in sententiam conspirat HIPPOCRATES *libr. de diet. acut. praua*, inquiens, *est hæc dieta, cum quis plures cibos corpori præbet.*

18. QVOAD ciborum vero genera, senio plane inimici sunt, qui glutinosi, compactiores & plurimum alimenti crassi, rudioris custodiunt, a CELSO valentioris materiæ dicti, nec non qui, ob tardio rem minusque expeditam concoctionem, ægrius intestinorum volumen traiciunt & flatulentiis ingig-
nendis fauent. Horum familiam ducunt oua ad duritiem cocta, carnes & pisces nimis saliti vetustiores & duriores, marini, vel indurati, fabæ, milium, lentes, pisa omnesque placentarum, quæ ex lacte, ouis, butyro & farina tritici pin-
suntur, species, nec non ipsa pingua, ægrius semper solubilia. Eundem quoque in censum referenda omnia cruda,

dura, & quæ ob fibrosiorem texturam, difficile in digestionis officina discerpuntur, sed ob viscosam tenacitatem facile in flatus resolvuntur, ex vegetabilium classe depromta, cuius generis potissimum sunt, napi, rapæ, bulbi, brassicæ species, dauci, allium, cepæ, raphani, acetaria, ex lactuca variisque herbis parata.

19. SED nihil certe magis senibus damni importat iisque aduersum est, quam acida, ipsius vitæ principii inimica. Hæc enim dum solidas partes præter naturam afficiunt, constringunt, irritant, densant, meatus coarctant, minima vasa obstruunt & vinculum feri ac sanguinis destruunt, fluida incrassant, & excretiones, præsertim quæ per aluum succedunt, impeditiores reddunt : vtique non possunt non senibus corporibus, in quibus solidorum constitutio iam vitata ipsaque fluida spissitudinem contraxerunt & lentius circumaguntur, maximum iniungere detrimentum. Deinceps quum ea ventriculi in annosis sit habitudo, vt ob imminutum robur & motum peristalticum, viscidas quoque & crudiores sanguinis particulas, per progressuum & intestinum motum tardiores minus euolutas, subtilisatas & ad sulphureo alcalinam naturam eductas, ingesta facile in eius cauo acescant, & sic saponariam illam alcalinam bilis indolem infringendo, ad strictiorem aluum, tenesnum, feces albas aliaque mala ansam præbeant ; iterum dilucide patescit : non solum quæ acidam & noxiam indolem apertius produnt, sed etiam in stomachum delata, acetosam & pernicialem naturam induunt, in grandiori ætate, tam ex ciborum, quam eorum, quæ potui inseruiunt censu, summo esse vitanda studio.

20. POTISSIMUM huc trahenda ex iis, quæ conspectius, ipso sapore teste, aciditatem monstrant, sunt omnes horæi fructus, acidi & immaturi, acetaria, vina acida, potissimum Rhenana, nec non cereuisiæ vetustiores. Ex his vero, quæ in ventriculi cauo demum acetosam indolem suscipiunt valetudini noxia sunt, nominandæ imprimis omnis lactis, excepto solo asinino, cum regimine dato, species, omniaque ex ipso

ipso parata, maxime caseus. Dum enim lactis materia cum acido, in ventriculo senum vbertim delitescente, congregitur, in coagulum abit & in firmam tractam difficulter solubilem densatum, parietibus adhærescit, & cum succo corrosiuo, acido & bilioso mixtum partem, cui incumbit, rodit, molestum in præcordiis sensum, cum inflatione stomachi excitat, variaque alia damna, in capite potissimum, ex consensu oriunda importat. Idem tenendum de dulcibus & conditis, & variis bellariorum generibus, quippe quæ, si non solutionem aluum reddunt, damnum gignunt, & testimonio CELSI imbecillo stomacho aliena sunt in eoque coacescunt. Eo maior autem noxa ab iis metuenda, si cum acidis, ut vino Rhenano, sumantur, eo quod aciditatem quidem promte imbibunt, sed firmiter retinent, donec tandem calore accedente, fermentatione acerrimam & corrosiuam indolem induant, qua ventriculum & intestina mordente, anxia & nauseabunda circa præcordia molestia percipitur, & alui tormina, irritus ad desidendum stimulus cum albis stercorebus excluditur.

21. DE potus delectu iam quidem ex præcedentibus constat, damnosum esse omnem illum, qui acidum in recessu alit, addendum vero etiam & senibus perniciosum esse reor hunc, qui caput petit, grauat & facile inebriat, siue vinum sit, siue cereuisia. Quia enim in senibus caput maxime, cum vniuerso genere, insigni infirmitate laborat: profecto omnia spirituosæ & ebrietatem inducentia, cerebro & nervosarum partium naturæ valde inimica, ipsumque sanguinem nimis rarefacientia, in iis non cum eximio damno naturale robur & motum magis pervertere, & distentis nimium a sanguine expanso tenuissimis cerebri vasculis, grauissimis capitis morbis occasionem præbere. Et quum legitimus aluinæ excretionis successus senum valetudinem quam maxime tueatur: utique, tam in cibo quam potu, solícite sibi temperare debent ab omnibus, quæ eundem turbare aut cohibere possunt, e quorum numero, præter acida, notanda potissimum cydonia & ex
ip[s]is

ipsis conflata, vina austera rubicunda, Gallica maxime quæ vocant Pontac & Claret, nec non cereuisiæ vetustiores, præsertim e tritico costæ, utpote quæ, longiori mora non solum magis spirituosæ redduntur, sed etiam acorem contrahunt. Denique ætate grandes desidiæ quoque nimiamque quietem fugere debent; quandoquidem si his indulgent, humores lentius per corporis vasa voluntur, spissescunt, & excretionibus suppressis, facilis ad obstructions aliaque mala est aditus.

22. REMOTIS igitur & interdictis, quæ senum valetudinem labefactant ac destruunt: progrediendum est ad ea, quæ eidem seruandæ profunt. Est vero inprimis mens hilaris, æqua, composita & ab affectuum impetu immunis, quæ non solum motibus machinæ vitali conseruationi dicatis minus perturbatum semper concedit successum, sed etiam vigorem corporis fulcit ac tuetur. Et optime certe a sapiente dictum est: *animus gaudens ætatem floridam facit, spiritus tristis exsiccat ossa.* Quare nihil magis e re sua esse putent ii, qui obrepente senectute valetudini consulere nituntur, quam ut pacato, CELSO ac excitato fruantur animo, illum subinde oblectando & innocenti voluptate & lætitia perfundendo, cuius vberissimam materiam penitior rerum, tam diuinarum in sacro codice comprehensarum, quam naturalium in amplissimo naturæ libro obuiarum, contemplatio suppeditat.

23. DEINCEPS aëris quoque magna vis est, ad inducendam tam secundam quam aduersam valetudinem, corporibus præsertim imbecillis senilibus, quæ mutato illo, illico etiam mutationem experiuntur. Ne igitur ex insalubri aura detrimentum accidat senio fessis, eligendus erit aer temperatus, purus, tetræ halitibus non inquinatus, sed liber, isque ruralis: quippe qui verum sanitatis pabulum, quod vires inspirat, appetitum excitat, concoctionem iuuat ipsique libero excretionum successui seruit. Inprimis e re illorum est, ut incolant conclauia ampla & spatiosa, ad quæ aer libere pertingere

re

re eademque perflare potest, orienti quoque & hiberno potissimum soli patentia.

24. APPRIME enim senibus conducit solaris calor hie-
me præsertim & autumnò vsura; quandoquidem sicuti flori-
bus, herbis aliisque vegetabilibus, brumali tempore pro-
pagandis, ad incrementum & durationem solis accessus sum-
mopere confert: ita pari etiam ratione, marcida senum cor-
pora hiemis ipsiusque senectutis molestias longe tolerabilius
perferunt, si solari naturali calore, & non tantum adscititio
per ignem suscitato, perfruantur. Veteres hunc in finem in
superiori ædium parte construebant solaria, quæ solem vndi-
que exciperent apricaque essent, & recepti inter eos ad vale-
tudinem tuendam moris erat, vt crebrius nudi in sole iace-
rent, federent vel ambularent, quod sole uti, & insolatio-
nem dicebant, cuius commoda MERCVRIALIS *lib. VI. cap. 1.*
fufius exponit.

25. PRODEST etiam nonnunquam, præsertim Maio &
Septembri mense, qui saluberrimi censentur, senibus, vt pe-
regrino aëre se confirment, quod præsidium prisca identidem
ad conseruandam & fulciendam corporis integritatem miri-
fice commendarunt; ita, vt PLINIVS *lib. III. ep. 1.* de Vespri-
cio quodam fidem faciat, quod constanter hanc regulam ser-
uans, post septuagesimum & septimum annum, aurium ocu-
lorumque vigorem integrum, agile & viuudum corpus serua-
rit. Idem clarissimo argumento docent diuturni & quam
maxime rebelles morbi, quos, quum non tempus, non reme-
dia vicerunt, mutatum coelum subinde sustulit.

26. PORRO motus corporisque exercitatio viribus fulci-
endis & sanitati seruandæ longe vtilissima est. Dudum id
professus est CELSVS, perhibens: *ignauia corpus hebescere, la-
bore firmari, illa maturam senectam, hoc longam adolescentiam
fieri.* Quemadmodum enim ipsa vita, omniumque tam ani-
mi, quam corporis functionum integritas, consistit in motu
solidarum æque ac fluidarum partium æquali ac imperturba-
to: ita certe, quin motitatio corporisque exercitium, hunc
(*Hoffm. Opusc. varii argumenti.*)

adiuuando, non solum vitæ & virium conseruationi eximie patrocinetur, sed etiam in ætate decliui vigorem ingenii ac corporis sustentet & augeat, ipsique sanitatis constantiam spondeat, non est quod dubitemus. Et licet plura ex remediorum classe sint, quæ corpus calefaciunt & motum sanguinis intendunt: motus tamen corporis his omnibus longe præferendus, quippe qui, naturalis magis & de proprio principio calorem & progressus augmentum inducit, ille vero adscititius, externus & aliunde accensus, naturæ non adeo amicus.

27. SVNT vero eiusmodi exercitationum modi eligendi, qui corpus non nimis languori dant, sed ætatis proVectioris viribus respondent. Saluberrima ambulatio, vel vectura, præsertim litteratis, quo sedentaria vita, quam poscunt musæ, per interuallum temperetur corpusque refocilletur. Hæc quo moderatior est, sub temperate calido coelo, eo plus emolumenti præstat, præsertim si tribus, vel etiam quatuor, ante, nec non post cibum sumtum, horis, instituatur; quandoquidem hoc pacto, concoctionem non turbat, sed eandem adiuuat & appetitum excitat.

28. APTISSIMUM quoque imbecillis & senescentibus, nec non qui musis in quiete & secessu litant, motus genus est clara lectio, cuius vsum veteres eximie collaudarunt. Dum enim elata voce diutius emissa, respiratio intenditur, non solum pulmones crebrius attolluntur, latius panduntur, incallescunt & cum aere sordes eliduntur, sed vniuersus etiam sanguinis circulus, cum calore, spiritu & perspiratione augetur, quo fit, vt partibus robur infundatur omnesque in corpore functiones expeditius & melius succedant. Quin auctore CELSO, figurata voce instituta lectio robur ventriculo maxime ingenerat & ciborum concoctioni egregie seruit; siquidem motis sub sermone thoracis septique transversî musculis, vicinus conquassatur ventriculus & comprimitur, vt non solum sanguinis arteriosi & fluidi neruei in eius tunicas augeatur impulsus, sed etiam maior saliuialis & fermentalis menstrui fiat affluxus. Vt adeo pateat, egregio beneficio publice docen-

docentes in eo frui, quod ipsa muneris ratio ipsis iniungat, ut ademptis maxima ex parte aliis motus speciebus, voce corpus exercean.

29. LENISSIMA & imbecillimis quam maxime conducibilis corpus agitandi ratio est gestatio in lectica: quippe quæ, ad discutiendum id, quod coit in habitu corporis & liberum perspiratum retardat, sine vlla vehementia plurimum confert. Iisdem quoque senio & debilitate affectis, CELSVS *lib. IV: cap. 5.* suadet, ut eiusmodi exercitationis genus adornent, qua superior corporis regio magis dimouetur & percietur, illudque in omnibus stomachi vitiis accommodum & ex usu esse confirmat: id quod commodissime perficitur manuum motitatione & brachiorum agitatione, per pulsationem musicorum instrumentorum, lusuum varia genera & qui plures alii sunt modi.

30. MOTVS vices in iis, quibus exercendi corpus occasio & locus deest, supplet frictio, quæ utilissime non modo in capite & dorso, sed etiam pedibus & toto corpore instituitur; eo quod inde calor insitus excitatur, motus sanguinis per minima vascula vrgetur, cutis rarefit, & si quæ subtus hac latent superflua transpirant. Multum certe huic detulerunt veteres, & CELSVS in primis in corporibus imbecillis & leuata aduersa valetudine, eius administrationem præcepit, neque dubium est, quin eadem debilibus etiam senum corporibus apprime proficua sit. Tutissimum vero & opportunum est, corpus quotidie, perfecta concoctione alvoque prius excreta, mane in lecto, vel vesperi ante lecti introitum, maximeque partes extremas, pedes potissimum, panno asperiori ad cutis ruborem usque perfricare, & ita quidem, ut fricatus deorsum ducatur; siquidem lentior semper est sanguinis ex inferioribus partibus ad fontem recursus, qui hoc auxilii genere adiuuandus est, in primis quum pedes senum & imbecilliorum ex facili & plerumque frigescent.

31. NON minus priscis in quotidiana corporis cura olim frequentissimus fuit balneorum & vactionum usus, & pugna-

re hæc præsidia contra frigiditatem & ariditatem partium, senibus exitiosissimam, affirmarunt. Verum nostris in regionibus, quæ coelum longe frigidius & rigidius obtinent, auramque inclementiorem fouent, quam Græcia aliaque calidiora loca, minus tutus est senibus balnearum infessus, inprimis autumno & hieme, eo quod aer perfrigeratus corpus ambiens, tonum cutis magis destruit & ad destillationes ac grauedines disponit. Interim tamen iis, qui senio non adeo exhausti sunt, æstiuo tempore, fatigatis per motum & iter membris, non adeo dissuademus, ut partes, tam inferiores, quam superiores, accommodo balneo, in conclauis maxime spatiofo, amplo, alto & lucido, foueant. Vnctiones autem magis, inter nostrates etiam, vsui esse possunt, ita easdem adornando, ut partes inferiores, & maxime etiam spina, ad solem, vel fornacem calidam, calide cum oleo v. c. amygdalarum dulcium, vel pinguedine caponum & gallinarum, additis aliquot olei lavendulæ guttis, inungantur & leniter perfricentur.

32. PRÆTEREA somni ad vitam & sanitatem seruandam tam præstans & vsus; ut sine eo durare nequeant, & ad vires reparandas tam incomparabilis facultas, ut omnem, cuiuscunque etiam analeptici, dilaudatam virtutem longissime exsuperet. Is enim non solum spirituosas & fluidissimas sanguinis & lymphæ partes fouet & tuetur, sed etiam nutritium & alibilem succum retinet, quo solidæ partes egregie humectantur & dulci rore perfunduntur; ut adeo ad exsuccas & aridas corporis marcescentis partes, eodem nihil sit vtilius & aptius, & ex vero a GALENO monitum: *omnibus ex siccitate laborantibus, somnus opportunissima est medicina.* Quo magis itaque senibus siccitas est infensa, & genuina, tam imbecillitatis eorum & extincti caloris, quam ipsius mortis causa; eo magis ipsis somnus amicus & in pretio esse debet, & is quidem non interruptus, non fatigans, inquietus nimisque accisus, sed placidus, plenus & reficiens, qualis esse suevit post coenam facilem & frugalem animoque hilari & tranquillo

quillo quieti sese dantibus. Incubandum vero etiam stratis mollibus, non solum ut ipse somnus eo quietior sit, sed etiam quo mollescente inde & relaxato corporis habitu, sanguinis liberior in hunc fiat appulsus, & sordes per aperta cutis spiracula eo promptius diffentur.

33. SVCCEDVNT ingesta, cibus scilicet & potus, in quorum delectu maximopere respiciendum ad senilium corporum, tam quoad annos, quam virium diuersam habitudinem. Etenim quibus firmior adhuc ventriculus minusque annorum, non facile discedant ab assueta victus ratione, licet tantisper durior sit & ex viliorum more; qui vero solutioris sunt stomachi, uti decrepita ætate confecti, selectum instituant & accommodis cibis vtantur, iis nempe, qui probatissimi succi, temperati, faciles concoctu, nec diu in ventriculo moram neçtentes eumque grauantas & moleste afficientes. Commendamus hunc in finem inprimis iuscula ex caponibus, gallinis aliisque alibilibus carnum generibus, nec non liquamen ex contusis cancris fluuiatilibus, sine aqueo vehiculo, affuso vini modico, adiectisque aliquot citri taleolis & macis frustulis, in vase clauso, imposito aquæ bullienti, per decoctionem paratum. Eandem quoque in rem laudem merentur brodia, quæ ex pane grossiori furfuraceo, cum aqua & vino, addito cinnamomo & saccharo, conficiuntur, nec non, succus ille gelatinosus, qui ex assatis carnibus stillat, quippe qui, tanquam selectissima & ad chyli naturam quam maxime accedens pars, natiui caloris in senibus substantiam egregie instaurat affuso solidis temperato, & spirituosius delibatissimo, nutrimento. Neque etiam penitus abstinendum a cibis leuioribus; qui aluum lubricam seruant & acidus in prima regione succos contemperant, cuius generis sunt pira & poma dulcia, pruna Hispanica, fructus cynosbati, cum passulis aqua & vino decocta. Parcior vero semper sit coena senibus, præsertim si caput infirmitate detinetur, vel tussis humida vrget, ipsiusque ventriculi robur remissum. Nam licet somnus coenam excipiens ingestorum digestionem secundet; ipse ta-

men, superfluum per alvum, vrinam, perspirationem & pituitæ scretum impedit, eaque suspensa, crudiatum fit proventus, quas ventriculi inflatio, ructus, capitis oppletio, pondus, sensuum torpor, nocturna tussis corporisque sub somno iactatio arguunt.

34. NON minor cautio circa potum adhibenda. Et ut prius de cerevisiis mentem promamus; rarissima certe sunt exempla senum, qui easdem ferre possunt. Nam si iuniores, flatuum generationi velificantur, si vetustiores, acorem contraxerunt & caput petunt, uti solenne inprimis est ex tritico coctis, si vero lupulo amaricantes & validioris materiæ, humoribus lentorem & capiti segnitiam insinuant. Quare si quis cerevisiis assuetus, nec aquarum potum admittere potest, tenuissimæ, vulgo *Halb Bier*, crassioribus præferendæ, & spirituosæ gratiores, quo nomine notæ sunt Goslariensis, Brunsvicensis & Mecklenburgensis, saltim instar medicinæ stomachicæ, modice, & quidem in coena, bibendæ. Qui vero aquis assuesacti, his leuissimas & purissimas, leniter tantum cum ligno lentisci, vel corticibus citri, decoctas, potui dare expedit, eo salubriores, si cum vino apto remisceantur.

35. DE vino eiusque usu; communis quidem veterum sententia fert: pueris dilutum, meracum & potens senibus conducere; norma tamen est neutiquam perpetua, sed potius cum iudicio & discrimine applicanda. Omnino enim natu grandioribus saluti est, ut vinum minus potens bibant, vel forte, quale vetus Rhenanum & inter Gallica optimum Burgundicum est, aqua temperent: ita tamen, ut si aquæ potus ordinarius, illius tertia vel quarta pars confundatur. De generosioribus autem monendum: quod potentia eorum simulque dulcia, quorum censum subeunt, quæ superior Hungaria profert, inprimis Tockauense, porro e Gallicis Languedocense, Vin de St. Laurenz, Lusitanum quod ex Portu Cale aduehitur, Florentinum & inter Franconia der Stein-Wein senili ætati admodum salubria sint, modice tamen & crebrius inter cibandum sorbillata, quo pacto iuuant conco-

ctio-

ctionem, calidum natium, ex prisco loquendi more, instaurant, neque minus vniuerso corpori calorem infundunt & ferofas sordes, tam per vrinarios meatus, quam subcutaneos tubulos, eiiciunt.

36. SVNT vero etiam præter frigidos potus, recepti nostra ætate vsus calidorum potulentorum genera, Thee scilicet Coffee & Succolada, quæ, an grandævis etiam profint, dispiciendum. Hæc utique senibus eorumque valetudini tuendæ aptissima sunt, etiam paullo liberalius propinata; eo quod humectant, crassos & salsos humores diluunt, meatus patulos seruant, & calore sanguinis progressum sordiumque cum perspiratione diffationem promouent: modo ventriculus liberaliorem ferre possit copiam. Interim tamen, quia vis herbæ Thee adstrictiua senili corpori non adeo fauet, rebus suis melius consulunt, qui tutioris virtutis herbas cum calida infundunt, eoque nomine inprimis herba veronicæ, betonicæ, melissæ, præsertim Turcicæ, cum corticibus citri & aurantium, commendationem merentur. Decoctum quoque Succoladæ, si cum aqua paratur, adiecto vno vel altero oui vitello, senum constitutioni & nutritioni quidem maxime accommodum est: sed moderamen tenendum, nec nimis crebro eo vtendum. Neque etiam potus Coffee plane reiiciendus, quod si enim aluum soluit & nervoso generi non obest, acidum, quo seniorum ventriculus plerumque obsidetur, infringendo & contemperando, egregie inseruit. Sorbillantur autem eiusmodi calidæ potiones, nostra quidem sententia, commodissime & optime mane in lecto, quo iisdem lenis & placidus mador eliciatur.

37. SED hæc de vitæ regimine & victus ratione in tuenda senum valetudine seruandis; iam nonnulla adiicienda sunt, de aliis præsidiis, medicamentosis magis & non ita quotidianis, integritati tamen ætate prouectiorum egregie patrocinantibus. Et primo quidem loco excutiendum: num thermarum vel acidularum potus senibus utilis sit & accommodus? In hac autem consideratione potissimum ratio habenda

benda non solum virium, quæ vsuris constent, & ipsius periodi senectutis, quæ non adeo sit declivis, sed etiam facultatis mineralium aquarum, quæ minus vehemens esse debet. Proinde in decrepitis & a vigore defectis, quales communiter sunt qui septuagesimum annum compleverunt, caute mercandum est in medicatarum aquarum commendatione, ac potissimum improbandæ sunt validiori agendi vi instructæ, quarum classem ducunt Pyrmontæ & Egranæ, ex thermis Carolinæ, ex falsis Sedlicensis, cum fonte, qui ad pagum Seydschütz salit. Temperatarum vero & mitius operantium usum admitti posse censemus, & ex his quæ saluberrima est, Selteranæ, inprimis si tempore æstiuo loco ordinarii potus, cum tertia vini Rhenani optimæ notæ parte nupta, exhibeatur; ita enim acidum vini, cum alcalino aquæ elemento in tertium quoddam sal abstersivum degenerat, cuius ad excretionum successum secundandum eximia est virtus. Addi etiam potest huic mixturæ elæosacchari citri sufficiens quantitas, tum vt saporis gratiam captemus, tum etiam vt viribus tantisper prospiciamus.

38. AN venæsectio senibus proficua sit? vexatum in foro medico est dubium, facile diluendum & soluendum, si subactum medici iudicium accesserit. Quod enim in senili corpore, si firmior adhuc ventriculus & appetentia vegeta, sanguinis abundantia adsit, nullum est dubium, eo maior & certior, quo minus sub otioso minusque laborioso, senibus familiari viuendi genere, is per motum censumitur. Quin potius in plerisque non solum humorum redundantia, sed etiam ex hac oriunda impuritas peccat, vt plurima ipsis solennia mala, ac inprimis infestissimus prouectiori ætati marasmus, a crasso & copioso sanguine, quo viscera turgent & infarcta sunt, originem trahant. His igitur sanguinem mittere, est vitam prorogare & sanitatem seruare, præsertim si iam antea venæsectioni assueverint, diæta lauta ac vinosa fruuntur, sanguinisque per ani venas secessus substituerit. Nouimus certe plures, qui subtracto quotannis aliquoties e vena sanguine, ætatem,

ætatem, quæ robustissimis etiam satis longa est, impleuerunt, & annum octogesimum quartum & sextum excefferunt. Contra vero, si corpus impensius eneruatum, vires confectæ, appetitus dudum prostratus, sanguinem educere, piaculum foret & senectutem extinguere. Sed quum nobile hoc non minus quam vtile argumentum, iam olim peculiari scripto fusius pertractavi superuacaneum duco, plura de eodem, ibi dicta, huc transcribere.

39. PRÆTEREA quum aluina excretio, siue excedat, siue deficiat, senum saluti periculum minetur, legitimi eiusdem successus quoque ratio habenda erit. Quod si autem aluus compressa fuerit, eius solutio, neutiquam validioribus, & virulenta indole grauius in vires grassantibus, molienda; sed confectæ huic ætati, præter laxantes, ex falsis, dulcibus & pinguibus, cibos, apprime dicata & accommodata est manna, ad vnam vel alteram vnciam, cum lacte asinino, vel sero caprillo, oblata; quippe quæ, pectori amica, tussi medetur & ponticos austeros in primæ regionis diuerticulis obhærescentes succos egregie cicurat, eosdemque sine virium damno, promte per ani secessum exturbat. Sæpius quoque obseruauimus, exhibito saltim puluere absorbente, vel bezoardico fixiori, aluum in senibus fuisse motam, hanc forsan ob causam, quod alcali terreum pulueris ingrediens, cum acido primarum viarum in sal tertium abiit, & tunicis intestinalibus stimulum insinauit. Sennata autem nec non aloetica exulent. In segnioribus tamen & phlegmaticis, si res postulant, pilulæ temperatæ balsamicæ ex usu esse possunt, cuius generis sunt Beccherianæ & ad imitationem harum paratæ & correctæ. Et si forsan acciderit, vt ob fecum ficitatem & copiam aluus obstipetur, iniicendi sunt clysteres emollientes oleosi & his stercora euocanda. Sin vero nimis crebra alui deiectio senes exerceat, vt metus lienteriae sit, nocentissima sunt adstringentia; tutius est, diæta quodammodo ficcante vti, abstinendo ab omnibus acidis, falsis & acribus, stimulum inferentibus. Et ad reparandum intestinorum laxatum tonum, ex cinnamomo paratis nihil est præstantius. Vtilissimum quoque est balsamum nostrum spirituosum sic dictum vitæ, cuius

(Hoffm. Opusc. varii argumenti.)

Kk

guttæ

guttæ decem vel plures, cum duabus olei cinnamomi guttis interiorius assumendæ, eodemque exteriorius ventriculi regio inungenda.

40. SUPEREST tandem, ut de iis, quæ ex medicamentorum classe ad refocillandas in grandævis vires faciant, nonnulla addamus. Quamvis autem plurimi ad hoc perficiendum spirituosus & aquis sic dictis stomachicis, primas deferant: cautissimus tamen eorum sit usus auctor sum, ne liberali manu & crebrius propinata, sanguinem, præsertim si redundet, exagitent & caput imbecillius reddant; quin, in senectute viridi & vino fruentibus, plane ab iisdem abstinendum esse censeo. Interim si vires vacillantes remediis suscitare ex usu sit, tria, quæ principem inter analeptica locum tenent, ambram scilicet, cinnamomum & succinum, & ex his lege artis parata, plenissime commendamus. E liquorum autem analepticorum compositionibus, hanc maxime utilem & accommodam fore reor formulam: Rec. myrrhæ electæ unciam unam, croci unciam dimidiam, corticum citri & aurantiorum ana uncias duas, cinnamomi acuti unciam cum dimidia; affunde spiritus liliorum convallium libram dimidiam, postea adde vini Hungarici mensuras tres, destilletur lege artis per alembicum, prodiens liquor suauissimi odoris & saporis, iulepo rosarum grata dulcedine imbuatur & affusa drachma vna essentiae, vsui seruetur. Est certe hoc remedium tam accommodum senum fessæ naturæ, & tam præstans ad imbecillitatem subleuandam, quam vix vllum aliud, firmat quippe ventriculum debilem, caput roborat & blandum quoque somnum inducit. Poterit autem de eodem nonnunquam cochlear vnum vel alterum, vel solo, vel intincto pane mellito Norimbergensi exhiberi. Non minus etiam viribus & stomachi infirmitate egregie succurrit elixir. nostrum balsamicum viscerale temperatum ad cochleare dimidium post pastum propinatum, in primis si refracta dosis bals. nostri vitæ admisceatur: quod balsamum si ad aliquot guttas infuso thee instilletur, & exteriorus, attracto per nares odore, verticis, nuchæ & necessitate exigente aliarum a robore defectarum partium inunctione, in capitis dolore, vertigine aliisque senum afflictionibus, opem præstat longe saluberrimam.

DISSERTATIO X.
DE
SALVTARI AC NOXIO
VENÆSECTIONIS VSV.

§. I.

SI vnquam breuiter, solide tamen & accurate vniuersæ medicæ artis natura tradita fuit, certe id ab antiquissimo & probatissimo medico HIPPOCRATE præstitum fuisse arbitror, qui *libro de Flatibus* docet: *medicinam nihil aliud esse quam additionem & subtractionem: subtractionem eorum, quæ exsuperant, eorum vero, quæ deficiunt, additionem: Qui vero istud optime facit, is optimus medicus existimandus est, quique plurimum abest ab eo præstando, is plurimum in arte medica deficere censetur.* Profecto hac vere mechanica definitione grauissimus auctor vniuersæ nostræ artis indolem ac solidum fundamentum complexus est. Ecquis enim est, qui liberum functionum corporis nostri exercitium, quo sanitatis natura continetur, in sola moderatione motuum, & humorum debita proportionem ac temperie versari ignoret? vtpote nihil vitæ ac sanitatis negotio tam inimicum, & tam aduersum est, quam eorum, quæ vitam dispensant, excessus aut defectus: qua de causa omnis generis morbificæ causæ humorum & motuum excessum & defectum respiciunt. Et quicumque morbum vult tollere, is nihil aliud agere debet, quam vt motus & materias deficientes vel superabundantes in naturæ amicam temperiem ac moderationem reducat. Huc quoque omnis generis, quæ alma mater natura largiter nobis concessit, remedia spectant, quæ vel euacuandis vel restituendis humoribus aut nimis motibus compescendis vel tardis promouendis vnice dicata esse animaduertimus.

2. Ex quibus omnibus clarissime apparet, magnum no-

strum HIPPOCRATEM vniuersæ artis præsertim praxeos medicæ fundamenta nobis doctissime tradidisse, quæ si quis paulo diligentius & perquisitius attendat, is optimus certe effato cori medicus censebitur: habet enim hic normam ac regulam, qua scit, quid agendum, quid omittendum sit. Quum vero excedens & superfluis sanguis ex consensu etiam solertissimorum medicorum, ipsaque teste experientia, maxime omnium adfligit, & morborum passionibus producendis admodum idoneus sit, hinc facile apparet, principem merito locum inter ea, quæ exsuperans detrahunt, venæsectionem sibi vendicare: quia sanguis, quo naturæ, si moderatus fuerit, amicior est, eo, si superabundet, nocentior existit. Quapropter magna semper laus & gloria diuino venæsectionis remedio constitit. Comperit enim ratio & experientia confirmavit, omnibus aliis auxiliis tam operationis celeritate & securitate, quam tolerantia facilitate hanc esse superiorem: hinc nullo ferme in morbo a veteribus & HIPPOCRATE est intermissa; eius quoque vtilitatem præter veterum testimonia longus & quotidianus vsus comprobatur. Quo maiora autem huius in praxi medica sunt commoda, adeo ut non tantum ad arcendos a corpore morbos, sed etiam ad periculum in iis auertendum ipsosque sanandos summum sit præsidium; ita e contrario eo grauiora inde resultant incommoda, si nulla subiecti, causæ morbi, temporis ac virium ratione habita ea administratur, quare id laboris iam in nos suscepimus, & in præsentis de venæsectionis non solum ad vitam sanam & longam consequendam saluari sed & noxio vsu agemus.

3. DICTURI itaque de venæsectione, eamque ceu securum & summum ad prosperam ac longam vitam impetrandam auxilium adserturi, necessarium omnino arbitramur præmonere, neutiquam nobis in præsentis esse propositum, ut solam sanguinis detractionem protrahendæ vitæ sufficientem asserere velimus, vel quod sine venæsectione nemo prospera ac secunda valetudine frui, aut ad vitam longam spem sibi possit

possit facere. Neque enim vllum tam absolutæ efficacæ in vniuersa rerum natura datur remedium, de quo quis certum sibi, nedum talem effectum possit pollicereri: sed omnia, quæ in auxilium prompta sunt remedia limitatis viribus determinantur, & naturæ corporis ægrotantis potissimum innituntur. Præterea nouimus, qui sine venæsectione per longam ætatem firma gavisi sunt valetudine. Nouimus quoque, qui cum venæsectione præmaturo fato defuncti sunt: quapropter hoc loco nobis non est animus, vt asseueremus sanguinis vacationem omnibus promiscue indiuiduis quadrare, vel ad longam vitam necessario perducere; sed hic est noster scopus, hæc mens nostra, vt adfirmemus tantam virtutem, vt plures, quibus propter sanguinis redundantiam & grauis morbus, & subitæ mortis periculum immineat, ab imminentibus hisce malis tueri ac defendere possit.

4. PRIUS vero quam in huius rei explicationem paulo altius descendamus, non sine fructu fore arbitror, si eorum qui vel in totum vel ex parte hoc remedii genus contemnunt, rationes ac argumenta examini subiiciamus. Quamuis vero neque vllum vnquam auxilium tanto medicorum consensu ab incunabilis fere scientiæ medicæ per tot secula vbiuis fere terrarum, & per tam constantem experientiam, approbatum fuerit, præterquam ipsa sanguinis per sectionem venæ emissio; nihilominus esse & fuisse semper, quod satis demirari nequeo, qui fere diuini hoc auxilium ex toto damnare imo infamare, vel tamen parcissime eo vtendum esse, contenderunt, vix ac ne vix comprehendendum est. Quod vnicum certe documento esse potest luculento, quanta imperitia non dicam ignorantia inter gentem medicorum adhuc versetur; quæ res quo certior, eo magis deporanda videtur. Atque non tanta nos tenere debet admiratio, quare olim ERASISTRATVS & ante seculum forsan HELMONTIVS, & qui eius saluam lingebat THOMSONIVS hoc remedium contemptui habuerunt, quandoquidem ERASISTRATI tempore spissis tenebris adhuc rerum phylicarum & medicarum cognitio erat involuta. HEL-

MONTIO vero viro alias nobili, & per ignem Philosopho, qui nunquam artem agitavit, hic error de facili videtur condonandus: quod vero ex eo tempore, quo magnum illud mundi inventum, sanguinis intelligo circuitum orbi innotuit, & hinc corporis humani oeconomia paulo subtiliori solertia excoli coepit, ac vniuersa medicina ex tenebris in sereniorum lucem asserta fuit, adhuc ex medicorum cohorte dentur, qui vel ex toto venæsectionem repudient, vel nimis timide ac trepide cum hoc agant, illud merito vituperandum videtur.

5. POSSEMVS certe hoc loco, si velimus ire in exempla & nisi veritas odium, molestiam ac periculum gignat, multos casus recensere, vbi plures ceterum sani ac ætate florentes ex sola venæsectione tam curando quam præseruando ommissa in grauissimos & lethales morbos inciderunt, qui certissime potuissent maturæ venæsectionis auxilio seruari; sed hæc lubenter iam prætermittimus: potius hoc loco non alienum esse existimamus, at potrocinium venæsectionis agam & argumenta in contrarium, qua fieri potest breuitate ac perspicuitate discutiam. Mittimus vero ERASISTRATÆOS, quos olim iam suo tempore GALENVS *libr. de Venæsect.* aduersus ERASISTRATVM non sine felicitate refutauit, sed rationum momenta, quibus nonnulli ex recentioribus vti solent intuebimur. Præcipuum vero quod asserunt est: sanguinem non modo vitæ esse thesaurum, sed & ipsius animæ vehiculum & instrumentum, & sanguine amisso non modo vires, sed & vitam amitti. Cum vero omnis thesaurus non sit minuendus, sed potius seruandus & reparandus, hinc male cum ipsis agi asserunt, qui vitalem liquorem tam improvide profundunt. Insuper confugiunt ad experientiam, qua ostendunt plures a detractone sanguinis ita fuisse debilitatos, vt ægerrime pristinam valetudinem fuerint assequuti. Porro quoque dicunt, complures firma & æquabili valetudine frui & longa vita vita gaudere, qui totam ætatem nullam sanguinis imminutionem passi sunt. Illud vero primum & præcipuum illorum videtur argumentum, quod nullam plethoram seu boni sanguinis

nis redundantiam noxiam esse contendant, sique forsan superfluis & pravis vasis inhæreat, felicius eum abstinencia, motu & tutioribus remediis absumi posse asseuerent.

6. OPERÆ itaque pretium erit, ut hæc dubia, quæ primo intuitu videntur speciosa, paulo accuratius discutiamus. Primo vero non ibimus inficias, sanguinem pretiosum & desideratissimum, quo vita & anima ad suas operationes utitur, esse liquorem, quo penitus amisso & vita exspiret, & anima corpus suum deferat, necesse est: quo nomine utique optimus vitæ est thesaurus. Concedimus quoque immoderatam eius profusionem admodum debilitare, corporisque robur imminuere. At vero sanguis est thesaurus vitæ & animæ sustentaculum, dum nempe libero & æquabili flumine vitalem suum in orbem motum per corporis partes absoluit. Nunquam enim sanguis in se spectatus ratione mixtionis suæ præstat vitam vel animam cum corpore iungit, sed tum demum, quando in orbem agitur, & placido motu per corporis fertur tubulos, unde etiam talis motus recte dicitur vitalis, isque est, qui commercium corporis cum anima statuminat, simulac vero optimus alias liquor in parte quadam subsistit, & progressivo motu exiit, protinus amplam non modo morbis & morborum causis, sed & morti occasionem subministrat. Quod vero nimium exsuperans sanguis vitalem circulum turbet, nostrum est inferius ostendere.

7. REMOTO vero hoc dubio ad aliud deproperamus: naturam nempe nihil facere frustra declamant, utpote quæ tanta sapientia instructa sit, ut non maiori, quam par est, copia vitalem hunc liquorem progeneret. At huic assertioni optima veritatis parens experientia solenniter contradicit. Cui usus enim est ingens illa pinguedinis moles, qua subinde corpus humanum obruitur, annon potius plus exitii quam salutis naturæ adfert? Sique nihil noxii vel superuacanei aut deficiens quoddam natura proferat, unde fit, quod vnum corpus præ altero debilius, & non modo ad morbos, sed & ad mortem promptius existat? Unde porro evenit, quod natura
tam

tam parata ac prompta sit in morborum aliis causis fabricandis? Quo magis apparet, corpus nostrum ita esse dispositum, ut tam facile noxia quam utilia producat.

8. ACCEDIMVS iam eam rationem, quod videlicet experientia comprobet, amisso sanguine mire corporis robur debilitari: sed admodum etiam lubrico & inualido fundamento hæc innititur. Quid enim notius, quam quod ex corporibus pleni habitus per vulnera sæpe sæpius incredibilis sanguinis copia sine noxa profundatur? In huius rei illustrationem occurrit elegans locus apud IOH. HEVRNIVM in *Com. libr. 1. aph. 3.* dum scribit: *Illustriss. Auranæ Princeps Wilhelmus Nassovius Antwerpiae a latrone læsus sclopeto in collo, ita ut iugularis magna illa vena maximam sanguinis funderet copiam per plurimos dies, cum quotidie plures sanguinis libras emitteret, fluxione tandem colcothare cohibita salvis viribus evasit.* Quid porro familiarius in praxi accidit? quam quod foeminæ ex abortu ac in puerperio immensam subinde sanguinis quantitatem collectis mox viribus effundant. Neque adeo crebrior per venam sectam sanguinis detractio viribus infensa est, ut fert vulgi opinio. Legimus apud SCVLTE-
TVM in *obseruat. 11.* *Virginem septingentes per vitam venæsectiones passam fuisse sine omni sanitatis periculo.*

9. NEQVE Gallorum hodie medicorum morem ignotum esse existimauerim, qui acuta febre detentos decem sæpe repetitis venæsectionibus interdum citra detrimentum singulare exercent. Sanguis enim est, qui ex boni succi alimentis, saluo saltem ac integro manente appetitu, facilius reparatur, præsertim in iis, quibus laxæ fibræ sunt, & spongiosa carne gaudent; quandoquidem in his ob lentiores cursum temperatior fit calor, qui potius servat sanguinem, quam ut ipsum consumat. Deinceps non constantis est experientiæ vnicum virium fomentum esse sanguinem. Vidimus potius a venæsectione oppressas in plethoricis vires protinus erectas. Equidem negandum non est, quin sæpenumero venæsectio male a medicis a imperitis instituta corpora viribus exuat, ipsaque

que mirum debilitet, sed tamen remediorum abusus non tollere debet verum eorum usum, nec sinister quandoque superveniens euentus eius legitimum usum excludit: nam vix prodest, quod non lædere possit idem.

10. VRGENT præterea ii, qui minus sanguinis vacuationibus fauent, quod plures sine venæsectionibus longam & sanam egerint vitam. At hi perpauca numero sunt, neque vero omnibus alma natura tam valens ac robustum a natiuitate corpus concessit, cuius robur humorem alienum & excedentem facile vincere possit: pauci etiam sunt, qui motu, labore, commodoque ac attemperato victu bonam, quam a parentibus nacti sunt naturam secundant. Hisce discussis deueniendum iam ad vltimum, quod tamen primo loco esset ponendum. Communis nempe est sententia, quæ etiam in Gallia, teste IOVBERTO, adhuc viget, primam venæsectionem a morte liberare posse, quare nonnulli hoc remedii genus ad averruncandam mortem differunt. Ad hæc vero dicimus, si sanguinis missio hominem ab impendente morte vendicat, certe non aliter hoc præstat, quam sanguinem exsuperantem, a qua morbus subnatus fuit, & qui multum periculi minatur, subtrahendo: an non vero consultius est matura venæsectione morbum & illud, quod subest mali, depellere, quam periculo se manifesto exponere, quia hoc non raro labente bene agendi occasione & tempore hominem perimit.

11. DILVTIS itaque iis, quæ in contrarium possent moveri, dubiis, sequitur iam vt firmioribus ratiociniis venæsectionis tam necessitatem, quam vtilitatem ad tutam & prosperam valetudinem diu seruandam statueremus. Præcipuum vero ad firmandam nostram sententiam ex ipsa natura corporis nostri argumentum desumemus. Tam prouide enim & tam sapienter a benigno conditore constructa machina nostra & tam insignibus viribus dotata est, vt non modo sponte ab eo, quod vitæ est infensum, se liberare & feliciter tueri possit: verum etiam vt sola sapius optima morborum sine medici opera sit medicatrix. Iam vero cum nihil æque sit

(Hoffm. Opusc. varii argumenti.)

Ll

vale-

valetudini aduersum, quam superabundans sanguis, eo quod vitalem in orbem motum sufflaminet; hinc nihil prius & antiquius prudens habet natura, quam vt sanguinem superfluum conuenienti motu, debito quoque tempore ac loco felicissime eliminet: id vero non modo in sequiori sexu magno cum alleuiamento singulis præstat mensibus, verum etiam in puerili ætate vel adolescentia exsuperantem sanguinem per nares, in adultioribus per sedis venas statis subinde periodis, non sine singulari commodo euacuat. Et quodocunque solennis & saluberrima hæc sanguinis excretio vel ob languorem ex ætate vel ex longo morbo prouenientem vel ob alias causas e. g. præposteram curationem supprimitur, vel penitus cessat, protinus ingens malorum agmen corpus adfligit. Fiunt enim ex consuetis narium hæmorrhagiis deficientibus graues cephalalgia, ophthalmia, vertigines, in adultioribus apoplexia, aut sensuum deprauationes. Mensium vero inordinata vel deficiens fluxio quanta mala non concitat? inde enim spasmodica internarum partium tractiones, cachexia, lentæ febres, miræ flatulentia, ac digestionis vitia sequuntur. Ex hæmorrhoidum vero impedita vel cessante euacuatione grauissima quoque mala, vt sunt hydrops, insania, nephritides, spasmi primarum viarum, flatulentia, asthmata, cachexia & apoplexia subnascuntur. Monstrat certe medico sapientissima natura, quid ipsi sit agendum: nam cum medicus languida naturæ minister & adiutor, vel valentis spectator esse debeat, hinc naturæ methodum optimam addiscere, & cum attentione imitari debet. Videlicet vbi deficit, eam adiuuare, id est arte sanguinem exantlare superfluum, qui tantas molestias creat, enitatur; quo remedio tam ad depellendos, quam etiam ad sanandos prædictos affectus nihil est efficacius.

12. Ex his itaque clarissime perspicimus, venæsectionem maximum fundamentum in ipsa natura habere, cuius arstantummodo est imitatrix. Soluit autem venæsectio plethoram, quæ foecunda morborum est procreatrix: at cum ex recentiori-

oribus nonnulli dentur, qui plethoram existere pernegant, hinc non alienum esse iudico eorum etiam rationes paulo perquisitius intueri. Dicunt, sanguinem bonum minus abundare posse, talis vero ipsis est, qui gelatinosus temperatus & floridus apparet. Verum enim vero ipse sanguis duplici modo consideratus bonus dici potest, vel ratione mixtionis suæ, vel relatione facta ad motum, qui demum recte hunc titulum meretur. Nam etsi optimus, & gelatinosus in vasis contineatur, minus autem recte & æqualiter per corporis partes circumferatur, tum ad vitam & sanitatem tuendam plane inidoneus est: quandoquidem si tardiori nimis motu prouoluitur, facile in vasis præsertim minimis subsistit, & si viscidiores eius partes secedentes coalescunt, atque emunctorium vias occludunt, & hac ratione magna & noxia fit viscerum offensio. Cum vero optimus & temperatissimus, qui gelatinosa rubicunda substantia cognoscitur, maxime omnium facile redundet, patet, nullum æque hoc ipso ad morbos generandos esse aptiorem. Frequenti enim constat experimento, sanguinem ex plethoricorum vel etiam sanguineorum venis extractum, utplurimum mixtione gelatinosum, temperatum, coccineo & eleganti colore tinctum esse. Vbi itaque talis sanguis animaduertitur, ex eo recte sagaciores medicorum iudicant, multum sanguinis in eiusmodi corporibus generari, missionemque eius esse utilissimam: contingit id ipsum maxime in foeminis & qui spongioso habitu gaudent, laute viuunt, & mentis ac corporis motibus vacant; ibi enim temperatior calor sanguinis, ex gelatinosa substantia chyli, prouentui mirifice velificatur. Etenim quo intensior corporis feruor ac æstus est, eo maior liquoris huius vitalis fit consumptio. Siquidem celerrima ætheris agitatione, qua caloris natura continetur, nexus ac vnio partium sanguinis texturam constituentium facile dissoluitur, ut ex nobili & temperato alimento inutile excrementitium sulphureum liquamen emergat. Qua de causa vehementior corporis mo-

tus ac labor neque minus febrilis æstus pingue & sanguine superans corpus celeriter extenuat.

13. Ex dictis itaque clarissime patet, non modo habitum corporis plenum ac coloratum, sed & sanguinem optimum periculi imminentis esse plenum, quia ubi bonus sanguis gignitur, ibi eius quam facilis fit abundanta, quæ in peius omnia successiue præcipitat; qua de re perite non minus ac scite noster HIPPOCRATES *lib. 1. aph. 3.* prodidit: *athletarum euexia, quæ ad summum distensionis euasit, periculosa, unde talem euexiam sine cunctatione soluere oportet*: hinc dicebat CELSVS: *si plenior quis, speciosior & coloratior se ipso factus videatur suspecta sua bona habere debet*, quia inquit: HEVRNIVS: *a nimia sanguinis ubertate calidum nasium exstinguitur & præcipiti lapsu homines rapiuntur, & interceptis carotidum viis, parua apoplexia fit.* Quemadmodum vero redundans sanguis tam infensus naturæ ac inimicus sit, nostrum iam est exponere. Videlicet laudabilis ex bono chylo in vasis supra modum collectus copia sanguis vigori ac elateri, quo cordis musculi & arteriarum tunica instructæ sunt, nimium resistens, cursum ac circulum sanguinis reddit difficiliorem, unde sanguis ob debiliorem cursum spissescit, crassus euadit, ad obstructions & stagnationes gignendas paratissimus. Rationem vero huius rei ex mechanicis eruere non magnæ erit difficultatis: nobilissima enim motus scientia est, quæ nos docet, ex proportionem & relationem virium mouentis & resistentis motus effectum profluere, adeo, ut quo maior potentia sit virium in impellente, & minor in resistente eo celerior fiat motus; sicut contra, quo maior mobilis resistentia est, eo plus virium mouenti detrahatur, & tardior fit impulsus. Itaque sicut maior molis quantitas maiorem gignit resistentiam, ita maior quantitas sanguinis actiuitati & pulsui cordis atque arteriarum elateri plus quam minor resistit, consequenter sanguis tunc minus expedito circulo per corporis partes circumfertur. Perquam curiosum vero illud anatomicum experimentum est, ubi ex flatu immisso in venam cauam vel ductum thoracicum canis vi-

ven-

ventis, cordis motus mox sistitur, subsequente inte morte. Cuius phænomeni nulla alia subest ratio, quam quod dextra cordis auricula, cuius fibrarum structura valde tenera est, a flatu nimium distenta, non amplius contractioni sufficiat; unde cordis motus etiam conquiescat necesse est. Neque dubitamus, quin ex nimia sanguinis redundantia, si præsertim hic excedente calore aeris vel spirituofo liquore interius expandatur, cordis auriculæ eodem modo possint distendi, vt fibræ supra modum extensæ ad propulsandam sanguinis congesti molem & ad circulum continuandum fiant plane minus idoneæ, vnde lypothymia viriumque oppressiones plethoricis perquam sunt familiares.

14. QVIS itaque medicorum tam socordis ingenii & hebetis mentis est, qui non perspiciat, venæsectionem tam noxa sanguinis nimii congestionem summum esse præsidium, eo quod superfluum sanguinem subtrahendo protinus conuenientem proportionem inter cordis arteriarumque musculos & inter vim sanguinis resistentis, restituat, circulum sanguinis rursum æqualem & liberum, a quo sanitatis & vitæ ratio pendet, reddendo. Quod etiam experientia confirmatum habemus, dum oppressæ nimio sanguine vires vnica venæsectione, augentur, pulsu citiori calore & perspiratione reddita intensiori.

15. QVAMVIS vero hæc, quæ adduximus, ita sint comparata, vt quemuis etiam, possent conuincere, nihilominus dantur, qui hæc subuertere enixe laborant, dicendo sanguinis excessum longe tutiori via, videlicet abstinentia, inedia, vitutenui, motu corporis intensiori, infusis calidis, quam periculosa venæsectione consumi ac castigari posse. Verum non imus inficias, illud fieri posse, sed quis est nostris temporibus ita comparatus, vt a consueta sua indole, vel nimia edendi cupiditate facile deflectat & rigida hæc præcepta sequatur? Et vtut hæc cuncta fieri possent, tamen, vbi præsens impendit a sanguinis vbertate præsertim in passionibus acutis periculum, hæc commemorata remedia, quia tardissime agunt, plane non sufficiunt. Manet itaque & manebit perpetuo venæsectioni sua laus & gloria.

16. CONFIRMATA sic firmioribus ratiociniis venæsectio-
nis necessitate, proximum iam est, ut paulo specialius, qui-
bus in morbis auertendis, quo tempore & qua ratione sectio
venarum sit instituenda, proponamus. Primo vero dicimus:
omnibus, qui succi pleni sunt, vasa sanguine repleta habent,
bene appetunt, laute viuunt & vita secura ac otiosa fruuntur,
neque sanguinis solennem & ordinariam quandam vacuatio-
nem habent, detractionem eius ad depellendas, quæ pressio
certe sequi debent pede, ægritudines longe esse vtilissimam:
Perraro enim accidit, ut homines ita comparati periculum
euadat, quod feliciter venæ sectione bis vel ter anno institu-
ta potest propulsari. Nunc vero deuenimus ad eos morbos,
quibus dimouendis venarum incisio idoneum est remedium.
Videmus sæpenumero robustissimos, qui secura videbantur
frui valetudine præter omnium spem repente procidere omni-
que motu ac sensu priuatos exstingui. Neque nouum est,
multos in lecto, quem sani firmique conscenderunt, emor-
tuos reperiri. Nouimus & ante oculos plurâ nobis versantur
exempla, vbi tales funestos euentus prædiximus. Noui in
hac vrbe tres floridæ & sanæ visæ feminas, quæ subito fato
cecidere.

17. QVODSI vero solertiori studio tam subitæ mortis cau-
sas explorare animus est, tunc demortuorum corpora aperi-
endo, plerumque has duplicis generis esse obseruamus. Vel
enim ruptio vasorum intra cerebrum, aut in thoracis vel ab-
dominis cavitatem, quod tamen minus frequenter fit, visitur;
vel polyposa in cordis thalamis concretio, magna venarum
occludens orificia, causa deprehenditur. Incurrunt vero apo-
plexiæ periculum maxime ii, quibus copiosus intra venas san-
guis fertur, maxime si senectuti fuerint propiores, facilius
vero malum gignitur, si post largos imbres aquilonaris tem-
pestas & sæuientis boreæ flatus repente sequatur. Qui san-
guinis missionem, quam alioqui salutariter adhibuerunt, te-
mere negligunt, facile quoque eadem corripuntur, id quod
& iis euenit, quibus sanguinis per nares vel ani venas proflu-
uium,

uium, vel sponte constitit vel suppressum est, hinc etiam mulieres lochiis non rite fluentibus, hoc acerbo malo adfectas vidimus. In præseruatione huius funesti & feralis mali, si quid aliud certe venæ in pede tusio plurimum sibi vendicat, quæ vbi circa æquinoctialia tempora instituitur, securam præstat valetudinem.

18. QVOD ad polypi originem attinet, patent identidem huic quam maxime ii, qui sanguine abundant & habitu præditi sunt spongioso, insuper obesi, multum comedunt, sed parum bibunt, vitam agunt sedentariam, ac spiritum vini copiosius ingurgitant, fit exinde sanguis viscidus ac crassus, qui minus expedito itinere corpus percurrit, vnde viscidiores & glutinosæ eius partes columnis cordis facile adhærent, in fibrillas paulatim coalescentes. Quo minus vero promptum est tale concretum veluti mortis fomentum vlla medicina dissoluere, eo facilius ac paratius est, huius genesis præcauere, quo nomine præter abstinentiam & motum corporis validiorem nec non liberaliorem aquæ calidæ potum, venæ sectio omnibus præferenda videtur. Nactæ enim liberiori spatio, longe expeditius sanguis per cordis thalamos ac tubulos venosos mouetur, vnde concretio, quæ quietis & motus retardati soboles est, minus potest contingere.

19. DEINCEPS heroicum nostrum remedium in grauib; acutis passionibus præsertim, vbi inflammationis metus subest, præcipuum fert punctum, idque non modo in curando, sed maxime omnium in præseruando præstat. Est videlicet solertioribus practicorum haud incognitum, quantum periculi in febribus sub initio & statu præsertim immoderata sanguinis profusio habeat, cui symptomati sanguinei sic dicti & plethorici in tales incidentes morbos plerumque sunt obnoxii: quantum itaque auxilii a venæ sectione tam ad præseruationem, quam ad sanationem, si mature inter initia morbi adhibeatur, expectandum sit, quisque qui mediocri tantum iudicio pollet, facile diiudicabit. Pleuritides, peripneumoniæ, anginæ, nephritides & id genus aliæ inflammationes vel
prin-

principaliter adfligunt vel secundario superueniunt aliis morbis ob sanguinem copiosum spissiore factum, qualis e vena missus plerumque apparet. Quid vero hisce grauibus vitiis plus præcauendis & propulsandis sanguinis decenti detractio-
ne conuenientius sit equidem non video?

20. ABORTVS præsertim grandiori foetu graue malum est, ipsoque partu longe periculosius, eo quod secundina re-
tenta vasorum orificia adaperita mancant & sic lethales utplu-
rimum fiant hæmorrhagiæ. Inuadunt tales abortiones præ-
cipue sanguine redundantes, si graui terrore percelluntur. Præcauet vero dira hæc mala omnium optime phlebotomia
in tempore instituta, quæ in quibusdam confidentius repeti
potest. Animaduertimus enim quibusdam feminis abortum
esse frequentissimum, adeo, ut repetitis vicibus recurrat, a
cuius mali amolitione, aliis non neglectis, nihil aptius est ve-
næ sectione, quæ pro ratione circumstantiarum non semel vel
bis, sed singulis mensibus, sicuti tales obseruationes mihi
notæ sunt, debet continuari. Quoniam vero ordinario abor-
tus circa tempus mensium consuetum solet inuadere, oppor-
tunum utique tunc est, circa hoc, si res postulat, sanguinem
demere.

21. CETERVM plethoræ solutio grauidis administrata sa-
nas reddit puerperas, viuidos gignit infantes & multorum
malorum materiam præscindit. Ordinario enim grauidæ sunt
plethoricæ & inde fiunt cacochymicæ multis impuritatibus
in vasis collectis, quæ matri & infanti malo sunt, siquidem
in puerperio purpuræ tam rubræ, quam albæ, neque minus
partium internarum inflammationi fomitem præbent. So-
lent quoque prægnantibus adhuc alia incommoda succresce-
re: scilicet pedum & abdominis tumores oedematosi, ferinæ
tusses, vomitiones, dorsi dolores, odontalgia, languores,
quæ cuncta sanguinis imminutio, non omisso clementium la-
xantium vsu, egregie præoccupat. Dein ab impuro grauida-
rum sanguine infantes frequentem sibi contrahunt labem. Fi-
unt non modo inde infirmi, sed & si natura valet, variis exan-
thema-

thematibus, ut sunt tineæ capitis, aphthæ, erysipelata, variolæ, morbilli, crusta lactea, valde exercentur. Qui itaque ab omnibus hisce vitiis immunes eos reddere percipit, sanguinem ad iustam mensuram reducat, necesse est. Quam graua symptomata suppressa lochia causentur quotidianis exemplis edocemur, sequitur plerumque periculosa admodum inflammatoria febris complures perimens. Non semel sed sæpius summo cum fructu inter initia sectionem venæ in puerperio, vbi lochia cohibita fuerunt, vitiis alias difficillimis mitioribus inde redditis vel iisdem plane auerruncatis, vidi adhibitam.

22. ACCEDIMVS iam chronicas easque contumaces passionēs, quibus amoliendis vix par habet sanguinis copiosioris diminutio. Non incognitum est iis, qui in artis opere frequenter versantur, quod vere & autumno maxime circa æquinoctia graues morbi oboriantur & resuscitentur, in quo numero sunt hæmoptyses arthritides, asthmaticæ pectoris oppressiones, insanix melancholicæ, hemicranix, febres & acutæ & intermittentes, colicæ conuulsivæ, hemiplexiæ, quæ sæpe anniuersarias & statas temporum periodos obseruant, hisce generosa & alioqui probata præsidia frustra sæpe opponuntur: venæsectione vero circa æquinoctia celebrata, non neglectis iis, quæ primam regionem ab impuris sordibus liberant, omne punctum sanationis conficitur.

23. ARTHRITIS malum est, quod omnis ætatis & sexus homines vario tempore & diuersis in artubus exercet. Et quamuis eos, qui vel natura languidiores fuerint vel præposterò viuendi genere debilitatem membrorum contraxerint, potissimum inuadat, attamen a sanguine plurimo, qualis fit ob euacuationes solennes cohibitas, maxima parte fouetur. Sanguinei enim & spongioso habitu præditi plerumque fiunt arthritici, quibus si per hæmorrhoides aut alia loca superfluous sanguis fertur, ab hoc malo euadunt ferme immunes. Quicunque itaque a sæuis hisce doloribus suum corpus tueri percipit, is nihil prius habere debet, quam ut temperata diætâ

(Hoffm. Opusc. varii argumenti.)

Mm

nimi-

nimum sanguinis prouentum impediat : deinde omni studio ea remoueat , quæ viribus vlllo modo conuellendis idonea sunt. At solenni & spontanea sanguinis cessante vacuatione vel intermissa in iis, quibus humorum aderat plenitudo venæ sectione, si magnam malum incidit, tunc plus matura sanguinis detractiōe quam vlllo alia medicina efficitur.

24. MENSIVM profluium, a quacunque etiam causa suppressum fuerit præsertim ob languentem naturam, quæ circa quinquagesimum annum plerumque accidit, innumerabilibus illarum corpora malis obiicit, quæ solers medicus nunquam non matura venæsectione præcauere debet; hac enim graues diaphragmatis spasmi cardialgiæ syncopticæ, cordis palpitationes inde mox conquiescunt, neque tutius præsidium est, multa mala ab illis, quibus propter ætatem prouectiorem plane deficiunt auertendi ipso hoc nobilissimo nostro sanguinis mittendi remedio.

25. DOLOR calculi est vnus ex atrocissimis, sed si originem eius spectemus vix alia est, quam quod lente nimis procedens plus iusto abundans & spissus sanguis in renalibus vasculis stagnet eorumque elaterem ac tonum imminuat, vnde urinæ difficilis fit secretio, hinc tartarus ex hac secedens paulatim concrescit & inimicum hunc hospitem ingenerat. Videmus itaque plethoricos vitæque sedentariæ addictos, & quibus hæmorrhoides vel menses non amplius feruntur, potissimum diro hoc malo exerceri. Et hæc quoque est ratio, quare fluentes hæmorrhoides magno sint nephriticis remedio: vbi vero illos non prouocare licet, vicariam operam ipsa venæsectio in pede præstat. Et notauimus plures a calculo, quem dolor circa lumbos prænunciabat, hoc modo immunes redditos.

26. CACHEXIA & qui hanc insequitur scorbutus atque hydrops ex sanguinis & feri redundantia, factaque viscerum inde obstructione citra omnem contradictionem suam originem nanciscitur. His difficilioribus vitiis maxime ii patient, qui fibras natura laxas exiliaque vasa habent, atque
ex

ex victu crasso, duro, item intemperantia, nimio otio vasa humoribus aggrauarunt. Arduum vero ac difficile est, has graues adfectiones visceribus non amplius integris eradicare; neque tamen, si recens malum fuerit, omnis sanationis spes est amittenda, quam in sanguinis matura detractioe motu ac labore vsuque aquarum mineralium præcipue ponendam esse arbitramur.

27. Ex longis & periculi plenis vitiis non vltimum est phthisis, quæ multos in iuuentute constitutos perimit opprimitque. At vero ab hac venæsectione corpora defendi posse, paradoxon multis videbitur, sed tamen experientiæ id esse consentaneum, pluribus exemplis confirmatum habemus, vbi nempe iuues sanguine pleni ex variis causis macilenti facti, spiritus angustia, tussi sicca, dolore circa pectus grauatiuo, calore intensiori diu correpti in extremo phthiseos periculo versantes, admissa phlebotamia & vsurpatis aquis mineralibus cum lacte caprino mixtis, nec non pediluuiis & nitroso absorbentibus rursus obesi & robusti præter omnium expectationem facti fuerunt, pristinis incommodis penitus sublatis. Neque porro incognitum est, eos, qui hæmoptysi patent, quam facile fieri phthisicos, sanguine ex aliis partibus ob spasmodicas interiorum stricturas ad pulmones cum magno impetu congesto, qui postea vasorum orificia disrumpens floridus tussi eiicitur. Iam vero nil familiarius est, quam quod hæmoptysin male tractatam pulmonum exulceratio subsequatur. Quum vero prouide instituta venæsectio aliaque sanguinis a pulmone motum diuertentia commodissime hæmoptysin præcaueant, hinc quoque phthiseos periculum depelli hac ratione posse certum est.

28. VLTIMUM est, vt venæsectionem in senibus longam vitam producendi esse præsentissimum artis subsidium confirmemus. Communis & pessima opinio increbuit, quæ non modo vulgum, sed medicos etiam occupauit, senectuti sanguinis detractioem esse inimicam, eo quod senibus, qui ordinario inualidi ac infirmi sunt, non conueniat, illud, quod

virium pabulum ac alimentum est, subfurari. Quoniam vero supra iam hanc rationem destruximus, hinc superuacaneum ducimus hæc ipsa fastidiosè repetere; quin potius experientia solidoque ratiocinio nixi adfirmamus, venæsectionem senibus, quibus adpetitus adhuc integer ac saluus est & quorum vasa turgent, ad longam vitam & ad seniles ægritudines amoliendas esse conuenientissimam. Error est, sanguinis missionem senectuti vires subtrahere, possem enim hoc loco cumplura exempla proponere, vbi septuagenarii imo octuagenarii per aliquot annos singulis fere mensibus venam aperiri passi sunt sine vlla virium diminutione. Certo scimus, plures eam ætatem ad quam peruenerunt, non attigisse, nisi ex consilio medico singulis annis minimum bis venæsectionem admisissent.

29. DEIN nulla regio est vbi tam liberaliter hoc auxilii genus admittitur præterquam in ipsa Heluetia. Nemo fere est, qui non bis minimum singulis annis venæsectionem ibi sibi curat administrari, vixque in vlla regione, quam in hac tam longæui homines reperiuntur. In vniuersum vero pluriimi senum sunt plethorici, inque primis ii, qui robustiori natura & vegeto ad huc appetitu gaudent, quibus sanguinis copia præsertim ex boni succi alimentis adsumtis intermissoque exercitio in vasis colligitur, quam expedit; accumulatus itaque nimium in visceribus subsistit, illaque infarcit, obstruit, vnde ad cachexiam & marasmodum via præparatur paratissima. Ob lentiolem quoque humorum cursum & perspiratum segniores perfaciles feri contingunt secessiones, vnde catarrhi, tusses, raucedines, paralyses, pruritus, stranguriæ, dysuriæ senibus perquam familiares propullulant; si quando vero graui animi motu vel acri frigore accedente redundans sanguis ex partibus inferioribus ad caput & pulmones nimium vrgetur, apoplexiæ & subitanæ mortes, catarrhi suffocatiui celerrime suboriuntur. His itaque de causis senibus sanguine plenis nunquam venæsectionem inutilem iudicamus, adeo, vt potius eam ad longam vitam impetrandam expedi-

tiss.

tissimam esse adseueremus, modo simul ea quæ vires frangunt & hinc ætati sunt aliena remoueatur.

30. Ex his iam adductis cuius erit perspicuum quam generosum magnæque utilitatis tam ad morbos avertendos quam debellandos venesectionis sit remedium; nunc propositi ratio quoque postulat ut de eius noxio usu quædam dicamus. Multi proh! dolor sunt, qui omnium fere morborum ortum & causas, nimia sanguinis abundantia deducunt atque deriuant, eaque propter liberales nimium sunt in sanguine profundendo, ac in omnibus tantum non morbis venam secandam esse præcipiunt prætereaque sciunt fere nihil. Etenim sanguinis & bonorum succorum in vasis copiam, hæc nimium distendendo, lentius iusto progredi spissescere, imminutis excretionibus sordibus inquinari & vitalibus motibus infensam fieri, eaque propter subtractionem exigere, est utique certum. Sed pari ratione vicissim firmum est ratumque: sanguinis & bonorum succorum defectum ac inopiam, siue parciores iusto quantitatem, cum vitæ & sanitatis periculo iunctam esse, & foecundam morborum suppeditare matrem, ac ob id conservationem potius, quam consumptionem sanguinis poscere. Vires enim, quæ functionibus, & vitalibus & animalibus & naturalibus præsent, sufficientem omnino sanguinis & humorum, ad facilem & liberam circulationem, quantitatem possulant; hæc autem imminuta ad solidorum robur naturale, vim motricem ac tonum non sufficit, his vero elanguescentibus, labascit illico humorum progressus, sanitas ipsaque vita. Testes huius sunt ii, qui sanguinem non adeo copiosum in venis alentes, eundem inprimis paullo largius subtrahi patiuntur, quippe qui, haud raro sub ipsa missione, suspenso cordis & arteriarum motu, animo deficiunt, in animalibus postea æque ac voluntariis motibus, notabilem persentiscunt languorem, & oppressis viribus, de digestionem languente & stomachi grauitate iustas edunt querimonias. Quid? quod etiam in vulgus notum est, effuso nimium ex vasorum systemate sanguine, cum viribus vitam & animam effundi. Ut

adeo, vel ex hisce tantum, abusum etiam in sanguinis missione frequentissime committi posse, pateat abunde.

31. INDUCUNTUR autem plerumque morborum artifices ad præposterum eiusmodi consilium falsa illa hypothese quasi morbi tantum non omnes orirentur ex plethora. Nostra igitur iam demonstrandi methodus primo omnium exigit, ut hanc confutemus, & evictum demus: plurimos & præcipuos morbos, non a sanguinis & humorum abundantia, sed ex longe aliis causis, maximeque virium & succorum inopia, ortum ducere. In quo quidem recte perficiendo, ex vere pathologiæ principiis in genere repetendum erit: nullum morbum, siue præternaturalem in solidis & fluidis corporis nostri partibus mutationem, sine præcedente violenta quadam, in nerveo-musculosas, quæ motibus præsunt membranas, actione contingere; hanc actionem, vel augendo & intendendo, vel minuendo & destruendo, vel etiam varie alterando & determinando vim motricem, morbosam illam mutationem inducere, idque vel per nimiam harum exquisitioris sensus partium distensionem, vel compressionem, tractionem, puncturam, lincinationem, rosionem, aut continui læsionem ac dilacerationem fieri. Causas vero hos naturæ humanæ adeo inimicos effectus præstantes, non unius eiusdemque indolis ac generis esse; alias mole & quantitate nimia; alias mole exili & varia particularum peruersa figura & qualitate acri, salsa, caustica; alias materia crassiori; alias subtiliori; alias exhalatione putrida, sulphurea, vaporosa; alias nimium relaxando & colliquando; alias nimium constringendo & exsiccando, calore aut frigore intensiore, noxium edere hunc effectum. His vero omnibus tam diuersi generis morbificis causis tollendis, an ullo modo satisfacere queat sanguinis missio, nemo, quantumvis perspicax & acutus, capere valet.

32. IAM, si specialius ipsas morborum origines disquirimus; stupendæ profecto exiguitatis sunt illæ exhalationes, quæ malignos, pestilentes, petechiales, dysentericos, exanth-

the-

thematicosque morbos inducunt, ac quæ intima corporis subeundo iisdemque adhærendo, motuum in solidis & fluidis œconomiam grauitèr peruertunt; ita vero comparatæ, vt neutiquam sanguinis subtractione amoueri queant & eliminari, sed potius eo firmitus impingantur. Quamtopere solus immaterialis actus, ob commercium animam inter & corpus, sine vlla materiali, quantitate, vel qualitate delinquente causa, vniuersum partium neruosarum systema afficiat & præter naturam commoueat, quamque graues & exitiales sæpe, chronicæ æque ac acutæ passiones, inde accersantur, animi affectus, mœror impensus, angor, metus grauis, cura ac sollicitudo, terror, ira vehemens, cum profundis assiduus meditationibus satis superque testantur. Quæ omnia, vbi accidunt, sanguinis missio, nisi eminens concurrat plethora, vtique plus detrimenti affert, quam emolumenti.

33. POPVLARES dein morbi, qui vno tempore, ob insolitam temporum constitutionem diuturnam subitasque tempestatum vicissitudines, infestant plures, vti sunt ex febribus maxime catarrhales, benignæ & malignæ, intermittentes, tam quotidianæ, tertianæ, quartanæ, quam anomalæ, arthriticæ, synochæ cum cacochymia complicatæ, rheumaticæ, pleuriticæ spuria & huius generis alia, longe frequentiores & periculosiores sunt iis, quibus sanguis & succi laudabiles deficiunt, quam quibus abundant, ac sanguinis missionibus vt plurimum & grauiorè redduntur, & contumaciorè. Qui milites, ob perpeffum in castris interdiu æstus, noctu frigus, toleratam famem, vigilias, victum & potum insalubrem, nec non inquinatum putridis effluuiis haustum aerem, affligunt autumno & in hiberna concedentes, graues morbi, tanto magis si putridorum genium habent & summum spirituum & boni sanguinis defectum arguunt, tantum abest, vt venæsectionem ferant, vt potius inde exacerbentur ac teste RAMAZZINI *de morb. artif. pag. 291.* id remedii genus suspectum, semper fuerit obseruatum, quin funestum.

34. QVÆ biliosus humor, vehementi ira subito & cum impetu ex vniuerso ductuum biliariorum systemate in duodenum exturbatus, mora acrior & corrosius factus, ventriculi & aliarum partium ueruosas sentientes exquisitè membranas, lancinando, vellicando & spasmodice constringendo, suscitāt mala, cardialgiæ syncopticæ, febres inflammatoriæ, cholericæ, tertianæ continuæ, causi, ictericæ, lentæ & hæcticæ, omnis fere generis euacuationes, maxime omnium vero sanguinis, respuunt, ac potius demulcentia, diluentia, & sedatiua poscunt. Morbi, qui ex vitio digestionis & deiectione intestinorum & ventriculi tono oriuntur, multi & graues, ac colluuiæ crudorum acido-viscidorum succorum nerueis tuni-
cis inhærentium, has rodendo, vel ubi in flatus resoluuntur, distendendo sunt molestissimi, maxime iis, qui natura debiliores, a morbo diuturno conualuerunt, otio & gulæ indulgentibus, senibus, etiam lactentibus, colicæ flatulentæ, plurima hypochondriaco affectui iuncta pathemata, vomitiones, diarrhœæ, phlogoses, eructationes, tusses, cephalalgia, interdum etiam conuulsionēs, tantum abest, ut sanguinis subtractione quicquam leuaminis accipiant, ut potius imminuto inde plus robore, magis ingravescant.

35. MITTO iam illos atrocibus symptomatibus stipatos morbos, qui a morfu vermium in intestinis, a calculo asperi-
ori & grandiori in vretheribus & biliaris ductibus, nec non vrinariæ vesicæ collo, a materia arthritica articulorum membranas ac rodente, a punctura tendinis, aut alia externa violenta causa accidere solent, quibus omnibus nihil plane cum sanguinis plenitudine commercii, ac proinde etiam cum eiusdem subtractione, nisi admodum per accidens, ut symptomatibus occurratur, sed longe alia indicantur auxilia. Neque etiam dicam de contumacibus ac gravibus, quin funestis sæpe occurrentibus passionibus, asthmate humido, suffocatiuo catarrho, pectoris aliisque hydropis speciebus, syncope, cordis palpitatione, quæ a polyposis in corde & maioribus vasorum concrementis, post mortem repe-
riun-

riundis, ortum ducunt. In his enim cunctis, venæsectio, nisi forsan ad præseruationem, locum inuenit nullum, ac potius est detrimento. Neque minus quotidiana & funesta sunt exemplo eorum, qui ex haustu potus frigidi, corpori sudanti ingesto, ventriculi inflammationem, phthisin, lentam & hecticam febrem, hydropem, hypochondriacos sic dictos spasmodicos morbos incurrerunt. Sed quid etiam his in morbis a sanguinis missione expectari queat auxilii, nec ego, nec quisquam alius in arte exercitatus, perspicere valet.

36. PRÆTER hos autem, a causis, figura irregulari, subtilitate inimica & mole parua nocentibus, inductos morbos, sunt adhuc alii, qui non tam a sanguinis & seri corrupti copia, quam potius debilitatissimæ succorum substantiæ defectu ingignuntur, ac venæsectionem ea propter minus commode ferunt. Hos inter primum merito locum obtinere videtur, venerea & scorbutica lues, cui variæ morborum externorum cutem defœdantium species accedunt, lepra, herpes, scabies, furunculi, tumores in vlcera mali mores desinentes. Omnia enim hæc vitia, neutiquam a sanguinis & humorum plenitudine fiunt, neque etiam, vt in simplici cacochymia accidit, intemperie siue dyscrasia viscida, aut falsa nituntur, sed potius in defectu spiritualescentiæ succorum, siue inopia subtilioris, purioris & spirituosius elementi, quod in sanguine a veteribus vitalis, & in cerebro animalis spiritus, nomine fuit insignitum, suum habent fundamentum. Huius quippe si sufficiens adest quantitas, humores in crasi, consistentia & mixtione naturali seruantur quam optime, ac a corruptela vindicantur; vbi vero deficit, fluida corporis a naturali *σχέσι*, vnione & mixtione perquam facile desciscunt & in corruptionem ac vappescentiam abeunt. Et certe quantum ad seruandam fluidorum integritatem conferat nobile hoc subtile elementum, in physicis testimonio sunt aquæ, tam pluuiiales, quam fontanæ, minerales quoque & medicinales, quippe quæ aufugiente ab ipsis subtili ætherea elastica materia non modo saporem genuinum cum virtute medicamen-

(Hoffm. Opusc. variis argumenti.)

Nn

tosa

rosa amittunt, sed & facile corrumpuntur atque putrescunt. Idem vino accidit, quod subtili & spirituoſa ſua parte orbatum, vappam contrahit, ac immutata plane priſtina mixtione ac vnione, ſub leni digeſtione in acetum degenerat. Atque etiam ex his ingentis illius in malo ſcorbutico corruptionis quam facile ratio eſt repetenda. Cauſæ enim ipſius ut plurimum ſunt aer denſus, humidus, materia elatiſtica in locis humidioribus cibi exſucci, indurati, craſſioris compagis, subtili elemento orbi, potus aquarum ſtagnantium, crudarum ſpirituoſa parte deſtitutarum, cum vita otioſa motusque experte. Quæ omnia, iunctim ſumta, corpus non modo viribus defraudant, ſed & ſuccos a naturali indole deciſcentes & in corruptionem pronos ingignunt, vnde grauiffimi memorati morbi ducunt originem.

37. DEMVM in perquirenda morborum geneſi & hoc memorabile occurrit, quod plures ex iis, ut apoplexia, deliria, phrenitides, ventriculi inflammationes, hæmoptyſes, peripneumoniæ, paralyſes, neque a ſanguinis & humorum abundantia, neque intemperie ac dyſcraſia, in ſe ſpectata, originem ducant, ſed potius inculandus ſit error quaſi loci incongrui, in quem ſucci & ſanguis ſunt delati. Id enim non infrequens eſt, per aliarum, etiam ſæpe remotarum partium ſtriſturam, ſpaſmos, flatuſ, animi affectuſ, corporis exæſtuationem, calore & factam poſtea refrigerationem, aliasque cauſas, ſanguinem in capillares tubulos propelli, qui ſecundum naturam ſanguinem nec capiunt, nec ferunt, ſed tenuiorem humorem, cruorem in eos vectum hære ibi, colligi & impactum malâ tam atrocia ſuſcitare. Sanguis autem ſic in anguſtiſſimis vâſis incarcerationatus, neutiquam euacuatione artificiali factæ liberatur, eaque propter venæſectio auxilium afferre valet, directe nullum, licet, ſi plethora vrget, ad intercipiendum maiorem ad partem laborantem affluxum, & impediendum inflammationis incrementum, deriuandi fine uſum habere queat. Nec aliter de ſanguinis miſſionis uſu in intermittentibus ſentendum.

dum. Si enim in earum genesin inquirimus, eas plerumque vitii in aere, aut pravi victus, foetus esse constat. Nihil autem ipsis commercii cum sanguinis plenitudine, eaque propter eiusdem subtractione neutiquam tolluntur, sed experientia teste redduntur chronicæ, nisi in referuatis quibusdam casibus, ex accidenti, plethora eminente, eadem iudicetur necessaria.

38. GRAVIA porro damna, qua ex indiscretim instituta venæsectione resultant paulo vberius & specialius iam excutiemus. In quo exsequendo, primo omnium censuram meretur, illa erronea, tam vulgi, quam chirurgorum, ipsorum etiam medicorum minus peritorum opinio, qua omnibus ferme hominibus, ad corpus a morbis vindicandum, venæsectionem verno tempore vtilem ac necessariam esse putant. Id quidem certum, quod ineunte vere, quo sanguis, hieme ad corporis exercitationem minus apto, sub impeditiore perspirationis successu, vberius collectus, atmosphæra iterum calidiori reddita, expandit sese maiusque affectat spatium, iis præsertim, qui ad generationem copiosi sanguinis proclives sunt, ad præscindendos ex succorum plenitudine imminentes morbos, vtile ac necessarium sit, vt copia exundans subtrahatur; interim tamen id neutiquam uniuersale censendum. Non enim in omnibus tum adeo sanguine plena vasa, vt depletionem poscant, quin quandoque plane virium languor adest atque debilitas, siue per morbum prægressum, immoderatos animi affectus, vigilias nimias, aut digestionis & appetentiæ vitio fuerit inducta. Quod vbi accidit, sanguinem non perdere, sed potius ingignere & longe aliis præsidiiis seruare decet. Vidimus certe plures, corporis tenuioris ac debilioris, post sanguinis, inprimis paullo liberalius institutam vere missionem, in maiorem virium prostationem, grauatiuum & pressorium artuum dolorem, neque minus in rheumaticas & catarrhales incidisse febres, quæ, accedente medentis errore, in lentas tandem desierunt.

39. PARI ratione falsa est opinio illa pervulgata: non-

nisi circa æquinoctium, ante, aut post illud proxime, venæsectionem esse adornandam. Nam licet plurimi medicorum mirabilem prorsus æquinoctii in corpus humanum influxum esse credant; is tamen alius est plane nullus, quam qui a calore solis pendet, neque certa semper tempestatum ratio, sed interdum plurimis ante æquinoctium diebus, interdum circa illud, mitior & calidior atmosphæræ est constitutio. Quare nos, ex mente ipsius HIPPOCRATIS, qui in omni magna ac subita tempestatum vicissitudine, quæ æquinoctii tempore est maxima, dissuadet medicationes magnas, venæsectionem, cum ipsis Heluetis, tutiorem iudicamus. Februario mense, si serenum est cælum, ubi non tantæ aeris sunt mutationes, quæ perspirationem mire lædunt. Atque etiam si aliquot ante æquinoctium hebdomadibus, incidat insuetus calor, minime expectandum æquinoctiale tempus, sed plethoram citius solvendam esse censemus, ne sanguis ob expansionem in venis, periculum intentet.

41. NON autem frequentiora sunt medicorum in præcipienda venæsectione delicta, quam in femillis. His enim quia solennis spontanea sanguinis per vterum emissio, huius successum, nunquam fere non vrgent morborum artifices, & sanguinis missione in pede proritate nituntur. Si forsan occurrat virguncula ægrotans, agens decimum circiter quartum ætatis annum, quo plerumque erumpere solet primum vterina purgatio, in hac prouocanda illico sunt toti. Licet autem in iis, quæ angusta & exilia habent in vtero vasa, ac ceterum natura sunt sensibiliores, difficulter admodum succedere soleat eruptio prima, multaue valetudinis afferre incommoda; pessime tamen sanitati consulunt ii medentur, qui menses mouentibus & sanguinis missionibus, fluxum procurare pertinaciter & vi contendunt. Lenissime enim & circumspecte tractanda sunt tenera eiusmodi corpora, tam medicamentis, quam ipsa venæsectione, quæ, nisi manifesta plethora & vasorum turgescencia poscat, plus erupturi sanguinis effluxum impedit, quam adiuuat. Longe vero melius balnea, inessus a-

qua-

quarum mineralium potus, frictiones, balsamica temperata & potus ordinarius accommodatus, desideratum hunc mensium fluxum eliciunt.

41. MVLTQ magis adhuc, vel conscientiae causa, notandum illud præposterum quorundam molimen, quo, ubi mensium defectus adest, ut hunc restituant, omnibus viribus, reluctante ipsa natura, pugnant. Euenit enim sæpius, ut a puerperio, largiori lochiorum fluxu stipato, a prægresso diuturno succos consumente morbo, mensium profluvii stata periodo, bis, vel ter obseruetur defectus, aut parcior successus. Quod ubi animaduertunt illi plethoram ubique crepantes medici, ad maius, ut putant, auertendum periculum, repetitis venæsectionibus instant, quin quandoque emmenagogis paullo fortioribus, ex radice bryoniæ, croco, sabina, myrrha, baccis lauri, cum vino aut aqua infusis, aut etiam in elixirii formam redactis, nec non balsamicis pilulis, motum simul corporis, quantum fieri potest, validum imperantes, menses iterum emouere conantur; quum tamen potius imbecillia eiusmodi, succis bonis viribusque exhausta, ac malis ex vacillante digestionem succis referta corpora, clementioribus laxantibus, stomachicis temperatis & iusculis nutrientibus fuissent excipienda. Vnde non mirum, ex præpostera eiusmodi medicatione, miseras in longe maiorem coniici miseriam, in cachexiam, lentas febres, quin ipsam hæcticam funestam. Nos certe nouimus complura, veritatem hanc, licet odiosam, confirmantia exempla, e quibus etiam est, quod in femina, tenerioris & debilioris constitutionis, vidimus. Profuderat hæc post partum sanguinem largiter, cum tanta virium prostratione, ut nec caput, nec corpus, sine metu animi deliqui erigere posset. Periit postea appetentia, successit lenta febris & calor cum ventris torminibus, simulque elapsis sic aliquot mensibus, substitit, ob sanguinis inopiam, mensium fluxus. Ad quem reuocandum, instituta aliquoties sanguinis missio & datæ pilulæ sic dictæ balsamicæ, eo cum effectu, ut virium decrementum incretaret, febris purpu-

rea & petechialis succederet, & hac depulsa, hectica presso pede obreperet febris, ac intra mensis spatium, sanguinem cum ipsa vita absumeret.

42. NON leuiores sunt intempestiuæ venæsectionis damna, iis in morbis, qui ex imminuta, aut restitante plane veterina purgatione, sensim succrescunt & diu extrahuntur, chlorosis, cachexia, virium & appetitus prostratio, lentus calor, cum atrophia. Enimuero primordia horum morborum ex menstrui fluxus vitio repetenda esse notum est quidem ac certum. Neque etiam negandum, venæsectionem, mature & circumspecte administratam, interpositis aliis congruis remediis, egregie prodesse. Sed quando res eo deuenit, ut elapso iam aliquot mensium, aut longiori temporis spatio, infectis magna labe humoribus, atrophiciæ phthisicæ & hecticæ sit suspicio, cum eminentiori virium defectu stipatæ; perperam ad primam illam causam dirigitur medicatio, ac ut menses extundantur, iterata adornatur in pede venæsectio. Nam hac methodo fieri aliter nequit, quam ut malum præsens increseat, & consumptis cum sanguine viribus, mors acceleretur. Atque etiam sic omnino euenire, testatur experientia, qua nouimus, complures feminas, ob impensum diuturnum animi moerorem & angorem, incidisse in insuetam ipsis mensium difficultatem, sanguinem misisse, eoque adeo debilitasse stomachum, ut vomitu reiecerint omnia; sedato vomitu, successisse dein erraticam febrem, cum quotidiana quadam intermissione, mensibus tum penitus retentis, ut redirent, iterum venæsectionem admisisse miseras, sed peius habuisse, & lentam febrem, in phthisin & hecticam veram degenerantem, incurrisse, cum vitæ iactura. Quare firmiter omnino, ceu practicum axioma, tenendum inculcamus: in lentis feminarum febribus, multo magis hecticis ipsaque phthisi, licet ex mensium defectu primam traxerint originem, menstrui fluxus per venæsectiones aliaque remedia reuocationem, nunquam esse moliendam.

43. EADEM ferme ratio illius feminis adeo frequentis passio-

passionis hystericae, quæ vniuersum neruofarum partium systema male afficit & multis grauibusque symptomatibus stipatur. Nam huius quoque incunabula ex deficiente sanguinis superflui per vterum excretionem; atque etiam si recens malum est, sanguinis missio, cum iudicio adornata, præsidio est egregio, tanto magis, si ipsius operatio postea medicamentis roborantibus, sanguinis spirituascentiam & circulationem liberiores promouentibus, secundetur. Ast, si iam anno, aut longiori tempore, firmas egit radices & in feminis porosi corporis habitus eo processit, vt a magna stomachi inflatione syncopes, facies pallida, cordis palpitaciones, artuum tremores & quæ alia grauitatem mali indicantia pathemata, accesserint, vena secanda cautione summa, ne, vti sæpius, si inconsiderato fit, accidit, symptomata aliquantisper inducias dare visa recrudescant, sed potius thermalium aquarum potu & balneo, iunctis balsamicis, medicatio perficienda.

44. Quæ omnia sicuti de feminini sexus ex mensium vitio morbis vbertim constant; ita non minus obuia medica peccata, quæ in virili sexu, ex præiudicio de salubritate hæmorrhoidali fluxus, subinde committuntur. Eadem autem tenenda de his, quam quæ modo inculcauimus. Scilicet quamuis in morbis, qui post restituentem consuetum hæmorrhoidum fluxum impetunt, in cachexia, hydrope, tympanitide, atrophia cum lenta febre & virium prostratione, statim ab initio cum coeperunt gigni, proficuum esse potuisset, si vena secta fuisset & usurpata ea, quæ sanguinis cursum ad intestina crassa maximeque rectum placide direxissent; frustra tamen non modo, sed & cum certo damno postea in his quæritur auxilium, quum mala longiori mora inualuerunt & iam insignem viscerum labem introduxerunt. Tacitum interest, vt medicus obseruet opportunitatem & medendi occasionem, qua dimissa, priora, quantumuis egregia præsidia, postea iuant nihil, quin nocent.

45. INPRIMIS seuera censura dignus, pathologicus ille,
qui

qui sectariis multorum animis altius insidet error: hypochondriaci mali originem vnice fere petendam esse ex plethora & sanguinis spissitudine, nec non deficiente hæmorrhoidalis fluxus successu. Quo inducti, ruunt dein in errorem therapeuticum: sanguinem esse subtrahendum, ani stillicidium proritandum & corpus valide mouendum. Ast tot & tam graua a venæsectionis in hypochondriacis abusu damna sæpius notauimus, vt per ipsam conscientiam, peruersam eiusmodi medicationem non possim non, quin ipsam detester magnopere & ab eadem serio dehorter. Enimvero si originem huius passionis dispicimus, naturæ ut plurimum debetur infirmitati, siue natiua sit a parentibus accepta, siue studiorum & animi intemperantia, aut aliis vires attenuantibus contracta. Quæ etiam detinet corpora, bonis succis & sanguine plerumque sunt destituta, ac præterea ipsis illis grauibus spasmodicis pathematibus, animi ut plurimum impotentia ac in moerorem procliuitate stipatis, longe magis adhuc infirmantur. Vnde non mirum est, sic afflictos & iam debiles, crebris venæsectionibus crebrisque per pilulas fortioribus purgationibus, in peiorem valetudinis statum adduci, & succedere maiorem virium languorem, inappetentiam, animi & præcordiorum angustiam, melancholicas mentis turbas, cum pulsu debili & inæquali. Quæ autem circa portæ venam in mesaraicis & hæmorrhoidalibus vasis adsunt stagnationes, neque spissitudini sanguinis, qui emissus plerumque apparet tenuissimus, neque copię boni, cuius magis præsto est defectus, vnice tribuendæ, sed potius virium imbecillitati solidorumque robori deiecto, fluida contenta minus efficaciter propellente; eaque propter liberaliori sanguinis subtractione obfirmantur potius, quam soluuntur. Et illa hypochondriacos in infimo ventre subinde male habentia symptomata, tormina, dolores pressorii ac tensiui a lumbis ad sacrum os excurrentes, quibus quandoque iungitur dolens venarum in ano protuberantia ac humoris sanguinolenti visceri cum tenesmo secessus, effectus sæpi-

sæpius atque producta sunt spasmorum intestina grauius detinentium, quam solius plethoræ indicia.

46. PRÆTEREA vltro quidem largimur, in morbis, qui a sanguine in vasis maxime abdominis stagnante oriuntur, spasmodicis scilicet intestinorum doloribus, vesicæ vrinariæ mictum sufflaminante spasma, indeque pendente dysuria contumaci, nec non doloribus tensiuis dorsi, ischii atque etiam intestini recti, sanguinis missionem in pede vtilissimam esse iis, quorum corpus succis plenum & vasis non adeo minutis donatum. Sed vbi tenerior corporis habitus, vasa exiliora, nec vires adeo vegetæ, idem hoc remedium, licet symptomata primum minuire videatur, curam præstat mere palliativam, ac pathematum atrociam sensim non modo iterum postea succrescit, sed & increscit. Quin, ipsa venæsectio, crebro & intempestiue instituta, ad eiusmodi stagnationes ac inde oriundos morbos disponit, tanto certius, si corpora imbecillia sunt atque tenuia. Etenim illæ sanguinis & humorum stagnationes, non semper a copia ipsorum pendent, sæpe potius a deficiente vasorum vi motrice, progressum humorum seruante, quam vero sanguis nimium subtractus magno pere labefactat. Vehementer igitur delinquant ii medici, qui in hisce morbis nonnisi ad sanguinis abundantiam, quæ tantum particularis ob deficientem ibi virtutem motricem est, medicationem venæsectione dirigunt, non vero, vt roborantibus ac diluentibus solidis robur reddant propellens, ac liberum & expeditum sanguinis procurent com meatum, quo tamen omnes hæ passionēs quam optime aut penitus tolluntur, aut minimum multum leuantur.

47. NEQVE hac occasione reticendum, crebram inconsulto institutam venæsectionem, corpora ad affectus subcutaneos, & qui ex feri acrioris impuritate fiunt, reddere disposita. Nostro hoc tempore inter exanthematicos hos morbos maxime frequens est purpura, quæ vario colore, maculis ac pustulis etiam subinde prodit non modo sola, sed & aliis morbis complicatur, ac insuetis plane grauibz symptomatibus

(Hoffm. Opusc. varii argumenti.)

Qq

vt

ut stipentur, facit. Causam autem huius frequentiae nullam aliam subesse autumo, quam quotidianum intemperatum, calidorum potuum, maxime ex fabis coffee vsum, cum sanguinis missionibus, iam nostris plus quam septentrionalium regionum incolis familiaribus. Illis enim calidis potibus sanguinis & humorum massa multis heterogeneis, salino-alkalinis, ex parte empyreumaticis, inficitur particulis, & calor ipse motum intestinum intendendo in corporis succis alienas multas gignit materias, ac praeterea quae insunt subtiliores reddit simulque deteriores. Venæsectiones autem crebriores in omnibus fere, debilioribus & feminis maxime, sedentariae vitae sub potu parciori diluente addictis, sanguinis ad capillaria subcutanea vascula affluxum minuendo, perspirationem impeditiorem, ac ut retineantur illae sordes, faciunt. Cui, si accesserit alui segnities, magis adhuc inquinatur humorum massa, nec mirum, conflare sic fermentum quasi exanthematicum, demum prorumpens morbumque inducens. Idem vero etiam cum aliis cutis defœdationibus succedere, ipsius experientiae fide constat. Noui in corporibus a febre chronica reſtitutis, adhuc tamen languentibus, instituta æquinoctii tempore sanguinis missione consueta, erupisse breui post per omnem ambitum vlcera & abscessus tetros, quorum coactis, recrudescente sæpe exulceratione, medentibus multum faceſſiuit negotii. Ratio huius in procliui est: febrili quippe intestino motu diu perseuerante, ipse sanguis in tenue, impurum, salsum serum est resolutus, simulatque solidorum robur morbo ita attritum, ut fordium genitarum per conuentia emunctoria non rite perfici potuerit excretio. Detracta dein per venam sectam adhuc sanguinis parte, reliquus intus contenta ætherea elastica materia, facto spatio, impensius agiratus, utique plus in serum impurum est dissolutus, quod retentum pariter, exclusit materiam inducendæ scabiei aliisque cutis defœdationibus idoneam.

48. QVOD si etiam iam in corporis succis præsto est eiusmodi materia sanguinis mixtioni & nervosis partibus infecta,

sta, eaque propter extus pellenda, podagrica, arthritica, erysipelacea, purpuracea, variolas & morbillos faciens, cum venæsectione mercandum est cautissime. Quando enim vasa repleta sunt sanguine crasso, in quo genuina plethoræ missionem vrgentis continetur ratio, neutiquam sub initium statim, si vena pertunditur, nocet, sed potius inimicæ illius materiæ ad corporis ambitum secessum adiuuat. Verum si venæ plus sero sanguineo, quam ipso consistente sanguine sunt oppletæ, viresque imbecilles, sanguinis subtractione nihil est deterius atque nocentius. Hoc etenim facto impeditur excretio, ac potius retrocessio fit materiæ, quæ ad interiores nobiliores exquisitioris sensus partes delatâ, suscitât ibi pathemata ac damna grauissima. De quo obuia passim sunt exempla, facile recensenda, si tempus ferret & occasio. In primis de purpureo exanthemate est in comperto, id difficulter penitus eradicari, sed relinquere quasi fermentum, quod reuiuiscens, crebro morbum inducit eundem. Interim si placida ipsius ad cutem fit emissio, & debito regimine excipitur, vacat periculo & postea redit sanitas; si autem præposterâ sanguinis missione, illud retinetur exanthema, atrocia symptomata, melancholici, maniâci & apoplectici insultus ac suffocatiui catarrhi cum conuulsiuis quandoque motibus, succedunt, tanto certius in tenerioribus ac animo mobilioribus.

49. MITTO iam turbulentos illos sanguinis motus & perniciosas sanguinis congestiones inflammatorias, quas venæsectio, liberalius iusto minusque opportune instituta adducere valet, de quo noxio effectû sanguinis missionis, non in vno, sed duobus locis adornatæ, tres consignauit obseruationes HILDANVS *cent. VI. obs. XCII.* Is autem non prætereundus venæsectionis abusus, qui subinde committitur in iis, qui pathematibus spasmodicis, conuulsiuis & epilepticis detinentur. Recte enim iam pridem dixit HIPPOCRATES: spasmos & conuulsiones non tantum a repletionem fieri, verum etiam ab inanitione. Quæ posterior causa ubi subest, hic morbus non ex nimis aucta sanguinis bene consistentis copia, sed serosi

potius atque attenuati nimium vitio accidit, pertusa vena, nunquam non augetur & contumacior redditur.

50. CETERVM in genere de venæsectionis in ipsum sanguinem effectū, inter omnes, qui rationem sequuntur ducem, est pro certo: post eam relictum in vasis cruorem magis attenuari, eo quod particulæ aëreo-elasticae, quæ nunquam non in ipsius sinu hospitantur, mole nimia antea compressæ, facta ventilatione, in vacuum cedunt locum, sese expandunt & irrequieto suo motu sanguinem interfluum agitando, crassiores moleculas discerpunt, attritu attenuant eoque maiorem ipsi conciliant tenuitatem. Vnde, nostra quidem sententia, vix certior sanguinem mittendi est indicatio, quam ubi viscidus is & crassus comparet, a colore obscuro veteribus dictus atrabilarius, qui in aqua multum substantiæ gelatinosæ dimittit, cuiusque serum mox post emissionem in offam supranatantem densatur. Sic enim comparato sanguine, utilissima ipsius missio, tum ut tenuior reddatur atque fluxilior, tum etiam ut eo promptius circumagi & solidis robur foenerare possit. Contra ea, si sanguis iam tenuis nimium est atque serosus, ac deficientibus moleculis solidescantibus, plus aeris, quam sanguinis venis inest, ipse quoque sanguis emissus & frigefactus respuit coagulum, venam secare damnosum est atque perniciosum. Quam ob rem atro merito carbone notandus ille nonnullorum passim obuius practicus error, quo nimium sanguinis, per tussim, sputum, narium, vteri, aut ani venas, fluxum, iterata sanguinis, non bis, sed vel quinquies & sexies intra mensem subtractione, cohibere nituntur. Nam licet profluvium ad tempus conquiescat & pallietur quadantenus, neutiquam tamen tollitur, sed sanguis inde tenuior factus simulque imminuta perspiratione acrior, eo magis per apertos tubulos exitum affectat & malum vehementia recrudescit maiori.

51. SED nolumus diutius immorari enumerandis hisce tædiosis medicorum delictis; præsertim quum iam passim in variis scriptis hæc cum aliis perstrinxi, maximeque in *dissert. de imprudenti medicatione multorum morborum causa*, nec non

non ea, quæ de medicis morborum causa, inscribitur. Subiiciemus potius, tantum ex pluribus vtilissimas cautelas, ad euitanda damna in suadenda venæsectione seruandas.

I. Magis proficua est sanguinis subtractio carnosio corporis habitu præditis, quam obefis ac pinguibus. Hi enim vasa exilia habent & progressus humorum lentus & perspiratio est impeditior; hinc quam facile a copiosa sanguinis detractio tam celerem animi patiuntur defectionem, quare potius alia via exsuperantes succos educere oportet; iuuat potius hunc in finem scarificatione & leni laxante humorum abundantiam minuere: in carnosis autem longe turgentiora sunt vasa, ampliores canales, magnum cor, quod vasorum amplitudini respondere solet, apparent; quare confidentius macilentioribus sanguinem etiam in copia mittere possumus.

II. Errorem committunt, qui artes operosas exercentibus plus sanguinis subtrahunt, quam sellularias tractantibus. Motus enim & exercitatio corporis ipsis quotidiana, ad iustam quantitatem sanguinis in corpore seruandam, & nimiam absumendam, iam est sufficiens. Sanguinis autem missio, vires labefactando, eosdem ad labores reddit minus aptos.

III. Perperam instituitur venæsectio, vbi primæ viæ vitiosorum succorum colluie scatent. Hac enim facta, sordes sanguinem subeunt ac retinentur facilius, ob imminutam ipsam ventriculi & intestinorum vim expultricem. Quare consultius est, præmittere sanguinis missioni ea, quæ aluum blande ducunt & canalem intestinorum a sordibus liberant. Nil tamen est deterius, quam in crasso sanguine turgidis impetuosas ac vehementes per inferiora, vel superiora moliri purgationes, quibus sanguis exagitatus, cum impetu ad incongrua loca propellitur, consequentibus morbis grauissimis.

IV. Neque etiam in senibus reformidanda sanguinis missio. Sunt enim inter illos, qui appetentia integra laudabili victu vsi, sanguinis maiorem, quam par est, in vasis colligunt quantitatem. Vnde in senili ætate interdum magis ne-

cessaria, quam alia, ad morbos grandævis familiares arcendos ipsamque mortem aliquamdiu protrahendam.

V. Cum sanguinei temperamenti corpora etiam multum inter se differant, dum alia carnosiora, robustiora & maioribus vasis instructa, alia vero teneriora, cum valde exilibus & angustis vasis, atque in illis pulsus plenus & magnus, in his autem debilior, oportet etiam medicum hoc discrimen in sanguinis missione instituenda attendere, quia in illis venarum apertio plus utilitatis & securitatis, quam in hisce habet, si e.g. mensium ita, ut vel hæmorrhoidum, sive fluxus substituerat, non semel, sed aliquoties brevi post venam sectam in corporibus plenioribus sanguinis fluxum fuisse restitutum observauerimus.

VI. Summa prudentia ac iudicio opus est, ut iusta & corpori proportionata sanguinis quantitas emittatur. Quare illud monendum ducimus, quod nimia sanguinis copia si fuerit detracta non sufficiens satis ad partes inflammatione adfectas perveniat, quod ut humor eccentricus de sede sua non dimoveatur, sed corruptionem & sphacelum parti adfectæ minetur. Nam sicuti inflammationibus sanandis nimia sanguinis quantitas nocet, ita etiam exigua eius portio est iis adversa. Rectissime monet CELSVS *Lib. 2. Cap. 10. in sanguine mittendo vim corporis melius ex venis, quam ex ipsa specie æstimari; & porro ibidem ait: si materia vel deest vel integra est, istud alienum est, nullo modo melius succurritur. Et vehemens febris, ubi rubet corpus, plenæque venæ tument sanguinis detractio- nem requirit: item viscerum morbi, nervorumque resolutio & rigor & distentio quicquid denique fauces difficultate spiritus strangulat, quicquid subito supprimit vocem; quisquis intolerabilis dolor est & quacunque de causa ruptum aliquid intus atque collisum est: item malus corporis habitus, omnesque acuti morbi, qui modo non infirmitate; sed onere nocent.* Qua propter in definienda ea exacta habenda est ratio ætatis, sexus, corporis habitus pulsus, vitæ generis, consuetudinis, morbi ipsius maximeque omnium virium.

DECADIS SECVNDÆ

DISSERTATIO I.

DE

BALSAMO PERVVIANO.

§. I.

NVLLVM gratius, & quod maiori suauitate sese commendet, nomen occurrit in foro medico, quam balsami. Quiuis siue chirurgus, siue medicus sit, ad eius mentionem mox singularem efficaciam & virtutis medicamentosæ spem sibi promittit & concipit; qua de causa euenit, vt in more habent medici, generosa & magnæ virtutis, quæ ad conciliandam gratiam & famam præpararunt remedia, balsami vel balsamici titulo exornare & commendare. In vulgus enim notum est, balsamum vel balsamicum tale quid audire, quod fraganti & suauissimo, odore nares reficit, & insuper omnem labem ac corruptionem a corpore avertit: nemini enim est ignotum, animantium cadauera ad putredinem summe procliuia, balsamo diu conseruari, & a corruptione defendi posse. Neque de nihilo est tanta balsamorum æstimatio. Ex omnibus enim vegetabilibus non datur aliquod præstantius, quam succus talismodi oleosus, suauissimi ac penetrantis odoris ac virtutis, qui ex certis arboribus elicitur, vnde merito rex & princeps vegetabilium talis balsamica arbor dici meretur. Sicuti vero sanguis inter animantia est nobilissimus ille liquor, qui vitæ & omnibus actionibus corporis præest, a quo totum corpus calorem, robur, incrementum & conseruationem sortitur; ita succus, qui per cortices fertur, vegetabilium sanguis est, & ipsorum pretiosissima pars, a quo vegetatio ipsorumque omnis, medicamentosa virtus duci ac æstimari debet.

2. Ex

2. Ex eo iam facile apparet, quod succus vegetabilium quo puriori & suauiori resina & oleo pollet, eo maiores obtineat laudes, maioremque custodiat efficaciam. In tota enim rerum natura nullum principium maiori donatum est agendi potentia nullumque eximiores virtutes atque affectus prodit, quam quod inflammabilis est indolis & sulphur seu resina & oleum audit, hoc mixtis non modo calorem, odorem, sed & vires ac spirituascentiam elargitur, & præcipuarum operationum fons ac fundamentum est. Non immerito itaque peritiores medicorum a multis retro temporibus ipsa balsamica, quæ suauis, naturæ amica liquida resina constant, ad sæuissimorum morborum ferociam edomandam nullo non tempore maximi fecerunt. Inter ea iure meritoque palmam obtinuit & adhuc obtinet, balsamum sic dictum Peruvianum, omni tempore a medicis & chirurgis celebratissimum. Et quum cogitatio animum subiret, de nobilissimo hoc simplici inter tantam farraginem nihil huc usque scriptum, quod ex instituto eius originem naturam & vires pertractet; non dubitauit haud inutilem laborem fore, in præsentem materiam hanc paulo exquisitius excutere & fusius ventilare.

3. ANTEQVAM ad scopum ipsum accedamus & balsami Peruuiani naturam & vires decenti scrutino medico persequamur, e re fore nostra iudico de origine huius nominis eiusque varia acceptione quædam præmonere. Plures sunt qui hebraicam eius originem esse asserunt, dum balsamum a Baal seu Bal, quod dominum significat, & Samen quod pinguedinem seu oleum notat deriuant, adeo, vt balsamum, pinguedinum seu oleorum princeps audiat. Alii malunt, hanc vocem esse orientalem, quoniam balsamum in linguis orientalibus princeps aromatum significatur. Nihil hoc loco addimus, quam vt nomen ipsi rei correspondere asseramus, quoniam tantum excellentissima olea ac sulphura balsami titulo superbiunt. Equidem perperam vulgo aliis rebus hoc eximium nomen assignarunt, dum apud pharmacopolas

las linimentum omne ex variis fragrantibus concinnatum, balsami nomine ornant. Hinc balsami rosarum, apoplectici cinamomi, nomina vsitata sunt. Deinceps, compositi quidam spirituosi liquores ex gummatibus resinis & oleis fragrantibus, cum spiritu vini extractis vel destillatis, nomen hoc accipiunt, vnde surgunt nomina, balsami neruini & balsami vitæ. Ipsi quoque chymici non veriti sunt, hoc nomen suis præparatis affigere, dum vel salia fusa aut liquata, vel sulphura mineralium oleis destillatis extracta, balsamorum titulis insigniunt. Nobis balsamum non est artificiale compositum, sed naturale quoddam simplex, ex vegetabilium familia oriundum, oleosum & inflammabile, consistentiæ fluidæ crassiusculæ, odoris fragrantis & virtutis mirabilis. Tale hoc proprie & κατ' ἐξοχὴν balsami appellationem sortiri debet, & hoc iam commode de balsamo de Tolu, Copaiba, styrace liquida, & maxime Peruuiano prædicatur.

4. BALSAMORVM nostra appellatione sumtorum varia genera antiquis fuisse cognita, & ab ipsis propter egregium vsum maxime æstimata, is credit, qui veterum monumenta paulo attentiori animo versat atque manu euoluit. Inter alia iam ante Christum natum in orientalibus regionibus celebratum, & sancte pro vfu asseruatum fuit balsamum quoddam, quod nostro tempore balsamum orientale & verum dicitur. Non levis hinc nata fuit controuersia inter genuinos rerum naturalium perscrutatores, quale balsamum fuerit, quo Ægyptii, Syri & Iudæi ad balsamanda corpora & ad medicinam vfi fuere, num hoc balsamum adhuc nostris temporibus cognitum sit & vsitatum nec ne. Sunt qui existimant post excidium Hierosolymæ in Iudæa, balsamum verum non amplius exstitisse, quale quid prodidit EVONYMVS. At vero præter PLINIVM & GALENVm, qui post excidium hoc scripserunt, ipse SOLINVS gravissimus auctor, TRAIANI tempore viuens Cap. 43. *Polyhistoris* balsami existentiam confirmat post Christum natum his verbis: *In Iudæa tantum balsamum nascitur, quæ sylua intra terminos XX. iugerum usque ad victoriam no-* (Hoffm. Opusc. varii argumenti.)

stram clauderetur. At cum Iudæa posui sumus, ita loci illi propagati sunt, ut iam nobis latissimæ colles fudent balsama: similes vitibus stirpes habent, malleolis digerunt, rastris nitescunt, aquis gaudent, amant amputari, tenacibus foliis semperno adumbrantur. CORNELIUS TACITVS lib. V. eundem in modo scribit: *exsuperant in Iudæa fruges nostrum ad morem, præterque eas balsamum & palmæ, balsamum modica arbor.* Hanc balsami autem plantam periisse THEOPHRASTVS & MONARDVS scribit, hic multis, inquit, iam annis periit id balsamum quod in Ægypto nasci solebat, nec usquam gentium amplius inuenitur. Huic autem contradicit CLVSIVS in *Exoticis*. lib. X. cap. 9. de Balsam. p. 304. scribens: *falleris MONARDE, nam Arabia felix, quæ sola balsami plantas sponte nascentes ab omni ævo protulit ac etiam nunc profert, legitimum balsamum præbet.* Aliud quidem Ægyptus loco quodam Cairo vicinus, quem Matharia appellant, nunc etiam opobalsami frutices alit, sed ex Arabia semper petitur, quemadmodum olim Iudæa habuit. Tale quid etiam affirmat BRASAVOL. in *Exam. simplic.* p. m. 396. BVSBEQ. de *legat. Turc.* ep. 4. NICOL. CHRISTOPH. RAZIVIL in sua *Hierosol. peregr.* p. 177. SCALIGER *Exercitat.* 157. qui CARDANVM balsamum desuisse & in paruo esse pretio aientem vanitatis arguit.

5. DESCRIBITVR autem hæc planta, quæ balsamum orientale, quo vsi potissimum sunt in regum inunctione, fundit, a BOCHARDO in *Tract. de Terra Sancta* P. II. c. 5. hæc tradens: *Inter Heliopolim & Babyloniam medio fere loco est balsami hortus, in festo Michaelis lignum satis humile existerat, scilicet palmæ & dimidiæ in altitudine habens folia paruula ut ruta sed parum albiora, & de ligno mecum detuli.* Inter notas autem & characteres, quibus hoc dignosci possit, celebrantur penes fide dignos auctores primo ut planta hæc resinifera perpetuo vireat, postea magnitudinem habeat pedis longitudine ex pollicis crassitie, duorumque aut vel trium cubitorum altitudinem, ramulos multos & graciles obtineat. Deinde addiunt eiusdem esse hanc plantam cum vite naturæ, quam

lin-

singulis annis amputare necesse sit, ne degenerent, cortex viridis est, folia viridia lentiscinorum foliorum modo formata, nonnulla minutiora aut rutæ faciem præ se ferunt, cortex digitis tritus valde odoratus est, saporis pinguis & aromatici, instar thuris lignum candicat, odoris saporisque expers, hoc vocari solet Xylobalsamum.

6. HÆC planta nunc potissimum Ægypto apud Cairum colitur, qua de re omnium optime & studiose scripsit PROSPER ALPINVS excellentissimus æui sui botanicus, qui per nouem annos ceu medicus clarissimus Venetorum claruit, vbi medicorum tam Ægyptiorum, qui Hebræorum auxilio plantam penitus indagare, modumque colligendi Opobalsamum, notasque veri Carpobalsami, Xylobalsami addiscere potuit, quod in suo libro *de Plant. Ægypti Cap. 14.* de se ipso testatur. Et multo clarius in suo *de Balsamo* dialogo, quod cum Appella Arabe & Abdachim Hebræo medicis in examen vocat, in quo omnes propositi negotii difficultates tam clare & perspicue soluit, vt veritatis amanti nullus amplius superesse possit scrupulus.

7. DEINCEPS arbor balsami orientalis flores fert paruos & albos in vmbellæ formam compositos, quinque foliis obrotundis constantem, floribus acaciæ proximos. Ab hisce semina promanant flaua, folliculis nigris filiquosis obrotundis, magnitudine vnus digiti fusci inuoluta subrubentibus contenta, valde odorata, intus humorem flauum melli similem habentia, sapore amaro, parumque acri, linguamque ferientia Opobalsamum redolentia, sicut præclare tradit WORMIUS in *Museo* 223. Quod preiosissimum illum liquorem colligendi modum attinet, qui Opobalsami nomine venit, notandum est, mensibus æstiuis desinentibus vmbriis luna plena incidendum esse corticem ad medullam vsque, ita liquor exstillat, qui in vitrea vascula excipiendus. At vero non possumus hic fidem adhibere ipso RAYO, qui scribit, spatium trium horarum duodecim huius liquoris libras effundi, cum arboris magnitudo exigua contrarium potius suadeat.

In eo autem omnes, qui balsami huius naturam & originem inuestigarunt, consentiunt, quod liquor ille, qui emanat, primo albo colore tinctus conspiciatur, & liquidior sit, mox paucis diebus in viridem mutetur olei crassitie, demum post aliquot annos aureus & mellis consistentiæ fiat, & instar terebinthinæ crassescat.

8. PORRO dicunt quoque primo tempore turbidum esse crassumque uti oleum statim ab oliuis expressum, postea clarum fieri & tenuem, demum crassescere & sub aqua mergi, cum primum propter leuitatem ascendat, & supra totam aquæ superficiem expandatur. Scribunt quoque de eo, quod primis diebus acuti & validissimi sit odoris, ut aliquibus inter odorandum sanguinem e naribus eliciat, qui grauis odor cum tempore pereat & gratior sit & fragrantior. Sapor est acris, amaricans & paululum adstringens. Notatu quoque dignum est, quod aliqualis coagulatio lactis ab eo infuso perficiatur. Probe notat celebris scriptor Gallus du POMET in *Traité de Drogues* p. 275. quod hoc balsamum sit rarum, pretiosissimum & in Matharia magnoque Cairo, ubi in hortis crescit & maxime colitur ac defenditur, rarius obtineri possit, nisi per legatos Turcicos, quibus ceu munus offertur. Vnde porro addit, adulteratum esse, quod vulgo venditur pro vero balsamo, & nihil aliud esse, quam balsamum Peruuianum cum storace & benzoe permixtum. Confirmat hoc assertum CLVSIVS in *Monard.* p. 103. qui eius unciam modo viginti modo decem ducatis vendi scribit. Quocirca hodiernum, quod venditur & inclusum est nucibus Coccis pro Opobalsamo, artificiale est. Qui plura de hac materia legere vult, euoluat elegantissimum tractatulum VOLCAMERI, *de Examine Opobalsami* editum.

9. ACCEDIMVS nunc ad balsami Peruuiani originem indagandam, quod nostræ potissimum considerationis est. De eo scribit celeberrimus æui nostri botanicus RAIVS ex *Pisone* in *Hist. Plantar.* p. 1757. Quod arbor sit mali medicæ magnitudine, foliis amygdali maioribus tamen rotundioribus & magis

magis acuminatis, floribus pentapetalis, in extremis ramorum flagellis luteis, initio loculorum oblongorum forma, sed procedente tempore quorundam veluti foliorum cæteris latiorum. Arbor est siliquosa, siliquis breuibus in singulis semine contento. In America & quidem Hispania noua & Mexo crescit, vnde etiam Americanum, Mexicanum audit. Cortex contusus suauissimos dat glabulos aliaque multa. Lignum eius singularem in ædificiis præbet vsum.

10. CÆTERVM MONARDVS fidissimus rerum exoticarum scriptor de arbore huius balsami scribit: quod contineatur in America, vastæ sit magnitudinis, ad radicem vsque ramosa, duplici cortice, septa, altero crasso suberini modo, altero tenui interno, materiam arboris complectente. Ex eo, quod inter vtrumque corticem est, spatio, incisione balsamum educitur. Fructum dicit esse ciceris aut pisi grano non maiorem, in extrema siliqua angusta, digitum longa, alba, tenuitate regalis simplicis. Depinxit PARCKINSONIVS pro balsami Peruuiani arboris fructu, siliquam longam, angustam, quæ balsamum Peruuianum, aut benzoinum adeo odore referebat, vt sibi plane persuaserit, eiusdem arboris fructum esse.

11. QVOD attinet ad modum colligendi balsamum, hic duplici ratione vel per incisionem vel per coctionem peragitur. Incisio fit cultro, quouis annuo tempore, post imbres serenitate aeri restituta, luna plena, & vt perhibent eum in modum, discinditur nempe vterque cortex, tunc emanat liquor tenax, subalbidus, limpidus, terebinthinæ consistentiæ, saporis acriusculi, aliquantulum amari, odoris fragrantissimi. Et hoc dicitur Peruuianum balsamum album, estque rarius & carius nigro: nigrum autem quod ad nos magna in copia adfertur, decoctione extrahitur, videlicet referente CLVSIO *Comment. in Monard. p. 302.* ramos atque etiam truncos arboris assulatim & minutim concisos, in lebetem amplissimum iniiciunt, multa insuper affusa aqua, bulliunt omnia & feruent, quantum satis esse putant, igne sublato frigescere sinunt, & conchyliis o-

leum supernatans colligunt. Id vero est, quod in has regiones inuehitur, & quo vulgo utimur, ex nigro rubente, odoris suauissimi. Vasculis argenteis, vitreis, stanneis, aut fictilibus vitratis asseruatur, omnem aliam materiam penetrans. Ex quibus patet, balsamum Peruvianum esse vel album vel nigrum, & binas has species ex vna arbore provenire, parandi tamen modo differre. Nam album stillat ex arbore ad medullam usque perforata instar olei terebinthinæ, & longe præferendum est balsamo nigro, quod coctione paratur, ubi nonnullæ particulæ volatiles auolant.

12. DIFFERT autem hoc nostrum balsamum tam nigrum quam album a balsamo sic dicto Copaiba. Duplex hoc nobis apportatur, quale vnum liquor est limpidus, stillans ex arboribus Americanæ Copaiba dictæ ad medullam usque perforatis odoris fragrantis & gratissimi saporis acriusculi; alterum vero crassioris instar therebinthinæ est consistentiæ. Discrimen autem hoc dependet ex diuerso colligendi tempore. Illud enim cum statim post arboris incisionem primo effluit, est admodum clarum, album, odoris resinosi. Hoc autem quod sequitur, magis aurei coloris & consistentiæ tensioris est, quæ consistentia ipsi balsamo nomen conciliauit. Vltimum hoc balsamum, magna in copia in lagenis ex Portugallia ad nos perfertur: alterum autem tenuius magis rarum est.

13. TANDEM discrimen quoque inter nostrum balsamum & sic dictum Tolutanum. Existimant nonnulli balsamum de Tolu & balsamum Peruvianum album esse idem, falluntur autem in eo, differt enim arbor, differt etiam natale solum. Arbor pino est similis & folia ceratiæ faciem obtinent, semper virent, ramos quaquauersum spargunt, teste RAI0 in *Historia Plantarum* p. 1759. Locus ubi crescit est prouincia Hispaniæ nouæ, inter *Carthaginem & le nom de dieu sita*, Tolu indis dicta. Incisione etiam exstillat ex arborum corticibus, coloris est aurei saporis dulcis, grati, & non nauseabundi, limoniorum fragrantiam quodammodo refert, si pauxillum in vola manus fuerit fricatum. Rarius est in Gallia, in Anglia

Anglia autem ordinario reperitur, unde ad nos in consistertia sicca aduchitur.

14. QVOD saporem balsami Peruviani attinet acris est, paululum amaricans, utpote subtili acredine irritatiuæ, papillas linguæ nerveas afficit. Subsimilis sapor in corporibus resinosis præsertim liquidis obtinet, qualis deprehenditur in terebinthina, strobilis pini, resina ligni quaiaci, tam ea, quæ coctione cum aqua quam spiritu vini rectificatissimo extrahitur, resina ladani, storacis, in storare liquida, essentia ligni aloes, deprehenditur. Tenuis est hæc acredo, testatur sal quoddam volatile acidum cum oleosis particulis intime esse nuptum. Notum enim est, non tantum ex analysi chymica, sed & ex compositione, resinas ex oleo fluido æthereo & tali acido tenui esse conflatas. Unde oleum quodvis æthereum destillatum permixtum cum spiritu nitri concentrato in magma resiniforme abit, quod subtili acredine ipsam linguam petit & afficit.

15. ODOR balsami Peruviani est suavis & fragrans indicio sulphuris & olei volatilis ætherei probe temperati. Recte enim a chymicis odor petitur a sulphure, & quidam eius suauitas a mixtura earum partium, quæ sulphur constituunt, temperata & proportionata. Fætor a mixtione intemperata, & proportionem discedente. Notandum autem hoc loco est, quod effluvia balsami Peruviani, quæ admoto fortiori calore in cochleari argenteo mittuntur in auras, in nares recepta, in limine arteriæ asperæ tussiculam ordinario quandam mouere soleant, quod etiam aliis resinis, benzoes, resinæ storacis, perfamiliale, in manifestum signum, effluvia hæc tenuissima non esse salis acris & stimulantis expertia. Sulphureum autem, aut oleosum principium, palmarium esse balsami nostri ingrediens, vel sola inflammabilitas abunde manifestat. Utpote non modo in liquida forma, si debita ratione candelæ ardenti obiciatur, flammam probe concipit, verum etiam quando ad siccitatem redigitur, quod fit, si tantummodo arenæ candidæ miscetur, hoc ipsum præstat: præter

præter hoc sulphuream materiam clare demonstrat eius facilis & promptissima dissolutio & intima unio cum spiritu vini rectificatissimo & oleis cunctis spirituosus & destillatis, amice enim coniungitur cum his ipsis, neque olei, neque spiritus vini unionem respuit.

16. Hoc loco autem non prætereundum est, cum cera & cum oleis omnibus expressis balsamum Peruvianum, siue calide, siue frigide mixtura fiat, nunquam velle coire, unde etiam ii perperam agunt, qui inter olea cocta & expressa, pro medico usu, præsertim externo hæc inter se miscent. Contra probe ingreditur balsama illa, quæ ex oleis destillatis composita sunt. At vero auersatio hæc expressorum oleorum & pinguedinum hanc affert utilitatem, ne his ipsis adulterari queat. Falsum enim est, uti nonnulli auctores habent, admixtione olei amygdalarum dulcium hoc balsamum infici. De balsamo Peruviano sic dicto albo, quod in officinis venditur, res clara est, hoc nunquam vere purum, sed perpetuo hoc oleo est adulteratum. Nam lubenter, quod notabile est, olea expressa cum hoc balsamo iunguntur, neutiquam autem cum nigro, quod, uti nos existimamus, citra adulterationem venditur.

17. PLACET hoc loco mentionem quoque facere nonnullarum mixtionum, quas instituimus cum variis rebus; ita nostrum balsamum aquæ infusum fundum petit, plane autem respuit consortium aquæ, dum nullo modo, vehementi etiam agitatione facta, ab ipsa turbatur vel lactescit. Id autem in ipso experimento curiose conspicere licuit, quod extremitas pennæ immissa balsamo Peruviano, eoque imbuta quandoque, vitro aqua repleto inditur balsamum Peruvianum, ægre descendat, sed sub globosa forma, in medio vitri suspensum hæreat, simul ac autem extra aquæ superficiem penna ex aqua educitur, mox decidit de penna & in fundum delabitur. Ratio iis, qui gravitatis naturam cognitam habent, ex physicis & staticis facilis est. Datur tamen medium hoc balsamum intime miscendi cum aqua simplici pura, & hoc est ipse

ipse vitellus oui. Dici vix potest, quam amice inque momento ad superficiale tantum mixtionem, vitellus capiat hoc balsamum, intimeque cum ipso vniatur. Mixtura postmodum hæc aquis indita, per omnia spatia diffunditur & flavescentem turbidum colorem ipsis largitur. Non contemnendus hic in pharmaceuticis modus est balsamum Peruvianum potionibus & mixturis admiscendi.

18. CVM oleo vitrioli rectificato quando miscetur particula balsami Indici, nulla fit efferuescentia, sed tantummodo leni calore color immutatur, & intense ac saturate purpureus ex utroque exsurgit, amboque abeunt in coagulum, quod quando aqua calida affusa sufficienter eluitur, aciditate vitrioli transeunte in aquam, relinquitur purissima solida resina in manu tractabilis sine cohæsione, quæ ad flammam admota perfacile accenditur, & in rectificato vini spiritu soluitur. Docet hoc experimentum, acidum, quod coagulationis causa & auctor existit, nostro balsamo sufficiens deesse, unde liquidum permanet, hoc si adiicitur, stabilem acquirit consistentiam. Fecimus quoque simile experimentum cum spiritu nostro flammifico, hic cum certis oleis iisque aromaticis, intensissimam & lucidissimam flammam vehementer ardentem producit, ad mixtionem autem aliorum oleorum v. g. carui, anisi, terebinthinæ, maioranæ, lauendulæ, mox intensissimam facit efferuescentiam: hic mixtus cum nostro balsamo, non statim efferuescebat, sed mora aliqua interiecta & facta agitatione demum ebullitionem prodebat, ob eam procul dubio causam, quod in balsamo quoddam æthereum oleum latitet, sed viscosis terreis partibus valde sit immersum.

19. TANDEM etiam quædam adiicienda veniunt, quæ variis factis destillationibus annotauimus. Primo enim hoc balsamum cum aqua mixtum & vesicæ cupreæ inditum & destillatum nullum fundebat oleum; aqua tamen de odore quodammodo eius fragranti participabat; nihilominus ea aqua, quæ in vesica supernatans deprehendebatur manifesto odore, sapore, colore etiam aliquatenus flavo imbuta erat. Vi-

(Hoffm. Opusc. varii argumenti.)

Qq

detur

detur nexus iste partium viscosarum, terrearum, olei tenuioris & ætherei, nec non salis acidi, tam arctus esse, ut vaporibus aqueis disiici nequeat. Non enim mirandum est, in chymicis dari corpora, quæ sapore acri, nec non salis acris copia imo volatilis scatent, quæ tamen sub destillationibus humidis nihil de hisce suggerunt. Ita gelatinæ, sanguis animalium, ossa destillata, ex vegetabilibus, zingiber dant aquam odore saporeque priuatam.

20. QUANDOCVNQVE autem intimior hic partium nexus ac vinculum dirimitur ac soluitur, ecce mox alius effectus sese pandit. Fecimus itaque experimentum, & lixiuium satis forte sumimus hocque miscuimus cum balsamo Peruviano, mixturam indidimus vasi argenteo, & subdita flamma, hanc in ebullitionem feruidam coniecimus, ita mox conspeximus, dissolutionem balsami vsque ad dimidium factam, nam saturate flauo lixiuium tangebatur colore, & vapor, qui in coctione emanabat, odorem penetrantem suauissimum exferebat, adeo ut pateat, hac ratione, aquam ex balsamo Peruviano ex vesica destillari posse vna cum subtili oleo præstantissimo. Est enim ea indoles alcalinorum salium, ut contextum viscosarum, oleosarum & resinotarum partium fortiter aggrediantur, dissoluant & oleum acido ac terra ligatum in pristinam volatilitatis libertatem vindicent.

21. VERVM enim vero adhuc longe nobilior modus eliciendi ex hoc balsamo spiritum fragrantissimum mirabilis virtutis prostat, quem primus descripsi in *Annotationibus in Poterium* p. 440. nempe tres partes balsami Peruviani cum vna parte salis tartari exacte trituantur in mortario, affunditur spiritus vini rectificatissimus vel melius spiritus rosarum ad eminentiam quatuor digitorum: extractio fit leni calore, postea destillatio in cucurbita vitrea per alembicum vsque ad siccitatem, ita prodit spiritus, longe suavior & fragrantior ipso balsamo, qui in omnibus neruorum & cerebri affectibus a causa frigida & humida ortis, in omnibus partium neruosarum & glandulosarum nimis relaxationibus, efficaciam vix parem

parem possidet. Relinquitur in cucurbita magma ex crassis viscosis terreis partibus constans, quod volatili oleo suavi penitus orbatum est. Notatu hoc loco dignum est, ipsum sal tartari oleum tenue & suaue a tricis & inuolucris partium viscosarum separare, quod postmodum receptum in spiritu vini calore cum eo sursum rapitur. Eadem encheiresi ex aliis resinis, mastiche nempe succino, benzoe, myrrha, aloes ligno, eduxi spiritus admirandæ virtutis & vix adhuc in pharmaceuticis notos.

22. DESTILLAVIMVS quoque balsamum nostrum sicca via, miscuimus nempe partem unam huius cum partibus duabus, arenæ, mixturam immisimus retortæ vitreæ, & facta fuit per arenam destillatio, ita prodiit oleum ex flauo rubrum, quod aquæ supernatabat, odoris non ingrati paululum empyreumatici, quod in spiritu vini rectificatissimo solutum egregium liquorem neruinum, interne & externe assumendum constituat. Destillatione ulteriori subsecutum est oleum crassius, fundum in aqua petens. Duplex enim oleum in balsamo Peruviano observatur, vnum tenuius & leuius, alterum crassius, potest hoc extemperaneo labore ad oculum demonstrari. Nempe sumatur balsami Peruviani particula, & ferventissimæ aquæ iniiciatur, ita mox videbis, oleum quoddam instar cuticulæ supernatare, sapore penetranti imbutum, crassiorem autem & maiorem portionem in fundum descendere, ex quo patet, non inepte balsamum Peruvianum immisceri posse decoctis, quod adhuc magis ex voto succedit, si particula simul salis tartari additur.

23. Ex hisce omnibus dictis & adductis, abunde elucescere arbitror, balsamum Peruvianum, esse succum resinoso-oleosum arboris ex corticibus & foliis, mediante aqua & igne extractum, qui compositus est ex oleo tenuiori & subtiliori viscosis terreis acidis partibus ligato & intricato. Probe hic est notandum, aquam non addi eum in finem, ut dissolvat & extrahat balsamicam & oleosam arboris partem, utpote hæc nullum habet in id ingressum, sed calor tantummo-

do humidus facit liquationem & fusionem oleosarum & resinotarum partium, quæ in porulis & interstitiis corticis, potissimum arboris subsistunt; liquatæ autem per calorem oleosæ partes, recipiuntur in aquam, quæ si non adesset & sicco tantum calore negotium instituëretur, periculum esset empyreumatis. Nihilominus tamen nostra non est opinio aquam in extrahendo omni destitui virtute, equidem non adoritur ipsum oleum, in partes tamen acres, salinas ius quoddam habet, vnde dum in eas agit, easque in se recipit, vna quoque addncit quasdam oleosas. Exemplo res clara est in decocto ligni guaiaci. Hoc lignum valde est resinosum, & ob copiosam resinam admodum graue. Si eius raspatura fortiter decoquitur in aqua per aliquot horas, & postea hoc ipsum decoctum inspissatur, relinquitur magma quoddam resiniforme, quod saporis est acriusculi, odoris fragrantis, multum ad stomacis resinam accedentis. De hoc sumta particula & naribus excepta, sternutationes insignes, citra tamen capitis imbecillitatem efficit. Hoc tamen dolendum est, ex libra vna ligni, vix drachmas duas posse obtineri, cum tamen vnciæ tres ad minimum eius resinæ, si extractio fiat cum spiritu vini rectificatissimo, haberi possint.

24. EST nempe balsamum nostrum resina arboris liquida. Possident omnes arbores succum quendam, quo nutriuntur, qui vel gummeæ, vel resinosæ naturæ est. Arbores in nostris regionibus substantiam magis gummeam, in præcalidis autem & orientalibus, ob fortem solis æstum, magis resiniformem, adeoque calidiorem alunt. Hic succus nutritivus per intermedium corticis spatium & per ipsa folia fertur vnde vel incisione facta exsudat, & calore externo humiditate absunta in solidiorem substantiam concrescit, coctione autem cum aqua & extractione vel cum spiritu vini facta, ex poris tam radicis quam ligni extrahitur. Quod si autem, uti in aromatibus fit, pars oleosa tenuior præualeat partibus acidis & gummeis, coctione cum aqua & destillatione facta, purissimum æthereum oleum, quod delicatissima & volatilior
istius

istius succi pars est, obtinetur, vnde nulla resina, nullum balsamum liquidum, sed optime oleum ex aromatibus v. g. caryophyllis, cinamomo, nucista, floribus macis, corticibus citri præparari potest. Quaiacum autem & lignum aloës resinam largiuntur, quoniam pars oleosa particulis terreis & acidis magis est imbuta. Dantur autem certa ligna, ex quibus nec oleum destillari, nec resina cum spiritu vini confici sed elegantissimum balsamum liquidum produci potest. Et tale est santalum flauum, cuius limaturæ si spiritus vini rectificatissimus affunditur, & inde emergens essentia leni calore abstrahitur, remanet balsamum perfectissimum, consistentia & colore Peruuiano simile, odore ambram redolens.

25. DICIMVS itaque in nostro balsamo esse temperatam & valde proportionatam mixtionem elementi sulphurei oleosi, tenuis, oleique crassioris viscosioris & salis acidi, quo nulla resina, nullum vegetabile solet destitui. Ex substantia hac oleoso-resinosa & viscosa iam merito omnis virtus, quæ in nostro balsamo latitat, debet deduci, imo non tantum seu principio, vires per experientiam seu a posteriori cognitæ peti, sed & nouæ incognitæ inueniri & detegi.

26. PAUCIS autem hic recenserebimus, in quibusnam affectibus tam internis, quam externis, chirurgis & medicis eximiam opem & leuamen balsamum Peruuianum præstiterit. Vt autem exordiamur ab usu interno, ante omnia in decubitu & defluxione feri & pituitæ, glandularum tumoribus & laxitatibus, neruorum tono deiecto, præsentissimam opem tulit, nominatim vero in gonorrhœa tam maligna quam benigna, vnice hoc balsamum, præmissis purgantibus, idoneum est, molestum hunc affectum tollere, siue eius sola essentia sumatur, siue cum vitello oui in formam electuarii redigatur.

27. IN fluore albo quoque, præmissis per epicrasin agentibus, laxatiuis ex melissa, abrotano, corticibus lignorum, essentia balsami Peruuiani cum tinctura martis ZWOELFERI mixta, in rebelli hoc & molestissimo foeminarum affectu, non omissis quoque externis cum eodem balsamo suffi-

migationibus in vterum receptis, egregium leuamen aliquoties attulit. In nimis feri excretionibus & destillationibus lymphæ per scretum, per tussim inueteratam, per nares, in raucedine, vuulæ relaxatione, essentia succini cum essentia balsami Peruviani mixta, & cum tinctura antimonii acri maritata, nimium illum fluxum ex stagnatione feri & glandularum laxitate ortum, roborando & tonum, restituendo egregie cohibet.

28. PRÆTEREA balsamum hoc mirifica pollet virtute in læsionibus, corruptionibus & exulcerationibus partium consolidandis, adeoque in vlcere pulmonum, renum exulceratione eius vsus circumspæctus mirabilis est. Probe autem hic notandum, balsamum sibi relictum per se esse nimis calidum, vnde cum aliis temperatis peropportune in balsamum miscetur. Huius census est Locotalli, qui ex oleo florum hypericonis, vino Hispanico, fantalo rubro, terebinthina Veneta, & balsamo Peruviano, cunctis debita dosi sumtis conficitur. Vidimus hoc ipso balsamo perfecta phthisi laborantes, & per plures annos grauiter affectos feliciter restitutos, si singulis diebus cum decocto hordei, succo cancrorum fluuiatilium roborato, æstus compescendi gratia drachma semis fuit assumpta & exterius ipsi regioni stomachali eius portio cum oleo nucistæ, menthæ, carui, commista applicata. Continuatio autem, quod probe notandum est, per dimidium anni fieri debet, seruata simul accurata diæta. Potest etiam balsamum pectorale egregium ex eo concinari, si sumantur balsami sulphuris cum oleo amygdalarum dulcium præparati vncia vna, balsami Peruviani in vittello oui soluti, balsami de Copaiba ana drachmæ duæ, olei anisi drachma semis. Et hic balsamus in omnibus pectoris affectibus ipsoque asthmate, nimis excretionibus purulentæ & viscosæ materiæ, diuinas medentibus porrigit manus. In læsionibus & exulcerationibus intestinorum post dysenteriam grauem, idem balsamum Peruvianum vel Locatelli per clysteres applicatum, vel intus etiam assumptum, ad consolidationem, practicis celeberrimis passim

passim testantibus, laudatissimo pollet effectu. In asthmate pituitoso elæosacharum balsami Peruuiani, vel syrupus ex eo factus, balsamicus nobis dictus, egregiam præstat efficaciam. Paratur autem hoc elæosacharum, ita sachari canariensis vncia vna, cum drachma dimidia balsami Peruuiani miscetur. Syrupus autem fragrantissimus & gratissimus, in officinis Brunsvicensibus a magni nominis archiatro Conerdingio introductus prostat, qui sequentem in modum paratur: ad libram aquæ hordei affunditur balsami Peruuiani vncia semis: per balneum Mariæ fit destillatio, vsque dum dimidium prodierit. Humiditas autem in cucurbita relictæ & balsamo supernatans, eiusque oleo tenui imbuta coquitur cum sachari debita quantitate, ad syrupi consistentiam. Sapore hic syrupus gratissimus est, virtute quoque præstantissimus, & certe omnibus, quotquot in officinis prostant, antefereendus: commodissime enim & magna cum gratia, quibusvis portionibus potest admisceri. Extemporaneæ autem parari potest, si sacharo soluto debita quantitas spiritus nostri balsamici, de quo supra facta fuit mentio, adiiciatur.

29. IN affectibus neruorum & capitis, v. g. vertigine, paralyfi, epilepsia, imbecillitate capitis, post discussam apoplexiam cephalalgis grauatiuis a causa pituitosa ortis, soporosis affectibus, balsamum, omniaque ex eo parata, & iam recensita diuinam afferunt opem. Nascuntur hi affectus ut plurimum ex nimia laxitate & tono deiecto membranarum, vasculorum & neruulorum cerebri; vnde circulatio sanguinis debita impeditur & humores pituitosi viscidi accumulantur. Ad tonum itaque debitum restituendum, ad humores stagnantes in motum redigendos, non potest non sale suo tenui acri & sulphure amico, tonico, nostrum medicamentum multum contribuere. Optime autem tali in casu vsurpatur sub forma pilularum, quando extractis vegetabilium amariorum, nec non purgantibus debita in quantitate admiscetur. In omnibus autem affectibus spasmodicis doloribus arthriticis, rheumaticis, hystericis, nec non viscerum contractionibus,

bus, quas largæ sanguinis effusiones quandoque subsequi variis in locis solent, in usu crebriori habui sequentem spiritum. Combinaui spiritum prædictum balsami Peruuiani cum tinctura antimonii acri & spiritu eboris rectificato anatica portione, prodit mixtura spiritus nobilissimarum virium, spiritui Bussiano longe præferendus, qui dictis in affectibus, item præseruationis causa ad quosuis cuiuscunque generis morbos præsidium est generosissimum, triginta vel quadraginta guttulis sumtis. Tandem aduersus scorbutum, ad luem veneram, & ubi humorum coagulum adest, motusque imminutus existit, vires balsami nostri non contemnendæ veniunt. Notum enim est, in hisce refractariis morbis, ea, quæ resina acri stimulante & balsamica, sanguinem & humores fortiter concitante pollent, inter specifica numerari. Extra dubium quoque est siue essentia huius balsami decoctis lignorum admisceatur, siue in forma pilularum adhibeatur, exoptatissimam operationem exinde promanare debere. Tandem etiam in ventriculi & intestinorum vitiis, tono eorum ob spasmi frequentiam deiecto adeoque dispositionem ad tormina colica, ad flatulentiam, vomitum, nauseam, virtus balsami Peruuiani est excellentissima. Hunc in finem ingreditur elixir balsamicum meum & balsamum vitæ, quæ duo remedia intus cum cibis sumta & continuata, præfatis in affectibus, omnique defectu virium & spirituum virtutes, vix ab aliis remediis obtinendas, fouent & sustinent.

30. LVSTRAVIMVS iam nostri simplicis breuiter usum internum & medicamenta huic destinata, præparationes nobiliores candide communicauimus, superest iam, vt pauca etiam verba faciamus de usu eius externo, eoque chirurgico cum satis etiam ille nobilis sit. Nolumus vero esse longiores cum satis abundeque huius vsus chirurgis perspectus sit. Non enim datur excellentius remedium, in omnibus periculosis tendinosarum & nervosarum partium læsionibus, exulcerationibus & contusionibus, hoc ipso, & vix habet simile in omnibus naturæ regnis, maxime omnium autem in capitis

pitis læsionibus, pericranii, membranarum cerebri, ipsiusque cranii vulneribus, & contusionibus, in ipsa quoque trepanationis operatione hoc balsamum solum omnibus palmam præripit.

31. NOTVM est, in partibus sic dictis frigidis nempe membranosis & tendinosiis, quæ a motu sanguinis vitali valde remota sunt, læsiones summe periculosas enasci, quibus conuulsionibus, spasmi, sphacelationes, inflammationes frequenter coniunguntur. Respuunt hinc omnia pingua, inviscantia, poros obstruentia, amant autem omnia balsamica, quæ putredinem avertunt, motumque fluidarum partium internum per earum fibras conseruant. Prout autem diuersus est læsionis modus diuersis quoque rationibus solet misceri & prudentibus applicari. Ita nonnulli miscent cum melle & spiritu vini, qualis mixtura in duræ matris vitio optima. Alii cum vitello oui, thure & mastiche, quod egregie facit ad puris generationem. Alii oleum tartari foetidum & balsamum sulphuris terebinthinatum ipsi iungunt, quod arcet putredinem in antiquis sordidis profundis, fistulosis exulcerationibus & corruptionibus.

32. QUANDO CUNQUE cum essentia balsami nostri miscetur essentia succini, myrrhæ, mastiches, flor. hyperici, vulnerarium præstantissimum elixir paratur, quod vel solum omnia recentia vulnera sanat, antiqua ad incarnationem & consolidationem perducit, putredinem & carnem luxuriantem abigit, cariem ossibus absorbit & recentem carnem progenerat. In gingiuis exulceratis, sphacelosis, scorbuticis idem elixir virtutes ostendit egregias.

33. TANDEM in omnibus doloribus, spasmodicis contractionibus, paralyticis neruorum resolutionibus, vbicunque locorum ipsæ consistunt, nostrum balsamum solutum in spiritu vini rectificato, additis camphora, oleo nucistæ & croco, instar incantamenti dolores abigit, debitumque robur partibus addit, ipsisque egregium solamen affert. Ingreditur quoque balsamum apoplecticum tam ficcum quam liquidum cuius inunctio in temporibus, vertice, naribus & ceruice facta, ab omnibus præternaturalibus sanguinis & feri in capitis &


(Hoffm. Opusc. varii argumenti.)

Rr

cere-

cerebro factis stasibus præseruat, & grauissimis capitis affectibus neruorumque imbecillitatibus interno vsu sic medetur. Ad roborandum imbecillem stomachum, in frigida eius constitutione, in nausea, vomitu, externe cum oleis stomachicis iniunctum, vel emplastris stomachalibus additum, excellentissimi est effectus.

34. TANDEM quoque elegantissimum præbet suffumigium, quod fit, si vel hoc balsamum Peruuianum solum vasi argenteo inditur & carbonibus imponitur; effluvia in nares recepta, coryzam, ori immissa raucedinem tollunt, ano applicata alui fluxum, in vterum autem recepta fluorem album cohibent: postremo ad reficiendos spiritus & ad aeris humiditatem & vappescentiam eius corrigendam non datur excellentior & fragrantior fumus, quam si hoc balsamum cum resina storacis & gummi benzoës in mortario calido miscetur, addito oleo ligni rhodii & cinamomi, fit hac ratione pretiosissima illa massa, quæ vulgariter dicitur Hispanica. Plura iam restarent enumeranda specialiora, sed indigitasse hæc saltem suffecerint quibus sapiens quiuis percommode vti poterit. Coronidis loco addimus hanc vnicam cautelam, vt abstinemus a balsami huius vsu tunc temporis, quando febri-les adsunt commotiones & ventriculus copia bilis repletus est, nec non in statu plethorico, vbi vasa nimium sanguine impuro turgent.



DISSERTATIO II.
DE
TEREBINTHINA.

§. I.

DE therebinthina dicturis primo omnium ipsius therebinthina Græcis dicitur *τερεβινθίνη* Germanis *Terpentin*. Est nempe ratione naturæ suæ liquor transparentis & clarus, resinofus, odoris non ingrati, saporis paululum acris, ex certarum arborum truncis & ramis, mediante incisione, defluens. Ordinario tres terebinthinæ recensentur species, quæ etiam ratione arborum, ex quibus proueniunt, ratione soli natalis, virtutis & pretii, longissime a se differunt ac distinguuntur.

2. PRIMA est terebinthina Cypria, quæ etiam vocatur de Chio, quoniam in abundantia in insula Chio crescit; secunda species est terebinthina, quæ vocatur Veneta & secundum Gallos: *la terebinthine du bois de Pilatre*, & tertia est communis. Terebinthina Cypria omnium est pretiosissima & defluit ex arbore mediocris altitudinis, quæ appellatur terebinth. Arbor eius est baccifera, mense Aprili florens fructus instar nucum iuglandium, ratione magnitudinis, ratione figuræ autem, instar pistaciarum, profert. CLVSIVS hanc arborem ad frutices refert ex eo, quod illa maxima ex parte fruticasse visa fuerit, nihilominus tamen & ipse fatetur sæpius hanc arborem adolescere id quod etiam affirmat THEOPHRASTVS ERESIVS *lib. 3.* qui generi arborum, quæ non nisi in montibus nascuntur, perpetuo virent & ineunte vere germinant, & circa tritici messem reddunt semen, accenset. Idem laudatus auctor binas huius arboris species constituit, quarum altera mas, altera foemina ipsi dicitur, hæc fructum ferens, illa sterilis, quæ tamen in eo conueniunt, quod radice valida in terram profunde demissa truncum alant,

cuius lignum, forsan ob molliorem & rariorem texturam, torno, sculpturæ vsibusque aliis mechanicis minus aptum sit. Celeberrimus botanicorum IOH. RAIUS in *Plantarum historia* p. 1577. possidere hanc arborem edocet ramos longos, raros & cinereo cortice tectos, a quorum tuberculis copiosi longo racemo producantur flores, meris flamineis fibras purpurascenscentibus contexti, folia autem laurinis non absimilia, scribit: delapsis floribus, fructus apparere paruos, rubentes, oblongos, resinofum viscidum lentorem & nucleum includentes. Idem optimus auctor *loc. cit.* falsam illam assertionem, terebinthinam semper virere & nunquam sine foliis reperiri pronunciat, testibus autoptis BELLONIO, RAWOLFIO, CÆSALPINO & CLVSIO.

3. QVOAD locum natalem, auctore DIOSOCRIDE, terebinthus arbor nascitur in Cypro, Syria & Africa, obseruante autem CLVSIO, etiam in Hispania, Lusitania & Gallia. In Hetruria Italiæ regione ipsam quoque se inuenisse refert; RAIUS *loc. cit.*: In Gallia autem & Hispania resina ex hac arbore non colligitur: etiametsi LOBELIUS in *Tom. 2.* terebinthinam in sylua Monspeliensium interdum ab inflictis vulnusculis pellucidam resinam fundere affirmet; attamen in exigua copia colligitur, vt nec in propriis aromatopoliis proftet, multo minus in nostras transmittatur terras; hinc RAIUS officinis Europæis terebinthinam veram & Cypriam ignotum esse fidenter affirmat, & huius loco abietinam vel lariceam substituit. Ipse GALENUS *lib. de methodo medendi* lariceam suo tempore locum terebinthinæ veræ subornat. Terebinthina hæc est resina solida, dentibus non adhærens, non fluida, pellucida, coloris subflavi, odoris gratissimi, saporis suavis, paululum acris & amaricantis. Per destillationem suauissimum oleum limpidum & spirituosum elargiri, quod in vrina cienda, calculo pellendo, vlceribus persanandis, lymphæ corrigenda & nervosis ac glandulosis partibus roborandis, præstantissimam vim habere, Angli de eo affirmant.

4. ACCEDIMVS iam ad examinandam alteram speciem terebinthinæ, quæ ex arbore larice, germanice Lerchenbaum exstillat, & falso nomine terebinthinæ Venetæ venditur. Est autem larix arbor e coniferarum censu, magnitudinem abietis æquat, & indigenam recto ac procero caudice attingit, quæ de re euolui potest IOHANNES BAVCHINVS in *Theatro Botanico* it. MATTHIOLVS & CASPARVS HOFFMANNVS. Colligitur resina hæc tempore vernali & autumnali, æstiuo intensissimo existente calore, perforatur arbor iunior vsque excipitur vasis appropriatis & lauatur aqua simplici, vt acredo resinæ minuat & illa mitior euadat. Curiose notat HERMANNVS in collectaneis suis, raro arbores has fundere resinam, in quibus agaricus est, quoniam resina in producendo agarico absumitur. Nascitur larix diversis in locis. CLVSIVS in Viennensi saltu aliisque montibus Alpibus obseruauit eam in copia. Sic in Alpibus Vallensium, Stiria ac Carinthia copiosam obseruauit peregrinans RAIVS. Et CASPAR SCHWENCKFELD in *Catalogo Stirpium & fossilium Silesia Lib. 1. pag. 119.* in baronatu lægerndorffensi laricem abundantem esse meminit. VI-TRVVIVS, autumante RAIIO, PLINII calcans vestigia, de larice pro more erronea quædam audacter consignauit litteris, inter alia autem asserit, eandem floribus exornari & lignum ex ipsa non ardere, sed instar lapidum ignis vi non posse consumi. Cui asserto experientia Vallensium expresse refragatur, ibi enim vix alia ligna, præter laricem, in vsum culinarem adhibentur.

5. NOTABILE est resinam hanc, siue terebinthinam ex larice, a Lionensibus nobis vendi pro vero balsamo Peruuiano albo ab aliis venditur sub nomine, vti antea dictum, terebinthinæ Venethæ, cum tamen Venetiis nulla ad nos apportetur terebinthina. Terebinthina hæc clara est & longe melior communi, colorem solet habere citreum & dentibus adhærere, id quod non facit terebinthina Cypria. Cauendum maxime, ne adulterata sit additione olei terebinthinæ, id quod facile cognosci potest ex consistentia & odore, quan-

do enim oleo terebinthinæ infecta est, vaporem sub flamma præbet nigrum, celeriterque accenditur & consumitur. Ex aduerso si pura & sincera est resina, odorem resinofum suavem præbet, neque tam facile concipit flammam.

6. DEVOLVIMVR iam ad terebinthinam communem, quæ passim magna in copia in Germaniæ locis venditur. Soboles arboris est abietinæ & piniferæ, quæ non tantum in exteris regionibus, maxime in Gallia, sed etiam Germania, silua Hercynia, Thuringica, abundantissima reperitur. Terebra autem, vel securi infligitur vulnus arbori, aut cultro scinditur cortex ab imo ad summum, detracto cortice, successu temporis succedit resina, quæ primo est limpida, postea vero induratur, & hæc resina terebinthina communis vocatur. Depuratur aqua simplici & agitur, ut & fordes abluantur, & acredo mitigetur. Feces solent petere fundum, & aqua decantata, resina colligitur. Resina illa, quæ sereno tempore ex pino, præcedente incisione, effluit, tempore sereno solidescit & alba est, Gallisque vocatur Gallipot, siue thus album. Gummi hoc etiam fundunt, & cum fustum est, infundunt doliis, quæ pondus 300. librarum attingunt, & hæc est terebinthina illa communis, quæ quo clarior, eo melior est. Impuriorem ex strobilis & conis pini coquere solent. Resina illa, quando funditur cum paucissima quantitate olei terebinthinæ, fit exinde alba, quæ Argentorato & Hollandia affertur.

7. IN nostris terris terebinthina non elicitur, sed arbores tantum suppeditant picem, quæ in Norwegia & Fennlandia magna in copia elaboratur. Cæduntur nempe arbores, lignum inditur furnis, qui habent quatuor canales, circa furnum accenditur ignis, & tunc ex ligno per canales in ollas foras liquida manat resina, quæ dicitur Germanis *Teer*, si diutius coquitur, siccatur pix purior. In aliquibus locis, fit ex resinis laricis, quando nempe destillantur per descensum, relinquatur pix purior & clarior. Quod autem liquor resinofus transparens terebinthinaceus ex nostris pinis colligi nequeat

queat, causa hæc mihi videtur quod in nostris locis calor & æstus sit mitior. Confirmat enim experientia, quando æstas est feruentissima, pinos & arbores alias resinofas longe melius crescere & copiosiores ac liquidiores resinas suppeditare.

8. EXHIBITA sic naturali terebinthinæ eiusque specierum descriptione, ratio instituti etiam postulat, ut ex ipsis præparata & composita, quæ vsui medico servire possunt, recensamus. Quicumque in substantia illam propinare & præscribere solent, plerumque, ut tutior eius vsus fiat, correctionem & præparationem quandam superficialem instituunt. De Cypria & Veneta sic dicta, quæ nullo egent correctorio, propter partium sulphurearum blandissimarum & purissimarum, quibus constant, abundantiam, illud non valet, sed saltem de communi, ex strobilis siue conis pini & abietis prodeunte. Hanc aqua quadam destillata, vel pura pluuiali, antequam interno vsui destinant, probe & repetitis vicibus lavare solent, non alium forsitan in finem, quam ut a sordibus inquinamenti variis & acredine eminentiori, quæ omnibus resinis arborum intime inhæret, liberetur. Certissimum enim hoc est, resinarum elementa esse tenue, subtile oleum & acidum. Patet id manifestissime ex artificiosa resinarum compositione, dum nempe quoduis oleum destillatum, commixtum cum spiritu nitri probe dephlegmato & concentrato, in perfectissimam resinam, inflammabilem, solidam, in spiritu vini rectifico solubilem & cuti ac dentibus adhaerentem convertitur. Quocirca non improbabile videtur, acre illud sal, quod ex acido & tenui oleo componitur, & in terebinthina vulgari extraversum quoad partem & extricatum est, sufficienti affusa aqua tepida dissolui & ablui, sicuti videmus, aquam cum benzoe coctam, tenuissimum sal acre cum particulis sulphureis, tenuissimis, terrestribus resolvere, quod deinde præcipitatum, exhibet flocculos instar amianthi splendentes, acredine penetranti præditas, quæ sternutatorium & errhinum ysum habent præstantissimum & flores vocari solent.

Equi-

Equidem reponi hic posse video, superuacaneam & pene frustraneam esse eiusmodi lotionem, imo plane reiiciendam, quoniam actiuo suo principio simplex hoc defraudetur. At vero, vtut non negemus, si aluum laxandi, vel vrinam cieiendi fine, quis terebinthinam præscribere velit, inutilem esse talem abluitionem crebriorem; attamen fateamur necesse est, si consolidandi laxos fibrarum & glandularum villos, nec non consolidandi scopo ipsam administrare velimus, præparationem hanc valde esse proficuum laudemque mereri.

9 PORRO notissima res est, ex terebinthina destillari posse oleum tenuissimum, quod promte flammam suscipit & penetrantia sua de varios vsus medicos & mechanicos sese commendat. Eius autem præparatio sequentem in modum solet adornari, nempe terebinthinæ sumitur libra vna, imponitur cucurbitæ vitreæ, & in Mariæ balneo calore subdito satis feruido, oleum destillatur diaphanum, pellucidum, paucum tamen, quod spiritus nomine indigitari solet. Alii terebinthinam imponunt vesicæ, affundunt aquam, & calore subministrato debito ignis, oleum æthereum summæ penetrans eliciunt. Verum si in maiori copia expetimus oleum, tam tenue, quam crassum, cucurbita vitrea, ex qua mediante balneo prius abstractum fuit oleum tenue, in arenam denuo collocanda est, vt calore intensiori addito, oleum minus tenue ex flauo rubescens eliciatur. Quod in fundo cucurbitæ residuum est, corpus stabile resinofum constituit, quod colophonium germ. *Geigenharz* vocari solet. Colophonia, siue caput mortuum terebinthinæ, si recipiatur ad vncias quatuor & cum arenæ cribratæ vnciis octo misceatur per destillationem ex retorta oleum spissum, acre, empyreumaticum acquiritur. Notabile autem hic vltcrius est, acidulum quoddam phlegma simul prodire & sal quoddam eiusdem saporis, nec secus ac in destillatione succini accidit, oleo empyreumatico insidere, qua de re etiam consuli possunt *Collectanea Chymica* LBYDENSIA cap. 69. pag. 204.

10. OLEVM terebinthinæ in longe maiori quantitate obtinetur, quando illud gummi simul ac ex arboribus effluxerit, destillationi subiicitur, quale non procul a Marsellis & provincia Bordoux elaboratur & hoc oleum æthereum nomine spiritus terebinthinæ vbique venditur, optimum est, quod clarissimum & instar aquæ pellucidum, odoris fortis & penetrantis est, ne vero diminutionem patiatur, præsertim aere existente calido, neque flammam facile suscipiat, & periculum maximum inde exsurgens euitetur probe munitum seruari debet. Ex oleo hoc æthereo balsamum sulphuris vulgare confici solet, quod virtute reuera præstantissimum est & ita paratur. Recipiuntur olei terebinthinæ partes tres, florum sulphuris, vel loco horum, sulphuris purissimi, stillatitii partes duæ, miscentur, induntur retortæ, vt in arena calore lenissimo per octo ad minimum horas fiat destillatio, ita vt pauca quantitas olei in recipiens vas exstillet, balsamo rubinei coloris in retorta relicto. Notatu hoc loco quoque dignum est mone- re, moderatum subministrari debere calorem, alias, intensis- simo dato, receptaculis fortiter luto munitis & firmiter clau- sis, periculum grauissimum incendii domus, cum fragore & tremulo motu ædium illarumque quasi subuersione, excitari potest, quale exemplum in pharmacopæa Clausthalensi ante aliquod tempus accidere memini. Extemporaneo magis la- bore cum oleo sulphuris balsamum ex sulphuris hepate, quod ex anatica portione sulphuris & salis tartari, mediante lique- factione in igne, compositum est, parari potest. Neque opus est hic destillatione, sed sub leni calore oleum sanguineo tingitur colore. Ex eodem quoque fundamento balsami sul- phuris antimonialis dependet præparatio, quod ita paratur: sumitur nempe vncia vna salis lixiuiosi sulphurei, ex lixiuio scoriarum reguli simplicis parati, oleum terebinthinæ pellu- cidum, ad eminentiam trium digitorum transuersorum, vel loco huius, oleum iuniperi, menthæ, anisi, in æquali portio- ne adfunditur, digestio cum leni destillatione in retorta vi- trea, mediante arena, instituitur; ita nobilissimi vsus balsa-

(*Hoffm. Opusc. varii argumenti.*)

Ss

mum,

mum, sapore, odore & virtute commendatissimum acquiritur. Insuper præstantissimæ virtutis balsamum sulphuris compositum parari solet sequenti ratione: recipe florum sulphuris, myrrhæ electæ, aloes, mastiches, benzoës, succini ana drachmam vnam, olei anisi, iuniperi, terebinthinæ ana vnciam vnam semis, camphoræ drachmam vnam, spiritus vini rectificati vnciam semis, misceantur inuicem in cucurbita parua, & igne arenæ fac, vt leuiter bulliant, ita spiritus balsamicus acquiritur, instar rubini, præstantissimæ virtutibus fulgens.

II. CURIOSVM est, spiritum, siue oleum terebinthinæ, cum spiritu nitri concentratissimo fumante impetuosissimum & calidissimum motum efficere, adeo, vt ingens fumorum copia ex mixtura horum emergat: & quando satis fortis & ab omni phlegmate priuatus fuerit spiritus, oleum in carbonem siccum exurit. Quando autem phlegmate adhuc est dilutus, generatur resinosa sapa rubicunda, quæ promte flammam igni admota suscitatur. Notissimum quoque experimentum est sulphur genuinum vulgare per artificium parandi ac regenerandi, quod BOYLEVS in *Chym. Scept.* hunc in modum describit: sumitur nempe æqualis portio olei terebinthinæ & olei vitrioli, quæ inuicem mixta, per retortam vitream igne arenæ destillantur, ita sulphur vulgare inflammabile in retortæ collum sublimari affirmat. Quamuis autem experimentum omnibus probe obseruatis circumstantiis, institutum fuerit; minus tamen succedere voluit, sed materia quædam resinosa loco huius in collo retortæ visa fuit, quæ tamen accensa vaporem instar sulphuris emittebat. Hic quoque commemorandum, perfectissimum sulphur, communi in omnibus, consistentia & colore simile, ex oleo vitrioli & certo succo inspissato vegetabilis a me fuisse productum & sublimatum. Porro circa oleum vel spiritum terebinthinæ illud notari meretur, hoc ipsum in spiritu vini rectificatissimo, etiam tartarizato difficillime dissolui; cum tamen omnia olea destillata ætherea promptissime huic obsecundare soleat. Rationem huius phænomeni reddere, res videtur difficilis: credibile

dibile tamen est, tenues salinas, acidas & aqueas partes, quæ omnibus resinis inhærent, cum oleosis ramosis partibus firmiter esse connexas, quæ deinde intimam unionem cum spiritu vini rectificato respuunt, & potius in forma globulorum, aut in superficie, aut inter interstitia spiritus vini, hærent.

12. QVOD ad composita ex ipsa terebinthina attinet, nolumus hic esse longiores in cunctis recensendis formulis & compositionibus, sed saltem præcipuas quasdam hic apponere sufficiet. Ita celebres sunt pilulæ ex terebinthina contra gonorrhæam, quarum descriptio in nonnullis Westphaliæ pharmacopœis prostat, quæ hæc est: recipe terebinthinæ Venetæ, ad consistentiam cum aqua rosarum coctæ, vnciam vnam, extracti rhabarbari drachmas duas, balsami Peruviani, de copiaua ana scrupulos duos, ossis sepiæ, succini albi præparati, coralliorum, mastiches, terræ sigillatæ ana drachmam vnam, nitri purificati drachmam semis, camphoræ scrupulum vnum misce f. l. a. pilulæ ex scrupulo semis numero XXX. pro vna dosi. Neque hic omittendum censemus præparandi modum ex terebinthina pilulas, quæ exstant in *Dispensatorio Brandenburgico* p. 157. quarum præparandi modus hic est: recipe terebinthinæ Venetæ ad consistentiam cum aqua rosarum coctæ, succini, mastiches electæ, olibani ana drachmam vnam semis, boli armenię drachmam vnam; cum sufficiente quantitate terebinthinæ fiat massa pilularum, in gonorrhœa, fluore albo & nimis glandularum laxitatibus valde proficua. Tandem etiam terebinthina celebratissimas pilulas BECHERIANAS ingreditur. Cæterum terebinthinam Venetam recipiunt complures aquæ spirituosæ, ut nempe balsamica & oleosa vis destillatione eliciatur. Eiusmodi aqua est *B. Frid.* HOFFMANNI contra gonorrhœam, communicata in *thesauro pharmaceutico* pag. 27. & hæc est. Recipe herbæ menthæ siccæ vncias tres, seminis rutæ, agni casti ana vncias duas semis, foliorum dictamni vnciam, radicis ireos Florentinæ vncias duas, terebinthinæ Venetæ vncias decem, vini generosi albi mensuras tres, fiat destillatio in mariæ balneo. Hæc aqua non

tantum in gonorrhœa, sed & fluore albo feminarum, præmissa sufficiente purgatione, insignis est utilitatis, de qua æger mane, horis duabus, vel tribus horis ante pastum, & vesperti quatuor horis a coena, duo capiat cochlearia.

13. *AQVAS* nephriticas, quæ partim ad pellendum calculum, partim ad læsam substantiam consolidandam, valde proficuae sunt, nostra ingredi quoque solet terebinthina. Exemplum potest esse tale: recipe succi petroselini libras duas, herbæ selleri, chærefolii, hederæ terrestris, millefolii, dracunculi hortensis, pimpinellæ ana manipulus duos, baccarum iuniperi libram semis, milii solis uncias tres, terebinthinæ Venetæ uncias quatuor, spiritus vini mensuras quatuor, stent per aliquot dies in vase clauso, postea destillentur: cuius dosis cochlear vnum, vel duo, in curatione tria, vel quatuor, tempore matutino vel ventriculo vacuo ad præseruationem esse possunt. Ipsa terebinthina ingreditur quoque aquam Anhaltinam famigeratissimam, cuius usus multorum annorum experientia probatissimus fuit, non saltim externe in affectibus arthriticis, rheumaticis, verum etiam interne, in expellendo calculo, cuius efficaciam idem *B. HOFFMANNVS* pag. 45. *Clau. Schræderian.* mire extollit, vbi tamen notandum, si interne illam adhibere velimus, propter maiorem penetrantiam, conuenienti aqua destillata dilui deberi.

14. *MERETVR* quoque hic apponi balsamum sic dictum Hispanicum, cuius vires vulnera intra breue temporis spatium conglutinandi mirifice laudari solent. Compositio talis est: recipe olei vetustissimi uncias quatuor terebinthinæ uncias octo, frumenti integri unciam vnam semis, florum hyperici uncias duas, radicum cardui benedicti, valerianæ ana unciam vnam, thuris electi uncias duas, radices & herbæ grosso modo contendantur & ollæ imponantur, superfundendo tantum vini albi, vt omnia submergantur; stent per biduum, deinde adde frumentum & oleum, coque ad vini consumptionem, tum forti facta expressione, addatur terebinthina & thus, & iterum ebulliant, demum in vase cum alembico ad usum seruentur.

15. CELEBRE quoque est balsamum Locatelli, quod, & externe, & interne, in sanandis vulneribus & ulceribus præstantissimæ efficaciam est, legitime usurpatum. Descriptio autem est sequens: recipe olei hyperici veteris libr. semis, ceræ albæ, terebinthinæ optimæ ana vncias sex, balsami Peruuiani vnciam semis, fantali rubri drachmas duas, vini Maluatici quantum satis. Coquantur leni calore in balsamum consistentiæ mediocris, cuius dosis drachma semis, ad vnam, in iusculo calido esse potest. Cæterum terebinthina omnia fere chirurgorum emplastra & vnguenta digestiua solet ingredi, non tantum ob meliorem solutionem mixtionemque ingredientium, verum potissimum ob virtutem suam temperatam balsamicam, qua abstergit, mundificat, consolidat & fibras partium solidarum læsas roborat.

16. QVOD vires eius ac vsum in morbis sigillatim attinet, is omnino latissime sese extendit. *Dioscorides* ipsam omnes antecellere confidenter asserit. *Clarissimus D. le Mort. in pharmaceutica medica physica* p. 64. hoc elogium ipsi tribuit: *terebinthina* inquit, *quasi vniuersale dissoluens menstruum omnium resinorum puriorum existit, tam ad solutionem, quam ad mixtionem faciendam illorum corporum, imo plura dantur in hoc genere resinosa, quæ terebinthinæ consortium immediatum expetunt, antequam ullo modo dissolutiones ulteriores admittere debet.* Sic gummi Copal primo dissolui debet in terebinthina, alias difficiliter cum aliis permiscere sese sinit absque empyreumatis contractione. Et p. 55. l. cit. diuersis, ait, adicitur oleis, ad facilitandam unionem & solutionem, vinct quoque ingreditur omnia emplastra, vnguenta & similia præparata. Terebinthina præsertim vulgaris & laricea, magno cum successu in scabie leprosa, tinea & aliis cutis defœdationibus, vel sola vel cum aliis in vnguento olim fuit adhibita GALENVS ipsa sola pforam sanauit, vid. lib. 8. de simpl. med. facult. Neque hic obiici debet, aliam hanc fuisse terebinthinam. Etenim & ipsum lariceam assumpsisse & in vsum vocasse, ex compluribus probabile videtur; siquidem ipse GA-

LENVS lariceam suo tempore loco terebinthinæ vendidit, vnam alteri sæpius substituit, vt ex *libro eius de medicamentis secundum genera* satis patet, vbi etiam affirmat, quod laricea omnia illa, quæ terebinthina vera possit, efficiat. WAGNERVS in *historia naturali Heluetiæ curiosa* p. 266. huius resinæ vsum in scabie, pfora, tinea valde laudat. Cuius ratio hæc est quod mundificet & glandulas nimium relaxatas roboret, a salibus autem stagnantibus corrosas consolidet, & vltiorem feri corrosiui & lixiuiosi generationem in subcutaneis vasculis impediat. SIMON PAVLI in *Quadripart. botanico* in capitis vulneribus, vbi vel a plaga, vel etiam post trepanationis vsum, dura meninx nuda detegitur, huius resinæ vsum valde proficuum pronunciat. In omnibus vlceribus & recentibus vulneribus sanandis commode terebinthinam admisceri DODONÆVS in *Historia stirp.* pag. 857. docet, quoniam non euidentem obtinet acrimoniam, qua vlcera irritare possit. Imo si verum est, quod iudicat DODONÆVS *libro citato*, abietis lacryma pro laricea a GALENO habita & reputata fuit, quod & BAVHINI, RONDELETHI, CLVSII & SIMONIS PAVLI sententia est, qui similem vsum ac effectum habere asserunt; hinc non video, cur tam anxie a se inuicem soleant distinguere, præsertim cum externa differentia, si recentes sint, vel exigua, vel plane nulla inuenire possit.

17. SED placet iam paulo accuratius terebinthinæ vsum internum eximium in variis affectibus enarrare. Primum itaque terebinthina, ad drachmam vnam cum vitello oui subacta & cum aqua destillata sumta, aluinam regionem probe expurgat: vti id experientia manifestum est. De purgante autem ipsius virtute potest etiam inter alios videri WAGNERVS *l. c. p. 297.* Inest enim omnibus ferme gummatibus sal quoddam acre, quod resolutum fibrillis membranarum intestinalium stimulando, contentorum eiectionem faciliat atque promouet, sicuti id luculenter videmus in gummi ammoniaco, myrrha, sagapeno, benzoe, quæ cuncta pilulas antihypochondriacas & antihystericas laxantes non sine leui effectû ingrediun-

diuntur; vtpote succi acidi, qui alias aliorum purgantium vim respuunt & eludunt & quibus hypochondriacorum regio valde scâtet, egregie eiusmodi gummatibus purgantur & euacuantur. Acidum enim corrosiuum ramoso horum contextu excipitur, infringitur, sicque saturatur & corrigitur, ut adeo pro purgandis acidis morbosis succis sint conuenientissima.

18. PRÆTEREA vtilissima terebinthina est interne in affectibus renum & vesicæ, dum sale acri, tenui glandulas & si-phunculos renales irritat & separationem urinæ promouet, nec minus viscosam tenacem materiam in vrinariis tubulis renum hærentem & calculi materiam præbentem abstergit atque dissoluit: insuper particulis oleosis viscosis substantiam renum & vesicæ ab erosione, inflammatione & exulceratione læsam, quod sæpissime in truculentis & diuturnis calculosis harum partium affectionibus accidit, rursus conglutinat & compagem laxatam vnit & firmat. Quocirca passim ab auctoribus practicis terebinthina in substantia probe cum vitello oui mixta & propinata cum specifica quadam aqua, ad ardorem urinæ mitigandum, in vlcere vesicæ, nephritide, purulenta mixtione & renes detergendos, incarnandos eosque a calculo purgandos magnopere commendatur. SIMON PAVLI in *Quadripart. Botan. pag. 533.* de laricea nostra siue Veneta inquit: insigniter est vtilis, vbi renes viscida pituita & calcululo obstruuntur, in aqua chærefolii, petroselini, fragorum, aut simili, addito tantillo vitelli oui soluta & crebrius propinata, vrinas pellit & pectoris vitiis, ac gonorrhœæ medetur. FORESTVS passim in observationibus suis magis ad præseruationem, quam curationem calculi illam adhibet: at vero si iam calculus est præsens, commodissime propinari potest sine vlla præuia præparatione, quod HILDANVS aliquoties expertus est uti ex eius observationibus patet. Quidam infuso cum cereuisia, leue accedente prope ignem deferuescentia, pro potu ordinario ipsa in calculo viscerumque obstructionibus laudabiliter vtuntur. Obiter hic notari meretur, quod tere-

terebinthina, licet frequenter vsurpetur, non æque vt reliqua diuretica noceat, cuius phænomeni GEORG. HORSTIVS *decad. 8. qu. 1. de calculo renum & vesicæ* rationem reddere conatur, inquiens: *caliditatem terebinthine temperatam membris coctioni dicatis amicam, esse*: at magis nobis arridet ratio RIVIERII *Tom. I. prax. 1. 8. c. 1.* quia scilicet aluum simul laxat, & per eam crassiores educit humores, qui a cæteris potissimum diureticis ad renes adducuntur.

19. IN paroxysmo vero calculoso exhibitionem eius non suademus, sed consultius est, ante ipsum, vel post eum mitiorem factum, adhibere, ita enim optime arenulæ e renibus eliminantur. Deinceps in thoracis affectibus non sine utilitate adhibetur, illam enim ab omni immunditie pulmones nec non infimum ventrem purgare, scribit RAVVS *l. c.* Confert quoque porro, vt ait, veteri tussi, spirandi difficultati & spuito sanguinis. In phthisi cum lacte sulphuris si exhibeatur maximam præstare ibi opem scribit HARTMANNVS *in Tirocin. Chymic.*

20. IN gonorrhoea & fluore albo, ipsam terebinthinam, in substantia, vel coctam, aut destillatam magnas præstare virtutes inter chirurgos & medicos notissimum est, & reuera hic terebinthinacea omne absoluunt punctum, præsertim si cum specificis purgantibus acuantur, vel balsamum etiam Peruvianum admisceatur, vtpote serum copiosum & vitiosum partim per renes & alvum educunt, partim glandulas & vesiculas seminales nimium laxatas roborant, sordes abstergunt, & dilaceratas partes consolidant. Optime hunc in finem adhibentur in forma pilularum, desuper bibendo serum lactis, vel etiam lac calidum. Et hæ sunt præcipuæ, quibus terebinthina imbuta est, vires, in medicina & chirurgia reperiæ expertissimæ; circa quas tamen illud adhuc venit monendum, peropportune terebinthinam hanc sumi vel in bolo, vel sub forma pilularum, aut placentularum; deinde exiguum, vel plane nullum eius vsum esse debere, quando ventriculi adest debilitas: recte enim a Celeberrimo WEDELIO *in Amoe-*

nitatibus materiae medicae l. 2. f. 3. cap. 4. ventriculum debilitare terebinthina dicitur ex multiplici experientia, hinc etiam in stomachicis spirituosus merito debet propinari, vel si maior adsit imbecillitas stomachi præparata ex ea, nempe spiritus, aquæ destillatæ, cæteris partibus, magis exhibere debent. Subiectis tamen robustioribus commodissime per se exhiberi suadet idem laudatus WEDELIVS & quidem in massa pilulari, *vid. l. c. p. 239.* neque sine ratione, utpote analysi chymica crasis & textura mixti, a qua forma & virtus medicamentosa dependet, plane destruitur, & præparata exinde longe aliam induunt naturam, a priori plane diuersam, aliasque vires & operandi modum nanciscuntur. Videmus id manifestissime in china chinæ, ceu specifico optimo antifebrili, lumbricis terrestribus, ceu laudatissimo antepileptico: quæ destillata & igne resoluta, virtute hac plane exuuntur & & defraudantur: unde non sine ratione ARNOLDVS *de Villanova* simplicia longe antefert præparatis & compositis & dolum esse, inquit, uti compositis, ubi adsunt simplicia. Egregius quoque locus de hac re existat in HELMONTIO *Tractat. dispensat. moderno p. m. 372.* dum inquit, *detestatus sum multorum simplicium compositiones, eo quod si ad odorem sanatiuum alium desuper adiunxeris, qui priorem supprimat, palliat, in se convertat, vel simul ex utroque neutrum suscitet; sciui exinde vim specificam sanatiuam abolitam fore, irritumque effectum ab ægro optatum.*

21. CIRCA vsum & applicationem spiritus terebinthinæ & ex ipso præparatorum quædam adhuc monenda veniunt Nimirum cautissime calidissima hæc remedia adhibenda esse interne, præsertim quando calor præter naturam corpus afficit, aliis obstructa & status plethoricus præsens est. Tunc enim maximum damnum inferre solent, quotidiana experientia id edocente; renes enim hac ratione facile ad inflammationem, exulcerationem & calculum disponuntur; in phthisicis calor facili negotio per præposterum balsami sulphuris terebinthinacei vsum suscitatur; in mensium suppressione idem

(*Hoffm. Opusc. varii argumenti.*)

Tt

bal-

balsamus sulphuris, adhibitus antequam secta fuerit vena & intestinalis regio a copia & saburra vitiosorum humorum purgata, sæpenumero calorem internum maximum cum anxietate præcordiali excitare non sine periculo solet. Diabetem ab eius improuido vsu productam notauit WEDELIVS in *Miscellaneis Nat. Curios.* In gonorrhœa caute etiam cum validissimo hoc medicamento mercandum est, lenta enim febris, nisi prudenter adhibeatur, hoc ipso facile inducitur. Auctor itaque sum, vt in subiectis præprimis tenerioribus, ætate iuuenili, tempore æstiuo, temperatura cholericæ biliosa, parcissime, vel plane non adhibeatur. In robustioribus autem, pituitosis, rusticis, & duriori vitæ generi addictis, paulo liberalius vsurpari potest, vbi tamen semper generalis regula debet valere, ne plethoricis, ne aluo obstructa, vel calida intemperie laborantibus offeratur. Refracta dosi si misceatur cum tinctura tartari, elixirio pneumonico, carminatiuo, spiritu salis ammoniaci vinoso, in plurimis affectibus eius vsus non erit de nihilo.

22. EXTERNE autem spiritus terebinthinæ, maxime si cum axungis animalium rite mixtus fuerit, in neruorum ac ligamentorum contractionibus, tensionibus, nec non relaxationibus egregium auxilium præbet, si calide partes paralyticæ ipso inungantur. BOYLE spiritum hunc, in *Tractat. de specificorum remedium natura*, aduersus contracturam eeu summum & diuinum remedium extollit. Ad vlcera cacoëthica mundificanda, carnem superfluum absumendam & putredinem arcendam, cum spiritu vini dilutus chirurgis fert opem exoptatam, præsertim in læsionibus partium neruosarum. Spiritus terebinthinæ, imo ipsa terebinthina, cadauera a putredine & corruptione præseruare optime potest. Sed hæc de terebinthina eiusque vsu monisse & attulisse impræsentiarum sufficiant.

DISSERTATIO III.
DE
MILLEFOLIO.

§. I.

NON minus acute, quam vere pronuntiauit superioris seculi clarissimus chymicus OSWALD. CROLLIVS, dum ait: *natura etiam in minimis & abiectissimis observatur cum stupore maxima & ubi deficit in corpore, abundat in viribus.* Ad veritatem huius adsertionis confirmandam auctor inter alia ex regno vegetabili exempli loco allegat vitem & culmum innuendo varii generis frumenta. Et sane si triticum, secale, hordeum intuemur, nihil aliud sunt quam gramina exili splendore ornata, at in seminibus eorum succus adeo nobilis delitescit, ut exinde vniuersus orbis communissimum pabulum & sitis leuamen præparet & vitam hanc fere vnice sustentet. Similiter vitis & frutex parvæ considerationis, floribus exiguis prædita & incapax suis viribus e terra se elevandi opus habens loco fulcimenti adaptatis palis vel arborum truncis ramisque, quibus se ope capreolorum suorum circumvoluit & in altitudinem effert: nihilominus tamen utilitas, quæ ex fructu ipsius plane diuino ad vitam & sanitatem hominis redundat, reuera est summe admirabilis, siquidem succus vuarum, per fermentationem in vinum generosum mutatus, maximum est machinæ humanæ restauratiuum, sanguinis spirituscentiam auget & mentem acutiores atque eleuationem reddit, unde & ipse sacer codex eius vires mirifice extollit & Syracides præ æstimatione huius adeo delicii nectaris exclamat: quid est vita absque vino!

2. QVODSI latius paulo in castra vegetabilium exspatiaturi fuerimus, conspectui nostro sese offerent multiplicis generis herbulæ circa semitas hinc inde dispersæ, figuræ qui-

dem externæ pulchritudine non admodum superbientes, quarum tamen elementa & agendi vires si penitius scrutemur, fatendum omnino erit, esse illas ex earum numero, in quibus natura cum stupore voluit apparere maxima. Vnicum solummodo hac vice lubet in medium proferre millefolium, quod ubiuis copiosissime prouenit & in omnibus fere pratis luxuriat, aspectu quidem ignobile, viribus vero eximium, & dignum maxime, vt præ vlnaria & aliis longe speciosioribus plantis reginæ pratorum nomen sustineat. Non possumus non singularem Dei prouidentiam & ore & calamo venerari, cum obseruemus, tam bene, tamque sapienter consultum fuisse generi humano, vt, quæ ad longe optabilissimam sanitatem conseruandam & ægritudines valde horribiles simul a corpore auertendas inseruiunt, non e longinquo & ex abditis terrarum locis scrupulose debeant conquiri, sed circa vias in campo plano haberi & colligi queant, quare non inconcinne PARACELSVS alias non adeo magnus vulgarium medicamentorum æstimator pronuntiauit: *rusticum quemlibet verum pharmacopolium ante suas aedes habere.* Et profecto, quid impedit, quo minus hoc adsertum cum rei veritate valde consonum sttuamus, siquidem circa quoduis tugurium in copia crescunt malua, chamomilla, millefolium, acacia, sambucus, esula, papauer rubrum erraticum, brassica, petroselinum, plantago, pimpinella, hyosciamus, lapathum & aliæ adhuc præstantissimæ herbæ ac frutices, quibus sane omnibus in morbis indicationibus satisfacere possemus optime, vt adeo vix opus esset tam pretioso ex regno minerali apparatu. Mea est & manet firma sententia, quod qui simplicissimis herbis, seminibus, flosculis & radiculis morborum curationem suscipiunt, omnium felicissime medeantur, id quod pluribus testatum facere possem exemplis, si temporis permitteret. Et eam omnino ob causam, exiguitas ex locupletissimo materiæ medicæ thesauro præ omnibus placuit millefolii herbæ tractationem suscipere. Et quicquid de nobilissimæ totius plan-

plantulae natura & usu explorare vel ab aliis iam exploratum deprehendi in dissertatione praesenti ea, qua possum, accuratione discutiendum decreui.

3. ANTEQUAM ad scopum ipsum accedimus & millefolii naturam viresque decenti scrutinio medico persequamur, e re fore nostra iudicamus, ut primo omnium in eius differentes species, cognomina ac figuram externam inquiramus, & descriptionem eius paulo accuratiorem sistamus, quo omnibus pateat, quanam sit illa herba, cuius discussionem plenior hic intendimus. Quodsi scriptores botanicos euoluimus, ii varias nobis subministrant millefolii species, siquidem CASPAR BAVHINVS, qui potius in herbarum nomina, quam earum usum sagaciter inquirat, in *Pinace Theatri Botanici Lib. IV. Sect. III. pag. 140.* tredecim millefolii species recenset & in *Prodromo Theatri botanici*, in quo plantae ab ipso primum descriptae traduntur *Lib. IV. cap. VI. pag. 72.* adhuc quinque millefolii species exhibet & sollicite delineat. CHRISTOPH. MERRET. *Pinace rerum naturalium Britannicarum* decem, HERMANNVS vero medicinae & botanices Professor in *Horto Academico Lugduno-Batavo* nouem millefolii exhibet species. Nos ex multis istis millefolii speciebus seligimus tantum vulgare sic dictum millefolium, quod Germanice audit Garbe, Garben-Kraut, Schaaff-Garbe, Schaaff-Ripp, Graece Chiliophyllum, miriophyllum, DODONÆO Achillea, FUCHSIO Stratiotes millefolia aliis alio non multum ab his differente nomine.

4. RATIONEM praedictorum nominum si quis a nobis expetat, dicimus, hanc herbam millefolii nomen accepisse ob multiplicem foliorum ordinem & incisuras, siquidem vnumquodque folium a caule plantae progrediens interdum, si praesertim in salaciori solo succreuerit planta, ultra octo spargit ramificatiunculas, quae singulae rursus quinque sex vel octo gaudent incisuris, ut adeo si a dictis foliorum ramificatiunculis eorumque incisuris calculus desumatur, reuera vocari possit millefolium. Quare autem Germanicis Schaaff-Garbe audiat, id eo deducendum esse arbitror, quo-

niam contestantibus id opilionibus oues lubenter hac herba vescuntur. Præterea achilleæ cognomen habet ab Achille magno Græcorum heroë, qui hac planta vulnera suorum militum curasse perhibetur. Stratiotes quoque dicitur, quoniam militum vulneribus sanandis egregie conducit. Satis vero de nomine dictum esto, cum in aprico sit positum, parum utilitatis inde in praxin medicam redundaturum. Salse admodum SIMON PAVLI in *Proœmio Quadripart. Botanic.* illos, quibus volupe est nomina herbarum tantum venari, neglecta virium inquisitione, perstringit his verbis: *quid opis ægro adferet medicus ex catalogo nominum Pœniæ, cum v. g. decies vel sæpius vno die eum concidere, conulsiuis motibus lancinari, contortis oculis toruum tuentem epilepticum ante pedes iacentem observat? Non hic scire conducibile* APVLEIVM PLATONICVM cap. LXIV. *de virtutibus herbarum* referre, quod Pœnia Græcis adpelletur Pentorobon, aliis Glycylis, aliis Agloophotis, aliis Pæonion, aliis Selenion, aliis Menion, aliis Panacosceras, aliis Helenogonon, aliis Dichomenion, aliis Gludim, aliis Menogenion, aliis Theodonion, Italos vero Pœoniam, alios Rosam fatuinam vocare? Nos igitur hac occasione ipsa hæc verba ad millefolium nostrum applicaturi dicimus: quid quæso proderit ægro spasmodicis ventriculi & intestinorum doloribus detento vel vulneribus multis afflicto, si medicus sciat exacte recitare cognomina eorumque accuratam calleat delineationem, interim tamen ignoret, quid virtutis intus custodiat hæc planta & quomodo in solamen & iuuamen ægrotantium millefoliata adhibeat.

5. MILLEFOLIVM ab auctoribus botanicis hinc inde describitur, vti videri potest in *Matthioli Comment. in Dioscorid. Libr. III. cap. CXXXVII. Dominica Chabræi, stirpium iconibus & sciagraphia*, SIMON. PAVLI *Quadripart. Botan. Class. II. pag. 103. RAII methodo plantar. noua & plurimis aliis*, Nos florentem herbam paulo accuratiori considerationi nostræ subiecimus & notauimus omnia, quæ ad externi illius habitus cognitionem aliquo modo facere videbantur. Radicem quod
atti-

attinet, ea ex plurimis constat filamentis & non secus ac calamus aromaticus late per tellurem dispergitur atque hinc inde turiones emittit, qui successiue increscunt & nouæ plantæ faciem induunt, vnde facile peti potest ratio, quare hæc herba adeo luxuriet & a Iunio ad Septembrem vsque flores possideat, cum rosæ, lilia, tulipæ, plurimæque aliæ herbæ vix per quatuordecim dies in flore conspiciantur. De foliis iam supra dictum fuit. Florem vero quod concernit, præsentat ille umbellam ex multis vna in serie separatim erumpentibus flosculis coagmentatam, vnusquisque horum flosculorum gaudet quinque petalis candidis & rotundiusculis, discum vero formant semiflosculi calyciformes quinque incisuris ceu petalis imperfectis superius notati, ex quorum fundo prominent stamina cum antheris aurantii coloris, quibus inferius capsula seminalis adhæret. Herba hieme perit, sed verno tempore radices succo nouo imprægnatæ copiosos emittunt turiones, vt adeo hæc planta non solum ex semine terræ mandato propagetur, sed potissimum ex radicibus late serpentibus denuo subpullulet. In pratis vbiuis fere locorum & circa semitas crescit. Si tellure alitur pingui & subhumido ad vlnæ altitudinem excrescit, in arido autem & exsucco solo plerumque spithamam longitudine non multum superat. Natura interdum ludit, & flores monstrat purpureos vel ex albo purpurascens, vti idem in aliis quoque obseruatur plantis & cum primis in cæruleo illo agrorum decore cyano, quem non non semel flore albo vel purpureo aut aliis coloribus ornatum reperire contigit.

6. HISCE obiter præmissis ordinis ratio postulat, vt ante omnia in naturam, principia & elementa herbæ millefolii inquiramus. Sicuti enim actio & operatio cuiusuis medicamenti vnice fluit & proficiscitur ex natura principiorum dextre cognita: ita præcipuum laborem hunc esse iudicamus, vt iam ostendamus naturam & principia actiua in millefolio, quæ vtique medicus cognita explorataque habere debet, si cum ratione & certo quodam effectū hac herba vti velit.

Cum

Cum vero plura sint, quæ simplicis alicuius naturam patefaciunt, hinc ordine decenti cuncta persequemur. Et primo quidem de principio infito & actiuo millefolii iudicabimus ex forma externa & loco natali, deinceps subiiciemus gustus & olfactus testimonia, quibus omnibus addemus experimenta chymico-pharmaceutica, vnde omnium elementorum huius herbæ qualitas optime hauritur.

7. MULTI sunt medicorum, qui magnam de viribus cuiusdam herbæ iudicandi fiduciam in signaturis externis ponunt, adeo vt OSWALD. CROLLIVS in *Tract. de signaturis rerum*, eum tantum verum medicum dicat, qui ex signaturis rerum externis de interna illarum præstantia iudicare possit & meliorem partem veræ literaturæ, per quam omnes res occultæ legantur ac inuestigentur, nuncupare non erubescat hanc falso iactitatam de signaturis rerum scientiam. Verum qui paulo penitius rem considerat, facile cognoscet, methodum hanc imaginationis sobolem esse, adeoque incertam & fallacem, vt nihil minus inde, quam specialis virtus & actiuum plantæ alicuius elementum explorari ac detegi possit. Hoc vero concedendum omnino est, ipsam florum figuram quodammodo, sed probabiliter tantum & generaliter nos de facultate alicuius herbæ instruere. Quare ex obseruatione botanica constat, herbas sic dictas vmbelliferas plerasque virtute gaudere sedatiua, antispasmodica & sulphure suo caput replere, simul quoque carminatiuam vim exserere, vti videre licet in anetho, leuistico, aniso, pimpinella, chærefolio, caro, coriandro, vlmaria, fœniculo, nigella, ceruaria, valeriana, meo multisque aliis. Itaque millefolium nostrum quod attinet, a priori ex solo aspectu vmbellæ ipsius cognoscimus, illud ob sulphur suum blande vaporosum magna pollere vi antispasmodica, sedatiua & carminatiua, quæ virtutes etiam ipsi reuera inexistunt ac de iure competunt, vt in sequentibus dilucidius exponetur.

8. ALIA vero adhuc via paulo securior datur in plantæ alicuius elementorum cognitionem deueniendi, si secundum
men-

mentem locus natalis, vbi hæc vel illa herba sponte prouenit, consideretur. Obseruauimus enim plantas pro differentia locorum, vbi sponte nascuntur, peculiare, sed communes & proprias fere possidere virtutes. Ita v. g. plantæ pleræque, quæ in foecundis ac pinguibus locis nascuntur, principio pollent partim mucilaginoso, partim sulphureo & vaporoso naturæ plus minusque amico, eaque propter omnis generis dolores sedant, somnum inferunt, humorum acrimoniam temperant, tumores emolliunt, omnibus affectibus, qui ex spasmis fiunt, medentur & immodicas fluxiones sistunt, quales sunt v. g. anethum, anisum, absynthium, buglossa, chærefolium, chamomilla vulgaris, cynoglossa, crocus, cuminum hortense & pratense, nigella, papaueris species, coriandrum, ebulus, foenum Græcum, foeniculum, hyosciamus, horminum, imperatoria, lolium, leuisticum, lupulus, mentha crispa & Saracenica, & huius generis plurimæ. Iam vero ad millefolium nostrum hoc adplicaturi haud ignoramus, illud in pratis, quæ locis foecundis accensentur, sponte progigni, adeoque valde probabilis infertur inde conclusio, quod iisdem agendi principiis sit instructum, quibus herbas in locis foecundis nascentes scaterere modo diximus. Itaque si vlla alia hoc in solo enutrita plantula certe hæc ob sulphureum blande vaporosum cum mucilagine quadam intermixtum principium insigni gaudet vi anodyna, antispasmodica, acrimoniam humorum temperante ac tumores emolliente.

9. ATTENDENDVM hoc loco est, quod prædictis modis in herbarum principia inquirendi necessario coniungi debeat gustus & olfactus experimentum, si cum certitudine maiori iudicare de herbarum virtutibus cupiamus; in hoc enim multum momenti situm est, siquidem cum duobus maxime natura gaudeat in mixtione corporum agendi principiis, ex quibus fere omnis earum virtus promanat, quorum vnum est sal, quod sapore diiudicatur, alterum sulphur, quod ope odoris percipitur, facile apparet, hunc plantarum vires explorandi

(Hoffm. Opusc. varii argumenti.)

V V

mo-

modum esse longe accommodatissimum & ceteris iam propositis pondus addere. Sicuti vero saporis diuersæ species sunt, quæ ex commixtione salis cum aliis partibus exsurgunt, ita quoque prout principium sulphureum cum salinis, terreis & aqueis varie commiscetur, diuersa odoris species resultat, unde ex sapore & odore generalis æque ac specialis certis in morbis proficua plantarum virtus explorari potest. Quodsi iam millefolii herbam gustu & olfactu perscrutamur, obseruabimus totam plantam, radicem cum fibrillis minimis fere capillaribus, caulem quoque cum medulla in eius cauitate hærente, folia & flores sapore gaudere amaricante, qui tanto conspectius duprehenditur, si hæ partes cum aqua decoquantur vel in ea saltem infunduntur. Odor vero plantæ est fortis sulphureus, qui in floribus præsertim longe eminentior obseruatur. Ex his igitur merito concludimus, millefolium sale quodam fixo cum partibus terreo-mucilaginosis nupto & sulphure vaporoso subtili & suauis naturæque amico esse instructum.

10. TANDEM chymico pharmaceutica partium a se inuicem abstractione optime elementa huius herbæ euoluuntur. Quodsi enim hæc planta recens vel ficca cum aqua destillatur, prodit inde oleum saphirinum penerantissimi saporis & odoris valde sulphurei vaporosi, quo ipso clarum fit, inesse huic plantæ sulphur quoddam vaporosum, anodynum, sedatiuum peculiaris indolis, quale vix vlla in planta excepta chamomilla vulgari reperitur. Huius igitur oleiratione quoque recte ipsi tribuitur virtus antispasmodica, anodyna & carminatiua. Quodsi oleum subtilius fuit abstractum, remanet magma bruni coloris, paulo mucilaginofum, valde adhuc redolens, quod cum decenti modo partibus terrestrioribus per expressionem prius separatis igni ad euaporationem supponitur, coit in extractum amaricantis saporis, quod ob immixtas adhuc plurimas particulas sulphureas singulari pollet efficacia antispasmodica, humorum correctoria & roboriante, itemque traumatica. Reliqua pars crassior post expressionem

tionem relicta tanquam terra effoeta nullius est utilitatis. Ex herba tota siccata & igne concremata sal elicitur amarican-
tis saporis. Constat itaque ex hisce experimentis, in mille-
folio prædominari elementum subtile vaporosum summe sul-
phureum cum quadam mucilagine, terra fixa & sale alcalino
intime combinatum. Ex hac igitur substantia oleosa cum
mucilagine quadam, sale & terra mixta deduci utique
debet omnis virtus, quæ in nostro millefolio latitat, imo
non tantum ex hoc principio vires per experientiam & a po-
steriori cognitæ peti, sed & novæ incognitæ inueniri & de-
tegi possunt.

II. EVOLVTIS hoc modo millefolii elementis & agendi
principis opus etiam erit, ut recenseamus, in quibusnam af-
fectibus tam internis, quam externis chirurgis & medicis
eximiam opem & leuamen medicamina ex millefolio ador-
nata præstiterint. Ut autem exordiamur ab usu interno, ma-
xima eius virtus celebratur in omnibus iis morbis, qui spas-
mis originem debent & dolores atroces iunctos habent, vn-
de præsertim aqua ex millefolio destillata febrium paroxys-
mos & vehementiam coercet, siquidem non solum humores
impuros in primis viis & massa sanguinea collectos corrigit,
diluit & resoluit, sed & spasmos, in quibus febrium natura
consistit, optime demulcet ac aufert. Et hanc ob causam
etiam ipsa in febre pestilentiali a compluribus auctoribus
præcæcis mirifice extolluntur millefoliata, adeo ut *Henricus
Paschasius Libr. de peste cap. V. pag. 1.* testetur, se millefolii
effectum plane singularem expertum fuisse in peste Hafnien-
si, nec desunt auctores alii plurimi, qui hanc herbam cum flo-
re ceu peculiare arcanum contra pestem habeant, uti videre
est in *Claud. Theod. Panth. Hygiast. Lib. III. cap. XXVII. Phil.
Cruling. Florileg. Hippocr. Galen. Chym. Part. VIII. cap. VII.
pag. 214. Th. Bartholin. in Act. Med. Hafniens. Vol. II. pag. 292.
Ang. Sala Opera Med. pag. 455.* Quin imo iidem auctores
millefolium suspendere tempore pestis præcipiunt in copia
domuum parietibus, forsan ut aer corrigatur & miasma pe-

stilentiale eiusmodi effluuiis odoriferis auertatur, quamuis ego potiore exinde promananrem effectum attribuam fiducia, quam eiusmodi homines, qui amuletis hisce domuum parietes ornant, tum concipiunt, his præditi postea non timent pestem, unde ab ipsa interdum immunes degunt. Idem quoque effectus antipestilentialis salis millefolii adscribitur.

12. PRÆTEREA millefoliata & cum primis florum cum aqua infusio aut decoctio, aqua destillata vel cum spiritu vini non rectificato extracta essentia aut syrupus infra describendus, ut & spiritus millefolii cum oleo eius adhuc exaltatus in omnibus doloribus, qui spasmodorum sunt tragici effectus, egregiam exserunt efficaciam. Equidem non sine magno fructu & utilitate in hæmorrhoidum cæcarum dolore, in colica, doloribus post partum, a lochiis suppressis & quæ ex hæmorrhoidum suppressione nascuntur acerbioribus tormentis, in cardialgicis quoque anxietatibus, affectu spastico ventriculi & diaphragmatis, uti in dissert. *de præstantia remediorum domesticorum* docui. Pulverem millefolii cum vino exhibitum efficacissimum esse in colicis auctor est *Iohannes CAMERARIUS in Horto medico pag. 101.* Similiter in doloribus a calculo eius usus non contemnendus est, quoniam spasmo constrictos venteres relaxat & liberiores calculis renalibus exitum conciliat. Pulchre hanc in rem scribit *MARC. ANTONIVS ZIMARA in antro magico medico P. I. pag. 7.* pulvis seminis millefolii vere collecti ad drachmam unam cum vino albo aut iusculo mane ieiune usurpatus quam sit præstans remedium ad calculum deturbandum experientia me docuit, præsertim si bis terve repetatur. In suppressione quoque urinae infusum millefolii in aceto suadet *APOLLINARIS in Enchiridio suo botanico*, quem in finem substitui rectius posset tinctura ex millefolii & chamomillæ oleis & spiritu iuniperi parata, si præsertim in gonorrhoea vel a flatulenta & feculenta cerevisia hausta oriatur. In odontalgia herba millefolii cum butyro insulso frixa & calide male dolenti imposita commendatur ab *Apollinari loc. cit.* quod sane remedium præsertim in tumoribus ab inflammatio-

matione membranularum dentes cingentium relictis est accommodatissimum. Manducata folia maxime recentia dentium dolores mulcere perhibentur, quæ virtus etiam com-manducatæ radici & diu sub dente dolente retentæ adscribitur, vti videre est in *Matthiol. Comment. in Dioscorid. Lib. III. cap. CXXXV. & Apuleio de virtutibus herbarum.* Sed an hic effectus inde sit expectandus, valde dubito, ego hunc in scopum potius suaderem oleum millefolii in gossypio dentis cauitati inditum & ad tempus ibi detentum.

13. QUVM vero enormiores sanguinis siue per vterum, siue per sedis venas, aut fistulam bronchiale profusiones, acerbioribus spasticis viscerum vel aliarum partium contractionibus suam originem suaque incunabula debeant, euporista illa ex millefolio parata in iis compescendis vix ulli alii remedio efficacia cedunt, vti multis practitorum testimoniis id clarum manifestumque fit. Ita *Matthiolus Comment. in Dioscorid. Lib. III. c. 137.* hanc in rem sequentia profert: *datatur vtiliter millefolii succus ad sanguinis reiectiones. Idem præstat sicci farina ex symphyti maioris aut plantaginis aqua pota. Eadem naribus indita fluentem inde sanguinem compescit.* Et paulo post hæc verba ponit: *herba recens tusa & supposita ubique illico mensibus profluvia compescit. Præstat quoque mirum in modum millefolii & foliorum & florum farina ad sanguinis mictum, ubi uncie pondere una cum Armeniæ terræ drachma ex vaccino lacte propinetur ieiunis diebus tribus continuis.* conf. quoque *Galenus Lib. III. simplicium medicamentor. Joh. Renodæus Lib. I. de Materia Medica, Reinerus Solenander Consil. VIII. S. IV. Sennert. Lib. IV. Med. Pract. pag. 2. Sect. II. cap. VI.* sistit quoque hæmorrhoidum nimium fluxum secundum *Petr. Pachegu. obs. V. ap. Riuer. in Comment. Thom. Willis. Pharm. ration. P. II. G. I. cap. VII. Thom. Fuller Pharmacop. Extemporan. p. m. 235.* Ex eodem quoque fundamento non modo sanguinis, sed alias quoque fluxiones egregie intercept & cohibet, hinc memorato MATTHIOLO millefolium una cum floribus tustum & cum sua ipsius aqua aut caprino lacte

potum gonorrhœam in viris, in feminis alba vteri excrementa tollere & dysentericis quoque vtiliter infundi vna cum sui ipsius succo perhibetur, qualem obseruationem etiam habet GABRIEL FALLOP. *Secret. pag. 73. 77.*

14. INSVPER antepileptica quoque virtute excellere millefolium auctoritate ARNOLD. *de Villanov. Lib. I. Prax. cap. XXII.* & CRATON. *Lib. I. Consil. IV.* comprobatur, quæ vis & efficacia vnice, vt nobis videtur, a sulphure vaporoso, anodyno & magno spasmodicis etiam conuulsuorum sedatiuo petenda ac deriuanda est. Porro in spasmodicis vermium rosionibus commendatur, vt inter alios prodit ZWINGERVS in *Herbario suo* it. ANTON. CHALMET in *Enchirid. Chirurg. Lib. III. cap. XV.* quæ ipsi virtus ob amaricantem saporem & olei fragrantiam competere videtur, vnde ex eodem fundamento IVLIVS CÆSAR CLAVDIVS in *Empiria rationali Lib. III. Sect. 31. Tr. II. cap. VI.* aquam rosarum & *Riuerius* aquam florum aurantiorum aduersus vermes conuenire deprehenderunt. In abortu imminente, qui nunquam non absque spasmodicis summa violentia fit, decoctum millefolii ceu præstantissimum remedium præseruatorium commendatur a SIMONE PAVLI in *Quadripart. Botanico class. II. pag. 103.* Contra vomitum herbarum decoctum cum labruscæ floribus vtiliter dari putat MATTHIOLVS in *Comment. ad Dioscorid. Lib. III. cap. 137.* quod non sine ratione ab ipso statuitur, siquidem vomitus est affectus insignium ventriculi præsertim ac duodeni spasmodicis, quibus vero sedandis millefoliata optime succurrunt.

15. Si villo vero in morbo solamini egregio sunt millefoliata, certe in malo sic dicto hypochondriaco & hysterico eorum vsus continuatus tum ad præseruationem paroxysmi, tum ad eius mitigationem, obseruatur longe præstantissimus. Hunc in finem familiarissime vti soleo decoctis & infusis ex millefolio, neque minus frequenter præscribit pilulas ex extractis millefolii, chamomillæ, camphora castoreo & extr. rhabbari paratas. Mirifice etiam clarissimus STAHLIVS in *dissert. de Therapia passionis hypochondriacæ* medicamenta ex herba mille-

millefolii extollit, dum ait: *quodsi in passione hypochondriaca etiam acerbiores anomala commotiones circa venam portæ succedant, specifico quodam affectu illis succurrit herba millefolii vel in decocto vel in essentia adhibita, quæ ultima etiam cum moderata spiritus volatilis additione interdum non æque continuo usu offerenda conducit.* Et profecto, certa & multiplici observatione edoctis contumacissimum hunc morbum minime remediorum multitudine eorundemque crebra cum aliis mutatione vinci, non absque fundamento adserere licet, millefolii solius decocto vel infuso per longum tempus usurpato adsumtis interdum lenioribus laxantibus & servata insimul exactiori diæta plus præstari posse hoc in casu, quam omnibus aliis tantopere commendatis morosiusque paulo conquistis medicamentis.

16. QVIA flores chamomillæ vulgaris etiam propter oleum, quod per destillationem identidem sapharinum prodit, temperatum & sedativum, millefolio penitus ferme similes & ipsi affines vires alunt, eorum hinc virtus non dispar, sed vna eademque in commemoratis iam affectibus deprehenditur. Qua de causa opportune admodum in horum morborum curatione hi duo flores coniungi & in vnum medicamentum, ut infusum vel decoctum aut in clysterem vel cataplasma recipi possunt: siquidem hic flos in omnis generis doloribus, spasms quoque & hæmorrhagiis sistendis fere est incomparabilis. Id vero habet maxime familiare præ millefolio, quod semisfosculi illi lutei, qui discum formant, ad drachmam vnam aliquotes die vacuo sumti pertinaces febrium intermittentium insultus atque impetus potenter sistant & comescant longe tutius, quam ipse laudibus in cœlum sublatus chinæ chinæ cortex, qui ex remoto Peruviano regno ab aliquot inde iam annis tanto pretio redemptus fuit. Nullum vero simplex in rerum natura reperitur, quod tam amicum est intestinis, quam flos chamomillæ, qua de causa etiam non sine consilio & singulari fructu huc vsque solos flores chamomillæ ad clysteres in omnibus fere affectibus loco aliorum

rum ingredientium recipiendos curavi ac suasi addito, si opus videbatur, oleo amygdalarum dulcium vel huius loco substitutis ad sumtus parcendos oleis lini aut raparum, quæ & salis communis sufficienti quantitate, si præsertim alui deiectione tentata simul fuerat; quippe sal commune in stimulan- dis intestini recti tunicis meliorem longe usum habet, quam varia extracta & electuaria lenitiua vel purgantia, quibus omnibus inter clysteres carere possumus optime.

17. DENIQUE millefoliata mirifica pollent virtute in læsionibus, corruptionibus internarum partium consolidandis, adeoque in pulmonum, renumque exulceratione eorum usus circumspectus non plane est contemnendus. a FONSECA *Tom. II. Consil. Med.* & IOHANNES PRÆVOTIVS in *Medicina pauperum* valde extollunt puluerem millefolii in phthi- si & vlceribus pulmonum, si quotidie eius drachma vna in iusculo calido sumatur. Neque dubium est, quin dictis in morbis maximam interdum præstet utilitatem, præsertim si æ- grotantis ætas non sit proeclior, si succos adhuc in venis alat benignos, nec marcor, languor & summus virium lapsus in corpore sentiatur, sique insimul accuratior victus ratio obser- vetur & medicatio hæc per dimidium annum & ultra sollici- ta cura continuetur. Eundem vero & illustriorem adhuc af- fectum in phthisi ab usu continuato decocti millefolii cum conserua rosarum rubrarum præparati & bene clarificati exspe- ctare possumus. In læsionibus & exulcerationibus intestino- rum post dysenteriam grauem flores millefolii & chamomil- læ in clystere adplicati vel intus quoque in forma decocti ad- sumti ad consolidationem egregiam exserunt efficaciam. In casu ab alto ad sanguinem congrumatum resoluendum aqua millefolii destillata vel eius decoctum, puluis quoque cum aceto itidem præstantissimæ sunt virtutis.

18. LVSTRAVIMVS iam nostri simplicis usum internum, su- perest igitur, vt paucis tantummodo verbis agamus de usu eius externo, cum satis etiam ille nobilis sit. Nolumus ve- ro hic esse longiores, quia abunde eius usus chirurgicus & vulgo

vulgo est perspectus. Et primo quidem egregiam exserit efficaciam in tumoribus & inflammationibus externis emolliendis ac discutiendis. Speciatim vero cataplasma ex floribus millefolii, chamomillæ, meliloti aliisque similibus speciebus præparatum in tumoribus odontalgicis, itemque pedum oedematosis non sine effectû est euidenti. In erysipellate flores sicci prius contriti ope lintei triplicati parti inflammatione tactæ impositi optime conducunt. Linimentum ex aqua millefolii, chamomillæ, aceto vini, spiritu vini camphorato & cerussa partibus genitalibus, cumprimis præputio ac scroto ab impuriori venere tumore affectis frequentius de die calide adplicatum egregio est iuuamini.

19. PRÆTEREA decantatissima est millefolii apud omnes fere auctores & botanicos & practicos singularis vis traumatica, siquidem non solum vulnera recentia optime conglutinat, sed & vlcera etiam fistulosa & mali moris purificat & ad consolidationem perducit. Est igitur hoc millefolium inter vulnerarias plantas facile princeps & iam ab *Achille* armipotente Græcorum heroë ad vulnera militum suorum sananda adhibitum fuisse traditur. SIMON. PAVLI in *Quadripart. Botanico* citat historiam ex HOLLERII *lib. II. cap. V. institut. chirurg.* petitam de quodam rustico, cui decisus erat nasus ea parte, qua os in cartilaginem definit, qui sola herba millefolii tusa & in vino nigro trita imposita breui fuit restitutus. RENODÆVS in *materia medica* ita de millefolio disserit: *qualitatem habet adstringentem vulnerariam. Optime ab inflammatione vindicat, desiccatur & glutinat, vlceribus quoque prodest & sanguinem undecunque fluentem sistit.* conf. quoque ZWINGERVS & LONICERVVS in *Herbariis suis*. Vulgus in vsum vulnerarium subigit aut tundit herbam millefolii in formam cataplasomatis addito tantillo axungiae porcinae vel lardi infumati. Quidam etiam telæ arenearum parum remiscere ac vulneribus recens inflictis id adplicare solent. Gargarisma ex aqua destillata millefolii vel eius decoctione vsurpatum resistit putredini faucium, gingivæ, & colli. Herba contusa

(*Hoffm. Opusc. varii argumenti.*)

XX

car-

carbunculis cum fructu quoque adponitur, vti testantur IOH. CRATO *libr. de peste.* P. DROETVS *Consil. de pest. cap. X.* IUL. PALMAR. *de febr. pestilential. cap. XVIII.* M. VNZER *Antidot. pest. lib. II.*

20. VLTIMO loco exponendæ veniunt variæ ex millefolio præparationes. Quando herba vel recens vel sicca una cum floribus parumper inciditur & cum sufficiente quantitate aquæ simplicis vesicæ cupreæ vel cucurbitæ vitreæ-capaciori inditur & destillatur, prodit aqua coloris subcœrulei, cui supernatat oleum penetrantissimum coloris saphirini elegantissimi, cui vix datur in rerum natura simile, vnicum si chamomillæ oleum excipias. IOH. SIGISM. ELSHOLZIVS *in Destillatoria curiosa* plurima profert exempla vegetabilium colorate alembicum transcendentium, quippe secundum prædicti auctoris experimentum veronica recens cum vino vel aqua destillata dat aquam viridem, id quod etiam de salvia & rore marino valet; chamomilla Romana oleum flauum destillatione fundit, ex fecibus vini elicitur per vesicam oleum viridissimum, ex cinnamomo aurei coloris, ex petroselino & chærefolio florentibus & in semine constitutis viridiusculum oleum prodit, iridis quædam species cœrulea aquam largitur cœruleam, planta ros folis dicta decenti methodo per vesicam vitream destillata liquorem ad rubedinem inclinantem exhibet & certa pimpinellæ species cœruleo colore imprægnatum spiritum fundit. Meminit quoque curiosus hic scriptor olei cœrulei ex chamomilla destillati, sed de nostri millefolii oleo saphirino altum apud ipsum est silentium. Euoluimus hanc in rem plures alios scriptores tum chymico-pharmaceuticos, tum botanicos, nullibi tamen eius mentionem factam deprehendimus, etsi sollicita cura in id inquisiverimus, tandem casu quodam incidimus in exiguum libellum, quem IOH. POPPIVS Chymicus Coburgensis *de herbis* conscripsit & anno 1625. edidit, qui vnicus auctor iam mentionem iniicit oleorum millefolii & chamomillæ, quod colore cœruleo prodeant in destillatione.

21. MEMORABILE circa oleum millefolii hoc est, quod eius color pulcherrimus saphirum fere superans successu temporis paulatim mutetur, adeo ut gratiam suam intercapedine duorum vel trium annorum fere penitus amittat; spiritus vero coeruleus ex summitatibus destillatus nostro experimento ultra quinquemestrem colorem hunc suum longe amoenissimum exacte servauit, ab eo vero tempore deinceps successiue glaucescere coepit. Falsissima est eorum opinio, qui spiritus & olei millefolii colorem coeruleum vesicis destillatoriis ex cupro confectis deberi adserunt & dicunt solui ab oleo hoc penetrantissimo quasdam cupri particulas & deinceps commisceri eas intime cum oleo & spiritu, ut adeo hanc ob rationem coerulei coloris faciem induant. Refutari vero horum splendida theoria facile potest, si modo destilatio suscipiatur in vase vitreo, ubi itidem hac veste conspicua prodeunt oleum & spiritus. Circa iam dicti spiritus destillationem adhuc est monendum, quod is sub initio destillationis non statim coeruleus appareat & quidem ex hac ratione, quia particulae oleosae ob arctissimam cum ceteris partibus connexionem tum temporis nondum sufficientes ex floribus sunt euolutae & extractae. Quodsi vero aliquandiu continuata est destillatio, tum demum successiue colorem acquirit coeruleum, qui in fine, circa quod tempus potissima olei pars alembicum transcendit, fit saturatissimus. Obseruandum quoque hoc loco est, quod ex floribus millefolii recentibus vel modo siccatis maior olei quantitas & spiritus quoque saturatioris coloris obtineri possit, quam ex diu conseruatis & aridis, quia ex his tempore magna particularum sulphurearum portio exspirat.

22. OLEVM millefolii est magnum anodynum, antispasmodicum & carminatiuum medicamen, qua ipsa virtute egregia quoque spiritus exsplendescit. Spiritus vini rectificatissimus cum oleis millefolii & chamomillae destillatis & camphora decenti in quantitate impraegnatus eximiam dat medicinam carminatiuam ac discutientem, quae longe maiori cum fructu in omnibus istis affectionibus, ubi spiritus vini cam-

phoratus alias adhiberi solet, potest vsurpari. Spiritus iuniperi, in quo sufficiens quantitas olei chamomillæ & millefolii soluta est, concedit egregiam tincturam saphirinam diuretica & emmenagoga virtute non contemnenda præditam. Quodsi spiritus vini superfunditur floribus millefolii & aliquandiu solis digestionem vel leniori ignis calori exponitur, emergit inde essentia virtute gaudens antispasmodica, stomachica & carminatiua non vulgari. Essentia millefolii in pharmacopoliis prostat, uti & extractum, quod ex totius plantæ decocto inspissato conficitur & consimili virtute gaudet, interque pilulas laxantes, quæ simul confortant & humores corrigunt, recte recipitur. Laudatur quoque ab auctoribus nonnullis pulvis herbæ ex planta arida compositus. Posset quoque ex millefolio parari syrupus, qui cum aqua millefolii & cinnamomi haustus egregio foret leuamini in doloribus ventriculi & intestinorum, ut & nephriticis. Communissime herba & summitates millefolii in decocti vel infusi forma præscribuntur hysteriis præsertim & hypochondriacis subiectis, quæ ab uteri spasmodis, flatulentis & ventris torminibus frequentius afficiuntur, quibus etiam non mediocri est solamini.



DISSERTATIO IV.

DE

CAMPHORÆ VSV INTERNO
SECVRISSIMO ET PRÆSTANTIS-
SIMO.

§. I.

MEDICAMENTA sua etiam fata experiri, nemo facile, nisi rudis sit historiæ medicæ, in dubium reuocabit. Quid enim frequentius occurrit, quam quod non tantum diuersæ circa remediorum efficaciam apud medicos vigeant opiniones, sed & quædam interdum ob mirabilem maxime, qua celebrantur, virium potentiam, ad coelum vsque tollantur, quæ interuallo temporis ob noxiam, quam forte creantur, iterum culpantur & ad ima vsque deprimuntur. Neque tantum ab antiquis præstantissimis medicis maximopere commendata inque pharmacopœis recensita medicamenta cum primis composita hoc fatum sustinent, sed maxime nostris temporibus, quibus medicina magis exculta & in sereniorum lucem posita est, magnificæ famæ, quæ exstiterunt remediorum genera, paucis abhinc annis laudem atque existimationem suam penitus ferme amiserunt. Quanta enim famæ celebritas fuit paucis abhinc annis laudano opiato HELMONTII, elixirio proprietatis PARACELSI, antihectico POTERII, aquæ benedictæ RVLANDI, specifico cephalico MICHAELIS, tincturæ eius bezoardicæ, pulueri bezoardico SENNERTI, spiritui oleoso volatili SYLVII, tincturæ aperitiuæ MOEBII, tincturis ferme omnibus martis, bezoardico sic dicto solari, Iouiali, cerussæ antimonii, bezoard. minerali, panacæ GLAUBERTANÆ, theriacæ coelesti QVERCETANI, sali volatili cornu cerui, chinæ chinæ, illis, qui in artis operibus indefesso studio versantur, notissimum est. Vtpote hæc ipsa velut polychresta & arcana

Xx 3

ob

ob mirabilem & pene diuinam virtutem ipsis concessam recondebantur, quorum tamen fama atque existimatio nostris ferme temporibus periit atque exspirauit, eo quod conceptam medentum spem maxima ex parte eluserint.

2. Ex dictis his artis nostræ misera facies elucescit, quæ nunquam fere sibi constat, sed semper innouatur, reformatur & immutatur. Enimuero nolo hoc loco ipsa culpæ vel accusare remedia, quibus eximias vires agendi in summouendis morbificis causis utique Numen benignissime infudit, sed medicorum coarguo ignorantiam, inconstantiam, inque iudicio & applicando præcipitantiam: quorum plurimi, cum parum docti & solidi sint & recte ratiocinandi usu ac arte destituti, hinc in sentiendo sunt inconstantes, huc vel illuc agitantur, inque diuersas partes facile distrahuntur: maxime omnium vero eorum opinionibus, quos fama vulgi, casus, aut cæca fortuna forsan extulit, & qui in adplausu & existimatione viuunt, inhærent. Alii in præceptoris & magistri sui, quem sæpius etiam sorte nanciscuntur, vnice verba iurant, eiusque dicta quasi Apollinis Delphici oracula æstimant. Complures, dum a certi remedii usu sinistrum vel dextrum effectum obseruant, protinus hunc soli remedio nulla aliarum causarum concurrentium habita ratione, quæ multum remedii virtutem modificant, adscribunt, & hinc noxium aut proficuum in his vel illis euincendis morbis illud eximunt, sique tantopere decantatum remedium votis & expectationibus non recte respondet, tunc mox ad alia ab aliis magnifice laudata, vel etiam ad exotica transcurrunt, quo efficitur, ut nunquam recte notitiam remediorum facultatis atque potentiae, quæ tamen fere præcipuam therapiae medicæ partem sustinet, acquirant. Maxima itaque scientiæ & prudentiæ medicæ pars est, nosse medicamenta, nosse eorum facultates ac vires, neque minus eorum usum ab abusu recte distinguere, ita enim fiet, ut neque ipsis nimium laudis vel virtutis tribuamus, neque nimium detrahamus. Nostri iam instituti est de interno præstantissimo camphoræ usu nostras obserua-

tio-

tiones atque rationes exponere. Neque enim ignotum est, quam præstans atque eximius camphoræ sit vsus externus, at nescio, quo fato eius internus vsus minus tutus atque suspectus adhuc creditus fuerit; cum tamen non facile in rerum natura simile detur remedium, quod maiores in medendo camphora effectus exhibeat.

3. PRIVS vero, quam de interno camphoræ vsu & eius admiranda in compluribus morbis depellendis efficacia disseramus, quædam de illius origine, solo natali atque natura peculiari præmittenda esse censemus. Quod itaque ad eius originem ac generationem attinet, est ipsa foetus arboris glandiferæ in India Orientali, cuius folia & radices tenerissima tali resina sunt imprægnata, vnde etiam arbor camphorifera adpellatur. Fusiores vero huius arboris descriptionem exhibuerunt BREYNIUS in *exoticis plantis Cent. 2.* & KLEYRVS in *Annotationibus*. Crescit hæc arbor in Iaponiæ silvis absque cultura insigni in abundantia, radicem habet crassam, densam, subrusam & ligneam, quæ admodum olet camphoram, cortex est inæqualis ac grysei coloris, lignum vero solidum, ponderosum, subfuscum, oleoso humore turgidum & identidem camphoræ odorem de se spargit, rami oblongi, late expansi atque diuisi foliis alternatim positis gaudent palmam longis & duos transversos digitos latis, referunt Cassiæ ligni folia & contritu fragrantissima camphoræ effluvia emittunt. Hæc arbor ad quercus altitudinem in India quandoque adsurgere dicitur. Perpetua fronde viret & sub nostro quoque climate culturam fert, modo ab acri gelu & ventis borealibus sollicitè defendatur. Eam non modo in horto medico Leideni, sed etiam in famigeratissimo illo Schwebbelensi, quem ingenti sumtu adornavit generosus Dominus de Mynchhausen, vidimus. Neque vero tantum in vno eodemque Indiæ loco progignitur, sed alibi quoque eius prouentus visitur, utpote in Sumatra & Insula Borneo sponte & copiose in silvis crescit, nec multum a Iaponica distat.

Quan-

Quando inciditur hæc arbor, profluit oleosus succus, qui particulas camphoreas non paucas continet.

4. HÆC itaque arbor camphoram nobis largitur, quæ non vno modo ex ipsa elicitur. Distinguitur autem camphora in natiuam & factitiam, illa granulata est, & ex arborum trunco solis æstu sponte transfudat, vel ex fisso aut inciso ligno prolicitur & rarissima est: factitia vero, quæ ad nos in glebas & panes compacta transportatur, ex radicibus, ligno, ramis ac foliis dissectis ignis officio coctione extrahitur atque sublimatur. Natiua maxime ex Sumatrana & Borniensi arbore depromitur. Iaponenses vero per destillationem longe maiorem eius quantitatem obtinent, segmentis enim adfundunt aquam simplicem sufficienti quantitate, & postea in vesica, quæ collo longo ac angusto & capitello lato est instructa, destillationem adornant; in capitello vero ipsa camphora colligitur, ac condensatur. Quodsi opus esse censeatur, denuo sublimatur, quo præstantior puriorque euadat.

5. PERSPECTA iam genesi ac origine camphoræ, res poscere videtur, ut eius quoque naturam ac indolem paulo penitus inquiramus. Persecuturis vero excellentissimi huius simplicis naturam & proprietates paulo adcuratori indagine ac meditatione, in vniuersa rerum natura vix simile sibi aut par haberi iure pronuntiandum est. Quare etiam ob peculiare sibi proprias vires ac qualitates, ad quod genus vel speciem referenda sit, nondum inter medicos & physicos consensus est. Veteres camphoram pro resina habuerunt, eo quod ex arbore incisa succus elicitus instar resinæ inflammabilis concre scat; at vero, num ad resinas camphora sit referenda, merito dubitandum est. Nulla enim ex omni resinarum genere seu natura talis seu arte præparata resina fuerit regeritur, quæ accensa nullo cinere relicto tota in auras auolet. Quid quod haud vlla datur resina, quæ vase clauso per ignem tota in altum eleuatur. Ea enim est natura atque indoles resinarum, ut vehementiori igne tractatæ, phlegma, spiritum & oleum fundant. Accedit, quod nulla ex resinis nobis

nobis cognita sit, quæ tam promte insignem quantitatem spiritus vini rectificatissimi recipiat atque absorbeat, sicuti id obseruare licet in camphora, cuius pars vna exacte a spiritu vini rectificatissimi partibus duabus dissoluitur.

6. CVM itaque camphora inter resinas vix commodum adinueniat locum, hinc recentiorum nonnulli in eam iuerunt opinionem, vt camphoram salis volatilis oleosi possidere naturam adsererent, impulsæ maxime ad hanc sententiam ex eo, quod instar salis volatilis oleosi accedente calidiore igne non modo tota in auras auolet, sed & in clauso vase ne minima quantitate relicta in sublime feratur. Verum enimvero etiam hi ipsi mihi a veritatis tramite valde aberrare videntur, vtpote nullum datur sal oleo etiam intime imbutum, quod in flammam abripiatur vel quod cum rectificatissimo spiritu vini aut oleo quodam arctissimam vnionem subeat. Et qui camphora salis titulum iure mereatur, cum solutionem in aqueis menstruis penitus auerfetur? Neque isti rem accurata acu tangere mihi videntur, qui inter gummata illam collocant, quia & solutione & volatilitate plane cum ipsis nullam alit adfinitatem.

7. VT nostram quoque de camphora promamus sententiam, dicimus: camphoram nihil nisi oleum volatile tenuissimum esse, ast coagulatum, non liquidum. Id vero multis iisdemque firmissimis rationibus corroborabimus. Primo enim multæ dantur species fragrantis odoris & saporis penetrantis, quæ subtile oleum, quod etiam promptissime sub destillatione in vesica cum aqua fundunt, in se custodiunt. Hac ratione non modo ex omnibus fere aromatibus, sed etiam ex plantis oleo volatili turgidis, vt sunt lauendula, maiorana, mentha, rosmarinus, ruta, oleum destillatur, vnde profecto non mirum est, camphoriferæ arboris partes tale oleum fundere. Secundo sicuti omne oleum destillatum flammæ admotum mox accenditur atque totum auolat & aterrimam fuliginem emittit: ita etiam fit cum camphara, quæ mox flammam concipit, tota auolat, nigerrimo fumo exhalante.

(Hoffm. Opusc. varii argumenti.)

Y y

Dein,

Dein, quemadmodum omne oleum destillatum in spiritu vini rectificatissimo præsertim tartarifato soluitur, adeo, ut partes duæ spiritus vnam partem olei v. g. lauendulæ, in se recipiant intimeque inuicem vniantur: ita etiam experimentum cum camphora feliciter succedit, dum nempe vncia vna spiritus vini rectificatissimi promptissime dimidiam camphoræ vnciam dissoluit. Et quemadmodum solutioni oleorum cum spiritu vini peractæ adfusa aqua oleosas particulas præcipites deiicit: simile ratione soluta in spiritu vini camphora, menstruo aqueo accedente, rursus fundum petit & præcipitatur, mixtura inde reddita turbida albescente. Denique sicuti olea destillata, quibusdam saltim grauioribus aromatibus exceptis, propter leuitatem aquæ supernatant: ita etiam camphora in omnibus aqueis liquoribus in superficie hæret.

8. POSTREMO camphoram cum oleis destillatis similis eiusdemque esse indolis, vel ex eo colligitur, quod illa in spiritu vini rectificato soluta & per alembicum destillata non simul tota euehatur, sed in fundo cucurbitæ, nisi vltiori destillatione in alembicum vrgeatur, pars illius relinquatur, perinde ac fieri solet cum solutis oleis æthereis in spiritu vini rectificato, quæ destillationi submissa, spiritum oleosa substantia subtiliori quodammodo imbutum, fundunt, potiori tamen olei parte in fundo cucurbitæ relicta, quæ vltiori commissa igni separatim in forma olei prodit. Hæc exactissima experimenta satis abundanter comprobant, maximam inter camphoram & olea destillata intercedere conformitatem. Quapropter non satis mirandum est, quam inani & frustraneo conatu magni etiam chymiatrum oleum ex camphora destillatum eliciendum quæsiuerint. Quo fine obtinendo & sua ingenia & nobilissimum hoc simplex dire torserunt atque adflixerunt: ignorabant enim hi lepidi camphoræ carnifices, ipsam iamdum oleum volatile & destillatum esse. Sicuti vero ridiculum est ex oleis destillatis oleum elicere velle, cum iam tale quid sint: ita etiam, si quis ex camphora oleum vult perficere, res merito paradoxa dici debet.

bet. Decepti vero omnes sunt in eo, quod camphoram refinam esse credebant, quæ sicuti facile per destillationem oleum largitur: ita etiam hoc ipsum ex camphora eliciendum omni studio curarunt.

9. VERVM enim vero non eadem, sed diuersa camphoræ natura ab oleis destillatis videtur, cum hæc solida & sicca, illa vero pinguis, fluida quoque & manus madefacientia sint. Deinceps & in eo discrimen notabile obseruatur, quod oleum volatile denuo ex retorta vitrea per arenam destillatum subtilissimum quidem largiatur oleum, sed crassum magna relinquatur: camphora vero tota in forma sicca, ne ulla materia relinquatur, in auras abit. Quibus dubiis, vt satisficiamus monendum est, dari quædam simplicia in vegetabilium regno, quæ volatilem illam sulphuream & inflammabilem partem, quam in mixtione custodiunt, non in forma pinguis olei, sed in sicca forma, non secus ac camphora elargiantur. Ita si florum rosarum cum sale bene contritorum ac maceratorum magna quantitas cupræ vesicæ immittitur & cum aqua destillatur, præter aquam fragrantissimam etiam oleum, quod ipsi supernatat album, coagulatum instar seui, elargiuntur odoratissimum, quod non secus ac aliud oleum in spiritu vini rectificatissimo dissoluitur.

10. SIMILI modo ante aliquot annos ex ligno aloës tale oleum destillatum instar camphoræ prolicui, ingentem nempe raspaturæ ligni aloës odoratissimi ad libras decem accedentis sumsi quantitatem, aquam fluuiatilem adfundi curavi, qua per aliquot dies in temperato loco macerata fuit, postea, adornata destillatione, prodiit aqua, cui oleum ficcum, album, odoratissimum miræ suaueolentiæ & penetrantis saporis supernatabat, & ad drachmas sex minimum fuit collectum. Hoc resolutum in spiritu vini rectificatissimo elegantissimum liquorem cephalicum præstantissimi odoris & virtutis subministrabat. Ex radice recenti camphoræ simile oleum, quod camphoram & ipso odore & virtute æmulatur, destillari ex vesica posse mediante aqua

pto in materiam medicam notauit. Ita porro ex cortice radicis cassiæ cinnamomeæ camphoram parari posse GRIMMIVS docet in *Laboratorio Zeulónico*. Ex cortice vero radicis arboris cinnamomiferæ oleum paratur liquidum, quod camphoræ & cinnamomi fragrantem odorem refert & ex India ad nos transportatur, nullumque dubium est, quin ex aliis fragrantissimis corticibus, radicibus & gummatibus simile oleum ficcum per destillationem haberi possit.

11. QVAMVIS vero camphora ad oleorum æthereorum classem perquam commode possit referri, quod ex antea adductis experimentis & rationibus satis superque adparet: nihilominus talismodi sicca olea, vt camphora, præ pinguibus illis liquidis quasdam peculiare & sibi proprias facultates in sinu suo recondunt, multum enim inter se ratione volatilitatis seu tenuitatis partium differunt. Nam camphora non modo igne submisso, sed & sub moderate calido aëre tota in auras & quidem celeriter auolat & euaporat, nullo vestigio remanente: contra vero destillata olea tardissime auolant, emittunt saltim tenuissimas sulphureas partes, crassioribus & viscidioribus relictis, vnde olea destillata vetusta crassescunt, adeo, vt terebinthinæ consistentiam accedant. Quapropter etiam camphora, ne auolet, longe exactiori custodia & conseruationis cura in vasis muniri debet, quam ipsa olea destillata, quorum euaporatio non tam prompta & expedita est, sicuti camphoræ. Hanc ob causam pharmacopœi perperam suis rebus consulunt, quod camphoram, citra exquisitam clausuram, libero sic aëri committant, falsa traditione & opinione occæcati, quod adspersio seminis lini eius euaporationem impediat, cum tamen parum vel prorsus nihil huic scopo inferuiat.

12. Ex hoc igitur adparet, longe maiori partium sulphurearum inflammabiliumque tenuitate & exiguitate camphoram præ aliis oleis destillatis pollere, vtpote quæ viscido quasi quodam & ramoso inuolucro excipiuntur & custodiuntur, quo camphora summe volatilis ac tenera caret. Hæc
sum-

summa partium sulphurearum tenuitas a viscido pingui inuolucro liberata efficit quoque, vt camphoræ virtus ab olei cuiusdam destillati viribus longe multumque distet ac differat, nam vtut camphora tota inflammabilis sit, nihilominus tamen in corpore nostro calorem haudquaquam efficit, adeo, vt potius intensiorem corporis feruorem sistat, quo circa etiam a veteribus non calida, sed frigida habita fuit. Etenim viscidiores & secundum CARTESII doctrinam ramosæ olei destillati partes sulphur tenuissimum & inflammabile in carcere quasi irretitum & conclusum habent, vt minus promte per poros corporis euolare possit, sed diutius in corpore maneat, vnde etiam intensiorem intestinum sanguinis partium motum melius sustinet atque tuetur.

13. HAC quoque de causa omnia olea destillata, gummata quoque, quæ insignem olei quantitatem custodiunt, vt sunt gummi ammoniacum, myrrha, balsamum Peruuianum, sagapenum, galbanum, sanguinis & humorum massam atque vniuersum corpus mire exagitant, magnumque æstum atque feruorem accendunt, siquidem particulæ sulphuræ, ætheræ, quæ omnis intestinæ calidæ agitationis causa sunt, anfractuosæ, viscido & gummoso contextu inuolutæ per maius temporis interuallum remanent, neque tam facile ab inuolucro hoc se possunt emancipare, quare effectus diutius persistit ac durat: secus fit in camphora, cuius partes per poros citissime auolant, hinc etiam vna guttula olei cinnamomi plus calefacit, quam decem grana camphoræ. Quod vero viscosa, pinguis & ramosa olei substantia volatilitatem impediat vel ex eo liquidissime patet, quod camphora in oleo amygdalarum dulcium expresso vel in oleo de cedro aut lauendulæ soluta, sub liberiori quoque aeris accessu non facile in auras abeat, sed sub tegmine hoc oleoso diutius eius substantia contineatur. Et hæc forte fuit ratio, quare veteres semen lini ceu valde oleosum camphoræ adiici curarunt; quo minus eius volatiles partes in aerem secedant, quanquam hic effectus longe felicius obtineri possint, si modo camphoræ super-

ficies oleo amygdalarum dulcium inungatur, quod ad tutelam partium subtilissimarum plus, quam talismodi semen adiectum, efficere poterit.

14. QVOD vero camphora volatilis, tenuissimi & inflammabilis sulphuris copia imbuta sit, vel vnice ex sequenti, eoque perpulchro, experimento clarissime euincitur. Nostreis enim temporibus ex vrina fermentata debita encheiresi in Anglia præsertim paratus phosphorus est celebratissimus, qui leui attritu lucidissimum sine flamma ignem spargit, cuius causa ab acutioribus physicis in partium sulphurearum motu intestino, celerrimo, verticillari non incongrue constituta videtur. Hic lucidissimus ignis non melius, quam beneficio camphoræ multiplicatur ac propagatur. Sumitur nimirum granum vnum phosphori & grana decem camphoræ adduntur: hæc inuicem in mortario probe prius contusa miscentur, quo facto tota camphora fit lucidissima, quæ, si soluitur in oleo caryophyllorum, liquidus fit phosphorus, quo sine noxa & metu inflammationis, caro, cutis, crines, & vestes inungi possunt, quod elegantissimum de nocte præbet spectaculum. Huius vero lucis phosphori per camphoram propagationis nulla alia subest ratio, quam quod camphora propter summam partium sulphurearum tenuitatem ad intestinum lucidum motum producendum sit aptissima. Id autem minus experiri licet in aliis oleis destillatis, si cum solo phosphoro misceantur. Atque adeo ex hoc etiam experimento peculiaris & eximia camphoræ proprietas ab aliis oleis destillatis distincta elucescit.

15. HÆC igitur partium sulphurearum tam incomparabilis tenuitas in camphora efficit, vt eius quoque vsus plane sit singularis, neque oleis aliis destillatis proprius. Ita camphora, in vniuersa rerum natura nullum datur excellentius & magis discutiens remedium. Omnes enim humores in tubulis & poris stagnantes promptissime dissoluit, partim poros obstructos aperiendo, partim etiam fibras relaxatas animando, vt vel exhalent particulæ subsistentes, vel in motum ac circulum

culum redigantur. Qua de causa in omni dolore, siue iste in pericranio, siue perioftio persistat, spiritu vini camphorato nihil excellentius est. In omni præterea tumore abigendo, a quacunque etiam causa subortus fuerit, idem spiritus mirabiles fouet vires, namque tonum fibrarum roborando humorum cursum atque iter promouet.

16. DENIQUE in omni inflammationum genere, imo in ipsa gangræna conuenientissimum est remedium, non modo enim præseruat ab his sæuissimis malis, sed etiam, si eorum cohibitioni locus superest, nihil hisce casibus ipsa camphora exterius adplicata est præsentius, sicuti id solertiores medici & chirurgi longo vsu atque experientia compertum exploratumque habent. Eiusmodi vero efficacia roborans & discutiens in dolorum & inflammationum atrociam a nullo destillato oleo vel alia inflammabili substantia in rerum natura poterit exspectari vel obtineri. Tametsi vero magna quoque oleis quibusdam destillatis æthereis, si debite fuerint soluta, & roborandi partium tonum & fibrillarum exorbitantes motus sedandi virtus insit, vt non sine fructu adhiberi possint: nihilominus in inflammationum vi compescenda inque partis inflammatae ardore extinguendo camphoratus spiritus ceteris multis parasangis præcedit.

17. VTRVTR vero a nullo facile medicorum eius summa & mirabilis virtus ab vsu externo negari possit: nihilominus plures medicorum exstiterunt, & adhuc sunt, qui eius internum vsum admodum reformidant & damno atque exitio facile esse posse sibi persuasum habent; hinc veteres ea rarissime & parca admodum dosi in medicamentis & formulis suis vti consueuerunt, nullam aliam forsitan ob rationem, quam quod eam credebant calidissimam, quæ intensam sanguinis ebullitionem efficiendo æstum atque delirium accendat. Alii contra eam valde frigidam rati venerem ipsam extinguere credebant, cum tamen effectus ille, qui frigiditati adscribitur, cum intenso calore, qui ab aliis camphoræ adsignatur, minime conueniat. Quidam nimis vaporosam & caput & cerebri

rebri neruorumque vitio originem ducunt, eam minus conducibilem medicinam iudicarunt. Sed quod omnis hic metus inanis atque frustraneus sit, quo boni illi de cetero ac eximii viri laborarunt, & quod camphora non insegura, sed optima medicina sit, tum ratione & experientia, cum etiam auctoritate, quæ fulcimenta nostræ artis sunt, solide demonstrabimus.

18. QUVM vero securum camphoræ vsum internum dicamus, primo omnium hoc vocabulum, ne offensionis lapis fiat, dilucida expositione enucleandum est. Sensu itaque medico securum illud audit, quod naturæ humanæ conueniens est, neque in copiosiori dosi datum, facile motus aut turbas in corpore excitat & periculum gignit. Insecurum autem adpellatur, quod valenti agendi principio instructum in minori & proportionata dosi efficaciam exserit; in maiori vero commotiones vehementes & excretiones enormes suscitatur. Ex his dictis tamen minime sequitur: secura non posse nocere, quod per abusum illorum utique solet contingere, quemadmodum etiam de insegurorum utilitate non penitus desperandum, siquidem quando recte, prudenter & tempestiue adhibeantur, magna eorum vis & efficacia in persanandis morbis proditur. Iuuat tamen hanc distinctionem medicamentorum in praxi tueri eam ob rationem, ut quis prudentior medicus intelligat, abusum medicamentorum inseguriorum & fortiorum plus periculi gignere, quam si quis benignis securisque abutatur; maiori itaque cautione ac circumspeditione esse hæc adhibenda, facile nullus ibit inficias. Iam vero camphoram maiori in dosi exhibitam plures æstimat inseguriorem, adeoque periculi minus expertem.

19. CRATO minus æquus camphoræ censor est, & eam in morbis ob dolores capitis, quos concitare putat, fere ablegat; hinc robore maxime valentibus subiectis vix tria grana præscribere ausus fuit. Sed præcipuus auctor huius præiudicii mihi videtur medicus alias & chymicus magni nominis DANIEL LVDOVICI in *Pharmacia*, quem postea multi professo-

fessores, doctores & horum discipuli non pauci vsque huc presso pede sunt securi. Hic in *Pharmacia hodierno seculo applicanda Dissertat. I. de Diaphoreticis vegetabilibus* camphoram calidissimam resinam dicit, eamque volatilibus, calidioribus ac vaporosis medicamentis accenset. Dicit porro de eius operandi ratione, quod producat angustias, solutiones virium funestas, frustraneas ebullitiones & id genus alia. In eruditis, qui debilioris capitis sunt, itemque in delicatioribus feminis cephalalgias incompefcibiles atque deliria sæpe lethalia in febribus continuis præsertim in earum statu secundum ipsius sententiam excitat. Cum igitur tali modo inter calidiora remedia camphoram reponat citra manifestam sufficientemque rationem, hinc multis eam exilioris virtutis medicamentis postponit. At vero (pace huius viri dixerim) camphora minime est medicamentum calidissimum & noxium, quin potius prudenter, debito tempore & conueniente dosi exhibitum recensita symptomata febrium feliciter tollit & protinus aufert, siquidem camphora ad scrupulum vnum vel etiam ad drachmam semis in spiritu vini dissoluta & sano homini cum sufficiente vehiculo exhibita, quemadmodum experimentum multoties fecimus, corpori neque intentiorem æstum aut calorem infert, neque pulsus adaugere, sed potius manifestum refrigerium præsertim circa præcordia præstat. Multo minus vero adpetitum exstinguit, sitim mouet, aut urinam coloratiorem reddit, quod tamen ab omnibus nimis calidis fieri debet, hinc ad unciam spiritus vini ingestus vel vnicus haustus vini generosi plus caloris corpore, quam duæ drachmæ camphoræ inferunt.

20. QVODSI ergo eiusmodi symptomata a camphoratis remediis forsitan concitata fuerint, tunc sane illum effectum magis calidioribus essentiis atque elixiriis, quibus camphora adiecta fuit, quam ipsi camphoræ adscribendum iure censendum est. Camphora certe propter partium tenuitatem, qua pollet, cito e corpore auolat & intime poros subiens eosque obsidens, animando fibras inertes & relaxatas, non mo-

(Hoffm. Opusc. varii argumenti.)

Zz

do

do expeditiorem sanguinis & humorum cursum facit, sed & transpirationem valide adiuuat, tubulos obstructos aperit & peregrinas atque naturæ alienas partes expellit. Quod autem usum internum camphoræ nonnulli reformident, eo quod venerem sopiat atque exstinguat, id minime experientiæ est consentaneum. Nouimus potius camphoram naturam roborando cupiditatem coëundi concitasse. Et notatu digna sunt, quæ clarissimus PAVLI in *Obs.* 235. *M. N. C. Dec. I. A. VI. & VII. prodidit: est, inquit, in vicinia iuuenis vegetus & sanus, cui meo iussu in omni fere cibo ac potu camphora per aliquot septimanas a matre data fuit, ipse tamen minime recessit ab indole sua puellarum amantissima.*

21. Nos ea sumus in sententia, quod in vniuerso rerum naturæ sinu vix vllum reconditum sit simplex, quod ad submouendam de corpore malignitatem, cuius naturam in penetranti putredine tam solidarum, quam liquidarum partium reponimus, non detur ipsa camphora præsentius. Quare iure meritoque alexipharmacorum princeps dici meretur. Deinceps ad contagii siue maligni miasmatis morbifici vim infringendam, illudque mox ab initio de corpore propulsandum summum camphora est remedium. Morbi enim, qui ex contagio nascuntur, ex putrido quodam vapore seu halitu in interiora corporis suscepto fiunt, qui cum saliuiali latice in ore mixtus descendens ad ventriculi & intestinorum sinum humores ibi stagnantes ad fermentationem subeundam faciles, vt sunt biliosi & saliuales, penitus corrumpit, ipsisque putredinem inducit, quæ postea fluidum corporis nostri tenuissimum, quod maxime in membranis, nervis & fibris habitat, contaminat, vnde solidorum vis motrix, tonus & robur perit, quod summa virium conuulsio denotat atque sic humores & sanguis tardius non modo circulantur, sed & ad sphacelosam corruptionem inclinant.

22. QVICVNQVE itaque malignos contagiosos a corpore arcere vult morbos, is vel ipsum putridum miasma vel quod ab ipso corruptum fuit ex corporis nostri sphaera propellere
omni

omni studio atque opera nitatur. Nihil vero ad hoc præstandum aptius est camphora, vtpote quæ oleo penetrantissimo omnes corporis poros peruadit ipsasque fibras motrices, e quibus solida componuntur, citra augmentum caloris armat, quo fit, vt fluida corporis promptiori cursu per omnes tubulos corporis ferantur, inde stases corruptiux non modo impediuntur, sed & illud tenue putridum sanguini admixtum per glandulas & poros subcutaneos, velut congruum omnis excrementi spirituosius tenuis emunctorium, expellitur. Vnde etiam veteres eius virtutem in peste & malignis mirabilem agnouerunt. Quam ob causam non modo *electuarium antipestilentialis Kegleri*, sed & *pulverem Pannonicum rubrum*, cuius virtus, quæ ab admixta camphora maxime dependet, in malignis expellendis febribus semper plurimi habita est, ingreditur. Habet quoque camphoram *mixtura simplex Paracelsi* & *famigeratissima Michaelis bezoardica tinctura*, de qua tamen monendum ducimus, quod, si commotio sanguis ab eius usu paulo concitator fiat, is effectus non tam camphoræ, quam potius aliis admixtis radicibus calidioribus & ingredientibus debeat adscribi. Quam potens camphora sit in sphacelo partium externarum, quam profunda inflammatio minatur, auertendo remedium, vel medicæ artis & chirurgicæ elementa edoctis haud ignotum est. Quodsi igitur tanta eius laus est in sphacelo partium externarum auertendo, quidni etiam eius vsus internus ad interiorum sphacelationem viscerum præcauendam eadem ratione proficius sit? Quum vero rationi etiam ipsa experientia optima veritatum medicarum magistra adstipuletur, merito concludimus camphoram in omnibus malignis putridis morbis inque ipsa etiam peste omnibus alexipharmacis esse præferendam.

23. HVIC nostræ sententiæ primo adstipulatur MINDERERVS in *Lib. de Peste Cap. XV*, dum, inquit, *nostris laudibus insigniter deprædicanda venit camphora: non mirabile modo, verum etiam forte & efficax alexiterium est*. Modum operandi ita explicat: *interno nostro calore mox ignita & in corporis*

quasi meditullio flagrans inquinatos spiritus eosque tetros ac fædo miasmate pollutos aut inspiratos veneni tabe aliqua contaminatos halitus iam cordi vicinos ac circa præcordia hærentes exurit & sicco plane ac igneo calore peruadens partem expellit, partem combustionem absument, partem corrigit atque emendat, partem per sudorem pellit. Neque Iohannes CRATO in *Epistolis medicinalibus* a SCHVLZIO editis pag. 103. diuersæ est sententiæ, sed potius hanc confirmat ita differens: *aduersus pestem multa, quæ pro certissimis habentur, fallacia sunt, camphoram omnia remedia excellere re comperi.* Et idem auctor *loc. cit.* sequentibus utitur in febribus malignis puluere, qui ex bolo armenia drachma vna, camphoræ scrupulo vno, ambræ gryseæ granis tribus conficitur. Subscribit huic etiam FERNELIVS *Lib. V. Methodi medendi Cap. 21.* vbi camphoram malignos calidos vapores extinguere statuit. ZWINGERVS in *Epistola ad MONAVIVM inter SCHVLZIANAS num. 246.* camphoram cum spiritu vini solutam in peste & malignis mirifice commendat. HARTMANNVS vero in *Pract. Chymiatr. pag. 364.* aqua antipestilentiali in peste 1629. grassante magno cum fructu usus est & edidit hac de re Germanicum scriptum descriptio vero hæc est: *rec. spiritus vini optimi libram vnā, camphoræ vnciam vnā, croci orientilis scrupulum vnum, soluantur & spiritus vini fit aurei coloris, qui ad cochlearia aliquot dandus est.* Huius spiritus largiorem dosin suadet *Secreta in Tract. de febr. pestilent. pag. 296.* cum primis instante crisi in malignis, & quod miraculum præstiterit adfirmat, Vidimus quoque ex *manuscriptis Beate WEPFERI*, illum in malignis ad drachmam semis pro dosi summo cum fructu exhibuisse.

24. NVLLVS vero facile fuit, qui maiori dosi felicius illa in malignis & petechialibus febribus usus fuit ipso *Riuerio*. Neque alienum erit hoc loco notabiliora circa eius usum ex *Observat. & Histor. RIVERII* recensere. *Cent. I. Obs. 24.* hunc casum insinuat: *iuuenis sedecim annorum, febre maligna laborans, maculis violaceis conspersus cum delirio & alui fluxu, sumsit camphoræ grana duodecim cum pulueris sudoriferi scrupulis*

pulis duobus, copiose sudavit, delirium cessavit, alui fluxus imminutus est, & optime se habuit. Et porro Cent. I. Obs. 29. hunc casum adfert: iuuenis febre maligna cum exanthematibus laborans die nona moribundus visebatur. Dedi pulueris diaphoretici scrupulos duos, camphoræ grana duodecim cum aqua cardui benedicti, & tectus in lecto mansit per duas horas, non sudavit, vesperi eadem portio fuit iterata & copiose sudavit, multo melius habuit & conualuit. Denique Cent. II. Obs. 18. hic casus proponitur: vir quadraginta annorum febre maligna cum maculis liuidis, hæmorrhagia, pulsu paruo & frequenti laboravit, præscriptus fuit hic pulvis: rec. salis prunellæ unciam semis, camphoræ semi drachmam, misce, diuide in quatuor doses, quarum vnā accepit singulis tribus horis, mane multo melius habuit, iussit iterari puluerem & eodem die a præsentaneo vitæ periculo liberatus est, ac paucis postea diebus conualuit. Et Obs. 62. Cent. II. hic casus legitur: iuuenis viginti quatuor annorum febre maligna laboravit cum delirio, & circa undecimum diem motus tremuli & conuulsiui neruorum visi sunt, administrata fuit venæ sectio in fronte & dati fuerunt pulueres ex bezoardico minerali ad scrupulos duos, camphoræ granis duodecim cum aqua cardui benedicti ad uncias duas & euasit. Et Cent. II. Obs. 64. hunc nobiscum communicat casum: mulier quinquaginta annorum febre maligna cum maculis latis violaceis octauo die potionem diaphoreticam supra laudatam sumsit & addita est ventri & pectori cum spongiis, pulsus inde factus est validior ac magis ordinatus & die undecimo parotis apparuit, quæ in suppurationem transiit & conualuit. Et Cent. II. Obs. 73. idem sequenti confirmat obseruatione: filia viginti annorum febre laborans maligna, accessit circa undecimum diem delirium cum contractione neruorum in carpis manuum & lipothymia, ordinatum fuit iulabium ex aqua cardui benedicti uncis tribus, aquæ theriacalis drachmis tribus, bezoardic. mineralis scrupulis duobus, camphoræ granis sex, qui iulepi per biduum usurpati fuerunt, mane & sero, hoc remedio intra paucos dies conualuit.

25. Ex his adductis iam liquidissimum est, camphoram in malignis præsertim eo tempore, vbi corpus critico motu in eo, quod ipsi inimicum ac perniciosum est, expellendo occupatur, salutarem opem adferre, nullumque dubium est, quin laudatissima nostra camphora aduersus pestem tantopere commendatis omnibus remediis, modo debito tempore, quod caput praxeos medicæ est, exhibeantur, sit superior. Quam eximia laus *oleo* sic dicto *pestilentiali Heinsii*, cuius basis camphora est, constiterit, obscurum esse nequit. Huic viro statuam Romæ ob praxin feliciter in peste gestam erectam fuisse communis est doctorum traditio.

26. SECVNDVM nostram sententiam, si vlla medicina præsertim camphora multum in peste præstare potest, modo non præpostere, sed recte & ordine habita circumstantiarum & temporis ratione ipsa vtamur. Neque enim incognitum est, præsentissimam aduersus quendam morbum medicinam minus recte & inconuenienti tempore datam maximum nocumentum adferre, sicuti id clarissime in exhibitione chinæ, chinæ ad curandas intermittentes animaduertimus. Inter fortissima alexiteria a viris doctis atque eximiis medicis camphora numeratur, quia putredini mirifice resistit, sed quod non semper exspectationi & spei conceptæ effectus respondeat, hoc non remedio tanquam clauæ Herculis, sed medico, qui Herculis clauam tractare ignorat, adscribendum esse iure meritoque censemus. Nos huius sumus sententiæ, delinqui maxime in eo, quod camphoram in peste, in exili admodum dosi, præscribant & maiorem reformident. Deinde, quod calidioribus elixiriis & essentiis oleosis ipsam admisceant. Tum quod non conuenienti tempore eam exhibeant. Nos sub inuasionem vel prima accensione mali neque minus circa criticum tempus eius vsum conuenientissimum iudicamus, præsertim si cum acidis ceu vehiculis administretur. Hunc in finem in pestilentialibus febribus sequentem mixturam etiam atque etiam commendamus, sumatur nempe aquæ acetosæ & cardui benedicti ana vncia vna, bezoardici mineralis drachma

ma semis, camphoræ grana sex, syrupi acetositatis citri vncia semis, detur pro vna dosi.

27. PRÆTEREA visitur adhuc in camphora alia nobilis virtus putredinem & malignitatem lentam quidem, sed admodum pernicipalem ex corporis nostri sphaera propulsandi: talis est, quæ ab impuro coitu lymphæ succis vitalibus & postea solidis partibus ossibus quoque affricatur. Exiguum quidem, sed potentissimum omnium venenorum more est illud elementum, quod & virulentam gonorrhœam & luem sic dictam veneream eiusque atrocissima symptomata suscitât, intima corruptione & putrefactione succos præsertim lymphaticos contaminando. Præcipuum igitur curationis momentum etiam in eo consistit, vt putridum exterius susceptum miasma prima quasi in herba suffocemus, illudque citius e corpore expellamus, neque minns id quod putridum & corruptum fuit, a vitalibus succis separemus. Huic vero scopo obtinendo diu iam dudum ex omnibus naturæ regnis remedia quæsita & excogitata fuerunt; num vero camphora præsentius & excellentius adhuc fuerit repertum ipse vsus atque experientia addocet? Profecto summa in camphora ad gonorrhœam etiam veterem item luem veneream extirpandam medicina recondita est, qua omnes mercuriales saluationes lignorumque decocta balneaque laconica omniaque alia sunt inferiora. Neque ita pridem a medico, cui fides indubia habenda est, nobis relatum est, quod, præmissio conueniente alvum ductorio remedio, sola camphora soluta in axungia viperarum ad diram hanc luem persanandam suffecerit, id quod plurimis experimentis & exemplis ille edoctus asseueravit. Crediderim tamen mercurio fixato, qui sola diaphoresi agit, camphoram decenti dosi adsociatam in tollenda luis huius atrociora maiores adhuc præstare effectus. Hoc certa experientiae fide confirmare possumus, quod in gonorrhœa curanda inque luis venereæ principio nihil præsentius camphoraprehenderimus, quare etiam non sine ratione essentiis & elixiris contra gonorrhœam balsamicis, quæ ex Opobalsamo, balsa-

balsamo de copaiba, balsamo de Peru, balsamo de Mecha, refina ligni aloes, gummi Guaiaco cum spiritu vini tartarificato præparantur, camphora adiiçitur, vtpote quæ mirifice horum virtutem acuit atque incendit inque roborando glandularum tono & stasibus corruptivis abigendis mirabilem efficaciam exserit.

28. DEINDE camphora non datur excellentius remedium contra internas inflammationes, quæ sphacelum & interitum, si grauiores fuerint, inque membranosis partibus maxime consistunt, minantur & maximum periculum alunt. Felicissimo vero connubio tunc coniungitur cum nitro, nam solam camphoram in inflammationibus, quibus maximus æstus iunctus est, non facile suaderem. Etenim, vbi magnus feruor vrget, spasmus plerumque constrictæ sunt fibrillæ, & pori cutis clausi ac coarctati: his apertis & spasmus sedato mox sudor fuit secutus. Quum vero id felicissime exsequatur ipsum nitrum, hinc quoque mirum refrigerat & hoc modo efficit, vt camphora felicius & obstructions resolueret & materiam vitiosam in partibus inflammatis stagnantem discutere possit, metus enim est, ne poris arcte clausis & cute aridissima existente camphora interne quidem multum commoueat, sed parum vel nihil prorsus promoueat. Quare in febribus continuis, quæ fere omnes aliquid inflammatorii habent itemque etiam in inflammationum generibus ceteris, in pleuritide, phrenitide, angina, inflammatione vteri magno cum fructu semper camphora cum nitro mixta, adiecto puluere bezoardico, in artis exercitio vsus sum, vbi mox ab eorum adsumptione ratione æstus, delirii, sitis & vigiliæ ingens alleuiamentum secutum est. Tales quoque nitrosos & camphoratos pulueres acutus pariter ac prudens *Belgii medicus* CRAN in frequentissimo habuit vsu, vt ex ieu *Praxi medicinæ reformatâ* apparet. Ita in phrenitide & mania hunc puluerem laudat: sume lapidis prunellæ grana quindecim, camphoræ grana quatuor vel quinque, laudani opii semi granum, misceatur & fiat puluis. *Ab hoc puluere, scribit pag. 132. loc. cit. miras*

aliquando vidi operationes in phrenitide & mania ita, ut ægri ipsi mutationem admirarentur. In pleuritide & peripneumonia camphoram cum spiritu nitri vel etiam ipso nitro & aqua papaveris rhœados mire quoque commendat. *conf. pag. 197.* & in renum inflammatione lapidem prunellæ ad grana duodecim cum camphoræ granis quatuor miscet & præscribit. *conf. pag. 207.* & in febris continua pro siti sedanda grana tria camphoræ pulueribus addenda esse suadet & talem pulverem in febre pestilentiali cum bezoardico minerali quoque commendat.

29. DENIQUE camphora in hæmorrhagiis valde periculosis & enormibus, præsertim, quando febribus malignis iunguntur, miras præstat vires. Hac de re elegantem locum habet RAYGERVS in *Observationibus medicinalibus obseru.* 20. ubi ita scribit: *Nihil frequentius apud nos est in variolis, morbillis, & febribus petechialibus, quin & ipsa præterita anno 1679. peste, quam hæmorrhagia narium quandoque in statu morbi superueniens & quoniam rarius critica, semper, imo sæpius symptomatica morbum non soluit, sed potius exanthematum eruptionem impedit, spiritusque dissipat, ægrumque debilitat, hinc omnibus modis sistenda, vix autem melius & magis adpropriatum inueniri potest, quam Sperniola Crollii, cuius miram efficaciam semper tuto & optime sum expertus.* Et confirmat hanc adsertionem *observationibus ann 1685.* In hyeme puella duodecim annorum petechiis laborans corripitur hæmorrhagia narium, quam cum domesticis remediis reprimere non potuissent & tota nocte sensim ita stillasset sanguis, mane vocatus ego, obstupui conspecta quantitate sanguinis, tunc cum gossypio puluerem ex colcothare vitrioli, sanguine Draconis & terra sigillata consperso obturaui nares & exhibui sperniolam ad scrupulum unum & post tres horas rursus, & tertia vice reiteraui, sic sanguis non modo substitit, verum & petechiæ iam disparentes erupere, sensimque puella conualuit & adhuc viuit. Et porro anno præcedenti vocatus sum ad feminam, in quartum diem febre acuta maligna detentam, mane insuper abor-

(Hoffm. Opusc. varii argumenti.)

A a a

tum

rum passam, huic circa vesperam hæmorrhagia enormis superuenit, ut usque ad nonam noctis plus quam duæ libræ sanguinis effluxerint, cum valde debilis esset, exhibui statim Sperniolæ scrupulum unum cum aliquot granis Coralliorum præparatorum, at nares obturauit gossypio atramento scriptorio imbuto, ita efficit, ut intra breue tempus sisteretur. Iussi, ut singulis tribus horis puluis reiteretur, sic hæmorrhagia totaliter emansa & illa conuenienter tractata conualuit. Nec in hæmorrhagia narium solum, verum & in hæmoptysi optimum eius successum idem auctor expertus est. Componitur vero hoc medicamentum ex myrrha electa, thure, sumendo vniuscuiusque vnciam vnā, ex croci granis quindecim, ex camphoræ drachma vna & dimidia, qui puluis aqua spermatis ranarum vigesies vel trigesies irroretur; ita tamen, ut semper prius sponte exsiccet. Confectio de Hyacintho eiusque species laudantur etiam in nimis hæmorrhagiis, in malignis morbis & aliis, vtut compositio, ex pretiosis adeo lapidibus conflata, curiosa videatur, quicquid tamen præstat potissimum camphoræ intermixtioni adscribendum. HEURNIVS ad omnem sanguinis fluxum maximo cum successu semper propinauit sequentem puluerem *in notis ad aphorism.* Hippocr. Recip. seminis papaueris albi, hyoscyami albi cuiusque drachmam, hæmat: corallia rubra cuiusque semidrachmam, camphoræ scrupulum semis: sumat mane & vesperi semi drachmam. CRAEN *in Praxi reformata* in narium hæmorrhagia sequentem puluerem maxime commendat, rec. lapidis prunellæ scrupulum unum, camphoræ grana tria usque ad quinque, laudani opiatum granum unum, item rec. boli Armeniæ, terræ figillatæ, cuiusque grana quindecim, camphoræ grana quatuor. Camphora vero cum nitro in omnibus hæmorrhagiis magnæ est efficacæ, eam maxime ob rationem, quod græues hæmorrhagias, si a causis internis proficiantur nempe a viscerum & mesenterii spasmodis & constrictionibus, tanquam egregium antispasmodicum cohibeat.

30. PRÆTEREA camphora in discutiendis flatibus, qui hypochondriaca, hysterica & colica passione correptos sævissimis sæpe symptomatibus torquent, mirabilem præstat opem. Dici vix potest, & quotidiana id indicat observatio, quantam truculentiam in ventriculo & intestinis detenti atque incarcerati exerceant, nimia enim tunicarum sensibilibus expansione & distractione maximas angustias, anxietates spasticas nervosarum partium constrictiones, quas excretiones suppressæ & extremorum frigora insequuntur, non sine ingentis periculi & mortis metu concitant. Nihil hic opportunius est, quam ut penetranti medicina tonum ventriculi atque intestinorum deiecerit, qui plerumque flatuum causa est, restauremus, quo viuidiori reddito, non modo flatuum, sed & humorum aliorum excrementitiorum ibi hærentium copia feliciter foras eliminatur. An vero quid præstantius ad hunc scopum obtinendum ipsa camphora cum nitro mixta inueniri possit, est quod merito addubitemus? sicuti enim nitrum cum camphora in pluribus casibus felicissimum init coniugium: ita maxime id fit, ubi carminatiuam vim exercere debet, quia solum nitrum relaxando spasmos & biliosam acrimoniam partiumque calidam intemperiem temperando in vehementibus colicorum tormentis miracula præstat, multo magis vero, si felici copula iungatur camphora. Meretur vero hoc medicamentum longe maiorem laudem atque palmam, quam aliud ullum ex calidioribus præsertim concinnatum carminativum, eam ob causam, quod citra interni feruoris augmentum operetur, quæ virtus aliis calidioribus, in flatibus discutiendis negata est. Varia vero forma ac modo in talismodi casibus camphora poterit exhiberi, vel enim in liquidam aut solidam formam redigi poterit, si illam desideras, sequens formula selectissima laudem meretur, rec. tincturæ tartari, essentia corticum aurantium recentium, spiritus nitri dulcis cuiusque drachmas duas, camphoræ grana decem, misceantur, dosis sunt guttæ quinquaginta vel sexaginta, singulis duabus horis sumendæ. Si vero spasmi truculentiores vrge-

ant, tunc castorina eius nempe essentia vel extractum admisceri possunt. Pulverem si expetas, ille sequenti modo concinnari potest rec. lapidum cancrorum, antimonii diaphoretici, nitri purificati cuiusque drachmam vnam, camphoræ grana decem, olei chamomillæ vulgaris non adulterati vel olei millefolii guttas sex, misceantur, fiat pulvis, dosis est drachma semis. Hæc duo magnarum virium sunt remedia, quæ in hysteriis compescendis pathematibus omnes fere numeros absoluunt. Etenim hæc ipsa præter virtutem roborantem & flatus discutientem simul sedatiuam & anodynam habent, quæ in talismodi casibus est desideratissima.

31. EST præterea camphoræ alia adhuc laudatissima virtus atque efficacia infusa, nempe sanguinis excretiones consuetas & naturæ solennes promouendi. Haud ignotum in foro medico est, quam graua symptomata suppressas vel deficientes ordinarias sanguinis periodicas in plethoricis præsertim feminis euacuationes sequantur, cum nihil certius, præsentius & celerius statum sanum in deterius commutare his ipsis possit. Neque vero tam facilis res est, medico, opportuna medicina in ordinem talimodi salutare excretiones restituendi. Fateor vero ex omnibus tantopere ad id perficiendum laudatis remediis, nihil camphora esse excellentius, præsertim, si cum balsamicis & antispasmodicis specificis, quorum virtutem non parum accendit & auget, misceatur. Nostri moris est, hac vti mixtura: rec. essentiæ myrrhæ electæ, succini cuiusque drachmam semis, essentiæ croci, castorei cuiusque drachmas duas, camphoræ drachmam semis, quæ mixtura, præmissa venæsectione atque aluiductione, circa instans mensium tempus frequentius vsurpata eximio erit vsui. Obseruauimus scilicet a frequenti & continuato camphoræ vsu sanguinem antea crassum longe tenuiorem & fluidiorem redditum fuisse. Obseruauimus quoque homines obesos & sero turgidos quodammodo macilentiores factos fuisse euidenti argumento: hanc medicinam egregie humores crassos & stagnantes attenuandi & dissoluendi virtute gaudere.

32. EST

32. EST denique vsus camphoræ singularis atque eximius in morbis, qui vesicam infestant, quales sunt dysuria, stranguria, qui vtplurimum vel a vesicæ calculo, vel a viscida tartarea in eius cavitare stagnante saburra vel a seminali lymphâ corrupta & acri facta nunquam uon proueniunt. Etenim a læsione substantiæ vesicæ putridus quidam corruptus fit humor, qui vrinam præcipitat, ipsamque putridam efficit, quæ postea eximio sensu præditam vrethram membranofam lacinat atque dolore adfligit. Ad putridam igitur in vesica & vrethra stagnantem materiam summouendam fortiori quodam roborante & stimulante opusest. IOHANN GROENEVELD Anglus medicus tractatum edidit Londini anno 1703. *de tuto cantharidum in medicina vsu interno*, qui in vesicæ vitiis, in eius calculo, in gonorrhœa quoque virulenta cantharidum puluerem cum aliquot granis camphoræ mixtum præscribit, eiusque insignem vtilitatem non satis dilaudare potest. Cantharides solæ & sibi relicte ob sal, quo pollent, tenue, penetrans causticum validissime vesicæ partes nerueo-membranofas stimulant, & impactum viscidum, acrem humorem excutunt, quia vero metus est, ne inflammationem vel vasorum apertionem efficiat, camphora adiicitur, quæ causticæ vehementiæ non modo optima correctrix est, sed & stases inflammatorias impediendo facit, quominus periculosa inflammatio subsequatur. Etenim camphora non tantum vehementiorum diureticorum, quæ erodente sale prædita sunt, vehementiam mitigat atque castigat, sed & valentioribus acribus, purgantibus, quæ simili caustico acri sale agunt ceu summum correctorium quam opportune admiscetur, vtpote omnia cathartica, si pauxillum camphoræ ipsis adiicitur, longe mitiorem naturam ac facultatem induunt.

33. HISCE iam diductis ac demonstratis, quod camphora sit securissima medicina, reliquum iam est, vt de eius vtendi ratione monita breuiter adiiciamus. Quemadmodum vero nullum optimum etiam medicamentum semper iuuat, quin potius improuide & intempestiue datum nocet, ita etiam nulla

hac in re camphora gaudet prærogatiua. Nam & ratio dicitur
 & experientia confirmat, quandoque oriri ab eius improvido
 usu anxietates circa præcordia, cephalalgias augeri, appetitum
 destrui. Fit hoc maxime in iis, qui infirmioris sunt naturæ & fa-
 cile a leui mutatione læduntur. Accidit quoque in iis, qui ca-
 pitis & cerebri vasa sanguine & humoribus repleta habent, seu
 ubi inæqualis humorum circuitus est, & cum impetu sanguis
 forsan propter membranarum & vasorum atoniam ad caput
 ruit, quod ex facie tumida & rubicunda, dolore capitis graua-
 tiuo, vertigine, torpore, somnolentia adparet. Quo casu v-
 tique omnia volatilia & vaporosa spirituosissima, præsertim in ma-
 iori dosi exhibita, nocent. Quare etiam paralyticis, epilepti-
 cis & conuulsionibus diris afflictis cum cautione & parca manu
 sunt concedenda. Neque minus congrua præsertim in excessi-
 ua dosi sunt plethoricis & repletis corporibus, utpote motum
 intestinum, in humoribus, quorum liberior cursus ac iter impe-
 ditur, efficiunt &, ut dici solet, mouent, sed non promouent,
 hinc anxietates & inquietudines vel producant vel augent. Ne-
 que in alui adstrictione vtilia sunt, quia fibras intestinales sic-
 cando nimium efficiunt, quo aluus tardior descendat. Deni-
 que in omnibus acutis, ubi omnia interius feruent & ardent,
 humidumque deficit, cutis sicca & torrida & omnia constricta
 sunt, ea remedia, quæ motum intestinum augent interius, ne-
 quaquam locum inueniunt. Præstat etiam tali in casu lenis-
 sime agere & naturæ potius frenum, quam stimulum iniicere;
 nam in acutis nihil præcipitandum est, sed omnia moderate
 ac tempestiue sunt agenda. Quapropter in horum morbo-
 rum augmento vel statu cautissime procedendum est. Tu-
 tius in principio vel instante crisi, si natura eget
 stimulo vel sub declinatione, locum
 habent.

DISSERTATIO V.

DE

INFUSI VERONICÆ EFFI-
CACIA PRÆFERENDA HERBÆ THEE.

§. I.

DETESTANDVS Europæorum, maxime Germanorum mos est, quod remota & exotica magis æstiment, & suis indigenis & domesticis, longe sæpe præstantioribus præferant. Natura sui ubique est custos, cuique terræ sufficit, & uti dat alimenta, sic quoque remedia, hacque ratione omnibus nationibus, quod & ad alendum & sanandum est idoneum, præbet. Singulis terris olim sua suffecerunt remedia, nos autem, postquam peregrina alimenta & condimenta nobis placere cœperunt, nostra etiam spernimus remedia & foras remota, prioribusque seculis ignota, summo studio ac labore repetimus. Et sane, si verum fateri licet, nulla ex ceteris nationibus, maiorem sibi in hac parte sumsit licentiam, quam Germanorum gens, quibus nulla erga matrem naturam est fides & constantia. Quod alimentorum, condimentorum, potuum v. g. Thee, Coffée, Choccolade species, etiam sanitatis titulo inuentæ sunt? Equidem non omnem detrahere laudem hisce volumus, sed saltim hoc vrgemus, dari meliora & salubriora, & elementorum affinitate naturæ magis congrua in nostris terris, quæ aspernamur, & nihili habemus nobisque sordent; adeo ipsarum rerum saporem amissimus, ut nihil fere palato accadat gratum, quam quod male emptum, & ex disitis ac extremis regionibus allatum barbaræque nomenclaturæ titulo fulgeat. Hoc ad medendum longe efficacius creditur, stolidæ phantasia vires vel augente vel imminuente. Habemus ante oculos herbas efficacissimis virtutibus & dotibus instructas; minimeque ingratas, quas pedibus calcamus, quibus

bus ignotas & ex exteris regionibus allatas præferimus; cum tamen ipsæ Indorum gentes illarum vsum magnifaciant, & magno pretio ob hanc causam sibi adferri curent. Placet iam vnicam veronicam assumere, quæ non pares saltem, sed maiores, cum ipsa herba Thee, recondit virtutes. Huius infusi vires, liquore herbæ Thee adhuc superiores, dissertatione hac recensere nostri iam est instituti, simul istus herbæ elementa chymico igne cruta tradendo, accuratius observationes quasdam de huius infusi viribus insinuando.

2. ANTE omnia vero necesse erit, ut moneamus, quid sub infusi veronicæ nomine intelligamus, quo minus neglecta nominis evolutio difficultatem vel obscuritatem quandam pariat. Per veronicam intellectam volumus illam spicatam terrestrem perennem supinam vulgarem foliis serratis secundum Morisson flore albo & coeruleo nitentem herbam, quam Germanice *Chrenpreiſ* nominant. Infusio autem, siue infusum secundum SCHROEDERVM, audit liquor qualitibus medicamentosis, sola maceratione imprægnatus, & differt a decocto, quod in hoc coctione extrahuntur, in illo autem sola digestionem, & macerationem calidam virtutes medicamentosæ eliciantur. Vti autem infusiones apud medicos variis liquoribus, nimirum vino, spiritu vini, aceto, aquis destillatis, liquoribus salinis, aqua communi adornari solent, sic nostrum infusum veronicæ sola aqua simplici, eaque calidissima, facta in illam sufficiente iniectione herbæ exsiccatae, peragitur per exiguum saltem tempus digestio ac extractio fit facilisque aquæ tinctura, non secus, ac in præparatione infusi herbæ Thee fieri assolet. Omnibus vero alii infusum ex hac herba paratis medicamentis & præsertim illius spiritibus, essentiis præferimus; nam licet puriores sint, vehementius tamen ægros offendunt, & spiritibus corporis nostri vim faciunt, cum e contrario infusa moderate agant. Longe quoque præstabilius est ipsius decocto, quippe in hoc, fortiori calore admotum, particulæ volatiles subtiles ipsius plantæ in auras diffantur, crassioribus ac magis terrestribus a nexu aliarum dissolutis,

tis, inque ipsum liquorem coactis, quæ non parum vires ipsius infusi infringunt atque imminuunt. Ob, hanc quoque rationem rhabarbarum, & folia sennæ calide infusa, longe felicius vim suam purgantem exserunt, quam si cum eadem aqua decoctionem fuerint passa, particulis terrestribus identidem salis purgantis acrimoniam multum obtundentibus. Folia asari in infusione aquæ calidæ vomitum, decoctione autem diaphoresin mouent laudabilem. Herba Thee, fortiori in aqua coctione, adstrictiora facultate brunoque colore illam imbuit, minusque grata euadit. Quare sale subtili sulphureo, quæ pollent, magis infundenda, & quorum virtus in principio resinoso, terrestri, acido residet, magis coquenda esse, regula docet pharmaceutica. Adeo eiusdem medicamenti vires & vsus, ratione diuersi præparationis modi variant.

3. QVOD vsus nostræ veronicæ attinet, illam infundi solum iubemus, non enim decoctionem videtur admittere, partim ne substantia sua volatili summe æstimabili defraudetur, partim ne molleculæ fixiores terrestris indolis, coctione nimis euolutæ soluentis poros subeant, sicque actiuitatem medicamentosam infringant. Optime autem hæc infusio in decenti & cooperto vase instituitur, quo particulæ euaporabilis spirituosæ custodiantur, mox aqua elegantissima flauedine tingitur, & saporem non ingratum, leniter subamaricantem exhibet. Sorbetur hæc infusio calidissime, cum vel sine saccharo ad mensuram vnam, vel saltim dimidiam, in loco temperato blandum sudorem exspectando: paucis, eadem præparatio, idem modus vtendi veronica est, cum ipsa herba Thee.

4. VT autem infusi huius virtus dilucidius innotescat, & eius vires commendabiles euadant, necessum est, vt prius elementa ipsius herbæ paulo penitius examinemus, illamque diligenti tractatione chymica, ac mistionum cum variis liquoribus versemus, quo operationis fons eo liquidius pateat. Quemadmodum autem quæuis vniuersi huius corpora, ex diuersis ratione figuræ, magnitudinis ac motus, particulis con-

structa deprehendimus, sic quoque veronica nostra particulis non homogeneis, sed variis ratione magnitudinis seu molis, figuræ & situs constat. Quænam sunt volatiles spirituosæ, celerius euaporabiles, æque in minutissimas superficies diuisæ sunt, quare prompte subtilissimi ætheris aut aeris motui, vel calori obsecundant. Compertum enim est ex mechanicis physicis, nulla corpora proprio modo ascendere, sed ab ambiente extrinseco fluido grauiori sursum pelli, hinc particulas veronicæ volatiles, ipsius atmosphæræ particulis, leuiores esse firmissime statuendum esse videtur, certum est, veronicam innumera effluvia in veram emittere, nec minus odor & destillatio veronicæ recentis de particularum subtilissimarum leuitate ac copia testatur.

5. PORRO particulas salinas variæ figuræ nostræ herbæ inexistere, exinde patet, quia magnam copiam salis fixi, si decenti combustione tractatur, largitur, nec herba, solo absynthio excepto, facile inuenitur, quæ maiorem copiam salis fixi præbeat. Nostra herba retortæ indita, si igni aperto committitur, fundit liquorem salinum subacrem, empyreumaticum, qui cum acido affuso nullum quidem edit conflatum; attramen effectum alcalinum vndequaque edit, dum syrupum violarum coeruleum, viridi tingit colore, quod omnibus alcalinis est solenne, ipsiusque proprium, &, solutionem mercurii sublimati præcipitando, colore subflauo imprægnat. Carbonibus vivis ipsa herba iniecta, fumum exhalat salino volatilem, qui mirifice nares, & oculos ferire ac afficere solet. Porro hæc herba in solutione salis tartari prius macerata & destillata, præbet liquorem cum oleo empyreumatico, mere alcalinum aerem sal volatile spirantem. Sulphreas inflammabiles partes in veronica oleum indicat, quod ex destillatione emergit, idemque plantæ combustio. Et notabile est, infusioni veronicæ flauo colore tinctæ si iniiciatur oleum tartari per deliquium, vel spiritus salis ammoniaci virinosus, quod mixtura longe clarior euadat & color magis exaltetur. Omnia quippe alcalina singulari colores exaltant
diac

di ac diffundendi vi pollent, dum in texturam sulphuream, illam rarefaciendo, & lucis radios varie modificando agunt. Sic tincturæ rhabarbari, aloes, myrrhæ, addita debita quantitate olei tartari per deliquium, rubicundissimum induunt colorem. E contrario acida, vti nonnullos colores exaltare solent, sic quoque plures destruere apta sunt, & idem contingit circa nostram infusionem, cui, maxime si imprægnata fuerit ante liquore alcalino, affusum acidum omnem adimit colorem, ita vt pene limpida & clara evadat.

6. PRINCIPIVM terrestre in veronica arguit, præter lenem adstrictionem & amarorem, etiam color nigricans, qui ex mixtura infusi nostri cum solutione vitrioli emergit. Experientia quippe mechanico chymica ostendit, quæ particulis terrestribus facile solubilibus constant corpora, vti gallæ, terræ catechu, radix tormentillæ, lignum aloes, illa soluta ad mixturam vitrioli atramentosum induere colorem. Et quoniam eadem corpora, solutioni mercurii sublimati remixta, illam obscuro brunam reddunt, idem quoque cum nostra veronica, & herba Thee tentauimus, idemque successit effectus, manifesto indicio: plures terrestres solubiles partes continere nostram herbam.

7. Ex hisce iam adductis clarissime efficitur, plantam nostram ratione diuisionis ex corpusculis variis, nimirum volatilibus, leuissimis, mediis, & fixioribus, terrestribus esse conflatam. Particulæ quippe quo magis sunt diuisæ, eo volatilitatis statum, quo minus diuisæ, eo fixitatis indolem lubentius induunt. Subtilitatem particularem effluuia & odor testantur: fixiores partes, ipsum sal fixum, cineres, medias, particulæ sulphureæ salinæ solubiles sufficientissime demonstrant. Quoniam autem diuersæ hæc principia non inæqualiter inuicem mixta sunt, sed laudabilis harmonia & æqualis illorum proportio vbique apparet; hinc non sensibile prædominium qualitatis cuiusdam in sensus cadit, nec sapor, nec odor, qui alias elementorum illorumque variæ mixturæ indices ac productrices sunt, nimis excessivus est, hinc etiam

eius infusio non facile creat nauseam, sed palato, modo ipsi consuecamus, arridet, nam omnes potus qui fortiori odore imbuti sunt, facile nauseam parare solent, & ob id decocta & infusa herbarum cephalicarum, quæ sale oleoso turgent, v. g. saluæ, rosmarini, non adeo palato placent. Vno verbo planta Veronicæ, ratione principiorum constituentium, illorumque qualitatum ac virium valde temperata est, quo titulo quoque ipsa herba Thee fulget & arridet. Omne autem temperatum naturæ nostræ admodum amicum, intensum autem & nociuum omne, quod excessiua facultate notatum est, hoc facillime in deteriorem partem, illo autem minime uti possumus. Non tutius nec gratius & ad sanitatis conseruationem conducibilibus datur remedium, quam quod amica temperie se commendat: temperata magis sunt domestica, principiis nostris vitalibus magis confinia, quæ harmonia & decenti temperie sustentantur. Temperata æqualem, nec tardum nimis nec nimis celerem humoribus iniiciunt motum, in cuius æquilibrium vitæ nostræ ratio ac incolumitas præcipue consistit.

8. Examinata sic veronica, quoad principia, indole, si iam comparisonem instituere velimus, cum herba Thee, haud difficulter demonstrare possumus, longe excellentiorem illam esse, multisque parasangis eam antecellere; vtpote veronica longe copiosiores alcalinas particulas, quam ipsa herba Thee, alit. Falsum est herbam Thee sale volatili oleoso esse foetam, a quo, qui eius virtutes deducere vult, multum errat, talismodi enim salis volatilis oleosi, ne vllum quidem vestigium apparet; potius petendæ illius virtutes sunt, quicquid præstat, a sola calida aqua, & adstrictoriis terrestribus moleculis, siquidem herba Thee destillata exhibet non spiritum volatilem alcalina virtute præditum, sed subacidulum adstringentem empyreumaticum: fumi eius per fistulam si hauriantur, austeritate sua gulam constringere solent. Latissime autem patet eius virtus adstrictoria in decocto paululum inspissato, quod ad solutionem vitrioli in verum degenerat

nerat atramentum, non secus ac si gallarum infusio assumpta fuisset; extractum herbæ Thee propter virtutes adstrictorias alvum constipat, eiusque nimium fluxum cohibet, quod etiam annotavit D. MANDELSLOH in *Itinerario Indico* cap. 9. p. 42.

9. QVICOQVIT itaque herba Thee per se & sua natura præstat, id per particulas adstringentes copiosissimas præstare videtur. Nec absolum & rationi ineptum est, propter easdem adstringentes particulas alacritatem maiorem spiritibus iniungere, illosque ad promptiorem motum incitare, distributæ enim per intima sanguinis eadem particulæ, fibrarum ac nervorum dum ingrediuntur tubulos, illos sibi arctius iungunt, & strictiores reddunt, hinc illos tubulos angustatos paucior quidem spirituum animalium copia replet, compensatur autem propter angustias maiores, maiori illorum rapiditate, sicque, ob citatiorem spirituum motum œconomia animalis functiones, longe alacrius celebrantur. Compertum autem est, medicamenta adstringentia non eosdem, sed varios pro diuersitate indiuiduorum edere effectus & vni prodesse, alteri mire nocere. Illis, qui siccitate nervorum laborant, & quibus roscidum humidum deficit, adstringentia admodum infensa esse solent, magis enim nervorum thoruli occluduntur, & influxus spiritibus animalibus denegatur, sicque paralyseos & apoplexiæ metus fit. Magis itaque æstimanda venit ipsa veronica, quæ præter subadstringentes, ceu vasorum tunicas roborantes, etiam copiosas alcalinas salinas particulas possidet, quæ magnos in debellandis affectibus edere solent effectus.

10. QVONIAM autem tractatio nostra potissimum est de infuso ipsius herbæ, placet iam inquirere, ex quibus elementis illud ipsum constet, siue quænam principia ipsius plantæ, aquam, quæ infusioni seruit, ingrediantur. Diximus superius, particulas terrestres, quæque maiori gaudent superficie, non facile concedere in poros ipsius aquæ, nisi fortiore coctione comminutæ illorum interstitia subire cogantur; remanent itaque subtiliores salinæ alcalinæ & terrestres, promte solu-

biles, quas lubentius recipit ipsa aqua, ceu menstruum simplicissimum ac potissimum, calore extractionem non parum adiuuante. Volatilium particularum portionem infuso inesse, euincit illius destillatio, quæ aquam veronicæ boni odoris & saporis præstantisque virtutis largitur. Ex hisce iam patet, veronicam recentem vel in vmbra, aut sub charta circumspecte siccata quod etiam de aliis herbis tenendum est, ad infusionem esse optimam. Pessimus pharmacopæorum mos est, locis vel hypocauftis calidis committere herbas ad siccationem, cum præcipua virtus, quæ residet in sale volatili æthereo, auolet in auras. Quo curatius itaque nostra herba est siccata, eo meliorem depromit virtutem. Porro infusi magna quantitas, si debite inspissetur, postea aeri frigido exponatur, magma apparet in sua superficie sal tartariforme, haud ingrati amaroris & elegantibus striis emicans, virtute deterfiua ac aperiente se vndiquaque commendans. Præter salina autem in superficie contentas apparent in fundo magmatis particulæ terrestres copiosissimæ.

II. TRIA itaque in infuso elementa nimirum particulas spirituosas volatiles, deinde salinas alcalinas, & terrestres adstringentes deprehendimus. Ratione volatilium infusum hoc in corpus haustum, & in sanguinem distributum, tam spirituum animalium, quam reliquorum minutissimorum corpusculorum, in lymphæ & sanguine consistentium, motum blande procurat, & promouet, quia propter subtilitatem ius habet proxime adficiendi. Spiritus autem impulsus ac in motu constitutus, reliquos humores in motu tardiore versantes, ad motum faciliorem incitant ac cogunt. Etenim omne corpus in motu constitutum, alterum, quod in motu non est, facilius secundum axioma mechanicum impellere potest. Hac enim ratione motus omnium fluidorum machinæ nostræ tam progressius, seu circularis, quam intestinus promouetur, in quo utroque motu sanitatis nostræ conseruatio maxime pendet. Ratione particularum alcalinarum & salinorum, vi resolvente ac corrigente, laudatum nostrum infusum pollet. Certum enim

enim ac statum est, plurimas morborum causas nidulari in obstructiobus, illasque morborum fabros esse: hæ autem non nisi ab impedito partium fluidarum, per angustissimos capillarium anfractus motu, tam circulari, quam intestino, non possunt non originem suam nancisci. Fieri enim non potest, ut corpus fluidum, quamdiu eius partes in perpetuo & irrequieto motu iuxta se inuicem quiescant, & sese inuicem firmitus contingant, quo durum & solidum obstructionum primaria fiat causa. Quando autem sal propter acies & spicula minutissima rigida in continuo motu est, diuidendo crassorum humorum vascula obstruentium superficies, non possunt non illorum particulæ diuidi, incidi, atteri ipsisque motus denuo introduci, ut fluiditatem resumant: & in hoc pene omnis curationis cardo ac neruus versatur; qui enim promte ac facile obstructiones pertinaciores soluere nouit, ille & felicius curare chronicas passiones sataget. Tandem terrestriores infusi nostri particulæ, machinæ vitalis fluoribus intimatæ, parietibus vasorum ac tunicarum fibrarumque interstitiis, propter crassiorum superficiem, facilius adhærent, illaque coarctant, & in angustius spatium redigunt; unde spiritus animales, machinæ nostræ motores, in angustius spatium coacti, angustiam loci celeritate compensant, sicque celeriori influxu partes fibrosas ac musculosas magis animant, vigorant, constringunt, unde partium dependet robur.

12. Examinata iam sufficienter veronicæ natura, restat nunc, ut alterum ingrediens, nempe aquam calidam inspiciamus, quidnam ad infusum nostrum conferat, seu ab illa sit expectandum. Non absone plures emunctorium medicorum, quicquid infusum Thee, Coffe aliarumque herbarum præstat, id omne malunt ab aqua calida, quam ab ipsis herbis deducere. Nec noster animus est, ab hac sententia secedere, potissimas infusi vires adscribentes calidæ, secundarias autem ipsi herbæ. Sola enim herba vel redacta in puluerem vel in essentiam, & extractum abiens nunquam hoc præstabit, quod eius infusum, quarum vnum alterius poscit opem,
amice

amice ambo in medicamentum optimum ac præstantissimum debent conspirare.

13. QVONIAM autem in aqua calida duo occurrunt consideranda, primo aqua, & deinde calor, ipsi adueniens, placeat in vtriusque naturam paulo accuratius inquirere. Aquæ essentia consistere videtur in ipsa fluiditate, humiditate, & si loqui sic fas est, insipiditate, nihilque aliud aqua est, quam liquor insipidus. Notum autem est ex physicis, fluiditatem consistere in perpetuo ac iugi minutissimarum iuxta se inuicem motu, & quod fluida poris gaudeant innumeris, in quorum interstitiis copiosissima subtilis hæreat materia. Intestinum autem aquæ particularum motum solutio salium vel sacchari in ipsam iniectionum patefacit, quæ sine motu, ut ut oculorum sensum fugiat, absolui non potest. Abundantiam & diuersitatem pororum illud arguit experimentum, dum portio aquæ sale communi saturata, ut ne granum quidem salis capere amplius possit, aliud sal v. g. alumen iniectum, de nouo aggreditur, illud soluendo, sique hoc refertum est, tertium sal v. g. vitriolum tenue recipit, & sic porro, ut admiratio mentem merito subeat, quomodo hæc procedant. Nul- lum autem dubium, interstitia inter particulas aquæ esse figuræ diuersissimæ, quæ alias particulas capere ineptæ sunt, quam quæ ipsi loco congruunt, & cum salia longe diuersis gaudeant figuris, clarissime inde colligitur, poros cubicos particulas etiam cubicas requirere, & si illi saturati sunt, non alias amplius capere possunt, & sic porro. Præsentiam particularum aerearum & ætherearum in ipsa aqua hærentium, monstrat partim experimentum, dum in vase ab aere per antellam euacuato, posita aqua innumeras emittit bullulas, partim etiam aquæ euaporatio id testatur, quæ fieri non posset, nisi particulae quædam elasticæ æthereæ ipsi aquæ inessent. Præterea aqua insipida est, i. e. omni sapore destituta, quia lubricis, flexilibus constat particulis & salinis caret. Et quamvis pauca salium ramenta in magmate euaporatæ æquæ conspiciantur, illa tamen aduentitia sunt, ex fundo forsan ori- unda,

unda, nec proprie naturam aquæ ingrediuntur. In insipidis autem magna inest efficacia, vti id solide ac erudite demonstrat clariss. D. SCHRADERVS *in dissertatione de insipidorum efficacia*. Menstruum enim insipidum simplicissimum & purissimum est, & ad varias recipiendas particulas aptissimum, quoniam heterogeneis nondum est imprægnatum, & quicquid agit, sola fluiditate id præstat. Nam fluida, mediante intestina & perpetua particularum agitatione, corporum poris impelluntur, vt sic iterata insinuatione earum ac concussione non vi, sed blande particularum solidarum nexum tandem dissoluant.

14. Ex hisce iam adductis luculenter patet, aquam optimum esse menstruum, & vehiculum ipsius herbæ veronicæ, & quo puriorem ac leuiorem illam esse, eo meliorem, insignique pollere efficacia, salia cuiusuis generis ac figuræ in poros suos recipiendi, dura ac solida corpora emolliendi ac resoluendi, illaque ad fluiditatis statum adducendi.

15. QVOD ad caloris naturam attinet, ille id motu non rectilineo, sed curuo, confuso, & velocissimo particularum minutissimarum ætherearum consistit, adeoque elasticam dilatiuam expansiuam seu rarefacientem vim habet; æther enim in calore expansus propellit corpora vicina ex suo loco, vti id eleganter patet experimento, dum nimirum aqua inclusa æneo vasi, admoto fortiori calore, intus valde incalescens, data apertura, instar fontis magna vi profilit & erumpit. Calor itaque aquæ simplici superueniens, illi maiores vires foenerat fluidificationem, emollitionem ac dissolutionem mirum quantum augendo & adiuuando: quare notabile est, solis aquæ calidæ vaporibus ossa & cornua durissima emolliiri posse in vase destillatorio, quam operationem pharmacopolæ philosophicam calcinationem nominant; nec ignotum iam amplius curiosis est Papini experimentum, dum carnem ossa, & durissimas res includit vasi, ita coaptato, ne minutissima rima aquæ, quæ in decenti quantitate adiecta fuit, exitum præbeat, leni machina committitur calori, & sic breui

exacto tempore durissima ossa in liquamen gelatinosum ac lentorem fatiscunt, per solam vim elasticam calidæ aquæ, quæ potentissime minutissimos poros subire illorumque centra resolvere valet. Nam omnia corpora resolui ac emolliri possunt, si ipsis particulæ elasticæ vel beneficio aeris, ignis, vel menstruis subtilissimis impingantur.

16. CALIDÆ itaque aquæ vsus in medicina egregius est. Exstat circa hanc rem insignis locus in *Aetio tetrabil. 1. Serm. 3. c. 165. aqua inquit, calida conducit, ubi oportet excretionem præparare, & ubi quid attenuare diffundere, liquefacere, mollire, eluere, concoquere aut discutere volumus.* Calida quippe assumpta magna in copia cum tenuium partium sunt, qua data via ruunt, arctissimos poros vi sua elastica subeunt, & ubique sese insinuant, & quaqua versum penetrant, sicque calorem a potu calido assumpto in totum corpus diffundi sentimus: quodsi enim sanguis stomacho vicinus a calore aquæ rarefit ac fluidus redditur, lege circulationis non potest non omnis sanguis ad motum aptior euadere, magisque euolui, non secus ac videmus totum corpus calefieri, si calor externis saltem partibus v. g. pedibus admoueat.

17. PRÆTEREA calidi potus viscidos quoque & tenaces humorem attenuant, colliquant, sicque obstructions expediunt, & circulationem humorum promouent, quandoquidem talia effluvia actuant & partes tenuissimas sanguinis excitant, & humorum, illisque motum imprimunt, ut ipsi spiritus sic dicti animales exsuscitati functiones suas eo melius absoluant, hinc ex potu calidæ aquæ hilares & alacres ad studia & res peragendas reddimur, torpor & somnolentia dissipatur, vigiliæ magis procurantur, quæ in actiuo & concitatori spirituum animalium motu, & liberiori in partes nervosas influxu consistunt, quare infusum herbæ Thee somnum dissipat, vigilias procreat, non ob singulares dotes ipsius Thee, quæ nullo modo in hoc obseruari possunt, sed propter effectum ipsius calidæ aquæ, quamobrem quæuis pene herba aquæ calidæ infusa similem effectum excitat. Motis au-

tem

tem in corpore nostro spiritibus, qui primi ac præcipui reliquorum fluorum motores ac impulsores sunt, mouentur & ipsi, debitum motum absoluunt.

18. TANDEM quoniam plurimorum morborum symptomata, & exacerbationes salibus morbosis excrementitiis, illorumque acrimoniæ adscribendæ sunt; potus aquæ calidæ in magna copia assumtus non potest, quin insigne leuamen ac emolumentum afferat, vtpote qui salia illa, nimia acredine infensa, promptissime diluit, temperat, corrigit, & per congrua euacuatoria, nimirum glandulas subcutaneas, ceu per cribrum, eliminat. Quantum itaque sit vsus, & quanta efficacia aquæ calidæ, si herbæ talismodi temperatæ medicamentosæ, vti nostra est, virtutibus imprægnetur ac essentificetur, quiuis, qui ingenio pollet, & rerum physicarum ac medicarum parumper gnarus est, clarissime perspicere poterit.

19. PRETIUM autem erit operæ, singulatim recensere eximias illas dotes ac vires, quibus donatum est nostrum medicamentum, quæque in ipso obseruationibus curatis annotatæ fuerunt. Nolumus autem auctoritate veterum operationis rationem accersere a qualitatibus illorum primis, quatuor elementis inædificatis, quæ si curatius & libero animum spectemus, non absolutæ entitates sunt simplicibus inexistentes, sed potius relatiuæ potentiæ, & modificationes ipsius materiæ, quibus medicamenta varios effectus in corpore humano pro diuersitate indiuiduorum producere valent, nullum quippe medicamentum agit ratione actiuitatis, sed receptiuitatis suæ, hinc idem pro diuersa constitutione humorum, & varietate indiuiduorum diuersissimos solet edere effectus; sed tons operandi ac indolis nostri medicamenti satius supra detecta est, partim chymico igne, partim variorum liquorum connubio, & inde phænomenorum resultantium attenta consideratione, vbi deprehensum fuit herbam nostram calidæ aquæ subtiles, volatiles, salinas, alcalinas, cum terrestribus fixioribus, temperatas tamen particulas communicare.

20. SECVRISSIMVS autem modus est a posteriori siue ab ipsa experientia, optima artis magistra, & propriis obseruationibus desumere medicamentorum vires. Circa hunc modum autem merentur obseruari quædam regulæ, ne res difficultatibus innergatur. Primo optime medicamenti effectum explorare possumus, si singula seorsim, nec vnum aliis mixtum, in vsum trahatur, vnde nescimus, cui operatio sit adscribenda. Improbanda itaque illa medicorum consuetudo est, qui remediis suis quasi ludunt, & ab vno ad aliud ruunt, mutato quasi in horam consilio, sicque sine iudicio sæpe, & sine arte in curatione progrediuntur, & hinc fit, vt nunquam medicamentorum vires expiscari vel firmam sibi experientiam comparare possint, sed semper dubitent, vacillent, errent: deinde idem medicamentum simili in casu, iisdemque correspondentibus circumstantiis, non semel, sed decies, vigesies, eundem effectum præstare debet, si certi velimus esse de singulari & specifico effectu.

21. SEDVLA itaque ac studiosa obseruatione annotauimus, nostræ plantæ infusum moderatius tamen haustum, digestionem iuuare, ac resolutionem ciborum promouere, dum tenacem viscidam amurcam, quæ glandulas oesophagi, ventriculi & intestinorum obstipat, fundit atque abstergit, quo & melius tunc glandulæ plorare possint liquorem menstruaalem, qui potissimæ resolutionis ciborum causa est, & quando lymphæ, cuius soboles est ipsa saliuæ & menstrum ventriculi, nimis crassa & inspissata est, infusum veronicæ illam diluit, attenuat, sicque cibos fluidos reddit, illorumque resolutionem adiuuat, quod exemplo Indorum & Iapponensium confirmatur, qui semper cum cibis aquam calidam bibunt. Quinimo ventriculo gratus est omnis calidus potus, ipsoque gaudet; coagmentatus namque est ex meris membranis & tunicis, & hinc a prouida naturæ mente intra calidissima viscera positus est, vt ab omni parte blando foueatur calore, quo eo melius munus suum absoluere possit; quare nihil magis ventriculo, quam frigus, nocet, quod, vt humores facile crescant

creſcant, & in lentam abeant pituitam, efficit, hinc a frigido potu inprimis poſt inſignem corporis incaleſcentiam tanta noxa, ipſaque mors obſeruatur a practicis.

22. QVAM gratus ille potus ſit ventriculo, ſequens docebit hiſtoria, nimirum nuperrima æſtate ſtudioſus quidam, ingente corporis calefactione præuia, magnam cereuiſiæ frigida haurit quantitatem, mox debilitabatur & ſequentibus diebus dolor ventriculi, vomitus, nauſea, cibi faſtidium, virium proſtratio, calor præternaturalis, vrina rubra, ægrum affligebant. Remanebant hæc ſymptomata per longum temporis ſpatium, viresque & ſolidam partium ſubſtantiam notabiliter abſumebant, nec deerant hecticæ ſigna, diſcrimen vitæ minantia; ſanitati tamen æger reſtitutu eſt ſequenti methodo: primo potum veronica, cum tinctura flor. bellidis aliquoties de die aſſumebat, deinde cum cibis & iuſculis propinabatur bis de die, eſſentia baſamica, compoſita ex nuciſta, croco, myrrha, zedoaria, arcano tartari, & ſpiritu vini tartariſato. Extrinſece ventriculo applicabatur linimentum ex oleo nuciſtæ, ſpiritu vini tartariſato, oleo menthæ, camphora, croco, oleo caryophyllorum & baſamo Peruuiano, ſicque paucis ſeptimanis elapſis cum morbo rediit in gratiam.

23. PORRO obſeruauit nihil magis iuuafſe febricitantes, tertiana vel quartana decumbentes, quam ſi poſt paroxyſmum ſtatim in magna quantitate idem hauriant infuſum, componendo ſe ad ſudorem, qui ſi ſequitur, ſemper leuior ſequens eſt paroxyſmus. Conſentit hac in re HIPPOCRATES *lib. de locis in homine c. 88.* qui febricitantibus ſuis etiam propinauit calida, vbi inquit: *cum laſſitudo, febris, & plenitudo detinuerit, multa aqua lauandum, & quam maxime calefaciendum eſt, quo calor, aperto per ſudorem corpore, exeat, & in potu exhibenda calida.* Potus enim calidus in corpus ingeſtus ex ægro corpore detrahit, ſiue vrinas educat, ſiue ſudorem eliciat, vndique enim apertum, & reſpirans corpus ac motum faciet, quod conducit.

24. PRÆTEREA potus veronicæ singulariter phthificis opitulatur, & vitio pulmonum laborantibus. Annumeratur a practicis ipsa veronica inter herbas vulnerarias, & consolidantes, & vix potio vulneraria vel pectoralis in practicum libris inuenitur, quam non ingrediatur ipsa veronica. Notum est aquam veronicæ præstabilem opem ferre hecticis, ad præternaturalis caloris & sitis extinctionem; eius autem infusum, quod præter particulas volatiles etiam gaudet amarum, aperientibus, & acrimoniam corrigentibus, longe observatur præstantius, præsertim, si aqua, cui veronica infundenda est, ante cocta sit cum passulis, cornu cerui vsto, rasura cornu cerui, & loco ordinarii potus hæc substituatur potio. Nec minus observavit puerum decem annorum, asthmate pulmonali per aliquot annos laborantem, cum roncho ac sibilo, qui incassum oppositis antea omnibus celebratissimis pectoralibus, incidentibus sulphuratis, tandem solo potu veronicæ, qui omni die per aliquot septimanas hauriebatur, restitutus est. Porro non ita pridem vir quadraginta annorum, crassioris habitus, & hypochondriacæ affectioni obnoxius, mira sanguinis & humorum exagitabatur ebullitione, cum tussi pulmonali phthisin minante, appetitu prostrato, calore præternaturali, virium deiectione, frustra datis medicamentis alias generosis pluribus, tandem conualuit, & vires a solo potu veronicæ recuperavit, qui mox tussim sedabat, appetitum excitabat, expectorationem iuuabat, & præternaturalem calorem compescebat.

25. CERTISSIMUM est veronicæ vulgo adscribi ab omnibus medicis singularem virtutem depurandi sanguinis massam, nec sine ratione; virtus enim hæc depuratoria in eo consistit, ut sanguis & fluores corporis nostri scoriis salino sulphureis excrementitiis morborum priuentur, siue illis correctis ac inuersis, siue per congrua sua euacuatoria proscriptis. Vtrumque egregie præstat infusum veronicæ, quod acres morbosos sales temperando diluendo, & spiracula cutis renumque poros blande aperiendo, in sanguinis impuritatibus seu malo scorbutico

tico præsentissimam opem afferre solet. Sic veronicæ potu contra scabiem & cutis pruritus vix datur remedium præstantius, eaque mala depulit felicissime, aliquoties Halberstadii scabiem siccam, ægros imo ipsos senes infestantem, diuturnam, solo hoc potu largissime per mensis spatium hausto. Similem effectum extrinsecus etiam exercere testis est satis locuples SIMON PAVLI in *quadripartit. Botan.* qui ita scribit; *ingenue fateor, cum aliquando variis medicamentis aduersus crustosam scabiem puerorum usus essem incassum, me iussisse parentibus aquæ veronicæ intincta linteamina applicare compressa, ne stillarent suris brachiisque pueruli eiusque, meque sic eum ex voto restituisse pristinae valetudini.*

26. STVPENDÆ tandem virtutis, contra calculosam concretionem hæc herba a Clarissimis medicorum celebratur. Notabilem hac de re inserti obseruationem in *Ephemerid. Germ. D. ELSNERVS A. I. Decur. 1. Obseru. 107.* Sutoris vidua, quæ calculum per 16. annos in rene aluit sinistro, qui cruciatibus illam affligebat, vt, viribus omnibus absumentis, nil nisi sceleton viuum repræsentaret, ob summum cruris stuporem, & renis dolorem in isto latere, per totum illud tempus nunquam dormire potuit. Tandem decoctum veronicæ in magna dosi per aliquot tempus assumsit, quo effecit, vt calculus ad vretheres & tandem ad vesicam protrusus, miseram stillicidio & difficultate vrinæ diu vexauit, donec ab assumpto superiori nominato decocto & eius fomentatione, natura adhuc dormiens expergefacta maximis & iis conatibus, quibus alias a foetu se liberare conatur, excitatis, hospitem peregrinum cuspide expulit, qui tandem vi ab ipsa ægra per collum vesicæ extractus fuit, & quidem non absque summa illius læsione & copiosa hæmorrhagia. In colica, calculo & ipsa peste CRATO trium *Imp. Archiater* plurimi facit hanc herbam, imo vel simplex decoctum veronicæ omnibus aliis generosioribus internis medicamentis, contra calculum præfert. Sic obseruauit Halberstadii fortem infusionem herbæ veronicæ viro quinquagenario colica violenta laboranti, materiam instar sper-

spermatis ranarum, innumeris vesiculis constantem per aluum eduxisse.

27. NOLO iam esse nimis longus in recensendis veronicæ obseruatis viribus, & vt rem paucis complectar & expediam, crebro ac quotidiano vsu obseruata fuit potio & infusio veronicæ, idem imo longe præstantius quid effecisse, quam ipse potus herbæ *Thee*, nec singulare quid ab hac expectandum videtur, quod non idem noster potus præstare potis sit. Ego sane per multos annos hanc potionem loco herbæ *Thee* omnibus fere ægris, maximo cum emolumento, suasi & nunquam noxam ab hac obseruavi; cum contra herba *Thee* propter nimiam adstringentem qualitatem a me non semel obseruata fuerit magna peperisse incommoda, præsertim in illis, qui siccitate neruorum laborant, & spasmodicis contractionibus sunt obnoxii; hinc hypochondriaci & hystericae grauia non semel ab eius vsu experta sunt symptomata, nimirum cardialgias, anxietates præcordiales, dolores in abdomine alui fluxum &c. relatumque fuit mihi ex ipso Belgio, plures ex frequenti eius vsu factos fuisse paralyticos & hinc potum *Coffee* magis ibi æstimari.

28. Ex hisce iam adductis sufficientissime patebit, dari in nostris terris herbas longe salubriores, & præstantiores exoticis illis, quæ magno pretio ex extremis istis regionibus sibi afferri curant Germani, & quod veronicæ nostræ dignitas ipsa herba *Thee* longe sit superior. Hinc nostra vernacula, quæ nobis prouida mater natura largissime & gratis concedit, ad sanandum merito sufficere debet, vt non opus habeamus, ex dissitis regionibus ignota quædam ad medicandum repetere.

DISSERTATIO VI.
DE
PVRGANTIBVS MINVS
COGNITIS ET SELECTIORIBVS.

§. I.

VNIVERSAM œconomiam microcosmi vitalem eiusque conseruationem motu non modo progressiuo solenni per circulum, sed & variis motibus mixtionis, secretionis, excretionis, sustentari, nemo facile, cui interiora corporis nostri paulo exquisitius patent, in dubium reuocabit. Quapropter omnis generis læsionem præternaturalem & morbosam affectionem corporis nostri non inconuenienter ex læsis istis motibus prudentes ducunt atque deriuant. Ex horum numero eminent maxime motus euacuatorii, qui quantum naturæ commodi adferant, dici vix potest. Quandoquidem corpus nostrum in conseruationem suam eget multis rebus, quæ intus debent sumi, nec tamen in mixtionem & intimum eius vitale consortium abeunt, sed rursus maxima ex parte solent euacuari, quorsum spectant omnis generis fere salia inter alimenta reperibilia, humidi plurimum, nec non sulphurea explicata. Quin imo pauca sunt ex medicamentis, quæ sese cum succis corporis nostri iungunt, sed potius rursus debent excerni, vtut hoc ipso actu, dum intrarunt & exeunt, nobilissimam opem conferant. Paucis: natura plus est occupata in excernendo quam in retinendo. Si itaque euacuationes hæ summe necessariæ non debite, non sufficienter succedunt, & ea, quæ debebant eiici, relinquuntur, præsentissima inde materia ad morbos nascitur. Tametsi autem natura numerosa & diuersissima eum in finem construxerit euacuatoria: nullum tamen solennius est; nullum magis pernecessarium, quam quod constituit alius, si nempe ab ipsa perspiratione cutis longe saluberrima discefferimus.

(Hoffm. Opusc. varii argumenti.)

Ddd

2. ET

2. Et quemadmodum per alia euacuatoria certa & peculiaria tantum excrementa eliminantur, ita per aluum non vnus eiusdemque naturæ sed diuersi generis humores secluduntur; vtpote non modo ex ventriculo & tenuibus intestinis crassior, inutilis & effoeta alimentorum extractorum portio per hanc viam transit, sed ex toto hepate bilis, ex pancreate & intestinorum præsertim crassorum glandulis lymphæ, serum, mucus sequestrantur. Quantum vero corpori accedat inde beneficii, vel ex eo tantum potest cognosci, quod ex suppressa & pigra aluo morbi permulti oriuntur, nec ipsa præsentē, tuta ac felix cum acutarum, tum chronicarum passionum succedat sanatio, sæpissime enim prouidissima natura sibi eligit has vias, & sanat morbos. Ex hisce fluit, respiciendum a medico maxime omnium esse ad hanc aluinam euacuationem, vt ipsam, quando necesse est, iuuēt; munus enim medici in eo potissimum versatur, vt, quod natura sola non potest efficere, id arte procuret & exsequatur. Permultum autem interest, quibusnam subsidiis & instrumentis id perficiatur. Nos, repudiatis omnibus iis, quæ violenter & virulentia naturam lacerant, maximam securitatem ponimus in temperatioribus stimulantibus, naturæ amicis, & nullum damnum, nullam noxam, iis partibus, in quibus operantur, affricantibus. Quoniam autem non hæc obuia omnibus sunt, iudicauimus dignum opus recensere ea, quibus egregio cum fructu vti possumus. Placuit itaque in præsentī loco selectorum purgantium materiam pertractare & optima ac selectissima parum nota in vsum medicum commendare.

3. PRIUS vero quam ad enumerationem rariorum & selectiorum aluum stimulantium accedamus, nobis erit commemorandum qua ratione & quo principio euacuatio per inferiorem partem celebretur, siue qua ratione ipsa purgantia effectum purgantem exserant. Quemadmodum vero fœcum seclusio secundum naturam fit primo motu intestinorum peristaltico, secundo huic ipsi inseruiunt stimulo: ita etiam purgatio, quæ fit arte, simili modo habet. Notum enim ex

anatomicis est, totum intestinorum volumen gaudere tunica ex duplici fibrarum ordine longitudinalium scilicet & circularium contexta, quæ muscularis & carnea appellatur, cuius beneficio motum reciprocum dilatationis & constrictionis a ventriculo ad anum successiue tendentem persequuntur. Qualis motus peristalticus siue circumpressorius etiam vermicularis appellari solet. Hoc ipso omne in intestinis contentum vrgetur vel foras, vel per vasa in interiora. Motum hunc intestinale non esse a se ipso, sed ab alia extrinseca causa, nullus est qui dubitat: hanc vero corpoream esse & tenuissimam, fluidissimam, valde actiuam, nullus ex sanioribus quoque negat. Quo autem vocabulo hanc ipsam insignire quis velit, & vel naturam, vel animam, vel archeum, vel animalem spiritum, aut vitale principium vocare, nobis perinde est. Illud tamen suffecerit hic meminisse, nullum motum in tota rerum natura non nisi proxime per substantias extensas sese inuicem tangentes fieri, quamuis deinde talium substantiarum corporeas inter se actiones, & reactiones, immateriales actus in animantibus præsertim, quandoque variis modis modificare determinare & dirigere ad certos motus incognita nobis plane ratione possint & soleant, sicuti id in *dissert. de potentia diaboli in corpora* latius est ostensum. Quamuis itaque in motione intestinorum peristaltica, sicuti ad omnem in vniuerso motum, & mouente & mobili extenso opus sit, sine quibus nullus celebrari potest motus: nihilominus solo ideali & immateriali actu, cogitatione, peruersa impressione, determinatio & directio huius motus varia fieri potest. Ita habemus luculentissima exempla, vbi saltem ex solo visu, odore, auditu, multo magis sapore purgantium vehementer quidam purgati fuerint, vbi anima immateriali isto phantasiæ actu id minime effecit proxime, sed tantum per hoc instrumentum siue principium corporis actiuum, quod communi & recepto nomine spiritum vocamus.

4. QVEMADMODVM vero in microcosmo, si motus sunt celebrandi, non tantum sufficiunt mouens, instrumentum &

mobile, sed recte, ut hæc ipsa agant, opus est alia actione, motione externa excitatoria, quæ in ipsis nervis siue nervosis membranis fit. Hinc ubi musculos natura collocavit, ibi etiam adstites sunt nervi; in hos si fit insultus, vellicatio ab objecto corporeo externo, vel pondere, vel figura acuta, protinus excitatur, & motus in substantia augetur musculosa: eodem modo sese res habet cum motu peristaltico intestinorum, qui non nisi præcedente actione in nervosam tunicam, celebratur vel intenditur in tunica musculosa. Huic autem stimulo, quo agitur ipsa nervea tunica, serviunt non modo sanguis, alimenta, cum copia, tum qualitate salina, sed natura peculiarem eum in finem quoque elaborat liquorem, & iugiter ipsum in intestinorum initium amandat, ut per hunc ad motum incitentur, estque ipsa bilis, quæ a veneranda antiquitate non inepte clyster naturalis dicta est. Copiam vero ingestorum aluum irritare vel ex eo convincimur, quod in diuturna fame & iis, qui parum bibunt aut comedunt, utut bilis sit valde acris, tardissima soleat esse alui excretio, & ordinario a copia cibi vel potus assumpti sollicitetur natura ad deiectionem. Imo ipsa purgantia ante vel etiam post cibos sumpta laudabiliorem effectum edunt, ac si ventriculus fuerit vacuus. Acidularum & thermarum ingens copia, non tam actiuo principio, sed potius mole sua sollicitat aluum. Deinde cibos, quo magis sunt, sale & aromatibus conditi, eo citius per aluum transire, toto die obuium est. Principaliter vero ipsa bilis stimulo suo acri irritando nerveas sensibiles intestinorum lamellas ad conseruationem & autionem motus peristaltici multum confert. Vnde qui bilis defectu laborant, vel eam viscidam, inertem, vel nimis dilutam habent, ii ordinario alui sunt tardioris. Ex hisce allatis non inepte colligimus, ea esse optima & naturæ convenientissima aluum stimulantia, quæ ratione mixtionis & naturæ consymbolismum atque affinitatem fouent cum ipsa bile, cuius generis sunt omnia amara in regno vegetabili conspicua, nisi aliud quoddam iis admixtum principium eorum efficaciam retundat.

5. VERVNTAMEN cum de stimulo principioque purgante verba fecimus, non res ita intelligi debet, ac si proxime & immediate hoc ipsum commoueat intestina & suscitetur ipsas sedes. Quoad ego meminerim, nullus sanior vnquam medicus in talem iuit sententiam, sed omnes fere in eo sunt concordēs, quod sicuti omnia medicamenta, ita & ipsa purgantia non proxime & formaliter motum efficiant in nervis & musculis, sed quod hoc faciant spiritus, siue anima, quæ tantummodo ab ipsis pharmacis varie disponitur, & ad motum excitatur. Nam quemadmodum fluidum illud elasticum, quod in nervis & sanguine reconditur, omnium motuum in corpore nostro, ita etiam motus peristaltici aucti in purgatione causa est. Perspicua inde est ratio, quare qui sensibilibioris sunt naturæ, sanguine & spiritibus abundant, qui cholericis & sanguinei sunt, non modo expeditiorem euacuationem per aluum ordinario habeant, sed & a purgantibus celeriores & faciliorem effectum sentiant. Hæc quoque est causa, quod sub æstatem atmosphæra valde tenui & fluida existente, & in corporibus motu exagitatis facillime succedat purgatio. Idem fit, quando purgantia cum vehiculis calidis & spirituosissimis assumuntur, hinc vidimus cum vino calido, item cum spiritu vini dulcificato purgantia assumpta felicissimæ fuisse operationis. Contra per irrefragabilem experientiam compertum est, corpora, languida, segnia, torpida, ubi vires & spiritus deficiunt, fibræ sensus & motus debilioris, temperamentum pituiosum & melancholicum est, motus & laboris expers, coelum triste & nubilum, valde difficilem ipsa purgantium operationem scaturire. Quibus aperte liquet non proxima ratione purgantia hunc effectum præstare in intestinis, sed saltem mediate.

6. DEINCEPS hæc nostra sententia est, principium, quo agunt purgantia, & quocunque modo aluum stimulent, esse merum salinum, quod vellicando, scindendo, pungendo, fibrillas nerveas & naturam ad motum peristalticum intensiorem incitat & prouocat. Et clarissime hoc demonstrabimus

iis, quæ sequuntur ; omnis generis salia ex regno vegetabili & minerali desumta facultate pollere laxante & purgante : neque hic admittimus specifica sui generis salia esse, quæ intestina commoueant, stimulent, in aliis vero partibus id non faciant : sed potius aperte profiteamur, omnia salia, quæ extricata sunt, sui iuris, quæ ipsum iustum afficunt, linguamque feriunt & vellicant, esse debita in quantitate sumta etiam aluum stimulantia. Excipimus tantum volatilia salia, vrinosa, quæ quoniam nimis cito per poros auolant, hoc effectum destituuntur, & magis sudorem ac vrinam pellunt. Excipimus porro, omnia caustica ex regno animali desumta, quæ vesicatorium effectum exserunt & sale subtili caustico scindente imbuta sunt, cuius generis sunt cantharides, millepedes, scorpiones, araneæ, vermes maiales, bubones, quæ fortia sunt diuretica, minime autem purgantia, nam ex toto regno animali nec vnicum nobis notum est corpus, quod cum certo successu purget. Nam vtut certis in corporibus, præsertim insectis inhabitent salia tenuissimæ causticæ indolis, ea tamen propter nimiam exiguitatem & volatilitatem non apta sunt linguæ papillulas nerveas, multo minus intestinorum tunicas, commouere.

7. EQVIDEM quod non omnia salia purgantis sint virtutis, ex eo euincere allaborant, quod piper, zingiber, ceu fortissima salia stimulantia, aluum potius siccent, quam ipsam fluidam seruent ; veruntamen non negamus hæc dicta acerrimo sale esse foecunda. Ast quoniam copioso sale alcali tam fixo & volatili, nec non sulphureo scatent, potius in sanguinem operantur, calorem & motum eius intestinum mouendo, vnde calefaciunt, exsiccant & humores a centro ad circumferentiam commouent. Diximus vero antea omnia salia alcalia volatilia & sulphurea stimulo suo plus agere in sanguinem, quam in ipsa intestina. Vnde etiam radix armoraciæ, raphanus, piperites, sedum vermiculare, radix ari, quæ acerrima sunt, magis ob eandem rationem sudorem & vrinam cient quam vt sedes moueant. Quapropter statuimus sal
aci-

acidum, præsertim si cum aliis sulphureis particulis varie mixtum sit, esse palmarium purgantium elementum. Id quod probamus maxime exinde, quoniam, uti diximus, nullum sal volatile urinosum purgat; sed omne quod purgat, siue sit desumptum ex regno vegetabili, siue minerali, in mixtionem suam acidum principium admittit. Acida enim naturæ sunt fixioris, partes habent solidiores & constantiores, figura gaudent magis scindente & purgante præ alcalinis.

8. CLARIOR autem hæc assertio fiet per sequentia, dum varia minus cognita purgantia recensere animus est. Verum enim vero obiicitur hic vulgo, quod; quoniam affusione acidorum mineralium spirituum purgantia etiam drastica castrantur & exuuntur sua virtute, esse purgantium elementum magis alcalinæ indolis; quibus respondemus: imbecillum esse hoc argumentationis genus, si acida priuant purgantia sua virtute, ergo in alcali consistit eorum energia. Nam videmus emeticam antimonii vim sufficienti quantitate spiritus nitri affusa, siue cum tripla portione nitri deflagret, exspirare, neutiquam tamen exinde elicitur antimonii vim emeticam conquiescere in alcali. Quin imo ipsa tinctura salis tartari acri omnia drastica purgantia, colocynthidem, gummi guttæ, helleborum, omni vehementia purgante exuit & priuat. Ita quoque eadem encheiresi vesicatoria cantharidum qualitas debilitatur, vel plane destruitur. Potius hæc fortiora excessiua salia, quoniam totam crasin, schematismum, ac mixtionem corporum mutant, aliamque partium dispositionem & configurationem efficiunt, alium quoque introducunt effectum ac virtutem antiquam destruunt.

9. EXPOSITO sic elemento, quo & per quod agunt purgantia, sequitur iam, ut partim rariora, minusque cognita, partim etiam selectiora ex minerali & vegetabili regno sigillatim, eo tamen, quo fieri poterit, compendio, recenseamus. Prodeat itaque in scenam regium illud metallum aurum, quod per se fixissimum & omnium in hoc vniuerso grauissimum, quod nisi fuerit solutum, omni penitus effectui in corpore caret.

ret. Simulac vero degenerat in salinam & vitriolicam naturam, commixtione variorum salium, siue liquidorum siue siccorum; acquirit virtutem, non modo aluum sed & alia emunctoria sui officii admonentem. Ita verbi gratia solutio auri in aqua regis facta; inspissata & cum spiritu vini rectificato diluta, & instillata ad aliquot guttas aquæ fontanæ placide & egregie aliquot sedes mouet. Auri fulminantis virtus expurgans nemini non iam cognita est; accipit autem hanc ipsam tantum a particulis nitrosis intimius actu solutionis & præcipitationis auri minutiis commixtis, dum nempe ex commixtione aquæ regis & liquoris alcalini resultat nitrum, quod poris auri ceu corporis fixi inhærens hunc stimulandi producit effectum. Ab hoc quoque dependent auri fulminantis vis, de eoque obseruauimus, si fortius fulminat, vehementius etiam mouere aluum; contra vero debilius etiam hoc agere, si parum vel plane non fulminat. Experientia porro confirmat omnes solutiones & liquores auri, qui sub splendidis titulis medicinæ vniuersalis vel potabilis auri venduntur, sæpenumero in maiori dosi ciere aluum, non sine fructu: ita exempli gratia, quando in solutione salis communis, nitri, tartari vitriolati coquuntur folia auri, postea massa exsiccat, & hæc massa exsiccata extrahitur spiritu vini, exsurgit elegans tinctura aurei coloris, quæ chalybem quoque egregie tingit aureo colore, & in nonnullis subiectis efficaciter sordes educit aluinas. Referri etiam huc debet famigerati huius loci remedii, quod essentiam dulcem vocant, operatio, quæ in dispositis sæpius fortiter purgat. Verum quoniam in recensitis ex auro paratis purgantibus exiguum sæpe est salis, minus etiam purgare eadem solent, ast si maior accedat salium copia fortior quoque succrescit in purgando effectus. Ita verbi gratia granum vnum auri fulminantis bene trituratam cum arcani duplicati scrupulo & croceo colore, & metallico austero sapore hoc ipsum imbuunt. Talis puluis in Serenissima vltra viginti sedes nuper prouocauit,

10. OBSERVAMVS quoque ipsum fulminans aurum quando non sufficienter edulcoratum fuerit, plus ducere aluum, quam si ab omni salino contagio fuerit magna de industria elotum. Denique circa hæc ex auro parata remedia non ignorari oportet, longe maiori vtilitate & consilio ipsa præscribi in corporibus torpidis, cachecticis, infantilibus etiam, vbi intestina mucosa & verminosa saburra sunt obseffa, neque tam felicem eorum successum esse in sensibilibus & biliosis scorbuticis subiectis. Deinde animaduersionem desiderat hoc, quod tutiora perpetuo in forma liquida sint ex auro parata, quam sicca; metallum enim hoc omnium grauissimum plicis & tunicis intestinorum tam firmiter insidet, vt non tam facile elui possit, vnde concursu acidi solutum & vitriolicum factum vim inferre loco, cui inhæret, quam facile potest.

11. DESCENDIMVS iam ad argentum, & an ex hoc quoque prodeant remedia aluum soluentia, scrutabimur. Quæ de re non amplius dubitandum est, dum a peritissimis chymicis lunæ chrystallos catharticæ & hydragogæ celebrantur, & ab illustri BOYLEO pilulæ ex ipsis paratæ ad educendas hydropicorum aquas ceu specificæ commendentur: nec sine ratione, nam strenue a colluie serosa deplent intestinorum canalem, idque vnice faciunt, quia rodendo & vellicando intestinorum tunicas & glandulas maiorem motum peristalticum & maiorem affluxum feri procurant, nemini enim in medicina versato ignotum est, dictis crySTALLIS felicissimo cum successu inuri fonticulos. Et porro omnes solutiones argenti aluum ducente virtute per experientiam claræ sunt. Ita argentum purum, solutum in aqua forti, postea instillatum spiritui vini rectificatissimo largitur liquorem, qui in sufficienti quantitate ad guttas decem & vltra liberaliter & sine torminibus sedes facit. Succedit autem experimentum magis ex voto, quando secundum processum MONTESCHNIDERI argentum cum regulo antimonii miscetur & puluere fulminanti tractatum vertitur in cineres, qui expositi aeri, sal vitriolicum elegantissimum, splendidis miculis conspicuum præbent, quod

in aqua solutum, nobile medicamentum ad detergendas in primis viis sordes constituit. Magisterium etiam lunæ præcipitatione cum sale communi confectum, debita dosi, pituitam per aluum educit, & hydropicis & melancholicis confert. Cæterum notum est, quod in chronicis affectibus capitis, præsertim epilepsia, vertigine, in putredine quoque verminosa infantum, veteres remedia ex luna laudibus magnis extulerint. At vero quicquid boni præstant laudatis in affectibus, id saltem fit, cum successiue detergant, resoluant, & viscolitates e primis viis deducant. Valet circa vsum cautela B. HOFFMANNI in *clauæ* pag. 280. quæ est, ut non nimis crebro exhibeantur, quia alias noxam inferre possunt. Addimus quod magis pituitosis, segnibus & torpidis naturis conueniant, quam actiuioribus.

12. PROGREDIMVR iam ad cuprum, & quænam ex ea repeti possint aluum irritantia circumspiciemus. Eius vis draistica ventriculum subuertens & nauseosa, vomitoria, nemini non ignota est, adeo ut vniuersaliter pronunciandum sit: omnia ex cupro parata, præsertim in pleniori dosi, esse emetica, cuius rei ratio in eo consistit, quoniam sulphur mercuriale valde actiuum penetrans cum acidi mixtura celerrime agit, mox in ventriculi fibrillas corrosiuitatem exserit. Enim vero, quando cupri cum spiritu vrinoso, qui nullum aliud metallum præterquam hoc ipsum aggreditur & soluit, dissolutio instituitur, tincturam pulcherrime coeruleam concedit, quam debita dosi, refracta nempe, & conuenienti vehiculo propinatam intestina a sordibus per aliquot sedes liberando, in epilepsia infantili ex primis viis, febribus intermittentibus, & ex vermibus prodeuntibus symptomatibus non contemnendam opem tulisse ferunt. Operose vero talis coerulea tinctura ex luna cupro infecta, operosius ex vitriolo, & operosissime ex limatura martis petitur. Nam obseruationem meretur, quod famigerata ista coerulea tinctura, quæ ex Silesia etiam ad nostras regiones transferri solet, & pro tinctura martis venditur, & ex martis etiam limatura, salibusque præsertim sale ammoniaco conficitur, suum colorem vnice debeat veneri, quod minus curiosis paradoxum videtur.

Ve-

Verum qui considerat metallorum mutuū consymbolismum & affinitatem, & quod omne fere argentum quædam ramenta auri, omne fere plumbum particulas argenti, & omne ferrum aliquid veneris in sinu suo complectatur, ille facile capiet rationem, quare ex contextu & inuolucro martiali cuprum latitans non nisi salibus penetrantissimis eliciatur. Constat autem frequenti experimento, de hac dicta tinctura coerulea, quod pleniori manu exhibita, & vomitum & aluum quoque ciere soleat. Circa venereorum autem vsum monemus, vt ob metum corrosiuitatis valde moderatus ac parcus sit, præsertim si cum acidis menstruis ex ipso remedia fuerint parata.

13. NVM ex Marte magis in fonte metallo peti possint alvum ducentia, res exquisitiorem indaginem meretur: & quemadmodum nullum metallum, nisi solutum & vitriolicum factum operatur in corpore: ita etiam Mars, nisi solvatur, omni efficacia exuitur. Quapropter si quis limaturam Martis in substantia præscribere velit, opus est vt circumspiciat, an acidi in sinu ventriculi oberrantis præsentia sit, tunc operatio succedere solet non infructuosa. Nam acidum absorptum degenerat in vitriolum, quod sæpius aluum liberaliter ad quinque vel sex sedes cum appetitus, virium caloris interni suscitatione non sine fructu in quibusdam subiectis mouet, imo ipsum vitriolum Martis ad drachmam vnā vel duas, modo in sufficienti quantitate aquæ diluatur, egregie per inferiora operatur. Videmus id clarissime in acidulis, quarum virtus deiectoria notissima est, quæ plerumque vitriolo martiali debet. Quin imo omnes tincturæ martiales quæ cum blandis vegetabilium succis & menstruis sunt confectæ, verbi gratia cum succo pomorum borstorffianorum, cydoniorum, tamarindorum, succo pomorum chinensium, largius ad cochlearia duo datæ aluum egregie expediunt. Subiiciendum vero hoc loco est, quod martialia non semper in aluo ducenda correspondeant voto, sed quandoque stringendo contrarium exserant effectum, præsertim vbi humores incrassati sunt, & spasmodicis constrictionibus inferiores partes adsuetæ.

14. Ex Ioue suppeditari aluum stimulantia perinde in scho-

lis medicis incognitum nihilominus certissimum est: nam sal stanni virtute laxante & anthelmintica eminet & experimentum cum vulgari stanni solutione fieri potest, quæ ad drachmam vnam cum vehiculo aquoso data vehementer aluum exercet. De Saturni sale dubium quoddam restat, an hoc ipsum etiam sit laxantis naturæ, potius communi suffragio medicorum molestam alui constrictionem facit & ad tormina disponit. Alii virtutem emeticam ipsi tribuunt, quod solutio lithargyrii cum acetato facta & ad cochlear vnum sumpta vomitum & aluum cum violentia moueat. Verum cum, loco lithargyri minium si recipiatur, effectus idem non sequatur, ideo drasticam illam vim a cupro, quod lithargyrio admiscetur, dum argentum separatur, rectius deducunt. Merito igitur saturnina ceu stiptica & austera ex classe laxantium proscribimus. Devenimus iam ad mercurialia, quorum summe vehemens vis caustica in proritanda non modo aluo sed & vomitu, salivæ fluxu ex læsione, inflammatione omnibus apertissima est, & effectum inde producant. Notissimum porro, quod sicuti cætera metalla, ita hydargyrum etiam purum nisi fuerit solutum, in & extra corpus in magna quantitate sumtum omnis violentiæ expers sit: simulac vero contactu acidi soluitur & in sal degenerat, summe venenosum euadit.

15. ORDINE iam perducimur ad mineralium familiam ex quibus principatum ducit ipsum stibium. Ex hoc purgans turum diu curiosi rerum chymicarum ac medicarum scrutatores desiderarunt, sed adhuc expectationi votum non respondit. Potius antimonium ex emeticis omnium optima in exili dosi generosissimæ operationis subministrat. Vbi quidem non negandum est, post vomitus aluum etiam simul fluere, tale vero, quod tantum purget, nondum hætenus inuentum est. Illud autem non prætermittere hoc loco volumus, quod vehemens illa vis, quæ in emeticis antimonialibus conspicua est, identidem a connubio acidi cum mercuriali stibii parte sit petenda; nam crudum antimonium sine noxa, imo cum fructu insigni certe quantitate a quibusdam solet offerri. Simulac vero sulphur a substantia mer-

mercuriali separatur, & tenue acidum, inprimis tartareum, ingressum in hanc ipsam inuenit, summe violenta inde exsurgit operatio. Et hæc est causa, cur vitrum antimonii vino infusum ipsum reddat emeticum, & tartarus coctus cum hoc ipso sal emeticum paratissimæ operationis constituat. Mercurius vitæ quoque, si non sufficienti lotionē a spiculis acidis priuatur, valde violentus est; quæ omnia docent, acidum esse in causa, quod metallicam & mercurialem substantiam ita armet in venenum.

16. VERVM longe magis optatum ipsa salia ex minerali regno edunt effectum. Nam si sal primum est stimulans & præcipuum fundamentum purgatricis efficacix, facile constat, in salibus etiam eminentiori gradu hanc ipsam custodiri. Quod etiam res ipsa confirmat. Salia enim omnia, quæ natura profert neutra, quæ artis etiam sunt producta, dummodo in conuenienti adhibeantur quantitate, semper strenue aluum mouent. Et primo examen subeat sal commune, cuius virtus aluum deiectoria non omnibus æque nota est. Ast si vna vncia in dimidia mensura aquæ soluta hauriatur, sine molestia vltra sex sedes prouocabit, & eam ob causam ipsi fontes, qui ante aliquot annos celebres erant Hornhusani, circumspecte poti, quibusdam insigne leuamen afferebant, satis fortiter & celeriter purgabant: non vero aliud elementum, quam verum sal commune magna in copia, in parciore autem sal quoddam nitrosum calcareum complectebantur. Et duobus ab hinc annis Stasfurti scaturientes fontes valde insigni purgandi virtute pollebant propter sal commune, quod in copia continebant. Imo quotidiano docemur experimento, quod ab esu halecis mox citatiorem aluum experiamur, qua de causa a nonnullis medicis præsertim Vienstibus loco medicinæ commendatur. Effectus vero purgans & stimulans huius salis notissimus est inter clysteres, nam certe vna drachma salis communis in clysteribus plus præstat quam vncia vna aliorum purgantium, & si quando reliqui omnes clysteres subsistunt, & carent effectū, clyster salinus tantum ex sale & aqua paratus certissime eam reserabit, & reliquos ad exitum promouebit.

17. DE salis nitri laxante virtute nemo est ex medicis, qui ulterius dubitet, vnde etiam vbi metus est alui fluxus, ab eius usu cauere solent. HARTMANNVS in *praxi* miscet nitri vnciam cum mensura vna aquæ pro potu febricitantium. SCHROEDERVS in hunc locum scribit, quod non transcendat scrupulos quatuor & tamen sæpius alui fluxus concitet. Nos in omnis generis febribus non melius nouimus remedium ipso nitro tam propter virtutem refrigerantem, quam ob id, quod aluum ad fluiditatem disponat, quod beneficium tanti est, vt non satis ad sanandas febres possit æstimari. Quoniam vero de vitriolo iam superius mentionem inieciimus, de nitroso, calcareo, neutro, amaricante sale, quale in copia nonnulli fontes custodiunt, etiam aliquid dicendum est. Asserimus vero plurimas acidulas Germaniæ scatere tali sale nitroso neutro, arcano duplicato valde proximo, & ob id suam aperitiuam purgantem virtutem accipere; sicuti in *Dissertatione de methodo examinandi aquas salubres* latius demonstratum est. Abundantissime hoc sal etiam in fontibus Egranis existit, ex quibus quoque magna in copia arte paratur, Schwalbacensibus, Wildungensibus, Tönsteinensibus, & omnis effectus spiritui æthereo & huic sali est adscribendus. Quod exinde discimus, quando videlicet sal ex Egranis aquis elegantissima arte productum, suminus ad vnciam vnam & in aqua sufficienti soluimus, emergit liquor, qui totus haustus quinque vel sex sedes sine omni molestia mouet, appetitum excitat, & magnos effectus in chronicis morbis edit. Sæpius in me ipso & in aliis cum arcano duplicato feci experimentum, & ad vnciam vnam in mensura dimidia aquæ solutum hypochondriacis, intermittentibus lentisque febribus laborantibus egregio cum commodo propinaui. Sustulit sæpe vnica dosis febres, & sedes tres vel quatuor mouit.

18. HVIVS commatis quoque solet esse sal illud ex alumine paratum febrifugum purgans, de quo mentio reperitur in. B. HOFFMANNI *clauæ pharmaceutica* pag. 348. Ego, inquit, ex alumine cum alcali quodam combinato egregium noui conficere

cere sal crystallisatum abstersuum purgans, tutissimum in febribus & aliis affectibus, ubi curatio alias per colliquatiua purgantia non facile expedienda est, usurpandum. Dosis est a scrupulo uno ad drachmas duas vel ultra in brodio calido, habet vim saponariam, abstersuam ac diureticam. Ipse hoc sal loco arcani duplicati frequentissimo habeo in usu, quod in omnibus huic est simile, sed extendi eius dosin in fortioribus ad vnciam semis, imo ad vnciam vnam, ubi aluum in iis subiectis egregie aperit, quæ alias frustra purgantibus exercentur. Obseruavi de laudato sale aliquoties hoc peculiare, quod affricu in tenebris lucem sparserit.

19. NOTABILE porro est, quod alumen styptica virtute alias clarum certa quantitate mixtum cum sale communi & aqua coctum & ad crystallisationem repositum degeneret in sal amaricans austeritatis expers, quod ad drachmas quinque vel sex datum cum sufficienti quantitate potus egregie sedes mouet. Breuissimis; omnia salia neutra, tartarus tartarificatus, tartarus vitriolatus, tartarus nitratus, terra foliata tartari, solutio oculorum cancri, sufficienti in dosi, & cum largo vehiculo sumta, egregie primarum viarum sordes aliquot sedibus sine vlllo incommodo languore vel violentia expurgant. Et vnice id in exhibitione horum remediorum desidero, quod in certis casibus non dentur in ingenti dosi, nec eorum vsus continuetur. Quod autem in salibus potens insit vis expurgandi humores per aluum, vel hoc ipsum euidenti testimonio esse posset, quod ad acuenda purgantia, eorumque efficaciam intendendam salia addita egregie inseruiant. Ita ex sagacioribus medici salia dicta neutra paucis saltem granis verbi gratia diagrydii, ialapii, admiscere consuecunt, & obseruarunt, quod vnum granum diagrydii cum scrupulo semis tartari vitriolati mixtum plus operetur, quam si ad grana sex diagrydium fuerit sumtum, quod etiam valet in cæteris.

20. PERLUSTAVIMVS hætenus salium mediorum classem quo modo & qua dosi aluum laxandi vim habeant. Aquas quoque minerales laxantes ob idem principium salinum effi-
caces

caces obseruauimus. Dicendum iam etiam est de nonnullis vinis, quæ in conuenienti quantitate sumta eximie aluum aperiendo multas sordes educunt. Referri huc maxime debent vina Mosellana, quæ non modo propter temperiem, qua gaudent, & diureticam virtutem æstumatissima sunt, sed quod peculiariter aluum altero die satis strenue moueant, qua de causa etiam omnium saluberrima solent iudicari. Causas huius peculiaris effectus si exquirimus, non alias inuenire in expedito est, quam quod copioso sale, non tam tartareo, quam potius nitroso calcareo scateant, cui ipforum virtus est tribuenda. Relatum namque nobis est, quod ubi vites crescunt solum valde foecundum sit sale nitroso tartareo amari-cante, a quo etiam plurimi fontes & aquæ, testibus Tönsteinensibus, saporem salubremque virtutem muntuantur. Hoc sal causa quoque, est quod hæc vina amariusculem saporem præbeant, virtute diuretica & aperitiua prædita sint, nec facile inebrient, inque subiectis & morbis calidis, æstate quoque melius aliis ferri possint.

21. EXPOSITA sic virtute salium mediorum deterforia, sequitur vt circumspiciamus, num acidis, siue in forma sicca, siue fluida consistant, etiam eadem virtus possit attribui. Occasionem dubitandi subministrat, quod acida adstrictiuæ sint indolis, stimulum bilis eneruent, poros constringant, humores incrassent; at vero non perpetuo id esse verum sequentia indicabunt. Spiritum salis rite præparatum diureticum esse in eo hætenus, vt memini, conuenerunt omnes, sed laxante virtute instructum, paucos memini, qui adfirmarunt, verum hoc experientia discimus. Degit Cizæ non imperitus chymicus, qui sequentem in modum hoc spiritu vtitur. Instillat nempe ipsum ad guttas decem in mensuram dimidiam aquæ fontanæ. Hanc mixturam mane ieiuno ventriculo simul & semel hauriendum imperat, in calore præternaturali, febrili, bilis commotione ab iracundia, a copia vini, ita egregie præcipitat æstum, sitim exstinguit, aliquot sedes aluinas mouet, vrinam pellit & appetitum excitat. A spiritu nitri instillato
exi-

eximia quantitate iulapiis pro extinguendo calore febrili, quam methodum vsu quondam habuit Mindensis practicus, aluum inde fluidam redditam non sine notabilii emolumento vidi; aliquando tamen a paulo liberaliori instillatione huius spiritus etiam sanguis prodiit, verum sine damno. Clyffus antimonii sulphuratus quod similem in finem potui intermisceri soliat, practicis notissimum. Hic autem nonnisi spiritus nitri & sulphuris, penetrantissime acidus est. Meretur huc adduci, quod de hoc scribit WEDELIVS *in libro de medicamentorum facultatibus* pag. 152. *Acidulae, inquit, artificiales, siue clyffus antimonii sulphuratus aluum ducit & simul uti & acidulae naturales urinam pellit.* Hinc in praxi observamus, tota die potui febricitantium inditum aluum apertam tenere, ut hoc loco & largior paulo assumtus iisdem non noceat. De spiritu vero & oleo vitrioli maior esse posset dubitatio; verum, si in notabili quantitate offertur & magna copia aquae superingeritur, certissime & aluum laxabit. Quinimo ipsum elixir proprietatis secundum PARACELSI methodum vulgariter paratum cum spiritu & oleo vitrioli, teste experientia, plus laxat ducitque aluum, quam si sine acido vel liquore alcalino fuerit confectum. Et quod attinet ad oleum vitrioli, & hoc ipsum quod vehementer satis exerceat aluum, confirmat vsus elixirii sic dicti polychresti purgantis, quod in pharmacopolio Glauchensi prostat. Paratum hoc est ex oleo vitrioli, spiritu vini & purgantibus, acidissimum est corrosivum, valde amarum. Hoc in febribus ardentibus ad guttas viginti aliquoties de die cum regimine propinare solent, ut magnam quantitatem cerevisiae tenuis superbibant, non sine successu, uti aliquoties, ubi desperata cuncta videbantur, observatum fuit. Credibile est, ab acido vitrioli tunicas ventriculi rodente & vellicante plus dependere hunc effectum, quam ab admixtis purgantibus, quorum energia, uti notum est, ab acido tam forti valde cicuratur.

22. DVM hæc scribimus, in memoriam incidit, non ita pridem a duobus medicis collegiis, quod hodierno tempore
(Hoffm. Opusc. varii argumenti.) Fff in

incredibile visum, renunciatum fuisse ad acta famam & vitam concernentia, spiritum vitrioli singulis diebus ad guttas decem per mensis spatium sumtum mortem ex absoluta necessitate intulisse, cum tamen ab huius usu ægra bene valuit, menses habuit, donec post octo septimanas inflammatione anginosa fuerit exstincta. Cuius mortis causam, per assumptum spiritum vitrioli, qui inter acida corrosiva imbecillimus, per tantum temporis spatium inaudito exemplo sine corrosione existentem, quo ratiocinio solito, & connexionione cum physico-mechanicis principiis, quaque certa & vera experientia stabilire & corroborare possint, adhuc desideratur. Spiritui vitrioli occultam quandam virulentiam adscripserunt quidam ex veteribus, sed meliora experimenta chymica & practica edocti plane contrarium adserunt, & crudum spiritum vitrioli phlegmate suo sulphureo, quod HELMONTIVS realgaris nomine insignavit, saluberrimum iudicant, experientia communissima tot hominum talem spiritum cum fructu quotidie fere usurpantium id suadente. Turpe est sane in rebus, ubi certitudo haberi potest, opinionibus & coniecturis solis plus fidere, quam inquisitione accuratiori rem tractare.

23. VERVM vt in viam redeamus, utique acida egregio pollent laxandi effectu. Videmus id manifesto in cremore tartari, imo in tartaro crudo, in sale acetosellæ essentiali, sale succini bene temperato acido, tamarindis acidis; hæc in dosi debita aluum non modo lubricam & laxam, sed quandoque fluidissimam reddunt. Nam si sola, uti nostra est sententia, irritatio, vellicatio, arrosio, non tam in vna parte intestinorum, sed in pluribus simul sufficit, vt motum peristalticum intestina intendant, & alui fluxum secudent, acida id optime perficere possunt. Monendum tamen circa eorum usum iudicauimus, vt ubi pectus laborat vitio, ubi bilis deficit, dispositio ad spasmos ad melancholica, hysterica & hypochondriaca pathemata est, ubi excretionis sanguineæ consuetæ suppressio est, vt nos, quoad fieri poterit, ab eorum usu temperemus. In omni autem biliosa, præcalida, sanguinis
& hu-

& humorum commotione, aluique inde pendente siccitate, horum vsum magni facimus.

24. ULTERIVS deuenimus ad hanc quæstionem, num in salibus fixis alcalinis virtus aluum aperiens quoque latitet? minus quidem hoc notum est, nec in vllam huc de re in medicorum libris inuenimus mentionem. At vero si experientiam ante oculos toto die versantem consulimus, debemus vtique id ipsum plenissime adfirmare. Nam si spectamus thermas plurimas Germaniæ, præsertim Carolinas celebratissimas, hæ copiosissimum fixum alcalinum salem in sinu suo recondunt, quod etiam arte ex iis extrahi potest; videatur Dissertatio nostra *de methodo examinandi aquas salubres*. Iam vero quem latere, nisi imperitum, potest, has thermas, modo sufficientes potentur, sine vlllo incommodo, dolore aut molestia aluum decem vicibus & vltra pauco tempore sollicitare. Vt autem certior res fieret, sumsi hoc sal extractum ex thermis istis, secundum omnia sali tartari simillimum, & eius vnciam solui in mensuris duabus aquæ, idque in aqua calida solutum bibi: similis, purgans, diaphoreticus & diureticus respondit effectus. Neque dubitari poterit, thermas nos posse artificio imitari, modo sal alcali ex calcaria terra & spiritu acido minerali paratum sumamus, idque soluamus in aqua calida; sed hanc rem alibi fusius deduxi.

25. CONSIDERAVIMVS hætenus ea, quæ partim subterranea loca, partim chymica ars ad aluum expeditam fluidamque reddendam nobis largiuntur. Ordo iam postulat, vt etiam, quæ ex vegetabilibus possint depromi in vsum medicum, circumspeciamus. Dicimus vero primum, plerosque fere succos plantarum, quæ odore carent, sapore autem amaro & nitroso vel acido pollent. deterfua & laxante virtute gaudere. Ex his commendari merentur succus asparagi, betulæ, brassicæ, cardui benedicti, radicis cichorei, centaurii minoris, anagallidis, fumaricæ, scabiosæ, epithymi, portulacæ, graminis, hederæ terrestres, lactucæ, mercurialis, atripicis, scordii, fenecionis, & dulcium fructuum. Tales succi prius calefacti & in

debita quantitate poti, vel soli, vel cum sero lactis, aut aqua calida, egregiam virtutem aperitiuam aluum laxantem exserunt; inest enim dictis hisce herbis sal elegantissimum subtile tartareum & nitrosum, quod essentiale vocant, & arte quoque ex ipsis potest extrahi. Placet huc adducere eximium locum ex PECHLINI *observationibus scilicet obs. 9. pag. 357.* Vbi ait; *cichorei succus plurimo nitro abundat, quippe quod chymici dexteritate inde extractum vulgaris nitri instar & figuratum & inflammabile vidi: item in Portulaca, succulentissima planta, obuia quoque est nitri copia, quando illud crystallisatum in totidem angulos faciesque excreuisse obseruavi.*

26. PRÆTEREA ex vegetabilium classe plures herbarum & arborum flores subtili ac tenero sale acri, viscosis particulis immerso, foecundi sunt, & ob id blande aluum molliunt, eamque ducunt. Eiusmodi generis sunt flores persicorum, acaciæ, violarum, bellidis, borraginis, calcatrippæ, cheiri, item rosarum recentium, hepaticæ nobilis, fumariæ, rhapontici veri, ebuli, qui vel cum infuso in vino, vel expressi in succum, tempore præsertim vernali, egregie aluum commouent. Intenditur vero eorum vis, si aliquid de tartaro, agarico, aromatibus adiiciatur. Ex seminibus vegetabilium semen violariæ in emulsionem redactum gratissimam eleganti virtute non saltim diuretica sed & purgante pollet, vt drachma vna quatuor sedes quandoque ciere soleat. Valde accommodatum est infantibus, & iis qui nausea medicamentorum afficiuntur. Virtus hæc præstantissima adeoque commendatissima huius seminis parum nota est; meminit eius SCROEDERVS in *pharmacopœia*, qui lib. IV. p. 147. hæc habet: *seminis violarum usus rarus est, isque in obstructione renum, ubi emulsionibus potissimum inseruit, de quibus nota, quod plerumque vomitum ac secessum moueat.* Verum monendum, quod virtus emetica accipienda sit de recentissimo semine. Nam generalis est regula, quod omnia purgantia ex vegetabilibus, si fuerint recentissima, ob sal acre volatile cum aluo simul prouocent ventriculum ad vomendum.

27. PROGRESSVM iam facimus ad ea vegetabilia, quæ resina quadam subtili acri pollent, ex quibus aliqua delibabimus, quæ sunt tuta, vtut non valde vsitata. Maxime omnium vero non ignorari oportet, omnia resinoso-gummata, quæ multum olei & spiritus acidi per destillationem fundunt, & acredinem in lingua relinquunt, laxante quadam virtute gaudere. Ita, verbi gratia, gummi galbanum, sagapenum, ammoniacum, bdellium, opoponax, myrrha qualitate stimulante imbuta sunt. Gaudent enim subtili acri sale, quod enascitur ex commixtione olei & acidi, quibus constat. Quapropter non sine ratione veteres & recentiores hæc gummata in pilulas receperunt, hypochondriacis conuenientes, quo nomine Quercetanæ, Conerdingianæ claræ sunt. Abstinendum tamen ab iis esse censeo, quando humores biliosi, feruidi, prædominium habent, & phlogoses atque exæstuationes causantur. Ob eandem causam nempe, sal tenerum acre immersum particulis sulphureis, etiam terebinthina, Peruuianum balsamum, liquida ambra, resina ladani, stimulante sua virtute ad aluum aperiendam faciunt. Coni abietis in principio veris collecti, & loco thee cum aqua calida infusi, & saccharo canto melioris gratiæ ergo edulcorati, scorbutis frigido affectis eximie succurrunt. Nam non modo vrinam cient & aluum apertam tenent, sed & humorum & sanguinis massam commouent, & excretionem totius corporis optimum in modum secundant.

28. INSVPER egregium stimulans latitat in ligno guaiaco; hoc non modo copiosa resina, sed & acerrimo sale imbutum esse variis experimentis euinci poterit. Præter alia vero ipsius decoctio facta in aqua communi, sapore teste, id comprobatur. Hæc si inspissatur, largitur magna odoris balsamici, saporis acris, quod naribus exceptum potenter sternutamentum mouet. De quo iam olim egi in dissertatione *de sternutatoriorum usu & abusu*. Hæc ipsa substantia, acris, balsamica, vel per se in pilulis, vel melius in puluere ad scrupulum semis sumta, præsertim si aliquot grana salis neutri admiscentur, insigni cum euphoria aluum stimulando quatuor, imo sex sedes

mouere solet. Eadem virtute, quamuis remissiore, præditum quoque est gummi guaiaci, quod eum in finem inter balsamicas pilulas optime recipitur. Vltcrius notum est gummi benzoës purissimum, sapore acri, & sternutamento teste, subtili acri sale abundare, & eam ob rationem quoque opportune ingreditur pilulas cephalicas catharrales & balsamicas; cum autem in floribus sal illud acido-acre magis sit congregatum, hinc etiam obseruatur, quod ii ipsi ad aluum stimulantam meliores & aptiores sint. Duo hæc nempe benzoës flores, & extractum decocti guaiaci, ratione virtutis stimulantis nares & aluum, hætenus, quantum scimus, minus nota fuerunt, a me tamen sæpius commendata.

29. RESTAT adhuc aliud quoddam tutissimum stimulans parumper etiam cognitum, quod tamen meretur commendationem, & est essentia centaurii minoris cum spiritu vini rectificatissimo, & melius cum spiritu cochleariæ facta. Hæc ad guttas sexaginta vel ultra, propinata ex obseruatione & usu multiplici cum summo emolumento aluum aliquoties aperit. Qua virtute etiam resplendescit extractum, quamvis paulo languidius. Superest adhuc vt ex notis & vulgaribus istis purgantibus tutiora & selectiora commendemus. Inter hæc autem primas partes tenet rhabarbarum & folia sennæ, vtrique in infuso. Porro tamarindi in decocto, & denique extractum hellebori nigri in pilulis: mechoacanna vero in puluere vel essentia. Reliqua omni caustica potentia in maiori dosi plane dissuademus; in remissiori autem, exempli gratia, ad duo vel tria grana pro vna dosi, si fuerint remixta cum salibus & carminatiuis, qua dosi & methodo ea sæpius vtilissima sumus experti.

DISSERTATIO VII.

DE

CAVTO ET PRÆSTANTIS-
SIMO VOMITORIORVM VSV.

§. I.

QVICVNQVE in salutaris & pæne diuinæ artis nostræ exercitio dextre versari, & officio medici exacte satisfacere nititur: illi profecto nihil prius esse debet, nihil posterius, quam vt proprias & genuinas remediorum, quibus vtitur, vires, indolem & operationes, pro diuersa tot ægrotantium natura ac corporum constitutione, nec non morborum indole eorumque causis, probe intelligat intime pernoscant. Nihil enim ad rectam, securam & ratione subnixam medendi methodum magis necessarium est, quam exquisitum ac certum, pro morbi & ægrotantis conditione, debito tempore, conuenienti regimine, iusto ordine & congrua mensura, appropriata auxilia præscribendi ac offerendi iudicium. Quomodo autem cum recta ratione & solido fundamento id præstare velit & possit medicus, equidem non video; nisi prius ipsorum remediorum agendi principia & elementa, variamque partium, quibus componuntur, mitionem atque texturam, non solum a priori, tum sensuum, tum artis chymicæ ministerio, explorarit, sed etiam a posteriori, per varias obseruationes & experimenta practica, eorum effectus atque operationes plenius cognitas habuerit atque perspectas. Et quum pauci ex iis, qui medicinam faciunt & eruditorum nomen friuole affectant, medicamentorum facultates & pro tantâ ægrorum & causarum morbificarum varietate, mirum dissidentes virtutes penitus cognoscant & perfectius intelligant: minime certe mirandum est, tantos non solum lapsus, tamque graues errores, in ex-
pli-

plicando contrario sæpius & quandoque plane noxio medicaminis cuiusdam effectu committi, sed in tam diuersum etiam abire animos, in quorundam remediorum æque commendatione & usu, ac infamatione & vitatione; ita vt nonnunquam idem medicamentum a quibusdam insigniter celebretur & vt summe proficuum collaudetur, aliis vicissim hoc ipsum magnopere dissuadentibus & vt nocuum reformitantibus.

2. INIQVISSIMAM vero hanc ex medentum inscitia sortem ea præsertim experiuntur remedia, quæ præ reliquis vegetiori & validiori agendi potentia sunt instructa: vtpote quæ, quo maiori & insigniori virtute, si caute atque prudenter exhibentur, pollent; eo grauius utique damnum, perperam oblata, inducunt. Et sicuti hoc de omnibus sic dictis heroicis medicamentis quotidianæ ferme obseruationis est; ita certe vix vlllum ex eorum censu est, quod tantopere suspensos tenuit & in tot sententiarum diuortia pertraxit medicos, quam vomitoria. Viderant nimirum nonnulli, emetica veneni indolem æmulari, & exigua admodum mole validissime operari & atrocia nonnunquam symptomata, stomachi nempe ardorem, anxietates, oris pallorem, labiorum tremorem & suscitare alia. Cogitarant, ipsam vomitionem esse eiusmodi excretionis speciem, quæ, tantum abest, vt secundum consuetum naturæ ordinem contingat, vt potius eundem peruertat, & inuerso plane ordine procedat, ipsumque reciprocum ventriculi motum retro vrgendo, nonnisi summe violenta sit & aliena. Obseruarant præterea noxium sæpius & perniciosum effectum, apoplexiam, coecitatem, cruentum vomitum ipsamque mortem a vomitoriis esse productam. Et his potissimum rationibus inducti, emeticis indelebilem maculam inurendam eademque e foro medico merito penitus proscribenda esse censuerunt. Alii contra, ipsa experientia edocti, nouerant, venenum quandoque in salutarem medicinam cedere, & vomitoriorum incomparabilem prorsus esse vtilitatem ac præsentaneam in debel-

debellandis morbis opem: neque ob id mirificis encomiis eadem dilaudare dubitarunt, ita ut sine eorum usu rebellium morborum sanationem frustraneo conatu suscipi aperte profiterentur, & vix morbus esset, in quo non vomitum moventia suaderent ac commendarent.

3. VERVM vero quemadmodum priorum opinionem in ASELEPIADE, qui teste PLINIO, H. N. *lib. XXVI. cap. 3.* vomitum penitus reiecit, iure reprehendit CELSVS, *lib. 1. cap. 3.* ita certe parum circumspecti & imperiti esset, in emeticorum laudes tantum excurrere eorumque usum ultra prudenter, constitutos limites proferre, nimiaque promptitudine & liberalitate in eorum oblatione uti; quin potius media ineundum est via, & sagaci rationis usu dispiciendum: an & quare in hoc vel illo morbo, in alio & alio ægrotante, conducant vel noceant? Sed hoc opus, hic labor est, quem irritò sane ausu adgrediuntur, qui remediorum verum & rationalem operandi in corpus modum ignorant, fructuose vero & exoptato conficiunt, qui rationum physico mechanicarum & anatomicarum solida cognitione adiuti, in horum remediorum agendi principia, in effectus, quos in corpore humano, pro indole causarum morbum excludentium, nec non pro ratione temporis, producunt, summo studio inquirunt. Quæ quum ita sint, non inconsultum fore duxi, si hoc arduum quidem, sed summæ utilitatis argumentum, speciminis inauguralis loco mihi explanandum fumerem, & *observationes* non adeo tritas atque vulgares *de cauto & præstantissimo emeticorum usu* cum publico communicarem.

Observatio I.

Exquisita & stupenda partium tenuitas est in emeticis, qua tam violentos & vehementes in corpore suscitant motus: unde summa cum moderatione & prouida manu dosis eorum determinanda.

Scholion.

Quanta partium subtilitas, vis & potentia emeticis, siue ex mineralium, siue vegetabilium familia petitis, insit: inter cætera vel sola exigua moles ac dosis, qua oblata vehementissime non modo primas vias, sed & alias a ventriculo longius remotas partes exagitant, luculentissime arguit. Inprimis autem in antimonialibus mira particularum exiguitas est & summa teneritudo, qua potentissimæ operationis sunt, licet sensuum ministerio non percipi possit, eadem quicquam ipsorum ponderi decessisse. Nam frustum vitri antimonialis, hyacinthini coloris, scrupulum circiter æquans, vino Rhenano sub moderato calor immisum, tam validæ virtutis est, ut iterata vini aliquoties infusione, vel centum robustis, vomitu satis vehementi expurgandis, sufficiat. Nota etiam sunt pocula emetica, quæ ex duabus stanni Anglicani & vna reguli antimonialis parte concinnantur. In his si aliquandiu detinetur vinum, expeditissima vomitiua virtute illud imbuunt, quæ nunquam aboletur, sed tantæ firmitatis atque constantiæ est, ut procurato myriadibus vomitu, poculum ne sensibile quidem ponderis decrementum inde patiatur. Ipse tartarus emeticus, qui ex vitro antimonii & cremore tartari paratur, longe vehementioris operationis est eo, qui ex croco metallorum communi more conficitur, & tria huius grana, vix tanta vomendi vi pollent, quam vnum illius, cuius tamen vix vigesima pars antimonialis prosapiæ est. Famigeratissimus porro nostra ætate est pulvis ille emeticus Monckii, gallice Ramoneur dictus, qui ex nitro & antimonii regulo, in crucibulo calcinatis, præparatur, ope certæ cuiusdam encheiriseos, qua neglecta, vis vomitoria illico in mitissimam transit diaphoreticam. Nimirum si vna pars reguli & tantundem nitri depurati & exsiccati miscentur, & ambo crucibulo immissa calcinantur, in calcem acerrimam vtuntur, quæ spiritus vini rectificatissimi affusione, præuia digestionem & repetita infusione, celebratissimam illam metallorum tincturam elargitur, remanente in fundo calce antimoniali diaphoretica,

omnis

omnis virulentiaæ experte. Si vero eadem & reguli & nitri portio sumatur, nec simul & semel commisceatur, & crucibulo indatur, sed regulo fuso, successiue & per vices nitrum adiiciatur, & scoria demum, in superficie hærens, semper eximatur & remoueatur, quousque omnis regulus cum nitro in scorias abierit, & tunc his scoriis eodem modo purissimus vini spiritus aliquoties in sufficienti quantitate infundatur, quo lixiuiosum illud & acre sal cum nitro transcendat in spiritum, residuus in cucurbita puluis ad grana aliquot, sex vel decem propinatus, non raro pro dispositione corporis & humorum vomitiones sat violentas concitat. Cuius tam diuersæ operationis causam si quis scrutetur, vix aliam deprehendet, quam quod scoria illa, in superficie reguli, inferiorem carini partem occupantis, hærens, subtilissimis reguli exhalationibus imprægnetur, quæ nitro non cicurata vel inuersa, vehementis illius & vomitiua facultatis materiam præbent. Hinc etiam antimonium diaphoreticum, mitissimum alias omnisque vehementioris operationis expers pharmacum: illico insigni vomitiua facultate imbui potest, quando nimirum regulo in crucibulo fuso iniicitur, quo exhalantes e liquefacto illo & spumante agilissimas & tenuissimas particulas absorbeat, inque societatem suam admittat. Et sæpius obseruauimus, ipsum hoc antimonium diaphoreticum, cum tribus nitri partibus non rite præparatum & vstum, quandoque in corporibus dispositis nauseam & vomitum suscitasse, quod maxime contingit, si globuli regulini, forsan ex improuida pulueris carbonum admissione & inde facta reductione, prognati, calci diaphoreticae adhuc interspersi sunt. Neque vero tantum vomitoria antimonialis familiae in exigua dosi vehementes in corpore concitant commotiones, motusque ventriculi, intestinorum & oesophagi præter naturam inuertunt, sed minima etiam portio cupri, quod vnicum ex metallis emeticum est, ad vomitum poritandum sufficit. Vitrioli enim cypri, quod coeruleum a cupro mutuatur colorem, grana tria quatuor emesin suscitare valent; id quod etiam vitriolum album eo-

dem ferme modo præstat. Antiquissimis medicorum hæc actiua indolis e minerali regno deprompta remedia plane ignota neque in vsum recepta fuerunt, sed ad vehementiores per superiora & inferiora euacuationes suscitaneas, necessitate id exigente, solo helleboro, præsertim albo, vti sunt. Quam enormes autem pariter exigua aliquot granorum hellebori albi dosis turbas, in vniuersa corporis œconomia irritando & exturbando concitet, in propatulo est: vt nisi aliorum admixtione probe corrigatur & subigatur, instar veneni perimat homines, vel in miserum valetudinarium statum deiiciat. Nihilominus tam tenera & subtilis partium in eo est compages, vt sola paullo diuturniori ex aqua simplici decoctione, omni virtute drastica penitus priuari possit, & tuto postmodum assumi; quod etiam eadem ratione cum tabaco, asaro aliisque emeticæ & drastice virtutis vegetabilibus succedit. Similiter gummi guttæ, si ad grana sex vel decem propinatur, non modo per inferiora, sed etiam superiora, insigniter & vehementer purgat: si vero id ipsum paullo diutius cum aqua decoctum fuerit, quo sub coctura tenue illud & virulentum principium in auras aufugiat, cathartica vis ex toto perit. Folia vel etiam radices asari, nec non cortices medii, radicis & arboris sambuci, recentes, sæpe superius & inferius materias exturbant, asseruati autem, præsertim æstiuo tempore, aliquandiu, hanc virtutem penitus exuunt. Plura porro sunt ex fortioribus purgantibus, vt gialappa, scammonium, hermodactyli, esula, soldanella, gratiola & alia id genus, quæ, si recentia fuerint, præter deiectiones aluinas, etiam vomitum cient; quod tamen minime accidit, si in pulverem redacta, in libero aere diutius fuerint detenta. Experti quoque sumus, radicem ipecoannæ, si in puluere per annum & ultra liberiori aeris accessui pateat, vel ex parte, emeticam vim perdere, vt minimum longe maiori dosi ea tunc propinari debeat. Denique tenuissima illa & insigniter actiua emeticorum facultas dilucide ex eo patescit, quod exterius tantum admota, interiora promptissime subeant, & eo dela-

delata, vomitum illico proritent. Fidem huius rei faciunt M. N. C. *Dec. II. A. I. obs. 43.* vbi memoratur: quod decoctum croci metallorum, in puero trienni, herpete laborante, exterius applicatum, vomitum produxerit. Et teste HILDA-MO *lib. de dysenteria*, quidam ad emesin mouendam radices hellebori albi orificio ventriculi imponi, aut orificium hoc, & ventrem supra vmbilicum, vnguento de arthanita inungi iubent. Quæ quum tam vera sint, quam quæ verissima, cautiissime certe erit mercandum & summa cura prouidendum, ne vnquam in emeticorum oblatione dosi excedamus, in corporibus præsertim tenellis & ad anomalas commotiones admodum pronis. Hanc enim si medicus pro diuersa indole subiecti laborantis, partium neruosarum constitutione & virium quoque ratione, non solícite distinguit & circumspecte moderatur: præsentissimam, & haud raro, nisi cito succuratur, immedicabilem noxam inferre potest. Quare etiam sagaces & prudentes medici, non tam inconsiderato & promte, sed expensis omnibus circumstantiis ægri, morbi & temporis, ad hoc remedii genus descendunt, multo minus peregrinis & in exteris locis degentibus illud præscribunt atque committunt.

Observatio. II.

Sicut omnia activioris indolis & operationis medicamenta: ita etiam ea, quæ vomitum valide prouocant, in nerveo-membranaceas corporis partes, & primario quidem in ventriculum & intestina ipsisque contermina, vim atque efficaciam suam exserunt.

Scholion.

Per activioris naturæ & operationis medicamenta intelligimus ea, quæ ingentem mutationem solidorum & fluidorum motibus celeriter inducendi facultate gaudent; & excretiones vel præter consuetum ordinem & modum augent & intendunt, vel nimias sistunt atque compescunt. Priorum

censum subeunt omnia drastica & acriora, ἀνω καὶ καίτω eua-
cuatione, nec non quæ salivam, urinam & sudorem impetuo-
sius cient, aut sanguinis profluvia eliciunt. Inter illa vero,
quæ effrenes solidorum & fluidorum motiones sedant vel fi-
stunt, narcotica principem sibi vindicant locum. Omnia
hæc ac singula summa partium, siue sulphurearum, siue sali-
narum, tenuitate & subtilitate in tenerrimas tunicarum ner-
vearum & musculosarum fibras penetrando & agendo, tum
sensum, tum motum, & systalticum & diastalticum, cuius be-
neficio omnis generis fluido per canaliculosam partium tex-
turam trudentur & voluuntur, diversimode afficiunt atque im-
mutant. Nam pro diversa actiui in medicamentis principii
ratione, & pro varia etiam nervosarum partium structura,
longe multumque effectum variare, vel ex eo luculenter ap-
paret, quod quæ vomitum cient, potissimum in ventriculum
& duodenum, quæ aluum subducunt, maxime in intestina,
quæ diuresin proritant, in tubulosam renum substantiam, nec
non vteres atque vesicam, quæ diaphoresin procurant, in
arteriarum tunicas & tubulos subcutaneos, & quæ salivæ flu-
xum exprimunt, in salivales glandulas, vim atque potentiam
suam edant. Quæ certa & constans effectuum observatio, so-
la ad usum practicum & medentis scopum obtinendum suffi-
cit, neglectui data omni subtiliori theoria, seu potius sublimi
speculatione, quomodo nempe remedia agant in has vel illas
partes? qua textura, vel figura partium id fiat? Item: quid
moueat solida corporis nostri? vel motum peristalticum ven-
triculi & intestinorum efficiat? num fluidum, per nervos aut
arterias allatum, sit mobilissimum? aut an principium quod-
dam agens, vel ratione præditum, vel eadem carens, motus
in corpore perficat? Hæc omnia enim nimis abstractæ, subti-
lis & reconditæ indaginis sunt, ac ne hilum quidem ad tutam
morborum persanationem & prudentem remediorum admi-
nistrationem conferunt. Id vero nosse oportet medicum,
dari emetica mitiora & fortiora; quorum illa in ventriculum
& ei annexum duodenum agunt, ac moderate nec impetuose
nimis

nimis expellunt: hæc autem, non modo easdem partes fortius exagitando, euacuationem vehementiorem moliuntur, sed etiam in reliqua tenuia intestina, eorumque glandulas & confines ductus, quæ bilem & succum fermentalem e pancreate aduehunt, latius vim suam diffundunt, & varii generis excrementitias materias e remotis etiam sedibus alliciunt atque eliminant. Inter clementiora & magis diætetica, veteribus maxime familiaria, aquæ tepidæ, cum, vel sine sale & melle mixtæ, celerius haustæ copia, connumeranda, vel solennis recentioris æui medicis radicis ipecacuanhæ, aut tartari emetici, nec non pulueris regulini, præscripto Monckii parati, panaceæ emeticæ Glauberianæ & Conerdingianæ, usus, quæ parciore dosi & sufficienti cum vehiculo exhibita, primam sic dictam regionem, a corruptorum, ex bilis prauæ, acidorum succorum & malæ digestionis cruditatum coacervatione emergentium, ibique locorum stabulantium humorum sorditie, insigniter, blande tamen, deplent. Quod si vero hæc ipsa, antimonialis præsertim prosapiæ pharmaca, liberaliori manu propinantur, non tantum intra ventriculi & duodeni pomoeria subsistunt, sed intimius penetrando, in contiguas etiam & adiacentes partes vim suam propagant, & maxime ductus biliarios attentant, eosdemque concutiunt & crispant, vt redundantius biliosum humorem eructent: unde nonnunquam tanta biliosæ materiæ copia iterato vomitu reiiicitur, quanta neutiquam duodeni latibulis excipi potuisset ac comprehendi. Quinimmo sæpius vomitoria primæ regionis limites multum transcendunt & in longe distitas partes virtutem suam explicant, vt etiam, quemadmodum cachecticorum & anasarca laborantium exemplo constat, ex vniuersi corporis habitu, copiosos serosos humores, & per superiora & per inferiora, educant, ac in corporibus tenerioribus, & quæ spasticis ac convulsiuis neruofarum partium commotionibus solenniter conturbantur, grauissima & quandoque funesta symptomata inducant,

Observatio III.

Dentur, quæ vomitu ventriculum deplent plane innocentia & blanda, quæ non infesta qualitate & arrosione tunicarum neruearum, sed magis copia & fibrarum relaxatione, motum excretorium adiuuant, & non sine emolumento vsurpantur.

Scholion.

Quod pravi in ventriculi & duodeni cauitate contenti humores, ingenticeum commodo cito, & qua fieri potest brevissima via, ore foras eiiciantur, & ipsi spontanei a natura, ut ita loquamur, instituti, & arte prouocati vomitus, clarissime demonstrant; idque duplici modo contingere ac perfici attenta obseruatione constat: quando nimirum vel a subtili & penetranti acrimonia, vel mole nimium distendente, tunicæ nerveæ ad contractionem, expulsionem & motum inuersum irritantur & sollicitantur. Hinc repleto nimium & aggrauato, vel a cibis auidius ingestis, vel a copia potus, præsertim vini aut ceresiæ, vel in infantibus lactis congerie, ventriculo, summo sæpius cum emolumento, vomitus aut sponte subsequitur, aut etiam poritatur. Et certe, veterum excitandi emesin methodus, longe erat alia, ac illa, quæ nostris temporibus acrium & chymicorum pharmacorum ope recepti moris est. Illi enim rarissime helleboro albo, ceu drastico, utebantur, sed solenne ipsis erat, remediis fere diæteticiis, aqua nempe tepida, vel sola, vel cum sale, melle aut oleo remixta, liberalius hausta, non secus, ac quasi clystere, qui ex iisdem ingredientibus componi solet, ventriculum ad expulsionem per superiora stimulare, & hoc pacto acres, biliosos, viscidos & acidos humores diluere, detergere & utiliter foras eiicere. Et sicuti tutissimum hoc ad vomitum excitandum est remedium, quod in regionibus maxime calidioribus & corporibus facile mobilibus, felicissimæ erat operationis: ita omnino hoc ipsum in nostris etiam oris neutiquam penitus reiiciendum, sed sæpius necessarium esse existimo,

mo, tum potissimum vsurpandum, quando per actiuæ indolis chymica & mineralia stomachum mouere, valde intutum & periculosum est. Nam sæpe acres, biliosi, ab ira maxime commoti humores, firmiter ventriculi tunicis inhærentes, spasticam cum cardialgia constrictionem & perpetuum vomendi conatum gignunt, vbi antimoniale, vel acrius, vel validius, e mineralium regno petatum, propinare, perniciosum esset atque funestum: quum contra lubricans eiusmodi & relaxans, paullo maiori dosi oblatum remedium, maxime ex vsu sit, & vomitus, quos natura sinistra molitur, promouendos ac prouocandos. Sunt porro, qui ex deprauata concoctione ac digestionem, magnam stagnantium cruditarum colluuiem collegerunt, sic dicti hypochondriaci. Hi thermalibus aquis, primis potationis diebus paullo liberalius haustis, insigni cum leuamine vomitus experiuntur, & tenaci viscida materia reiecta, medicatarum aquarum postea vsu longe commodius ferunt & facili atque explicita curatione ex accipiti leuantur. Denique quotidianis experimentis comprobatum est, emeticum antimoniale, vel aliud minoris molis, sed agilioris indolis, molestissima vellicatione summâs sæpe cum frustraneo vomendi conatu parere anxietates; iusculis vero pinguibus, vel aqua tepida, cum butyro insulso copiosius haustis, & feliciter sequi vomitiones, & anxietates illas cardialgicas, cum inquietudine iunctas, conquiescere. Arsenicum, innumeris funestis exemplis infamatum venenum, spasticas vehementes per vniuersum neruorum partium systema contractiones, quibus totam œconomiam motuum in solidis & fluidis peruertit & exstinguit, efficit, cum vomitu non adeo frequenti, qui tamen copiose hausto lacte, oleis & humidis dum adiuatur, acrimonia veneni correctâ, non modo fibræ laxantur, sed vomitus etiam subsequuntur numerosi, quorum beneficio ipsum venenum felicissime e ventriculo eliditur. Ex quibus iam facile liquet, humida & relaxantia vberius ingesta, ad vomitum eliciendum summopere esse proficua: vbi ab enormi spasmo, a quacunque etiam causa subor-

(Hoffm. Opusc. varii argumenti.)

Hhh

to,

to, primæ viæ affliguntur; quandoquidem ad excretionem illam emeticam, non sola contractio tunicarum ventriculi sufficit, sed opus est, ut eius motus peristalticus, qui reciproca parietum corrugatione & dilatatione absoluitur, intendatur & inuertatur.

Observatio IV.

Quæ dolores & spasmos leniunt, motuum impetum refrænant & sistunt, ut sunt anodyna, narcosin inducentia, & maxime ex opio præparata, hypercatharxes per vomitum aut secessum sistere & coercere, experientiæ testimonio constat: eadem vero remedia vomitum etiam prouocare, non adeo quidem obuium, sed tamen attenta obseruatione compertum est.

Scholion.

Ipsam theriacam, & ex ea præparatam essentiam, nec non aquam cum vino destillatam, ad compescendas hypercatharxes certum & tutissimum esse præsidium in propatulo est; & hanc sistendi facultatem opio, ceu potissimo theriacæ ingredienti, tribuendam esse, non facile quisquam in dubium vocabit. Ut enim reliqua, quæ in obseruatorum commentariis memoriæ prodita sunt, prætermittam, commemorabilis inprimis hanc in rem est obseruatio Cl. ETTMVLLERI, quam in *Dissertatione de virtute opii diaphoret.* pag. 8. affert, dum tradit: *superiori anno iuueni ex incautius hausto vino emetico antimoniali, in hypercatharsin ultra XIV. dies adeo copiosam deiectionem, ut secessuum numerum referendo, mendacii suspicionem declinans, tam omittere liceat, essentia theriacalis, cum essentia opii propinata, eximiam utilitatem, XL. saltem guttarum dosi, attulit.* Similiter massa pilularum de cynoglossa, quam præter opium, etiam semen hyoscyami ingreditur, parciore dosi, ad aliquot grana, in puluere exhibita, ad compescendas enormes vomitiones, non sine fructu adhibetur. Ut vero hæc nimias per vomitum, aut aluum excretiones cohibendi facultas

cultas, in opio aliisque narcoticis, abunde confirmata & indubiæ veritatis sit: attamen iisdem sedantibus remediis, vomitum, ingenti sæpius cum anxietate stipatum, subinde proritari, identidem certissimæ experientiæ, & multoties a me præsertim in hypochondriacis, qui sumto circa noctem leni opiato, mane vomitum experti sunt, observatum est. Quem etiam effectum B. *Cel.* WEDELIVS in *opiologia* probe notavit. Et HELMONTIVS ob vomitiuam hanc virtutem opium accusat, quod virulenti & acris quippiam custodiat: licet hæc sententia ad veritatem minus accommodata, & miræ huius operationis ratio longe aliunde petenda sit. Quod si enim præcordia spasmis nimis stringuntur, anxietas potius & nausea, quam vomitus exsurgit: sublata autem per anodyna stricture, & motu peristaltico per debitam relaxationem & dilationem restituto, vomitio faciliior fit & expeditior. Vel anodyna etiam tonum & robur ventriculo subtrahendo, efficiunt, vt humores non expulsi in eo subsistant, restagnent & postea copia & infesta qualitate eundem ad contractionem & expulsionem stimulent, quod sane stomacho iam imbecilliore & solutiore ac concoctione vitata, facillime contingit.

Observatio V.

Quum emetica tutissime & celeriter a valde noxiis & naturæ infestis assumtis corpus liberent, dilucide patescit: quod aduersus venena, præsertim narcotica, nec non alia caustica ingesta, vel prognatos in ipsius ventriculi sinu virulentæ qualitatis humores, certius, tutius & præsentius vomitoriis non detur præsidium.

Scholion.

Inter venena, quæ per oris cauum corpus subeunt, præcipuum vtique locum sibi vindicant narcotica; vtpote quæ infesto vapore, fluidum, quod sensum, motum, tonum & robur solidis largitur, inficiendo & contaminando, illico sum-

num torporem, sensuum ac motuum impotentiam, anxiam spirationem, pulsum exilitatem & contractionem, nec non ob sanguinis in cerebri vasis stagnationem, deprauatam & plane aberrantem phantasiam inducunt. Horum classem ducunt omnes species hyoscyami, stramonii, daturæ, solani, mandragoræ, papaueris & quæ ex iisdem desumuntur: quæ si ex errore comesta, aut ex imperitia assumpta fuerint, certe consilio HELMONTII, vix præsentius & præstabilius emeticis est remedium; quod etiam Cl. WEDELIVS, in *amœnitat. mat. med.* experientiæ calculo confirmat. Obseruatur adhuc meo animo notabile hac de re exemplum. Deuorauerat nimirum quispiam ex errore loco pilularum balsamicarum extracti opii grana XIIIX & inde anxietates cum sensuum torpore mentisque abalienatione persentiens, errato opportune animaduerso, confestim cum conuenienti vehiculo tartari emetici grana tria assumsit, & quum nullus duabus horis elapsis sequeretur vomitus, urgente symptomatum vehementia, eandem tartari emetici dosin iterato ingerere coactus fuit, sed pariter ne quidem nausea, multo minus vomitio suborta est. Tandem vero iniecto clystere acriore, euacuatio successit, & decies vomens, nihil virium detrimenti percepit, sed optime conualuit. Porro aliud venenorum genus est, indolis acerrimæ, penetrantis & causticæ, ad quod referenda maxime arsenicum, argentum viuum corrosiuum, antimonii vitrum, regulus & drastica acriora maiori dosi data, præsertim elleborus albus: quandoquidem veri veneni ingenium in peruertendis & destruendis motibus vitalibus, hæc ipsa obtinent: vt adeo nihil magis consultum & opportunum sit, quam vt quam citissime & qua breuissime fieri potest via, e corpore exturbentur, ne pernicialis eorum vis latius serpat & intimiora aggrediatur. Sed horum ea est ratio, vt ipsa vomitum proritent, vel etiam enormes deiectiones moueant, licet sine villo leuamine: quippe dum firmiter adhærescunt ventriculi & intestinorum membranis nerueis, easdem perpetim lancinando & arrodendo, contractiones ad vomitus suscitant, quæ
tamen

tamen nec sufficientes sunt, nec idoneæ ipso veneno educendo. Quapropter si vomitum vomitu curare iuxta priscorum medicorum præscriptum expedit; certe illud hoc in casu ex usu est. Neutiquam tamen id irritantibus & virulenta acrimonia agentibus, sed lenientibus, pinguibus, demulcentibus, humidis copiosius haustis, exsequi fas est: quo non modo acrimonia inuoluatur & attemperetur, sed ipsum etiam venenum simul, euacuatione per vomitum auctiore reddita, e corpore exturbetur. Et sicuti vel sola ratione dictitante liquido inclarescit; ad infringendam & inuoluendam venenorum & acrioris indolis pharmacorum virulentiam, nihil pinguibus & demulcentibus ipsoque lacte esse præstantius: ita certe plurima exstant exempla, quæ id luculenter confirmant, e quorum numero notari inprimis meretur, quod mihi ante aliquot annos obtigit. Comiti decem annorum ad vermes enecandos pilulas ex mercurio dulci præscripseram, extracto panchymagogo Crollii & aliquot colocynthidis granis, sex dosibus assumendas. Sed arbitro forte remoto, comes ignarus numeri, circa noctem omnes in capsula contentas pilulas simul deglutit. Quod quum mihi esset renunciatum e vestigio vt afferatur insignis lactis copia iussit, eoque ad mensuras duas hausto, nihil plane incommodi & mali subsequutum est, sed aluo quinquies vel sexies circa matutinum tempus subducto, aliquot lumbrici lati adhuc viui vna excreti sunt.

Observatio VI.

Grauiissima nonnunquam symptomata lactis in ventriculo coagulum ingignit: quibus dispellendis & penitus submo- uendis, emetica exoptatissimam commodant opem.

Scholion.

Quemadmodum lac, moderate assumtum & ventriculo firmo ac puro, optimum præbet nutrimentum: ita certe co-
Hhh 3 pio-

piofius ingurgitatum, ftomacho infirmo & acidis succis ob-
felfo, infenfiffimum eft, & maxima non folum fymptoma-
tum tormenta fufcitatur, fed etiam ancipites & periculofos mor-
bos excludit, qui non prius difcedunt atque remittunt, quam
exturbata noxia & infefta mole, ventriculus iterum fui factus
fit iuris. Quodfi enim in lactentibus maior lactis copia,
quam tenerior & non adeo firmus ventriculus fubigere atque
expellere poteft in ftomachum, defertur, non modo in eius
cauo ftagnat, fed etiam acore inficitur & in tenaces ac fir-
mos grumos abit, quorum pondere ventriculus nimium op-
pletus, diffenditur & pleræque ægritudines, quibus infan-
tilis ætas infeftari folet, gignuntur. Inprimis notiffimum
eft, quod acelfens & fermentelfens coagulatum lac, fæpius
materiam & cauffam præbeat afthmati infantes tantopere af-
fligenti, vt etiam fuffocationem minetur: quippe procurato
per firupum emeticum, ex violarum firupo & tartaro emeti-
co, paratum, aut linctum cum aliquot pulueris Monckii gra-
nis, vomitu, facili & explicita curatione morbus illico di-
fpellitur & fubigitur. Porro hypochondriaci, quorum ven-
triculo plerumque folutior eft & acidorum & corruptorum
humorum fentina fcetet, ab affumto lacte & hoftili coagulo
infecto, maximas experiuntur moleftias, ventriculi inflatio-
nes, anxietates, fpirandi anguftiam, inquietudinem & infig-
nem virium prostrationem: a quibus vt præfentaneo cum le-
uamine liberentur, certior & promptior non datur ratio, quam
vt leniori emetico, cum diluente tepide fumpto, ventriculus
vomitu depleatur & peffimorum horum fymptomatum mate-
ries exturbetur. Fidem etiam faciunt M. N. C. *Dec. II. A.*
IX. obf. 64. quod lac copiofius haufum, in corpus nimio mo-
tu & calore æftuans & ventriculo acidorum fuccorum collu-
uie conferto, cauffa fuerit febris cum conuulfionibus: ægro,
cafeofa materia fponfe & elicto per artem vomitu reiecta,
ex voto conualefcence. Et HENR. ab HEER *obf. 50.* prodidit:
quod a lacte coagulato lipothymia grauis fuerit fuborta, quam
ipfe vomitorio oblato feliciter fufstulerit. Neque mirum eft,
ab

ab hostili lactis coagulo eiusque in ventriculo congerie, tam graues oriri cruciatus tamque dira symptomata, quum ROLFINCKIUS *ord. & meth. med. lib. III. sect. II. cap. 59.* testetur: instar farciminis sæpe caseosam materiam reiici.

Observatio VII.

In morbis, qui contagio serpunt & insigniter pernicialis indolis sunt, vt pestis, petechiales febres, febris acuta cum phrenitide, siue sic dictus morbus Hungaricus, emeticum, gliscente adhuc sub initium miasmate, cum alexipharmaco datum, summam promittit securitatem, & sæpenumero capitales has ægritudines prima in herba felicissime iugulat.

Scholion.

Integros, valentes & sanos homines, si cum contagiosis morbis laborantibus versantur, a pestifero & virulento miasmate tangi posse ac infestari, per experientiam satis comprobatum est. In quonam autem huius contagii natura, ratio atque operatio in corpus nostrum versetur, non adeo omnibus liquidum est atque perspectum. Nostra quidem ita fert sententia: contagio infestos eos quam maxime esse morbos, qui a penetranti & subtili mobilissimi & lymphatici humoris corruptione atque putredine, nervis eorumque summæ actiuitatis liquido, admodum aduersa oriuntur; cuius tetra exhalationes, vi quadam fermentatiua & multiplicatiua, in aërem sparsæ & ore per respirationem exceptæ, cum salivali valde fermentali humore connubium ineunt, & huius vehiculo intra poros faucium & oesophagi sese sensim paulatimque insinuant, vel cum potu aut cibis in ventriculum descendunt, ac multos ex vitiata digestionem & eduliis minus congruis collectos crudos & ad corruptionem pronos humores ibi offendentes, subito per hanc sentinam feralem suam & putridam vim disseminant, qua demum ad massam sanguinis & nervearum membranarum systema delata, tota motuum & fun-

functionum vitalium œconomia, summo cum vitæ discrimine turbatur, euertitur atque destruitur. Ne itaque mortiferum in corpus delatum virus sumat, & pernicialem vim latius diffundat, nullum certe, nec præsentius, nec tutius, propinari vel etiam excogitari potest auxilium, quam vomitorium, quo, quamprimum fieri potest compendiaria via, corrupti in ventriculo humores, vna cum virulento miasmate, foras exturbentur. Et hoc facto, assumtum postea alexipharmacum, siue in liquida, siue solida forma, v. c. tinctura bezoardica, aut puluis bezoardicus, cum momento camphoræ & aliquot nitri granis mixtus, reliquam veneni corruptiui partem facile discutit atque dispellit. Qua omnium tutissima & certissima curandi ratione, plures ab exitialibus, qui in castris plerumque grassantur morbis, immo ab ipsa peste, quæ aliquot abhinc annis plura loca funeribus exhaustit, & munitos esse & liberatos, certa & non fallaci experientia confirmati sumus. Hinc etiam SYLVIVS in *Opp. pag. 658.* vomitoria in pestis curatione laudat, mox ab initio diaphoreticis nupta; & si prima vice oblata effectū careant, secunda vel tertia vice eadem propinare iubet: si vero vomitus plane non sequatur, malum esse signum. Verum enim vero non modo ad acutas & funestis ut plurimum euentus has febres, sed etiam ad alias non adeo malignas, immo intermittentes, quæ ortum ex aëris vitio nanciscuntur, auertendas & præscindendas, hæc medendi methodus plurimum valet & præstantissima est. Nam sæpissime contingit, ut ii, qui in locis depressioribus, vliginosis, paludosis & culicum ac ciniphum caterua stipatis, æstiuo tempore, sole præsertim occiduo, diutius versantur, ac quibus simul ex intemperantia & ingluvie primæ viæ multis cruditatibus obsidentur, incidant in febres, intermittentes quidem, sed valde contumaces; quæ tamen cito abigi & iugulari possunt, si statim inter insultus febrilis initia & indicia, emetico omnis e ventriculo saburra, vnacum excrementitiis illis & causticis insectorum, per aerem conspurcatum eo delatis sordibus, opportune eiiciantur: specifico postea roborante

rante subiuncto. Id quod non fallaci coniectura & opinione, sed multiplici experimento confirmatum asserimus.

Observatio VIII.

Eximia & summopere laudanda emeticorum, in compescendis alui fluxibus & dysenteriis, utilitas est atque efficacia.

Scholion.

Vomitum superuenientem longo alui profluvio morbum solvere, est antiquissima sapientissimi Coi sententia, *Secl. VI. aph. 15.* Quare sicuti vomitiones sæpenumero ipsius naturæ beneficio in alui profluviiis, euocata sursum biliosa corrosiva materia, salubriter excitantur: ita naturam quandoque arte imitari neutiquam inconsultum est. Nam licet tum experientiae, tum CELSI testimonio, aluum per dies aliquot, & nonnunquam ad longum tempus fluere, bonum & admodum salubre sit; quum corpus hoc profluvio a copia feri impuri & biliosi sæpius benigne repurgetur: attamen si alui fluxus, sine, vel cum sanguine, a materia valde corrosiva, æruginosa, duodeni flexuræ firmiter impacta, nec virulenti contagii experte, suboritur, optimo eiusdem HIPPOCRATIS consilio obtemperandum, *lib. de locis in homine* præcipientis: morbos per eam partem, cui maxime vicini sunt, educendos esse, ne videlicet intestina sana, corruptæ materiæ transitu inficiantur & arrodantur. Et hoc nomine nostro certe ævo, ceu magnificæ famæ antidysentericum, radix illa emetica Americana, hypocoanna, celebratur, quæ etiam primis inuasionis diebus, semel, vel etiam iterato exhibita, opem fert longe desideratissimam. Plures iam olim fuerunt practici, qui tam præseruationis, quam curationis causa, in dysenterico malo vomitoriis vti sunt, cuius rei præclaros testes citamus SENNER-
TVM, *in Prax. lib. III. pag. 352.* ROLFINKIVM, *de ord. & meth. consult. pag. 668.* ET TMVLLERVVM, *coll. pract. Opp. Tom. II. pag. 154.* nec non RIVERIVM, *Cent. III. obs. 9.* qui memorat: quod
(*Hoffm. Opusc. varii argumenti.*)

adolescens, quum nullo remedio curari posset, in dysenteria, die morbi duodecimo, sumta salis vitrioli drachma, & reiectis per vomitum multis biliosis humoribus, euaserit. Eandem quoque in rem euolui possunt M. N. C. *Dec. II. A. II. obs. 108. Dec. III. A. III. obs. 15. & 51.* Et HILDANVS *lib. de dysenteria pag. 683.* suadet in hoc morbo potiunculam vomitoriam, ex aquæ pluuiæ libris duabus & mellis vnciis tribus, epoto eiusdem, cum olei oliuarum, vel butyri insulsi vnciis duabus, cyatho, & immisso post sesquihoram in gulam digito, vel penna, oleo oliuarum aut butyro illita. Quin immo M. N. C. *Cent. I. obs. 38.* aliquot exemplis confirmatum eunt, aluum in dysenteria ab hypecoanna obstipari atque compesci. Probe autem monet BAGLIVVS, *Prax. pag. 110.* dysenterias, quæ cum nausea & vomitu incipiunt, plerumque esse lethales, & tunc emetica, ipsamque hypecoannæ radicem minime locum habere: quippe, ventriculi inflammati indicium hæc esse, non sine ratione suspicamur. Inprimis singulari fructu atque emolumento, ante vsum radicis ipecoannæ, statim in principio, pulueres temperantes, cum cremore hordei, plena dosi offerre sueui, quo humorum acrimonia cicurata, eo melior & securior emetici sit efficacia. Operatione vero eiusdem peracta, vt lac bibatur iubeo ex consilio ipsius HIPPOCRATIS, qui dysentericis, epoto lacte, vel fero lactis, in quo candentes lapides extincti, dolores & cruentas deiectiones moderatiores fieri asseuerat.

Observatio IX.

Morbi, qui a colluie humoris biliosi corrupti, prima in regione, per quam maxime duodeni cavitatem intelligimus, stagnantis fouentur, & certis periodis infestare solent, vti sunt tertiana lentaque febris, tussis contumax, sic dicta stomachalis, hemicrania, vertigo stomachica, emeticum conuenienti dosi & tempore exigunt.

Scholion.

Fiunt hi, quos iam enumeravi, morbi, plerumque ex imbecilli & vitiata digestionē, in corporibus maxime debili-
rioribus & impuris. Corruptitur vero & destruitur cibo-
rum resolutio & subactio quam maxime, quando perpeffo
haud ita pridem diuturno morbo, vel febre intermittente
perperam curata, cibi avidius & copiosius, quam infirmus
adhuc ventriculus ferre potest, ingeruntur. Et ex hoc pra-
uæ digestionis vitio, denuo corruptorum humorum sentina
colligitur, quæ vel febris præcedentis recursus gignit, vel
lentus etiam, vires cum carne consumens, a pastu & circa
noctem succedens calor exsurgit: in cuius persanatione o-
mnem operam ludes, nisi opportune emetico colluuiem æru-
gine quasi tinctæ bilis euocaueris. Sæpissime certe a bile per-
iram effusa, & in primo intestino aliquot dierum interuallo
corrupta, lentæ eiusmodi febres excluduntur, quæ emeticum
moderatus, quod statim post excandescentiam, omnibus ad-
huc a violentiori impetu & motu tremulis membris, perni-
ciosissimum est, mora interposita & composito motuum im-
petu, non solum commodissime ferunt, sed etiam eodem pro-
fligantur. Porro a mensibus restagnantibus eorumque fluxu
suppresso, ex illuuiē vitiosorum, prima in regione stagnanti-
um humorum, lente cum cachexia febris gignitur, quæ nec
sanari, nec menses in ordinem redigi possunt, nisi emetico,
mitiori tamen, aliquoties oblato, primarum viarum latibula
a sentina sordium repurgentur. Ferina etiam cum ingenti
viscidæ materiæ excretionē stipata contumax tussis, verno
præsertim tempore prognata, & tam interdiu, quam noctu,
cum graui virium decremento & agrypnia fatigans, vix alio
certo ac probato, quod præsentaneam opem ferat remedio,
ac infuso aliquot vnciarum mannæ, cum vno vel altero tar-
tari emetici grano, tam ad sedes, quam ad vomitiones mo-
uendas, armato, expugnatur. Mira enim sic eiecta pituitæ
copia, facile demulcentia, vt lac & alia sedatiua, nec non
stomachum firmantia, reliquas molestias tollunt atque persanant.

nant. Similiter hemicraniam, inprimis eam, quæ ex alio morbo prodit, & certis temporum articulis affigit, sæpius præmisso emetico & subiunctis huic medicamentis stomachicis, roborantibus & neruinis, penitus profligatam esse nouimus. Et quum magna inter membranas ventriculi & cerebri intercedat consensio, mutuaque motuum vitiosorum communicatio, identidem notauimus, aliam vertiginem, summo mane a spasmo ventriculi profectam, pilulis aliquot Wildegansii sumtis, remisisse, aliam vero, a redundante corruptorum circa ventriculum & duodenum saburra, vel solis pilulis balsamicis, aut iisdem cum tartaro emetico acuatis, discussam esse & extirpatam.

Observatio X.

Quum plurimi infantum morbi optime ferant emetica; imbecilibus hæc ipsa non conuenire, erroris loco ponendum esse censeo.

Scholion.

Inter affectus, qui infantes maxime infestant & nonnunquam necant, connumeranda inprimis cardialgia & asthma ab inflatione ventriculi ortum, ventris tormina cum agrypnia sæpius iuncta, quibus tandem funestæ succedunt conuulsiones. Cuncta hac mala, ratione exactius putata, a nimia ingurgitatione lactis eoque in ventriculo & duodeno coagulato & corrosiuo reddito, suam nanciscuntur originem. Nam si infantes probe vomunt & alius ipsis fluida est atque frequentior, bonam portendit valetudinem: simulac vero & vomitus & deiectiones aluinæ deficiunt, retenta lactis copia, non potest non ad tussim, asthma stomachale, cardialgias, tormenta ventris & frequenter conuulsivas commotiones promptus parari aditus. Quocirca perpensis rite his omnibus, nullum opportunius & magis accommodatum ad auertendos & præscindendos hos morbos præter leniora emetica & acidum tem-

temperantia, dari remedium, nemo nisi imperitus negabit. Neque eos, qui in artis exercitio versantur, fugit, sæpius infantes morbillis, variolis aut alio quodam morbo laborantes, ex coaceruata ingenti pituitosorum humorum circa præcordia faburra, incidere in difficilem spirationem, suffocationem etiam minitantem, eandemque dimidia, vel quadrante grani tartari emetici parte, aut aliquot pulueris Monckii granis, cum sirupo violarum in forma linctus exhibitis, promississime abigi, ita ut mira humoris viscerum copia reiecta, illico vis morbi conquiescat. Et hinc luculenter admodum patet imbecillioribus etiam actiuæ indolis remedia, ut sunt emetica, apprime conuenire, iisdemque opportune porrigi posse, hanc maxime ob causam, quia quo debiliora sunt corpora, eo magis ob digestionis imbecillitatem & excretionum debitarum defectum, colligendis vitiosis humoribus apta sunt atque idonea.

Observatio XI.

Vomitoria non modo ea, quæ in ventriculi & duodeni cauitate delitescunt, expellunt; sed vim ac virtutem suam etiam in hepar explicant: unde in morbis quorum sedes in illo est, ut ictero & quartana, usus sunt longe egregii.

Scholion.

Quando in venæ portæ per hepatis viscus dispersis ramis lentius progreditur sanguinis iter, bilis inde non leue capit vitium, & secedentibus tenuioribus in vasa lymphatica partibus, ob diuturniorem moram, in ductibus biliosis spissior fit atque viscosior. Quod si vero biliosus humor lentus est ac tenacior, in canalibus illum vehentibus, crassa, quæ demum in coagulum abit & in lapillos concrescit, amurca gignitur, & hinc orificio, siue sphinctere ductus cholodochi, quo in duodenum hiat, obstructo, bilis, exitu prohibito, per vasa lymphatica ad sanguinis massam regurgitat, & vnacum illa per vniuersum corporis ambitum diffusa, icterum gignit:

cuius principio nisi opportune obstiteris iis, quæ detergendi & tenacem hunc mucum e loculis suis excutiendi vim habent, contumax & inueteratus, quinimmo, si ictericia nigra succedit, lethalis plane morbus euadit. Et huic scopo obtinendo apprime inferuiunt rhabarbarina, amara, lixiuiosa, cum sufficienti humido data, inprimis vero emetica. Quod enim vomitoria in nerueas ductuum biliosorum tunicas agant, superius iam asseruimus, illudque clarissime vel vnica hac obseruatione innotescit, dum sæpius post emetici vsum, & nouissime in viro hydropico, annotauimus, quod vsurpato vino, corticibus sambuci infuso, & vomitiua ac purgante facultate imbuto, complures insignis magnitudinis biliarii lapides per aluum egregio cum leuamine discesserint. Hinc etiam multoties statim inter icteri initia summo cum fructu vsus sum radice ipecoanna, iterato nonnunquam ad drachmam dimidiam exhibita, interposito elixirii balsamici lixiuiosi, minus spirituosi, & essentiae rhabarbari vsum. Cauendum vero perquam solícite est, ne, si subito ab ira enatus fuerit icterus, valentius emeticum porrigamus, eo quod spasmus subest, qui demulcentibus & anodynis sopiendus potius, quam per acriora intendendus. Porro quartana febris, contumaciam debet hepatis male affecto: id quod exinde patescit, quod perperam curatæ, plerumque succedat hydrops. Et contumax eiusmodi ac refractaria febris, omnia fere alia remedium genera eludit, nisi opponantur ea, quæ singulari virtute obstructions & infarctus reserandi facultate pollent: quibus decoctum radicis asari & summitatum centaurii minoris, multis experimentis a RVLANDO comprobatum nec non mercurius dulcis & regulus antimonii medicinalis merito annumerantur. Maxime omnium vero eximius hanc ob causam emeticorum in quartana vsus est, qui priscis medicorum etiam non ignotus fuit: vnde TRALLIANVS *lib. XII. de quartana, noui, ait, me vomitoriis quartanas inveteratas discussisse, ut in totum conquieuerint.* Et veteres quidem, semper primum lenioribus tentabant vomitum, iisque nihil proficientibus,

tibus, ad helleborismum tandem descendebant, quem huic morbo maxime accommodum esse censebant. Nos vero pro certo asseuerare possumus, pertinaces quartanas, non felicio-
ri & expeditiori remedio, quam per emetica venereæ pro-
sapiæ, fuisse sublatas: quando nimirum vitriolum album ad
grana decem, cum aliquot croci granis, in iusculo butyra-
ceo, tribus vel quatuor ante paroxysmum horis, exhibitum
fuit; & si non prima vice spei respondit euentus, secunda ta-
men vel tertia morbus decessit. Noui etiam quondam in
Westphalia empiricum, qui quartana detentis, tantum vi-
trioli cyprini, quantum ternario venit, in dimidia aquæ
mensura solutum, offerre, eosdemque hoc pacto ad sanita-
tem reducere solebat.

Observatio XII.

Quæ paullo validius emesin excitant, non modo ven-
triculi & intestinorum tunicas stimulando, sed & vniuersum
vasorum neruorum systema exagitando, operantur, eamque
ob causam, prouide atque prudenter exhibita grauissimis sæ-
pe morbis opitulantur.

Scholion.

Huius aphorismi veritatem vel ex eo clarissime consta-
re arbitror, quod ab emetico assumpto, arteriarum pulsus lon-
ge multumque mutetur, citatior & auctior reddatur, & re-
spiratio nec non transpiratio, ad sudoris vsque profusionem,
sæpe intendatur. Quare quum tam insignis & tam late pa-
tens vomitoriorum sit facultas, nullum etiam dubium est, quin
in compluribus ancipitibus & periculosis morbis medelam
spondeant. Inprimis hydrops, omnium morborum grauissi-
mus, visceribus saluis, nec extrauasato in thoracis aut abdo-
minis cavitare sero, curationem adhuc admittens, certe non
rectius & melius expediri potest, quam petito e mineralium
familia emetico, vti est mercurius vitæ probe correctus, pul-
uis

uis Monckii, aut tartarus emeticus, ad grana sex vel octo, cum mercurii dulci scrupulo mixtus, quippe quæ collectas & stagnantes in vniuersi corporis habitu aquas cumulate educunt, vt etiam in extremis digitorum apicibus, quidam vellitionis & contractionis sensus percipiatur. Quum vero ab humore stagnante, intestinorum tunicae & aliae motrices partium fibrae eliquentur ac relaxentur, & maiori stimulo, vt motus systaltici augmentum accedat, indigeant; in hydrope, praesertim anasarca, si medicinae adhuc locus, validissimis res aggredienda, & extractum elaterii, esulae, hellebori nigri, gummi guttae, auctiori longe dosi propinanda, & gummi guttae quidem ad scrupulum, extractum hellebori, esulae & elaterii vero ad drachmam vsque, vtpote quæ, licet in aliis, hoc morbo non detentis, validissime stomachum moueant, nihilo minus in hydropicis rarius hunc effectum edunt, sed potius aquas deorsum ducunt. Verum enim vero, quia hæc ipsa drastica, virulenti quippiam alunt, quod vitali illi & intestinali partium motioni, siue spiritali sentientiae inimicum, tutius vti que est ab iisdem abstinere, & emetica supra memorata, quod experientia etiam confirmat, in eorum locum surrogare. Præterea emeticorum efficacia ad magis diffitas adhuc partes cerebrum nempe, eiusque vasa ac membranas sese explicat. Hinc si sanguis ibi locorum hæret, vel restagnat ac difficiliter progreditur, ac phantasie turbationes mentisque abalienationes oriuntur: certe si vlla auxilii spes superest, illud nonnisi prudenti venæsectionis & emeticorum vsu impetrabitur. Monendum tamen est, quod longe auctiori ordinaria dosi, & v. c. tartarus emeticus ad gr. X. aut XII. & mercurius vitæ ad scrupulum propinari debeat: quandoquidem ob influxum liquidi per nervos denegatum, rigiditatem, stuporem & immobilitatem partes sensiles contraxerunt, & nonnisi vi pharmaci roboratae ac animatae, remouent & excutiunt obstaculum liberioris progressus, spissum nempe & viscidum sanguinem, quo vasa repleta, farcta atque distenta sunt. Denique emeticorum vim atque operationem non tantum ad superio-

periores, sed etiam inferiores partes ipsumque vterum spargi ac propagari, ex eo apparet, quod difficultatem partus non raro facilitent atque secudent; unde ANGELVS SALA, necnon ROLFINCKIUS, *chym. in art. form. red. lib. V. Sect. VI. cap. 13.* eadem ad partum excludendum commendant, modo foetus iusta positura instet. Et Cl. BOERHAAVE *in institut. med.* auctor est, vomitoria ad expellendum foetum mortuum conducere. Quandoque enim contingit, vt spasmi ex spinali medulla ad vterum tendentes, & ad expulsionem foetus apprimere necessarii, deficient, ad quos iterum suscitandos & promouendos, vtique emetica cum analepticiis mixta, proficere persuasissimus sum.

Observatio XIII.

Conducunt etiam vomitoria præseruationis maxime gratia, vel etiam sub initium eorum morborum, qui extremis partibus & articulis, cum inflammatione & ingenti dolore, incumbunt, vti sunt rheumatismi, arthritidis & erysipelatis species.

Scholion.

Fomes ac minera molestissimorum horum affectuum, prima in regione, & maxime in duodeni flexura, réconditur; congesta ibi ex vniuerso corpore, propter excretiones, vernali maxime & autumnali tempore, imminutas, acrium biliosorum humorum saburra, quæ postmodum rursus cum alimentorum succis ad sanguinis massam delata, & motu quodam febrili critico ad summam cutem propulsa, inflammatorios eiusmodi gignit dolores. Optimo itaque consilio, imminente morbo, congrua laxantia aut leniora emetica, præmissis corrigentibus & acrimoniam biliosam contemperantibus, propinantur, quibus vel ipsum malum penitus arcetur, aut paroxysmi ad longe mitiorem insultum perducuntur. Si auctoritates & experientiam in partes aduocare licet, consuli poterit SYLVIVS, qui *Opp. pag. 786.* asserit; quod experientia

(*Hoffm. Opusc. varii argumenti.*)

K k k

teste-

testetur, vno vomitorio, non tantum paroxysmum sublatum, verum nouum etiam ortum in longum tempus fuisse dilatum. Et SOLENANDER insigni cum emolumento in principio arthritidis purgans exhibere suevit, edoctus primum a TRALLIANO *lib. XI.* licet a multis hoc tempore reformidetur, quasi, quæ exagitata sit materia, non amplius moueri debeat. Porro MARTIANVS, *comment. in Hippocrat. pag. 382.* narrat: sæpius se obseruasse, quamplurimos podagricos, ob acorem in ventriculo peccantem, podagra correptos esse, liberatosque aut saltem mitiora tormenta passos esse, si acetosa euomuisent. Idem testatur HILDANVS *Cent. VI. obs. 84. vomitorium* inquit, *in principio podagricis datum, omnem dolorem absumit.* Quibus accedunt M. N. C. *Dec. I. A. VI. & VII. pag. 220.* vbi luculentum exemplum arthritidis annuæ, vomitu & diarrhoea solutæ, commemoratur. Post vomitum autem, suadet HIPPOCRATES *lib. de affect.* vt lac asininum, vel serum coctum propinetur: id quod etiam egregie ex usu est.

Observatio XIV.

Emetica inter remedia præseruatoria primum & principem obtinent locum, iis præsertim in morbis, quorum materia & causa prima in regione residet, & exinde remotas alias partes petit atque infestat.

Scholion.

Ægyptii singulis mensibus teste HERODOTO vomitoriis utebantur: & Græci sæpius etiam vomebant; vnde MARTIANVS *lib. de nat. hum. pag. 153.* memorat: quod veteres ad corpus repurgandum & muniendum, solo vomitu, rarius purgatione, vti sint. Inprimis autem GELSVS vomitum præseruatorium gravissimis de causis, *lib. I. cap. 29.* suadet: *vomitum*, inquit, *utilis est plenis & biliosis omnibus, si vel nimium se repleverunt, vel parum concoxerunt. Nam siue plus est, quam quod conco-*
qui

qui possit, periclitari, ne corrumpatur, siue corruptum est, nihil commodius est, quam id, qua via primum expelli poterit, eiicere. Et paucis interiectis inculcat, luxuriæ causa id fieri non oportere, interdum valetudinis causa recte fieri; commoneo tamen, pergit, ne quis, qui valere & senescere velit, hoc quotidianum habeat. Idem auctor utilissimam pronunciat vomitionem iis, qui coelum vel locum mutant. Cui etiam HIPPOCRATES de salub. diet. calculum adiicit, addita hac cautione; qui vomere bis in mense vult, melius consulet, si biduo continuabit, quam si post quintum, decimum diem vomuerit. Sed hoc veterum de crebriori vomitione consilium, nonnisi ex more illorum interpretandum est, quo vomitum ad præservandum institutum, non fortioribus & acrioribus prouocabant, sed lenissimis, quorum superius iam mentionem iniiecimus. Quemadmodum itaque vomitoria, ad corpus a variis morbis tempestiue muniendum, eximia utilitate splendent: ita præsertim in morbis, qui annuas statas periodos seruant, vel certis mensibus recurrunt, vt sunt varii generis febres, asthmata, hemicrania, arthritides, insultus quoque apoplectici, maniaci & melancholici, nec non purpura, ante inuasionem, eadem, leniora tamen & laxantibus nupta, aliquoties repetita, nec non in quibusdam sanguinis missione subiuncta, ex usu sunt; quandoquidem hisce præmissis, longe felicius aquæ minerales, vel decocta sanguinem depurantia, & lacticia, aut alia accommoda præsidia, operationem suam postea exequuntur.

Observatio XV.

Oris amarities, nausea, cum vomendi conatu, ardor circa pectus, anxietas præcordia stringens, saliuæ frequens, tremor labiorum, indicia quidem sunt subversionis ventriculi & subsequuturi vomitus: sed non semper tutum atque proficuum est, his indiciis obsequi & vomitum emeticorum ope procurare.

Scholion.

Exacte profecto & summa cum cura, hæc a qua causa
Kkk 2 pro-

proueniant pathemata discernenda sunt ; eo quod a vomitoriis, promte & sine discrimine, indicantibus tantum hisce signis datis, ingens damnum & vitæ etiam periculum exortum esse nouimus. Nam si hæc symptomata a solo motu spastico & contractorio ventriculi, per consensum, subsistente in remotioribus partibus causa, vti videmus in apoplexia, vehementi tussi, calculo, suffocatione hysterica, passione colica, iliaca aliisque eueniunt, vel etiam a vehementiori præcedente animi affectu proficiscuntur, cane peius & angue vitanda esse emetica, cum primis acriora, nisi neci tradere velimus eos, quorum vita nobis concredita est, auctor suasorque sum. Grauius certe in eo & infelicitus lapsos esse memini plures, qui omnes istos conatus & motus pro salutari principii vitalis & rationalis intentione agnouerunt, quam omni modo per artem promouere & subleuare oporteat. Deinceps sæpenu-mero etiam conatus ad vomendum a regurgitante sanguine ad vasa ventriculi in grauidis, mensium, vel hæmorrhoidum suppressione laborantibus oriuntur: vbi emeticum dare maximum foret piaculum; quum hac ratione cruentum & funestum prouocatum esse vomitum quamplurimis constat exemplis.

Observatio XVI.

Nunquam emetica dare expedit, in ipsa accessione, impetu aut vigore morbi, tam in febribus intermittentibus, quam continuis & acutis; sed si morbus necessitatem eorum imponit, tempore intercalari, aut remittente impetu, ad vsum ordinanda sunt.

Scholion.

Veritatem & observationem practici huius canonis & ratio suadet, & experientia adstruit. Emetica enim actiuiora omnia, & ventriculum, & reliquas nerueas corporis partes, spasticis stricturis tentant & sollicitant: sub morborum autem accessione, motu & impetu, systema tam vasorum, quam membra-

branarum neruearum, iam spasmodicis commotionibus agitur, adeoque motuum impetus non potest non ab eiusmodi drasticis cum insigni detrimento notabiliter augeri atque intendi. Communis quidem practitorum opinio & reuera error est, breui ante paroxysmum intermittentium exhibenda esse emetica: sed quam infelix sit successus, si vomitionis actui superuenit febris cum horrore & rigore initium, plurimis exemplis mihi innotuit; quippe syncopicas inde cardialgias, artuum tremores conuulsuos, animi deliquia, cum extremorum rigore & frigido sudore orta esse annotauit. Satiùs itaque est vomitoria vacuo tempore, aut quinque, vel sex ante paroxysmum horis, propinare, ac hoc demum pacto felicissime res succedet & febris discedit. Eadem quoque observatio tenenda in acutis, si vomitorium propinare necessitas vrget, illudque nunquam in vigore porrigendum, sed statim in morbi principio, vel ante tempus inuasionis, suffragante grauissimo auctore HIPPOCRATE, & *Secl. II. aph. 29.* monente: *ineuntibus morbis, si quid mouendum, moue: nam iis crescentibus, quiescere melius est.* Adeoque fatemur quidem, initiantibus morbis craftrensibus, febribus exanthematicis, variolis, morbillis, purpura acuta, antequam materia virulenta cum sanguine fuerit permixta, & altius solidis, fibrosis ac nerueis partibus insinuata, emetica cum analeptics, vel alexipharmacis, in forma liquida propinata, præsertim si saburra in prima regione delitescit, felicissimam locare operam & longe benigniorem efficere morbi progressum: sed, si quispiam hæc pharmaca in ipsius morbi statu exhibere velit, ingens certe damnum & symptomatum augmentum procurabit atque inducet.

Observatio XVII.

Si ob spasmos primarum viarum & viscerum abdominis, quemadmodum in hypochondriacis, nec non hæmorrhoidibus retentis & post grauiorem animi affectum solenne est,

inæqualis sanguinis motus aut congestionum impetus ad caput & pectus contingunt, vt in apoplexia, epilepsia, cephalalgia, vertigine, affectibus soporosis, narium hæmorrhagiis, hæmoptysi, asthma, phthysi, catarrho suffocatiuo, summo-
pere cauendum est ab emeticis, nisi ventriculus saburra obsessus sit morbi causa.

Scholion.

Egregium est monitum, quod SEPTALIUS *lib. III. sect. 12.* inculcat: *qui tæbe, inquit, qui capite, sine saburra ventriculo repleto, qui hæmoptysi, aut oculis, aut animi defectione, aut suffocatione vterina, aut colica suffocatiua laborant, hi plane ab emeticis abstinere debent.* Et certe, his in casibus magna prudentia & deliberatione opus est, antequam ad anceps eiusmodi & magnæ operationis remedium descendamus, ne plus damni, quam emolumenti afferamus. Nam ipso vehementiori nisu vomituriendi conatu, omnino sanguinis & humorum affluxus, ad partes superiores, caput & pectus vrgetur, quæ, si ex crebriori appulsu & congestu sanguinis, iam iam imbecilliores redditæ, ex facili inde labem contrahunt & pristinæ ægritudines recrudescentes, longe grauius, quam antea, infestant. Apprime huc faciunt, quæ HILDANVS de infelici emeticorum effectu obseruauit, qui *Cent. V. observ. 12.* a vomitorio violento, vnum mutum, alterum surdum factum, nec non *observ. 19.* coecitatem inductam esse, refert. Et SCULTETVS *observ. 92. app.* a vomitu tumorem frontis subito enatum esse, testatur.

Observatio XLIX.


Emetica mineralia vel vegetabilia fortiora, tutissime semper in forma liquida, interdum etiam vehiculo spirituo-
so, insignem liquidi copiam superbibendo, assumi, mul-
tiplici experientia compertum est ac confirmatum.

Scho-

Scholion.

Tutiora semper sunt, ad emesin exitandam ex antimoniatīs ea, quæ soluta sunt, præ solidis: quare aqua benedicta Rulandi, quæ ex vitro antimonii paratur, tartarus emeticus Mynsichti, qui ex croco metallorum, sale absynthii, vel cremore tartari conficitur, nec non sapa vomitoria Sylvii, magis ex usu sunt, quam vitrum antimonii, vel crocus metallorum, pulvis Monckii, mercurius vitæ aliæque. Quum enim stibiata hæc pharmaca non agant nisi soluta, facillime contingit, ut a contentis in ventriculi sinu falsis & sulphureis humoribus promte liquata, aut enormes non sine periculo suscitent vomitiones, aut obseffo lenta mucagine minusque ad solutionem idoneis succis, stomacho, non dissoluantur & nullius fere operationis sint. Accedit, quod non exiguum periculi subsit, si acrius eiusmodi minerale emeticum certæ tantummodo ventriculi portioni infideat firmiterque inhærescat, ut eandem continuo lancinando & arrodendo, ancipitem inflammationem pariat. Quod si vero potens eiusmodi pharmacum colliquatum fuerit & solutum, non vnam tantum tunicæ ventriculi partem adoriatur, sed vniuersam illam moderate afficit ac stimulat, ut longe facilius & tutius tota substantia ventriculi ad inuersionem & expulsionem sollicitetur. Quare semper mihi in more positum fuit, tartarum etiam emeticum solutum prius in aqua analeptica spirituosa, pauxillo syrupi grata dulcedine imbuta, propinare. Et hac ratione tutiorem longe, faciliorem ac meliorem, refracta etiam dosi, fieri vomitum obseruavi. Præterea non quidem negandum, quod remedia spirituosa & ipse etiam vini spiritus vomitiones sistant: nihilominus tamen, si hic vino spiritus cum syrupo violarum, aut rosarum iulepo cicuratus, vnacum emetico porrigitur; non solum minor & refracta vomitorii dosi sufficit, sed etiam longe expeditior fit operatio: eo quod spirituosus hic liquor,

liquor, tum subtilem illam & nervis inimicam acrimoniam corrigit, tum etiam insito suo calore maiorem sanguinis affluxum allicit & proinde motum & subuersionem ventriculi strenue adiuuat. Inprimis autem, si non tam copia, quam peregrina indoles acrium biliosorum in ventriculo humorum, præternaturalium affectuum causa est, post vomitorii assumptionem multum liquidi bibere expedit: quo intus latitans congeries eodem diluatur, attemperetur & hoc pacto promptius euacuetur. Et hoc consilio interdum post cibum sumtum vomitum procurare suadebant veteres, quos inter præsertim TRALLIANVS *lib. I. pag. 72.* nominandus, qui vomitiones post cibum in epilepsia vtilissimas iudicat: quandoquidem hoc potissimum tempore exhibita emetica, quicquid crassum in ventriculi cauo offendunt, id omne simul cum reliqua massa exturbant ac vtiliter remouent. Sed
fatis iam de vomitoriis eorumque usu dictum
esse arbitror.



DISSERTATIO VIII.

DE

VSV ET ABVSU PVLVERVM
STERNVTATORIORVM.

§. I.

QUEMADMODVM sapientiæ humanæ fundamentum atque initium sensus recte dici possunt, adeo, vt illis in vigore atque integritate constitutis mens nostra functiones suas promptissime exsequi queat: ita nobis non exigua quoque incumbit necessitas, illos ipsos tanquam rationis nostræ instrumentum curare ac colere, & quantum fieri potest, in debito statu atque incolumitate seruare, vt tali cultura ad optimos mentis vsus disponantur. Quod circa non incongrue illi faciunt, qui oculos frequenti terfione lemarum ac mucaginis per aquam frigidam tempore matutino puros ac serenos seruare allaborant, vel etiam perspicillis ad diuturnum visum illos præparant. Auditus organum frequenter purgare instrumentis a cerumine vulgaris etiam consuetudo est, ne forsan in gypseam duritiem mora transiens aurinos meatus ac gyros obstruendo auditui noceat. Organon gustus, quod lingua constituit, & oris elutiones cum aqua simplici factæ & calidæ iam vsitatæ infusorum varii generis sorbitationes percommode abstergunt & mundant, vtpote de nocte in lingua obortus lentor papillares eius tabulos obsidens calida sic aqua extergitur, vt non tantum ad meliorem gustum, sed & ciborum masticationem & faciliorem mixtionem cum genuino suo succo soluente disponatur. Tactum, qui toto diffunditur corpore, frictionibus matutinis conuenienter institutis curare vtilissimum & a veteribus valde celebratum consilium est, quandoquidem hoc pacto discussa superflua humiditate spiritus segnescentes in motum concitantur, vt ad corporis & mentis exercitia expeditius influant.

(Hoffm. Opusc. vari argumenti.)

LII

2. PRO-

2. PROFECTO autem nullius sensorii maiorem hodie mortales habere solent curam quam narium, quem in finem non tantum excogitata fuerunt varia odorum oblectamenta, quæ in balsamis solidis, liquidis, spirituosus, fumis ac pulueribus suauissimi odoris consistunt, quibus continuo nares deliniunt, sed & alia nunc frequens vbiuis ferme regnat nares purgandi ratio per singulares pulveres errhinos & sternutatorios extabaco variisque speciebus odoratis & cephalicis confectos, quibus naribus attractis viscosum in narium cauernulis hærentem humorem colliquare ac deturbare conantur. Quemadmodum autem salubritate sua ac usu non caret dictum narium purgamentum, ita tamen tanta iam increuit intemperies, non dicam vesania, nonnullorum, vt mira consuetudine vel imitatione aut auctoritate aliorum inducti, tali puluere nares perpetuo vexare & irritare videantur, vt etiam inter mutua colloquia, conuentus ac coenam deesse aliquid humanitatis credatur, nisi quis pyxidem suam, qua seruari puluis ille solet, singulari officio ac inseruiendi eius sanitati studio alteri offerat ad mucis officinam purgandam. Cum autem peruersus talismodi abusus, dum singulis fere momentis naribus talismodi puluis attrahitur, non parum damni ac nocumenti efferat siccioris persertim naturæ hominibus; itaque constitui de legitimo horum puluerum usu nec non praua illis abutendi ratione in præsentis verba facere, & non inutilem hanc materiam paulo vberiori euolutione pertractare.

3. VT autem eo felicius in nostro instituto progrediamur & emolumenta ac damna dictorum puluerum rite exponamus, vtile ac e re fore indico ante in sternutationis naturam, materiam & modum agendi errhinorum paulo penitius inquirere & ipsum quoque locum, ex quo riuus ille mucidus deriuatur ac stillat, secundum anatomicorum recentiorum accuratas obseruationes determinare ac perspicere. Nolumus autem rebus maxime intenti litem mouere de sternutatorii nominis deriuatione ac ortu, multo minus, an illud vocabulum barbarissimum sapiat, ex criticis decidere, sed tantum breui-

breuiter strictimque illud in limine præmonere allubescit, per pulueres sternutatorios nos intelligere tabaci varii generis folia & radices aliasque vegetabilium species rite siccatas & præparatas inque formam pulueris redactas, quæ naribus susceptæ inspiratione membranam narium irritando spissum vel aqueum humorem euocant, siue cum forti ac sonora aeris explosione, quo casu vocari solent sternutatoria, siue sine illa, vbi errhinorum nomine insigniuntur, vtut sternutatoria græcis quoque errhina veniant, meliori tamen vocabulo ptarmica designentur. De vtrisque autem hic loci agere decreuimus, præsertim cum ptarmica pro diuersa dispositione hominum facile in errhina & versa vice in ptarmica degenerent.

4. PRIMVM omnium autem, quo veritas dilucide appareat, constare debet, quænam pars corporis principaliter afficiatur ac patiatur in sternutationis actu, & ex quo loco insignis illa muci quantitas, quæ mediante talismodi remedio extrahi solet, stillet ac deriuetur. Magnam autem hac in re inter veteres & recentiores passim deprehendimus dissensionem, dum plures ex veteribus actionem ac motionem ipsius cerebri esse sternutationem affirmant, quæ in consensum rapiat thoracem, sicuti quondam HIPOCRATI & ARISTOTELI placuit. Alii potius principaliter illam actionem thoracis esse, quæ occasione irritationis factæ in naribus accidat, tuentur. Ita etiam circa partem, ex qua humor ille excrementitius effunditur, in diuersas abeunt partes. Plerique ex veteribus cloacæ huius originem esse cerebrum adstruunt, recentiores autem ex externis tantum capitis partibus materiam hanc fluere firmis ratiociniis autopsiæ anatomicæ innixis comprobare satagunt. Nos non diutius refutationibus veterum immorabimur, neque sub examinis incudem etiam nonnullorum recentiorum placita reuocabimus, sed breuissimis sententiam nostram exponimus, nempe sternutationem esse violentam actionem & motionem fluidi elastici tenuissimi, quod spirituum vulgari nomine venit, in nervis non tantum,

qui intercostales musculos descendunt. Quæ motio impetuosa ac præternaturalis cum sit & cum magna constrictione partium neruearum ac musculosarum coniuncta, hinc non inepte a veteribus conuulsio, siue etiam epilepsia parua, leuis, & particularis dicta est, præsertim ab AVICENNA *l. 3. c. 2. Tract. 2.* Et tametsi etiam experientia doceat sternutationem sæpiuscule præcedere epilepsiam, vel etiam illam sequi, sicuti id docte inter alios notauit WEDELIVS in tractatu *de medicamentorum facultatibus p. 211.* Vt ex eo appareat magnam esse affinitatem ac conuenientiam inter epilepsiam & sternutationem, illud tamen teneri meretur hanc esse vtriusque differentiam, quod conuulsio in sternutatione sit magis intrinseca, siue extra cerebrum eiusque membranas, in epilepsia autem intra cerebrum, vbi dura mater principaliter violentissima constrictione afficitur, sicque totum ferme corpus in consensum trahitur. Ex quibus patet sternutationis sedem non quidem cerebrum esse, attamen spiritus, qui neruos incolunt, principaliter esse affectos. Et deinde iam clarum ac perspicuum fieri potest, quare a solo irregulari ac concitato spirituum motu in dispositis sternutamentum moueri possit. Ita curiosæ sunt obseruationes, quæ confirmant, nonnullos, quoties cum vxore rem habere gestirent, immediate ante coeptum opus ter quaterque sternutare coactos fuisse, quæ de re legi meretur STALPARTIVS van der WIEL *obs. 6. part. prior. p. 44. it. AMATVS LVSITANVS scholiis curation. 3. Cent. 4. fol. 370.*

5. CVM autem sternutatio affectio spirituum sit, qui primas in regenda tota machina tenent partes, & ex quorum constitutione boni vel prauī effectus in corpus redundant; hinc etiam a vetustissimis temporibus sternutatio actus boni & mali ominis signum fuit. Ita optimum signum fuit & adhuc est reconualescentiæ, quando ægrotantes incipiunt sternutare, qui alias difficulter admodum id faciunt propter virium defectum siue spirituum non sufficientem influxum, vnde vulgatum illud inter medicos Parisienses est: sternuit, salua res est, & Mo-

& Mosocomio capelli debet, circa quam rem videatur Mosantius PRIOSIVS in epistolis p. 204. ita etiam BALLONIVS ad Theophrasti librum *de vertigine* p. 9. vulgo, ait, Xenodochiis iubent ægros exire, cum primum sternutant, quod bono id fiat omine, & quod in limine sint sanitatis, quasi victa calore naturali morbifica sit materia cocta & modificata. Ex aduerso etiam obseruatum fuit, sternutationem mali fuisse ominis, tum frequenter pestilentiam vel alium grauissimum morbum præcesserit. Ita THUCYDIDES lib. *de bello Pelopones.* §. 131. fol. 180. pestilentis cuiusdam malignæque sternutationis meminit, in famosa illa Atheniensium peste grassantis. POLYTORVS VIRGILIUS etiam *Lib. VI. de inuent. rerum Cap. 2.* itidem similis sternutationis mentionem facit, qua omnes, qui aliquoties sternutassent, paulo post extinguerentur. Afferitque ex recentioribus DIEMERBROCCIUS *Lib. de peste Cap. 15.* Tempore grauis illius pestis an. 1635. neminem se vidisse conualescere, qui durante morbo sternutasset sæpius. Exinde iam mos bene precandi sternutantibus, qui etiam diu ante Sospitatoris nostri ortum apud ethnicos, & ante ipsum Aristotelem obtinuit vt *Famianus, strada prolusionum academ L. 3.* refert, deriuandus videtur. Inualuit etiam is mos & semper continuauit per omnes ferme nationes, etiam Turcicum regnum, (vtut Angli hodiernum eum non obseruent,) vt ad sternutationem vel caput denudent, aut corpus inclinent, & sternutantes saluent his verbis: Deus te adiuuet, vt minus etiam urbanus ille habeatur, quisquis hæc, quicquid est humanitatis, negligat, vid. laudatus PRIOSIVS.

6. HISCE iam missis res maxime poscere videtur, vt recipiamus nos ad examinandum & inquirandum, in quænam corporis parte stationem potissimum habeat sternutatio, & vnde mucosi istius & squalidi humoris eiectione oriatur. Memorandum autem hic venit perperam veteres diiudicasse ex cerebro illud, quod sternutamento eiicitur, ortum suum habere. At vero infelicitati temporum, quæ obseruationibus anatomicis circa corpora humana admodum sterilia fuerunt,

id condonandum est, vtpote manifestissime hodierno tempore demonstrari potest, os ethmoides seu cribriforme foraminulis variis instructum, non aptum esse ad transmittendam vel emittendam, quandam materiam fluidam, cum firmiter foramina, vtut pervia, dura matre & neruorum ramulis per hanc transeuntibus occlusa sint, vt nullum fluidum etiam tenuissimum, sicuti est spiritus vini rectificatissimus, ibi detentum ne ad minimam guttam transire & ad nares descendere possit. Denique & illud clarissimæ veritatis est, humorem talem, qui per sternutationem discutitur, intra duram matrem & cranium nunquam delitescere, neque talem reperiri in cerebri ventriculis, nec glandulam pituitariam suam, quam secer nit, lympham huc amandare; vt adeo cloacæ huius origo alio in loco quærenda sit. Deinceps & nunquam hoc demonstrari poterit, aerem neque odores, multo minus alia externa inspiratione immediate in cerebrum peruenire posse, hinc optime GALENVS *de simplicibus medicamentis* scribit: Errhina quæ mediante inspiratione attrahuntur in nares non, vt vulgaris est opinio, per os cribriforme ad cerebrum scandunt; sic etiam mera persuasio & figmentum est, in illis, qui tabaci fumigationi perpetuo student, anteriora cerebri esse siccata & fumo nigro infecta, quod clarissime variisque dissectionibus factis refutauit NEANDER *in Tabacologia* pag. 228. & seqq.

7. QVODCIRCA rectissime cum recentioribus sternutationis subiectum & originem muci, qui naribus solet expurgati, nec non ipsius olfactus organon credimus esse cauernosam interiorum narium structuram & osseam concamerationem, quatenus nempe membrana non tantum ad sensum, sed & ad pituitæ eiectionem disposita inuestitur. Operæ pretium autem duco hac occasione accuratius paulo, qua tamen fieri potest breuitate, internum narium mirabilem structuram perlustrare. Quod autem internam narium concamerationem spectat, deprehendimus varios sinus & cauitates osseas deingyros anfractuosos osseos triplices, qui scalæ, it. ossa turbinata spon-

spongiosa vocantur, quorum fabricam & vsum singulatim iam perspicere placet. Sinus autem illi recte numerantur duodecim, nempe duo sphenoidei, qui intra os, quod sphenooides dicitur, excauati sunt & sellæ equinæ subiacent. Ex istis per anum foramen humores delabuntur in binos meatus, qui a naribus ad fauces tendunt. Ethmoidei sex numerantur, qui frontalibus & sphenoideis intermediis sunt, in utroque latere tres, & hi tenuibus ossibus transversis & non nonnihil obliquis ab inuicem distincti sunt, quorum anteriores reliquis ampliores sunt, in quibus etiam foramina duo reperiuntur, quibus mediantibus anterior hic sinus ethmoideus cum maxillari communicat. In osse frontis iuxta nasi radicem duo quoque exstant sinus dicti frontales, quorum vnus sæpius altero amplior & distinctas etiam fouet cellulas. In illorum sinuum postica parte foramen est, quod narium posteriorem partem respicit. In maxilla autem superiore duæ cavitates amplissimæ sunt, in quarum superna parte vnum est foramen & brevis ductus, qui ex sinibus ethmoideis anterioribus humorem recipit.

8. SINVS hi dicti duodecim nec non os vomeris omniaque ossa ad narium fabricam spectantia inuestiuntur membrana, quæ propter officium suum dicitur pituitaria, hancque cum sinibus narium ex omnibus accuratissime descripsit *VI-EVSEN in Neurologia cap. XVI. pag. 187.* vbi asserit illam esse fungosam, spongiosam ac glandulosam quamplurimis diversi generis vasis instructam, quæ si digitis comprimatur, mucum statim emittat, sique in aquam immittatur, spongiæ ad instar intumescat. *CASSERIUS PLACENTINVS* illam dicit esse spongiosam, subliuidam & multum sanguineam, ita vt si digitis leuiter fricetur, sanguinem effluere faciat. Et obseruavi in anatomia cadaueris masculini a me celebrata membranam hanc numerosissimis arteriis stipari, quæ iniectione liquoris spissi rubicundi adhuc dum in capite siccato elegantissime apparent. In plexulos hepatis vterini plexibus non absimiles numerosas has arterias ex carotidum ramis externis

nis enatas exire auctor est idem VIEVSSEN *Loc. cit.* Hæc iam membrana, glandulis copiosissimis prædita, ex innumeris hisce arteriolis partem aquosam, lymphæ neruorum ac cerebri elasticæ spirituosæ actiuitatem infringentem, instar cerebri separat, & per breues quosdam ductus, quos vasa mucifera laudatus VIEVSSEN nominat & quorum aliqui setam admittunt & circa posticam ossis vomeris & vtriusque ossis palati partem apparent, expurgat & in nares ceu communem cloacam deriuat. Hæc itaque membrana, quæ ab vtroque ossis occipitis processu oritur lateque expanditur & interne œsophagi tunicæ continua est ac laryngis latera contingit, os vomeris ossaque spongiosa & turbinata omnesque superius nominatos sinus duodecim obducit, est emunctorium principale ipsius muci, qui secernitur in naribus & sinubus, vbi mora nonnunquam nimium lentorem contrahit. Non autem vbique est æqualis crassitie vel conformationis, nam quæ posticæ vtriusque ossis palati parti appenditur, ea crassior est, & fere tota glandulosa & muciferis instructa vasis intertexta videtur. Illa autem membranæ pituitosæ pars, quæ duodecim sinus investit, subalbida, mollis & spongiosa est, valde autem membranosa & magis tensa apparet illa, quæ ossibus sic dictis turbinatis insternitur; de his autem ossibus CASSERIUS *de fabrica nasi Lib. 3. cap. 16.* scribit: *In profundo narium recondita sunt officula illa oblonga spongiosa, quæ gradu scalæ videntur appellari, eo quod gradatim vnum supra aliud positum sit, turbinata hæc ossa dicuntur.* Oriuntur ex parietibus narium ossibus in quam cauitatem genarum interne sepientibus, vbi initio tenui exorti statim crassescunt & turbinis formam adsumunt, vndique libera & nusquam nisi suo principio alligata, ita deorsum pendula dependent, vt intermediam quandam latebram inter os genæ conficiant. Et sane iucundum spectaculum est, hæc officula seu lamellas osseas, quæ neutiquam cartilagineæ sunt, in varios cylindros tubulos & semicirculos osseos conuolui, vt quasi in diuersos specus & labyrinthos, vbi alia in aliam tendit, diuidi. Hæc singula spongiosa os-

ficu-

ficula, singulæque eorum lamellæ & inde effictæ cauitates tunica etiam spongiosa, sed magis neruea inuestiuntur. Hinc etiam hæc ipsa magis præ aliis membranæ partibus sensu exquisitiori gaudet; sicuti enim tota membrana pituitaria per nares extensa sensum suum ac motum maxime nanciscitur non tam a primo, quam a secundo ramo quinti paris emissi, ita maxime hi nerui plurimas fibrillas per membranam, ossa turbinata obducentem, spargunt atque distribuunt, hinc merito huic tunicæ & dictæ ossium turbinatorum conformationi odoratus organi titulus tribuendus est, cum non peculiaris huius tunicæ textura neruea tensa alium vsum arguere videatur, quam vt tantum mucum separet: quocirca BARTHOLINVS in tractatu *de olfactus organo*, rectissime scribit: *quo maior tunicæ narium est superficies, eo plura nervosa extrema in eam terminari possunt, pluresque aeris particule in eandem impingere.* Hinc etiam laudatus auctor in venatico exquisitissimi sensus cane inextricabilem & plane innumerabilem lamellarum in semicircularem figuram curuatarum progerminationem & circumuolutionem inuenit, & animalia olfactu excellentia officula talia cucullum vel concham veneris figura referentia semper plura, longiora, magisque contorta possidere scribit.

9. SENTENTIA itaque nostra est, tunicam hanc sensibilem ossa turbinata cum illorum cauitatibus inuestientem subiectum maxime esse odoratus, cuius organon in tunicæ narium multiplicata, dum ex angusto in angustum ipsa tendit, & in concauitate officulorum aerem odoriferum non tantum remorante sed & verberante consistit. Et sicuti in hac tunica particule odoriferæ fluido respirationis impulsæ percipiuntur, ita etiam nullum dubium est, in eadem tunica varios pulueres vel species naribus susceptas ibique appulsas percipi sensumque irritatorium ab iisdem excitari, adeo, vt idem subiectum odoratus & sternutationis sit. Irritata autem illa tunica in consensum vtique trahitur tota tunica narium pituitaria, propter eandem communionem neruorum, nec non con-

(Hoffm. Opusc. varii argumenti.)

Mmm

tinui.

tinuitatem, ita, vt fibris eius constrictis & compressis succus ille, qui in eadem hæret, copiose & vbertim excutiat.

10. DESCRIPTO iam sufficienter sternutationis organo & subiecto, illoque loco, e quo promanare crassus ille mucus solet, qui sternutatione eiicitur, restat iam vt etiam breuissimis naturam sternutationis siue motus ipsius thoracis conuulsiui cum violenta expiratione & aeris explosione vehemente iuncti indolem perlustremus, & maxime, quomodo thorax & diaphragma ab irritatione narium tunicae in consensum rapiantur. Notum autem iam est ex anatomicorum obseruationibus, non tantum primum neruorum par, quod processum mammillarium nomine venit, verum etiam secundum ramum quinti paris neruosi intra cranium oriundi abire ad pituitariam membranam, maxime autem ad illam partem, quæ ossa turbinata sic dicta seu spongiosa inuestit, vbi non modo sensus siue perceptionis odoriferarum atomorum, sed & omnis motus & contractionis huius membranæ causa existit. Quoniam autem per neruorum intercostalium quoad maximam suam portionem neruis quintæ coniugationis debetur, hinc facillime ratio peti potest, quare irritatione facta molesta in naribus, quam semper subsequi solet influxus celerior neruei fluidi, in consensionem similemque actionem spiritus in neruis intercostalibus existentes rapiantur. Optime hinc VIEVSSEN *Lib. 3. cap. 5.* scribit: *In sternutatione statim ac nerueæ fibræ, quæ in membranam narium interiora occupantem designant, a re quauis acri vellicatæ corrugantur, illico diaphragma propter altiore inspirationem a spiritu animali per nervos intercostales deuecto excitatur, deprimitur & subinde membranæ narium, spasmo remittente, septum transversum superiora versus vehementer retractum violentam expirationem excitat.* Ex quibus dictis & adductis patet diaphragma potius & principaliter sedem & subiectum sternutationis esse dicendum, quam ipsum caput vel in eo contentum cerebrum, tametsi non negandum sit, ex influxu concitatori spirituum, qui occasione vellicationis ac morficationis tunicae narium

ner-

nerueæ contingit, violentum hunc thoracis motum dependere. Strepitus autem ille & aeris sonora explosio, in sternutationis actu quæ contingit, vnice proficiscitur ab aere per expirationem celerrime ex trachea in anfractuosos narium meatus & ibi contractione quasi angustatos, vi transeunte & irruente, vbi reuerberatione, allisione & fractione talem strepitum & sonitum edit, vnde etiam sæpius fit, quando sic aer primum vehementer inspiratus maxima vi in expiratione expellitur, vt etiam cibus & potus in ore & faucibus hærens eiiciatur, lapilli in interiori aure hærentes, vti nuperrimum hic exemplum docuit, expellantur, vel calculi ex renibus & vrtheribus in vesicam deturbentur, aut etiam foetus propulsio ex vtero promoueatur.

II. HISCE iam pertractatis ordo postulat, vt non tantum illa, quæ sternutationem excitare apta sunt, perspiciamus, sed maxime etiam, quod nostræ est tractationis, ad ea dirigamus animum nostrum atque inquisitionem, quo illa ipsa, quæ ingrediuntur & constituunt famosos illos pulueres errhinos & ptarmicos, cognoscamus, & medice examinemus. Et cum iam noster scopus saltim eo tendat, vt non tam illa, quæ intrinsecus in corpore ansam præbere possunt huic adfectui, inquiramus, quam potius externas causas scrutemur. Hinc omis- sis illis, quæ vtique vberiore tractationem merentur, saltim iam occupati erimus circa causas externas. Breuib; autem asserimus; omnia illa quæcunque membranam illam narium sensu exquisito pollentem, vellicare, irritare & morficare apta sunt, illa etiam sternutationem facili negotio mouere possunt. Ita sola titillatio cum penna vel cum papyro conuoluta facta, sternutamentum promte ciet. Et compertum est, irritari etiam nares & sternutationis motum produci per repentinum transitum e loco obscuro in admodum illustratum. Vnde etiam recte dixit ARISTOTELES : *Sternutat, qui sub solem se committit.* Cl. SCHNEIDERVS tract. de sternutatione refert, concionatorem quendam se cognouisse qui cum soli exponeretur, bis, ter vel etiam sæpius sternutare coactus fuerit,

M m m 2

quod

quod tamen tantummodo locum habet in subiectis sensibilibus. Ratio autem huius effectus hæc est : radii solares penetrantissima sua actione ac motione aerem commouendo, ipsos etiam spiritus tunicæ narium insidentes fortiter commouent; non secus ac videmus lucem solarem ob vehementissimam suam actionem oculis laborantibus non conferre, ita vt etiam solus adspectus lucis in ophthalmia causari vel eandem ob causam dolorem augere possit; siquidem nulla sensatio nulla perceptio in machina nostra microcosmica sine præcedente tactu vel tremula motione membranarum fit.

12. VT autem propius accedamus ad materiam & naturam illorum, quæ vel tantum pituitam e naribus euacuant, vel cum aeris explosione illam educunt, dicimus: omnia ea esse indolis salino-sulphureæ acris, quandoquidem non omnia salia, vti sunt neutra, media, salia etiam acida tali facultate pollent, quippe quæ fixioris naturæ & spiculis crassioribus dotata minorem ingressum habent in tenuissimos fibrillarum membranacearum poros, sed requirantur paulo subtiliora, qualia sunt sulphurea & acria, quæ motu intestino ætheris stipata longe penetrantiora sunt & intimioris admissionis, vnde videmus salia volatilia naribus indita promte colliquare pituitam, imo sternutationem excitare. Quinimo admodum verosimile est, principium illud, quod in errhinis & sternutoriis operatur, ad alcalinam potius quam acidam naturam accedere, præsertim cum acida eneruent & notabiliter infringant illam vim, teste experientia & antiquissimo auctore PLINIO qui histor. nat. *Lib. 23. ca. 1.* inquit: *sternutamenta acetum olfactu cohibet.* Et cum omnia purgantia propter idem sal acré irritans subtile volatile plus minus causticum, sint simul validiora sternutatoria & ipsorum vis purgans manifesto eneruetur atque cicuretur salibus acidis, dum nempe hæc ipsa sal illud tenue volatile alcalinum figunt & motum istum ætheris igneum sistunt, ita enim non inconuenienter argumen-
tari

tari licet eodem sale gaudere sternutatoria, quo ipsa purgantia. Accedit & illud, quod tabacus errhinorum & sternutatoriorum princeps sale volatili acri sulphureo copiosissimo polleat, qui intra assumtus ventriculi, oesophagi & intestinorum membranulas fortiter vellicando & vomitum & sedes violenter ciere solet, manifesto documento: non alium modum agendi sternutatoriorum emeticorum ac purgantium esse, quam qui in morificatione, insultu & rosione tunicarum nerveo glandulosarum versatur. Deinceps elementum illud, quo agunt ptarmica & errhina, salinae volatilissimae sulphureae naturae esse vel ex eo intelligi potest, quod pleraeque herbae cephalicae, quae sale subtili volatili oleoso gaudent, cuius generis sunt nominatim origanum, ruta, flores anthos, maiorana, thymus, serpillum, basilicum, semen nasturtii, sinapi, coriandrum, cubebae, vel recentes vel melius sicco modo naribus inditae promte sternutatorium vel tantum errhinum effectum exhibeant.

13. NON autem occupati erimus totum catalogum omnium errhinorum & sternutatoriorum proponere, siue totam materiam errhinorum recensere, sed tantum animus est brevissimis exponere, ex quibus usitatissimi isti pulveres, qui naribus inspirantur & attrahuntur, euacuandi muci causa componantur, siue quanam illorum ingredientia, quis modus praeparandi sit, ut eo melius postea perspicere queamus, quid damni vel emolumenti adferre queat illorum rectus usus atque peruersus abusus. Dixi autem superius, puluerum horum ptarmicorum princeps ingrediens esse ipsum tabacum seu herbam nicotianam; postquam enim huius herbae maxima utilitas generi humano innotuit, sub variis formis interne & externe usus humano illam adaptarunt, & cum nautae ac milites, quibus initio frequentior fuit tabaci usus, experimento didicissent, tabacum in pulverem redactum & naribus inspiratum esse ptarmicum, & hoc ipso exonerari caput utilitate optima, hic usus postea ad multas gentes & nationes pervenit, & primum ad Italos, apud quos talium pulverum usus est

frequentissimus, postea ad Gallos & etiam ipsos Germanos sese extendit, factum, ut tabacomania iam multi laborent, & ipsa consuetudo talem pulverem fecerit pene cum aëre necessarium, ita plerisque inutilis & superfluus imo noxius est. Multi recto eius usu primo, deinde facta consuetudine sunt verba Magneni de tabaco, postea contracto habitu tantam huius pulveris copiam absumunt, ut hominem nouerim, qui die vnico pulveris tabaci optimi vncias tres naso suo perdidit. Sed opus iam est, ut de præparatione horum pulverum quædam edisseramus, quibusque in locis præparentur, notum autem est præparari maxima in copia Bononiæ, Trienti, Venetiis, Turini, unde etiam ad alias diffitas regiones magno mercatorum lucro affertur. Modus autem præparationis hic est, sumitur nempe præstantissimus tabacus de Leuanie & eius stipites ac cespites aqua rosarum infunduntur, postea siccantur & in minutissimum rediguntur pulverem, qui cum solutione tenui tragacanthæ miscetur, & in pastam redigitur, quæ postea ex tenuissimis tuniculis ferreis compositum est angustissima foramina relinquens, traicitur, ita sub specie tenuissimorum pilorum apparet, qui dein singulari encheiresi vase concavo magno excipiuntur, & continua agitatione & succussione in globulos minutissimos rediguntur, qui germanicis sub nomine *geförnter Toback* venit, qui postea oleo de cedro vel iasmino, pergamotti suauis odore imbuitur & talis ex Italia ad nos adfertur. Turini flores aurantiorum exsiccatos item flores rorismarini admiscere solent. Alius autem est modus hunc pulverem in Hispania præparandi: hic enim loci in tenuissimum pellinem, qui in fumum facile abit, redigitur. Nempe sumunt tabacum optimum de Brasilia, & in camera calefacta extreme illum siccant, ut inter manus teri possit, talem iam indunt duobus sacculis ex linteo subtili confectis, postea in alio conclauis puro vir, qui bene nares, oculos, & os singulari adaptato instrumento muniuit ac defendit, duos hos sacculos vehementissime inter se concutit, ut tenuissimus puluis sub forma fumi per porulos sacculi expellatur, qui deinde

inde in conclavi excipitur, & ad vsum colligitur, & hic iam propter tenuitatem suam inspiratione improvida facile ad ipsam laryngem asperamque arteriam transit ibique irritatione facta tussim concitat. Præterea vsitatus hoc tempore adhuc est alius, qui ex Portugallia ad nos sub forma pulueris non adeo subtilis coloris ex flauo viridescens & odorem sicut panis grossior Westphalicus vulgo Bonpournickel de se spargit, & ex foliis optimi nigri tabaci prius in aqua rosarum maceratis præparatur, vt nimia eorum acrimonia salino sulphurea extrahatur; postea folia exsiccant & puluerem ex ipsis conficiunt, quem sine suaueolentia vt plurimum relinquunt.

14. PRÆTER has præparationes simplices adhuc innumeræ restarent magis compositæ describendæ, dum quivis ferme pharmacopola vel medicus graciosus in quavis regione peculiarem excogitat compositionem, vt non tantum colore sed & odore ac consistentia pulueres hi admodum inter se differant, vbi tamen tabacus manet basis, quod modo varias species cephalicas fragrantissimi odoris ad meliorem gratiam conciliandum admisceant. Nostri iam erit officii, vt præstantissimas & valde expertas & quas nos magni facimus, tantummodo hoc loco adducamus, vt quivis habeat, quo casu necessitatis pro morborum & humanæ temperiei vti queat. In antecessum autem hic moneo, duo præ cæteris elegantissima & præstantissimæ virtutis plane vel parum cognita me magni facere, quorum vsum etiam variis in adfectibus magno cum fructu & capitis robore adhuc expertus sum, quorum primum est resina ligni guaiaci, non illa, quæ spiritu rectificato ex rasura huius ligni extrahitur, sed quæ mediante coctione cum aqua tantum simplici elicitur; dum nempe in ipsa aqua per sufficiens tempus rasura coquitur; decoctum postea leni calore ad siccitatem vsque inspissatur & sic ptarmicum pulcherrimum emergit, quod suavi balsamico odore nares adficit & satis potenter pituitam colliquat. Alterum est benzoe in flores resoluta, quando nempe huius gummi optimi pulvis in aqua pluuiali coquitur, quæ identidem inspissatur,
ita

ita pulvis odoris suauissimi ex splendentibus miculis & squamulis compositus conficitur, qui naribus attractus penetrantia sua ad motum eximie suscitatur & densatum ibi humorem extergit. Quod autem horum remediorum præparatio cum aqua instituatur, hæc ratio est; quoniam hæc ex resinosis istis corporibus præter sulphureas, acutas, salinas scindentes & pungentes partes extrahit, quæ hic maxime desiderantur.

15. SED vt ad nostras, quas laudamus & laudauimus formulas, redeamus, sequentes cum beneuolo lectore communicabimus. Recipe sacchari optimi vnciam semis, balsami apoplectici grana duodecim, florum benzoës, resinæ ligni quaiaci ana grana decem, misce. Pulvis hic gratissimi est odoris & egregie neruofas capitis partes solatur, nec non pituitam satis efficaciter educit. Hinc merito cunctis ferme errhinis est præferendus; præcipue autem singularem opem spondet in capitis seu actionum animalium torpore, vertigine, nimia somnolentia, decubitu humorum catarrhali ad dentes, ad aures, capitis grauatiuo dolore; egregie quoque conducit pituitosis & qui caput imbecillum habent. Altera formula hæc est. Recipe pulueris tabaci, infusione aquæ rosarum prius mitigati, vnciam semis, florum aurantiorum exsiccatorum drachmas duas, olei florum aurantiorum optimi Italici guttas decem. Lenis operationis hic pulvis est, & suauem odorem spirat. Tertia hæc erit, recipe pulueris ligni aloës, succini puluerisati, tabaci ana drachmam vnam, castorei grana decem, olei maioranæ guttas quatuor, pulvis hic in dispositione ad apoplexiam, epilepsiam, paralyfin, vertiginem egregii usus est. Parandi modus hic est quartus, sume salis volatilis ammoniaci sicci drachmam vnam, olei maioranæ guttas decem misce. Hoc penetrantissimum est errhinum, solo odore, vel melius puluere eius naribus attractum in deperdito odoratu ab humore crasso, copioso, spisso, frigido, quale quid accidit in coryza, nec non in naribus plane occlusis, item apoplectico, epileptico paroxysmo, nec non in affectibus soporosis

rosis efficacissimum. Quinta pulueris compositio hæc est recipe radicis iridis florentinæ drachmam vnam, florum balauftiorum, rosarum rubrarum ana scrupulos duos, florum anthos, lauendulæ drachmam semis, hellebori albi grana octo, moschi in spiritu rosarum soluti grana duo, puluis exinde fit variis & grati coloris, & talis ex Turcia adferri solet, nec vsu suo defraudandus; hoc saltem vitii habens, quod lintheamina propter flores balauftiorum rubro colore inficiat. Sexta est, recipe florum liliorum conuallium, maioranæ, pulueris tabaci ana drachmam vnam, hellebori albi grani duodecim, olei maioranæ, cubebæ ana guttas quatuor; puluis hic si sternutatio mouenda est, & pituita crassa educenda, naresque mucosæ obstructæ, in pituitosis & phlegmaticis egregie suum facit officium. VII. Recipe radicis valerianæ, seminis fœniculi, pulueris tabaci ana drachmam vnam, florum benzoës grana duodecim, olei cubebæ, fœniculi, maioranæ guttas duas, spiritus rosarum guttas duodecim, misce fiat puluis, qui in adfectibus oculorum, visus imbecillitate, nimiaque illorum serositate usum habet non contemnendum. VIII. Clarissimus LENTILIUS in *miscell. parte 2. p. 564.* hunc puluerem magnificat in grauissimis capitis adfectibus; recipe olei succini scrupulum semis, lauendulæ, roris marini, saluæ, rutæ, spicæ ana guttas tres, balsami apoplectici grana octo, incorporentur cum saccharo canariensi finissimo, vt fiat puluis. Puluis mechoacanæ albæ cum oleo fragranti eximium quoque errhinum constituit, id quod ex Insula Malthæ adferri solet.

16. RECENSITIS sic optimis, quæ vsui inferuire possunt, errhinorum & ptarmicorum formulis, vtile futurum iudico, si de illorum vsu & abusu etiam verba faciam, illumque rationibus & experientia munitus aperte ostendam. In confesso autem est, omnino talismodi pulueres, si modus in hisce sit & prudenter applicentur, salubritate ac fructu non carere, quandoquidem in dubium vocari nequit, membranam illam narium, quæ in capite tam late se extendit, & tot anfructuosos ossium gyros ac sinuosas cauitates obducit, eo officio fun-

(Hoffm. Opusc. variis argumenti.)

Nnn

gi,

gi, vt viscosam, mucidam ac serosam superfluam materiam ex sanguine secernat, quo ipse purior, agilior, & ad fluidi neruei ac cerebri elastici productionem aptior euadat, dum liberatus est ab ea materia, quæ eius actiuitatem, expansionem elasticam impedire ac retundere poterat. Quinimo per solenne hoc narium emunctorium, separata sic debite materia pituitosa, præsertim in illis, qui eius copia abundant, sanguis in progressu & circulo suo per caput longe liberius ac minus impeditur circumuoluitur, cum alias si obstructis nari- bus refertus ac onustus talismodi lento humore sit, deprehen- damus, & grauitatem capitis cum dolore, auditus difficultatem, tinnitum aurium, vertiginem, torporem actionum animalium, somnolentiam, exinde oriri. Quemadmodum itaque legitimum exercitium actionum, quæ sanitati præsumt, potissimum in debitis secretionibus & excretionibus fundatur: ita omnino medici opus atque intentio esse debet, si secretiones hæ labascant, si secretoria & emunctoria otientur vel obstructa sint, conuenientibus remediis, omnes secretiones sollicitare, procurare, obstructaque dissoluere ac reserare, cui fini etiam seruiunt purgantia, diaphoretica, diuretica, expectorantia, apophlegmatica, saluantia & huius generis alia. Ex quo iam facile quiuis intelligere potest, remedia, quæ nares incitant ad excretionem muci, magnæ esse efficacis & insigni niti fundamento in re medica, adeo vt illorum usus æstimandus merito sit.

17. CVM autem natura optima sit morborum medica- trix & vias monstræt, per quas duci inutilis humor debeat opportunissime, & medicina imitatrix naturæ semper sit, hinc quoniam obseruamus naturam sæpius ipsam sternutationem efficere & colluuiem humorum serosorum per nares educere insigni cum corporis leuamine, sicuti videmus in coryza: ita etiam arte procurare nonnunquam licebit talem expurgationem feri effecti, inutilis, copiosi, præsertim si corpora fuerint pituitosa, si humores circa caput stagnant, grauitatem & dolorem pressorium inducunt, & nares humidæ obseruantur.

Maxi-

Maxime omnium autem tale excretionis genus moliri licet, si homines certis anni temporibus assueti fuerint ipsius naturæ vigore talismodi excretioni siue profluvio feri per nares, quale quid si a causis variis cohibetur, non potest non magnam noxam toti corpori imprimis autem capiti inferre. Deinceps quando odoratus deperditus est ob nimiam humiditatem, circa hæc loca confluentem, vtiliter etiam applicantur pulveres errhini, qui non modo exsiccandi, sed & tonum fibrillarum neruearum roborandi facultate pollent. Siquidem notum est, vti omnes reliquos sensus, sic etiam odoratum perfici in sensoriis, quæ membranas habent nerueas, tensas, spiritu animali turgidas, vt tremulum & vndulatorium motum, qui ad omnem perceptionem requiritur, externum obiectum efficere atque imprimere possit. Quando itaque membranæ nimis sunt relaxatæ & copioso humido imbutæ, nulla odorum perceptio, sicuti manifesto patet in coryza, fieri potest; hanc autem humiditatem præter naturam congestam extergunt, absument pulveres tabacini speciebus & oleis cephalicis neruinis exaltati. Præterea per ipsas nares etiam oculi purgantur, dum serositates, ex oculorum glandulis plorantes, per punctum lacrymale in cantho oculi situm singularemque tubulum inter osseum, qui ad narium cavitatem tendit, ordinaria via descendunt, quemadmodum id apertissime videmus, dum lacrymas copiosas emittimus, quod magna humiditas ex oculis ad nares dilabatur. Quod si itaque siue in puerili siue in senili ætate inque catarrhosis subiectis tonoglandularum ocularium nimis relaxato humiditates crassæ, limosæ, vel etiam falsæ, acres, copiosius in oculis influant, & non modo illorum serenitatem sed & visus aciem turbant, tunc puluerum, quos in superioribus laudauimus, moderatus vsus summe erit proficuus. Præterea & ipsa experientia testatur, in visu abolito principio guttæ serenæ tales pulveres errhinos cephalicos, minus autem violenter sternutationem mouentes, hisce adfectibus opitulari efficacissime, in specie vero, quando incipiunt maculæ vel imagines minutæ inter cer-

nendum ante oculos agitari, dicta remedia laudem merentur amplissimam. Confirmat hoc suo exemplo *Cl. BARTHOLOMÆUS in hist. anatom. cent. 5. observat. 1. pag. 50.* Postquam enim aliquamdiu inter legendum potissimum aut scribendum maculis vexatus fuerat, tandem ptarmico frequenter naribus immisso liberatum se, Deo benedicente, refert. Remedium autem hoc est, recipe tabaci opt. vnciam vnam, maioranæ, vncias duas euphras. sem. foeniculi ana drachmam vnam, agarici trochiscati scrupulum, aquæ foeniculi quant. suff. fiat pulvis subtilissimus.

18. COMMENDAMVS etiam dictorum laudatissimorum pulverum usum in aurium vitiis, quando nempe multæ serositates in capite collectæ ibi procumbunt & membranam tenuissimam nerueam, aurium labyrinthos obducentem, nimium humectant & relaxant. Tali in casu serum vitiatum ibi hærens percommode mediantibus errhinis vel sternutatoriis per ductus Eustachianos, ex auribus ad palatum abeuntes, euacuatur. Quando coryza infestat homines & maximo natura molimine ibi fordes pituitosas deponere quærit, quibus sarcinata est, non inutilis etiam erit horum remediorum usus, opus tamen hic quadam circumspectione, in principio enim quando serum est nimis fluxile, falsum & acre, & cum impetu fluit ad nares, abstinendum ab hisce est, maior enim tunc adfluxus excitabitur, in declinatione autem, quando serum incipit fieri spissum & in crassas lemas abire, quæ interiora sinuum occupant, tunc nostros pulveres adhibere summe proficuum erit. Addimus & hoc, quod errhina rite præparata & balsamicorum ac cephalicorum additione roborata, nasum a foetore, a polypo, aliisque concretionibus squalidis, nec non a malignis exulcerationibus præservare possint. Compertum enim in praxi medica est, qua ratione serum malignis causticis salibus in grauiori scorbuto vel lue venerea infectum, ad has partes procumbat, illasque propter teneritudinem suam corrodat penitusque exedat, & foedum ac incurabile vlcus producat, quod hisce remediis etiam potest auerti, partim dum eiusmodi

modi feri maligni vltior stasis ac mora, qua semper maiorem corrosiuitatem induit, impeditur, partim etiam, quod balsamicis speciebus putredo præcaueatur. Tandem etiam illud insinuare hic licebit, ad memoriam & prudentiam hominis, quod quidem paradoxon videtur, conferre temperatum nostrorum puluerum vsum. Quemadmodum enim cerebrum, nimia humiditate obsessum, plane ineptum est ad actiones ingenii & memoriæ exsequendas, dum idearum vestigia difficili negotio in fibrillas eius imprimi nec diutius detineri possunt &c. ita multo magis spiritus torpidi & segnes fiunt, quando sanguis vehit serum exsuperans; vnde exercitium iudicii ac promptitudinis ad ratiocinandum, quod in spirituum debita agilitate consistit, plane vacillat & imminuitur. Etenim non incongrue dictum a sapientissimis veterum, cerebrum siccum esse sapientissimum, & communi prouerbio, prudentes emunctiores, siue emunctæ naris homines ob eandem rationem saluantur. Ex quibus liquido constat, apud pituitosos & illos, qui multum humidi generant, & cerebrum laxius ac mollius habent, ad actiones ingenii excitandas non minimam opem ferre & spondere puluerum talium exsiccantium & spiritus serenantium vsum. Et quamuis non immediate ex ipso cerebro educatur superflua serositas, e pituitaria tamen tunica, antequam ad ipsius cerebri interiora cum sanguine adscendit, illud ipsum contingit. Tandem curiosum est quoque quod WELSCHIVS in *sylog. curat. obs.* 12. scribat podagricum ex consilio Ulrici Ducis Würtembergici intra singula decennia semen maioranæ cum origano naribus indita magnam mucis & pituitæ copiam extraxisse, nec vnquam podagram amplius sensisse.

19. VERVM dissertationis nostræ filum ad horum remedium nos ducit abusum, qui latissime patet, tantus enim ille hodierno tempore est, vt vix quenquam videas, qui etiam moratioribus & prudentioribus accerseri gestit, qui ne minimo quidem temporis intervallo carere possit, talismodi pul-

verum inspiratione, & non refertam hisce pyxidem semper pera sua circumferat, quo breuissimis intervallis semper nares replet & aliis etiam vrbauitatis causa offert. De tali autem peruerfa consuetudine nihil boni expectari posse facile quis agnoscat. Damnum autem, quod tales pulueres inferunt, differt maxime, prout ingredientia varia sunt. Si enim ex vehementibus sternutationibus compositi fuerint, & ita creberrime vsurpantur, non possunt non grauissima mala inde sequi. Huius rei *Theodor. KERCKRINGIUS obs. anatom. cap. 2.* flebile memorat exemplum cuiusdam rustici, quem interuectores nauis Harlema Amstelodamum vehebant, quique circumforanei cuiusdam persuasu eiusmodi pulueris periculum faciebat, quo tam vehementer sternutare primum, deinde & tantum emittere sanguinis per nasum coepit, vt tanquam mortuus humi procumberet, ac portatus Amstelodamum aliquamdiu ibi remanere necesse habuerit. Ita etiam guttam serenam sternutatoriorum intempestiuo vsu excitatam fuisse, ex observatione *Guilielm. FABRICII Cent. 1. obs. 24. PLATERI Lib. 1. praxeos pag. 239.* cognitum habemus. Denique experientia testatur in capitis grauatiuo dolore, vel nimia grauedine sternutatoria adhibita epilepsiam vel etiam apoplexiam excitasse. Videantur *RHODII analecta ad SEPTALII librum §. 17. pag. 229. it. NIMANNVS de Apoplexia cap. 46.*

20. NOSTER autem scopus præcipuus hic est, vt qualem noxam afferre possint tabaciaci hi pulueres improuide & continuo inspirati videamus. Primum autem dicimus odoratum illos ipsos abolere posse. Sicuti enim nimia humiditas odorum perceptioni officit, ita etiam nimia siccitas membranarum neruique odoratorii odoratum tollere potest. Hinc *SIMON PAULI Tract. de abusi tabaci ac Thee, periculosum est,* scribit, *adsuescere minutatim contriti tabaci vsui, quoniam saepe paruit, eos, qui eodem abundanter vsi sunt odoris priuatos fuisse tono.* Membranæ enim narium nimio horum vsu, præsertim in ficcioribus subiectis, callescunt & duriores euadunt, vt

vt nulla vellicatio amplius sensum efficere possit. Præterea dum indefinenter sic & excessiue nares pulueribus hisce vexantur, & capsulæ satis capaces de die euacuantur, continua sic vellicatione facta, in subiectis pituitosis & serosis, præsertim si aluus non suum faciat officium, attrahuntur ad nares & copiosissimæ serositates, vt deinde consuetam viam ibi facile affectent, & cerebri vasa ac tunicas narium humore tali infarciant, vnde & vocis claritas perit, dum narium meatus squalore turgidi angustiores facti fuerint, vt aer in voce, quod necessarium tamen est, ad gratam & claram loquelam libere non possit transire; hinc dicitur sie reden durch die Nase, deinde & tanta feri copiosi talismodo colluies circa caput collecta ad somnolentiam, torporem & comatosos adfectus fenestram aperire potest. Memorabilia sunt bina exempla quæ IOSEPHVS LANZARIUS in *Miscellaneis Nat. Curios. Dec I. an. 2. obs. 131.* adducit, primum scil. de ciue Ferrariensi, qui ex nimia quantitate pulueris nicotiani assumpta coma somnolentum contraxit tam potens, vt neque ab acclamantibus domesticis, neque ab alio remedio expergisci potuerit, sed in cubili sedens stupidus omnino ac immotus manserit, donec tandem septima die extinctus sit. Alterum de quodam satelite est, ob continuam tabaci pulueris assumptionem, ex phrenitide misere interemto. Notatu digna hoc loco etiam est historia, quam communicat WAGNERVS in *Miscellaneis Nat. Curios. an. 2. obs. 26.* nempe virum quendam litteratum ex abusu pulueris sternutatorii ex floribus liliorum conuallium, maiorana &c. confecti, aura inter aures abscondita, ita commouisse membranam tympani, vt nimirum in aure dextra ista dilatata aut disrupta penitus auditum ex ea parte sustulerit. Spectat huc egregius locus ex MERCVRIALI *de aurium affectibus cap. 4. de sternutatoriis nisi caput inquit sit purgatum sit, nunquam adhibenda esse; quia maxime continuuntur aures;* nam dum emunguntur nares, semper aures correspondent: quosi caput fuerit repletum, ex hac concussione trahitur noua materia ad aures, & ita malum augetur.

21. MVLTQ minus autem illis vtilis sunt talium puluerum attractiones, qui narium hæmorrhagiæ assueti sunt, vtpote hisce non tantum sanguinis largior fit profusio, sed natura etiam crebriores talismodi hæmorrhagias intendit. Tandem & illud adiiciendum est, detracto sic in nimia quantitate sero, per hoc emunctorium in cholericis & sicciorebus deficit eius, vbi tamen necessaria est, excretio in glandulis palatinis & saliuilibus. Cum autem saliuia secundum nostram sententiam genuinum sit alimentorum soluens, quo ipsorum nexus intime discerpitur, hinc facile patet, ex saliuæ defectu digestionis vigorem labefactari & ad generationem cruditatum causam suppeditari posse amplissimam. Nocent autem illis maxime, qui ebrii sunt & vino ad ebrietatem vsque se obruerunt, præsertim si sternutatoria valida hisce pulueribus admixta fuerint. Ita THIERMAIRIVS *Lib. 2. c. 9. fol. 133.* se expertum, ait quendam potui valde deditum, crebris sternutationibus valde commotis capitis humoribus, atque ipso vehementer concussio cerebro, depressoque in apoplexiam incidisse. Postremo egregiam obseruationem de incommodis, quæ sternutamentum secuta fuerunt, affert HILDANVS *Cent. 4. obs. 13. nempe an. 1611. Iuuenem quendam Rutgerum Gummersbachium, robustum optimo corporis habitu præditum, Coloniae cognouit familiariter. Ille cum catarrho ad dentes defluente vexaretur, empirici & circumforanei consilium auxiliumque implorat. Numerata pecunia curationem adgreditur, & nullo prius exhibito medicamento purgante, naribus puluerem in radicibus, pipere, euphorbio, & similibus calamo inspirat, & bacillo ex vitroque parte bifurcato inter dentes posito, sternutamenta provocat, & pituitam per os & nares extrahit & quidem copiose. Sed quid fit? eadem die subsequutus est tinnitus aurium molestus & dolorosus. Porro dolor iste cum per se paulatim remississet & materia ad nares defluxisset, ichor emanare cæpit, atque per menses aliquot inde effluxit. Tandem odoratus ita abolitus fuit, vt ab eo tempore siue suauissimi, siue ingratissimi odores fuerint, eos tamen percipere aut discernere potens non sit.*

22. CORONIDIS loco etiam adiiciendæ sunt quædam regulæ, horum puluerum usum varie determinantes. I. Plethorici, aluo adstricta laborantes, hypochondriaci ab effrænato eorum usu abstineant, item sicciore, senes, illis autem commode uti poterunt pituitosi. II. Noxius etiam eorum est usus statim a cibo, hinc consultius est, si homo ieiunus illis utatur. III. Abstinentum etiam ab hisce pulueribus in oculorum defluxionibus calidis, ne maior concitetur defluxio, item ubi nares hæmorrhagia tentantur, quia magis irritat: neque locus est illorum, ubi in naribus existit vlcus. IV. Quibus hic pulvis inadsuetus & caput plurimo humore graue est, tunc facile sternutationem concitat, & sic motu humorum importuno ad caput grauem inducit destillationem. V. Si sternutatio crebra & frequens oritur, loco auxilii potest esse firma compressio narium circa angulos oculorum, protinus enim hoc pacto impeditur sternutatio & ratio est, non quod descensus lymphæ lacrymalis ad nares inhibeatur, sicuti nonnullis placet, sed quod ramus nerui quintæ coniugationis, qui abit ad nares, per rimam orbitæ oculi prius egrediatur, & postea per os orbitæ interius, per sinus ethmoideos & ossa cribriformia demum redeat ad nares. Hic si comprimitur, influxus spirituum, qui expansuum elasticum hunc motum efficiunt, quodammodo impeditur. Sed hæc de usu & abusu horum puluerum iam sufficiant.



DISSERTATIO IX.

DE

MIRABILI SULPHURIS AN-
TIMONII FIXATI EFFICACIA IN ME-
DICINA.

§. I.

POSTQVAM in rebus medicis & chymicis philosophiæ seu
maius rationis studium liberius & rectius hæcenus agi-
tari & excoli cœpit, atque illa ipsa, quæ facti & expe-
rientiæ sunt, ad solidiorum principiorum normam & rationem
ponderata atque æstimata fuerunt, splendidior ex tenebris quasi
surrexit medicinæ facies, dum in hac veritates, complures
absconditæ detectæ, innumeri errores monstrati, via medendi
breuior & concinnior inuenta, & præsidia vincendis etiam
grauissimis morbis idonea excogitata fuerunt. Enim vero
quodsi ad prisca tempora animum aduertimur, quanta reme-
diorum maximam partem languidorum diffusorum peruersæ-
que compositionis sylua in illorum libris deprehenditur, quæ
nostro tempore, vbi ingenium morborum quasi mutatum ipso-
rumque contumacia adaucta neutiquam sufficientia obseruan-
tur. Quam præstantibus autem nec non concentratis & vir-
tute valentissimis ex mineralium familia petitis claret & in-
structa iam est ars nostra salutaris. Equidem in ea non sum
sententia, medicamina eiusmodi actiuiora ac chymica in do-
mandis morbis tantum esse arcescenda, sed potius necessaria
ad felicem sanationem tam Galenica sic dicta leniora esse quam
exaltata, actiuiora & ad minimam molem redacta chymica,
firmiter statuo & vrgeo, confirmante id vsu & experientia;
qua edocemur vtraque prout morbi sit conditio, vel ægrotan-
tis vires ac robur exigunt, eximium in medendo præstare
effectum, modo illa ipsa seligere prudenter, & morbis recte
opponere nouerit medicus. Attamen non inficiandum
est,

est, si medentis ratio & ars aliquid eximii in sanandis morbis præsertim refractariis efficit vel contribuit, neque medicatio tantum naturæ opus est, profecto illud ipsum medicamentis actiuioribus, magna vi & virtute motus instructis expedire posse & debere.

2. EMINENTIORA autem ea sunt chymica, quæ ex familia mineralium ducuntur atque deriuantur; hæc enim viua animata & spiritu minerali tenuissimo, purissimo, non destructibili foeta atque imbuta sunt. Ex omnibus autem iis, si vllum efficacia & vi rebellibus etiam morbis resistendi est armatum, certe est ipsum stibium, quod ex duplici actiuissima substantia, mercuriali & sulphurea altera compositum est, & hinc merito chymicorum deliciæ & diuinum minerale dicitur. Multa ex eo in chymicorum libris parata, nec non pharmacopolis præstantissima & expertissimæ virtutis medicamina, quæ artem nostram exercentibus sunt notissima, prostant. Cum autem experientia, qua indies docemur, & altius prouehitur res medica, compertum ac confirmatum habeamus, quoddam remedii genus, ex ipso hoc minerali peculiari artificio paratum minusque notum, quod titulo sulphuris antimonialis fixati gaudet, illudque non modo nobis, sed amplissimis archiatris, & peritissimis medicis ac chymicis hætenus per aliquot annos repetitis vicibus mirabilem atque diuinam in morborum sanatione præstitit opem atque auxilium, quod vix ac ne vix quidem ab aliis expectandum; ideo apud animum constitui, in præsentia ea, quæ circa efficaciam huius remedii, naturam modumque operandi obseruavi & meditatus sum, breui, vtilissimo tamen labore, communicare.

3. VT autem eo melius naturam ac indolem agendique modum ac efficaciam huius remedii expiscemur, opus erit ante exponere, quænam principia & elementa antimonium, medicinæ nostræ parens in se contineat ac complectatur. Vbi tamen primo loco tenendum, illud ex duplici substantia, altera sulphurea phlogista, minerali, & altera mercuriali, metallica regulina esse compositum atque conflatum.

Quod primum in eo contineatur principium sulphureum, hoc ipsum variis sese modis sistit atque sensibus nostris exhibet. Quando enim antimonium crudum siue solaribus radiis, siue igne carbonum calcinatur, vapor quidam tenuis, sulphur perfectum redolens in auras excutitur, qui quoque tenebricoso loco, fortiori ignis gradu admoto, inflammatus visitur. Dein sulphur ex antimonio, salua sua textura ac crasi mediante mercurio extrahi potest: hic enim cum salibus corrosius factus, & cum antimonio crudo mixtus ignisque vehementia destillatus, corpus stabile rutilantis coloris, cui nomen cinnabaris competit, producit, dum ipse mercurius sulphur antimonii, relicta regulina substantia, separat, inque amplexus suos amicos accipit & secum in altum euehit.

4. Ex cinnabari autem hoc sulphur purum sequenti encheiresi separatur: vna pars cinnabaris antimonii cum æquali portione limaturæ martis miscetur, & ex vitrea retorta, igne subministrato sufficiente, mercurius destillatur. In ipsa retorta sulphur antimonii cum limatura martis intimæ nexum remanet, quod si separaueris, concretum hoc in spiritus vitrioli quantitatem sufficientem iniicitur; ita hic martem in vitriolum soluit, relicto antimoniali sulphure intacto, in quod nullum ius habet acidum. Alii oleum vitrioli cum antimonio miscendo & destillando, sulphureum inflammabile crama proliciunt. Nonnulli spiritum salis fumantem antimonio adiciunt, & sic ab ipso sulphur inflammabile separant. Vulgari methodo alcalia salia fixa cum antimonio fusa promptissime eius sulphur imbibunt & separant, seque ita arcte inuicem iungunt, vt non nisi diuersæ naturæ liquido ex amplexu & tricis salium explicari & disiungi queat. Tam penetrantem ego possideo liquorem, qui simulac crudo puluerisato antimonio adfunditur, protinus, nullo præcedente calore, in ipsum agit, & substantiam sulphuream flauescens, aurum rutilanti, argentum primum aureo, postea bruno colore inficientem separat.

5. MERCVRIALIS in antimonio contenta substantia in eius regulis deprehenditur, siue cum salibus varii generis alcalinis, siue

siue cum carbonibus vel metallis sulphur saturantibus fuerint præparati. Mercurialis hic regulus naturæ est: sicuti enim mercurius metalla, si cum ipsis miscetur, friabilia & fragilia reddit, auroque pallidum inducit colorem; ita simili ratione regulus metallis immixtus ipsa in partes frangibilia reddit. & splendorem auro aufert. Porro sicuti mercurius vim habet saliuam in copia ex corpore prouocandi; ita etiam regulus, cum duabus nitri partibus conuersus, in puluerem album, qui cerussæ nomine venit, sæpiuscule saliuæ fluxum excitasse obseruatus fuit; præsertim si in insigni quantitate & repetitis per aliquot septimanas vicibus fuerit oblatus. Vnde etiam stomachicum Poterii, materia perlata Krugneri virtutem suam medicamentosam mutuatur. Tacemus, ipsum regulum, præcedente debita resolutione & con fermentatione cum salibus inuicem pugnantibus, arduo licet labore, in mercurium currentem conuerti posse.

6. POSTQVAM itaque elementa & ingredientia antimonii perlustrauius, operæ iam erit pretium dispicere, cuius indolis ac naturæ sit illud ipsum sulphur, quod in antimonio delitescit, vtrum nimirum peculiare plane & distinctum sit a sulphure minerali communi, an potius eiusdem cum ipso naturæ. Non possumus autem non hoc loco generatim nostram profiteri sententiam, quæ hæc est: vnum tantum sulphur in regno minerali datur, vti vnum sal volatile in animali & vnum spiritum phlogiston in vegetabili deprehendimus; differentia autem in aliarum particularum heterogenearum admixtione consistit, quæ si fuerint separatæ, vnius eiusdemque naturæ ac indolis est sulphur in regno minerali, & sal volatile in animali, & spiritus inflammabilis in vegetabilibus. Quocirca in antimonio non aliud agnoscimus sulphur, quam vulgare: quod nostrum adsertum inter alia ex eo euincimus, quoniam sulphur commune anatica portione cum antimonii regulo per fusionem antimonium specie, colore, natura, effectu vnum idemque regenerat. Vltcrius ex eo quoque patescit, quia ex nitro fixo & sulphure in antimonio existente inflam-

mabili, quando antimonium diaphoreticum conficitur, vna producit sal amaricantis saporis, figuræ sexangularis, arcano duplicato vel sali polychresto per omnia simile. Notum autem est, illud ipsum ex sulphuris mineralis acido & sale fixo nitroso parari. Vt silentio iam prætermittamus, sulphur antimonii cum mercurio commixtum in cinnabarim conuerti posse, non secus ac mercurius cum sulphure vulgari decenter permixtus sublimatione in cinnabarim pulcherrimi coloris transit.

7. EQVIDEM non sum nescius, hic quasdam obstare difficultates atque dubia, quibus sententia nostra possit oppugnari, dum nempe sulphur, quod ex lixiuio antimonii præcipitatur, colore & virtute a sulphure vulgari longissime sit distinctum, cum hoc securissimum vsu interno diaphoreticum & roborans sit remedium, illud autem drastica vi emeticum & purgans, rubroque colore splendeat. Addunt, quod sulphur antimonii singulari polleat virtute aurum depurandi, ipsique rutilantem egregium conciliandi colorem. Verum enim vero, ad hæc paucis respondemus. Sulphur illud, quod ex antimonio, mediantibus salibus alcalicis, extrahitur, vtique non purum, sed regulinis atomis, a quibus vehemens illa vis aureusque color proficiscitur, adhuc imbutum est. Etenim salia lixiuiosa non tantum in sulphura, in mineralibus existentia agunt, illaque separant, sed vna cum sulphureis mercuriales metallicas, arsenicales, sulphuri ipsi intime innexas, particulas imbibunt atque adgrediuntur. Arctissima enim vnio & firmissimum partium sulphurearum cum minutiis mercurialibus metallicis est connubium, adeo vt a se inuicem ægerime disiungantur.

8. ITA videmus & notorium quoque est docimasticis & minerarum excoctoribus, quomodo sulphur in tractatione & calcinatione minerarum plumbeo-argentearum vel mixturæ ex sulphure & argento compositæ igne simul auferat, in altum arripiat & portionem ipsius saturni & argenti deprædet. Mirifice enim amat sulphur mercurialem metalli substantiam, vti in cinnabaris compositione videmus, vbi vtraque firmis-

sime

sime sibi iuncta sunt, nec facile a se inuicem iterum disiungi possunt. Ita curiosum est, nullo lixiuio separari posse sulphur a cinnabari vel fortissima accedente coctione. Quando autem cinnabari antimonii regulus eius admiscetur & debito igne subministrato ex retorta fiat sublimatio, tunc resuscitatus mercurius vivus prodit, & sulphur cinnabaris cum antimonii regulo intime iunctum, antimonium regeneratum in retorta exhibet. Memorabile porro est, arsenicum crystallinum mixtum & fusum cum partibus duabus sulphuris communis tale efficere concretum, quod lixiuio etiam penetrantissimo coctum difficillime, vel potius plane non soluitur; cum tamen sulphur per se facili negotio, vti in præparatione lactis sulphuris patet, a tali lixiuio solvatur & imbibatur, non aliam ob causam, quam quod arsenicales particulae intime cum sulphureis coiuerint, vt ex ambabus noua crasis & textura corporis fuerit enata.

9. Ex hætenus dictis facile poterit concludi, sulphur antimonii purum difficillime acquiri, sed semper infectum esse regulinae substantiae partibus, maxime si cum salibus alcalibus fiat extractio. Salia enim alcalia cum sulphure communi mixta & fusa in hepar sulphuris abeunt, & postea, anatica portione mixta cum regulo antimonii igneque liquata, totaliter illum destruunt ipsumque vertunt in crocum, ablata nitida ac splendida metallica substantia, vt dein sulphur ex lixiuio tali præcipitatum non amplius albi coloris, vti magisterium seu lac sulphuris, non diaphoreticae virtutis, sed coloris rubicundi, vt sulphur auratum & virtutis vehementer emeticae existat. Idem euenit, quando antimonium regeneratum ex sulphure communi & regulo antimonii cum salibus lixiuiosis colliquatur & postea præcipitatur. Longe itaque felicius sulphur antimonii a regulina substantia mediante marte separatur, qui tantum sulphur aggreditur, in fundum regulina substantia sedente. Et exinde iam fuit ratio, quare in longe maiori copia regulus acquiratur, si antimonium cum marte tractetur, ac si cum salibus lixiuiosis præparetur, vti in confectione reguli

guli antimonii vulgari patet, vbi salia alcalia vna cum sulphure simul partes regulinas abripiunt.

IC. ALTERVM quod concernit dubium, sulphur nimirum depurare singulari modo aurum, adeoque in eo differre a sulphure minerali, ad hoc respondemus: neque sulphur antimonii, neque vulgare aut vllum aliud ingressum habere in auri strictissimum corpus, tantum quod superficialiter, æque antimonii sulphur ac vulgare, si cum tartaro atque sale communi fiat auri coctio, illud rutilante tingat colore. Antimonium autem fusum cum auro, quod cum argento vel aliis metallis mixtum colorem suum flammeum amisit, pristinum ipsi restituit colorem, non quod aliquid sulphuris addat, sed quod metalla heterogenea sulphure hoc ab auro separentur, inque scorias reducantur, & sic aurum vna cum regulinis partibus in fundum decidat. Huic quando additur sufficiens quantitas nitri, regulum in calcem vertentis, aurum sistitur splendidum finissimum. Similem obtinebis effectum, si antimonium artificiale, quod sulphur commune ingreditur, ad talem auri depurandi modum adsumseris.

II. CVM itaque in superioribus sufficienter deductum esse existimem, in antimonio quidem sulphur minerale latitare, vulgari quoad omnia analogum; at vero illud, quod mediantibus salibus alcalinis extractum & præcipitatum est, de mercuriali regulina substantia adhuc participare, & ratione huius virtutem longe diuersissimam præ sulphure communi possidere: operæ iam erit pretium, varias huius sulphuris antimonii extractiones recensere, vt dein eo melius appareat, quænam sint optimæ & ad vsum medicum aptissimæ: vbi dein facile innotescet, quid de nostro sulphure eiusque efficacia sit statuendum. Vulgatissima sulphur ex antimonio extrahendi via est, quando ipsum cum æquali portione pulueris nigri vulgo schwarzer Fluß, vel sale tartari aut cineribus clauellatis permixtum in crucibulo fluat, quo ipso in substantiam flauam salino-sulphuream redigitur, quæ decoctione in aqua per solutionem largitur lixiuium, cui si inspergitur

gitur acetum destillatum vel acidum quoduis vegetabile, in fundum tetro foetore pulvis copiosus aurei coloris secedit, qui repetita affusione aquæ pluuiialis probe elotus illud præbet medicamentum, quod sulphuris aurati nomine venit, quod vel solum vel melioris successus ergo cum tartareis mixtum & vomitionem & secessum satis efficaciter mouet.

12. EIVSDEM quoque efficaciam prodit sulphur, si cum solutione salis ammoniaci præcipitatio instituitur, dum nimirum lixiuiosum cum huius acido concreditur, & sulphur in poris hærens inde deiicitur. Præcipitatum rubicundo colore magis exaltatum acquiritur, cum sal volatile, quod in mixtura vtriusque salis exsurgit, colorem sulphureum dum in minimas discerpit partes, egregie adauget; & quod notabile, pulvis hic præ communi sulphure aurato magis adhuc est emeticus. Vehemens autem hæc virtus ab efferuescentia & mutua reactione videtur proficisci, quam sal acidum cum alcali confusum excitat, sub qua æther vehementer motus non tantummodo particulas sulphureas valde rarefacit, diuidit & in talem vaporem vertit, verum etiam ipsas regulinas, sub contextu anfractuoso sulphuris latitantes extrahit & separat, vt dein acidum cum hisce iunctum ersenicale, i.e. mercuriale volatile salinum quoddam crama producat. Attentionem enim meretur, lixiuium scoriarum reguli antimonii vulgaris leni evaporatione incoctum sal sulphureum alcalinum præbere, quod virtutem diaphoreticam & aperitiuam omnis vehementiæ expertem exserit, quoniam nullo acido coctum est. Circa eius tamen vsum cauendum, ne cum vehiculo vel corpori exhibeatur, cuius primæ viæ acido exsuperante scateant.

13. QVOCIRCA optima ratione perspicacissimi quidam chymicorum a longo retro tempore in eo magnam collocarunt operam atque studium, vt sine vllo præuio conflictu vel efferuescentiæ actu, & præsertim sine acidi accessu sulphur a sale suo lixiuioso liberetur, confisi, tunc omnem drasticam virulentam vim esse expiraturam, & moderatum, securum, diaphoreticum & resoluens nobile inde emersurum. Hunc in

(Hoffm. Opusc. varii argumenti.)

Ppp

finem

finem iam ipse GLAUBERVS, vir magnæ in chymicis peritiæ ac famæ, sulphuris huius præcipationem cum solutione tartari, ceu minori & mitiori acido adornat, & sulphur inde obscure rubicundum, quod titulo panaceæ in scriptis suis venditat, acquirit: cuius vsum non satis in sanandis morbis rebellibus, chronicis, impuritate lymphæ ex veteri glandularum & emunctoriorum obstructione pronata corrigenda, exulcerationibus consolidandis, tumoribus partium dissipandis, & quidem in exigua dosi repetitis vicibus propinando, non satis dilaudare potest. Videatur eius *Pharmacia Spagyrica* Curiosum est, quod ceu magnum experimentum illud commendet ad variolas arcendas & corpus ab ipsis præseruandum: id quod experientia septem infantum confirmat vid. l. cit. pag. 27.

14. IDEM remedium in vsum traxit & celeberrimum, magnum & nobilissimum illud archiattrorum Conerdingiani nominis par, vt illud sulphur in pharmacopoliis Brunsvicensibus & tractus Westphelici ferme omnibus panaceæ Conerdingianæ nomine magno venditatur lucro. Hoc iam dictum remedium a peritissimis istis archiattris non modo in periculosis acutis, verum etiam in refractariis diuturnis morbis vlitatum est; cuius vtendi modus in eo consistit: miscent v. g. grani partem dimidiam huius panaceæ cum pulvere bezoardico Sennerti vel Anglicano, & in principio variolarum, morbillorum, purpuræ, febrium petechialium, dysenteriae illud repetitis vicibus propinant; succedit exinde sudor optatus, præcordiorum anxietates maxime remittunt, & peropportuna exanthematum ad corporis habitum fit propulsio. Interdum etiam non sine damno salivæ fluxum irritat. In intermittentibus febribus inque morbis, qui a feri coagulo, copia & infarctu proficisci solent, idem remedium paullo maiori dosi datum & cum salibus fixis, nitrosis, vel etiam cinabarinis, martialibus iunctum, diuinam præstat opem. In lipitudine oculorum molestissima cum vnguis & panni metu, in artuum doloribus scorbuticis demulcendis, idem sulphur exilissima dosi resoluendo & acrimoniam feri demulcendo, suppe-

suppetias tulit optatissimas, teste clarissimo SCHRADERO in dissertatione *de medicamentorum Galenicorum & chymicorum necessitate*. Memini me quondam hic loci verbi diuini ministrum huius medicamenti efficacia & veronicæ infuso restituisse, qui scabie maligna instar lepræ in artubus laborauit, quos simul duri glandularum tumores in cute instar globorum hærentes occupabant. Cum autem iam laudatum remedium non plane drasticæ virtutis expers sit, sed in maiori dosi ad grana sex vel octo adhibitum præsertim cum cremore tartari felicissime vomitum suscitet, hinc caute cum illo mercandum esse in debilitatis, vbi vires fractæ ac concussæ sunt.

15. ALII inter quos acris iudicii & eruditionis consummata ETTMVLLERVS referendus est, purius & nobilius sulphur ex antimonio elicere hoc modo tentarunt. Lixiuum nimirum illud, ex quo iam semel & bis mediante acido præcipitatum fuit, sulphur denuo miscuerunt cum acido penetrantiori, spiritu nempe vitrioli, & ita sulphur, quamuis parcissimum, purius tamen & nobilioris effectus obtinuerunt, quod ceu eximium diaphoreticum, specificum in epilepsia præsertim infantili, adfectibus spasmodicis, venereis, & quauis lymphæ ac sanguinis prauitate mirifice extollunt laudibus. Neque res est plane de nihilo; hoc enim pacto sulphur leuius & subtilius obtinetur, crassum vero, grauius & regulinum præcipitationibus in fundum deiicitur; leuius autem ac subtilius interstitiis liquidi adhuc innexum, spiritu vitrioli demum præcipitatur. Vbi notandum, quod hic ipse magis facultatem habeat arsenicales mercuriales partes figendi, quam motu suo volatilifandi, sicuti spiritus salis & nitri efficitur: utpote spiritus vitrioli non agit in regulum, ipsumque soluit, quemadmodum aqua regis, vel spiritus nitri aut salis præstat. Quoniam autem illud ipsum neque in magna quantitate parabile est, neque etiam plane destitutum arsenicali volatilifate, cum fusione albicantes in aerem emittat vapores; merito nobilius desiderandum.

16. IAM ad alias huius sulphuris extractiones progredimur. Sic quondam aqua fontana, nullo accedente alio liquore, ipsum sulphur copiosissimum ex scoriis reguli antimonii simplicis separavi, quod probe elutriatum & exsiccatum non amplius vomitum, sed diaphoresin egregie excitavit, miscui hoc ipsum cum anatica portione auri fulminantis exactissimo tritu, quod arsenicalem virulentiam egregie in mineralibus cicurare consuescit, & hocce remedium efficacissimum in morbis chronicis vincendis iudico, quod tamen ulteriori experientiae relinquo. Hic autem non possumus silentio præterire sublimatum quoddam ex vitro antimonii, mediante sale ammoniaco per debitum ignis gradum factum & edulcoratum, quod tinctura antimonii sicca Grammanni vocatur, cuius meminit HOFFMANNVS in *Clav.* SCHROEDER. pag. 3. II. quam grassantibus febribus malignis in continuo auctor habuit usu, nec non in mania, melancholia, quartana ceu arcanum adhibuit: dosis præscribitur a granis duobus ad tria vel quatuor, sed ultra ad scrupulum semis extendi potest, nec alvum mouet, nec vomitum ciet, sed saltem diaphoreticam vim obtinet. Tota autem encheiresis in ignis regimine, quod moderatum esse debet, & vasis sublimatorii humilitate consistit, alias flores isti sunt purgantes. Ascendit hac ratione tantum sulphurea antimonii portio, relicta regulina virulenta, ceu grauiori in fundo: ab arsenicali tamen contagio sulphur hoc plane non immune esse existimo. Cum igitur in nostro remedio hoc ipsum sit fixatum ceu securius illud antefendum esse adfirmo.

17. NVNC ad examen sulphuris nobilissimi antimonialis deuoluimur, cuius VIGANI in *chymia* pag. 50. mentionem iniicit. Ex nitro nimirum, tartaro, sale communi & antimonio conficitur regulus, ex cuius separata scoria & dissoluta in fortissimo lixiuio calcis viuae, præcipitatione nobilissimum sulphur antimonii acquiritur, odoris gratissimi & saporis, febres ardentes vnica dosi profligans, sudorem & vrinam mouendo, quod remedium etiam in doloribus gallicis summe proficuum
lau-

laudat. De hoc sulphure nostrum hoc est iudicium: ipsum esse præstantissimum, modo non sub præcipitatione tale quid confundatur, quod arsenicalem vim exaltet atque exsuscitet. Ex nostra præterea inuentione non inelegans sulphur antimonii martiale medicamentosæ virtutis egregiæ sequenti ratione: scilicet lixiuium scoriarum reguli antimonii simplicis præcipitatur cum solutione vitrioli martis; ita in momento color exsurgit atramentosus, & pulvis in fundum eiusdem coloris secedit; vtpote, coeuntibus acidi vitrioli partibus cum sale lixiuioso hac ratione non tantum ex lixiuio antimoniali particulæ sulphuræ, sed ex solutione vitrioli martiales sulphureo terreæ præcipitantur, vt adeo pulvis hic martialis & antimonialis sit profapiæ, qui bene elotus & desuper spiritu vini accenso correctus, virtutem custodit non contemnendam in expediendis grauissimis obstructionibus, & excretionibus sudoris & vrinæ promouendis; vnde eius vsus in cachexia, hydrope, hæmorrhagiis, intermittentibus &c. laudatur.

18. ACCEDIMVS iam ad medicamentum, quod sulphur antimonii fixatum est, vsu securissimum. Sumitur nempe antimonium crudum vel eius minera Hungarica, aut regulus antimonii medicinalis, in quo sulphur magis reclusum & extraversum est, miscetur cum liquido penetrantissimo, non tamen pure lixiuioso, & ita substantia sulphurea dissoluitur, quæ etiam singulari encheiresi, nullo alio interueniente liquore heterogeneo, multo minus acido, in fundum deiicitur, vbi pulvis coloris obscure rubicundi apparet, qui aqua purissima elotus, & exsiccatum medicamentum nostrum est desideratum. Iniectum hoc carbonibus ignitis, vel crucibulo nullum vaporem tetrum arsenicalem vel sulphureum emittit, neque inuicem coit aut in massam funditur, sicuti hætenus omnia fere recensita faciunt, sed manet fixissimum sine vlla ponderis imminutione, tantum quod color tantummodo euadat brunior. Tandem autem subministrato extremo ignis gradu, siue igne vitrificatorio, qualis est, qui ex solis radiis collectis in vitro prægrandi caustico nascitur, instar croci martis vel hæmatitis

in massam ferro fuso similem, in auram eleuatis vaporibus colore albis, odore sulphureis, colliquatur.

19. QVOD vires huius sulphuris fixati attinet, non possum non hic propria & aliorum exercitatissimorum practico- rum experientia confirmatus adfirmare, illud ipsum in chroni- cis rebellibus, in acutis periculosis auxilium ferre maximum. Primum eius vsum vidi & didici ex viri litteraturæ quidem experte, ast in rebus & operationibus chymicis ac experimen- tis etiam practicis ad inuidiam multorum versatissimo, qui in febribus acutis petechialibus, variolis, nec non intermitten- tibus contumacissimis faustissimo euentu, vbi omnia alia, et- iam generosissima fuerunt adhibita, propinauit, & quidem sub duorum vel trium granorum dosi effectum edidit diapho- reticum; quandoque etiam tantum per insensibilem euapora- tionem peccantem causam exterminauit. Et quod attentio- nem meretur, deprehendi in aliquot subiectis, imo in me ipso sum expertus, sudorem ab adsumto hoc medicamento per tri- duum durasse, ita vt hora certa ac stata tempore matutino, vbi primum ipse sudor coepit, magno cum naturæ leuamine fuerit reuersus. Postea ego ipse in artis exercitio multoties eius vsum vidi mirabilem in profligandis malignis petechiali- bus febribus, in morbis arthriticis, contracturis artuum scor- buticis, lymphæ impuritatibus scabiosorum, vbi in contra- ctura laborantibus notaui, quod prima vice sudor ex partibus adfectis non profluxerit, sed tantum ex sanis, donec conti- nuatum præsidium, reclusis viis obstructis similem effectum in morbofis etiam præstiterit partibus.

20. IN medicamento dicto duo præcipua veniunt notan- da & expendenda: primum est eius mirabilis fixitas, alterum cum fixitate persistens efficacia summa medicamentosa tam in corrigendis, quam in commouendis humoribus. Vt autem de fixitate eius primo loco faciam verba, vero simillimum es- se iudico, illam ipsam mechanice fieri, & dependere a par- ticularum varia structura connexionem & implicationem. Fi- xum dicitur corpus, quando ignis vi eius particulæ minimæ
non

non possunt separari & in auras eiici. Notum autem est, omne sulphur ex mineralibus, nec non omnem mercurialem & arsenicalem substantiam igni non adeo forti obsecundare & abire in fumum; quod autem in nostro remedio illud non fiat, huius inquirendæ causæ sunt. Principalem autem credimus particularum mutuam implicationem atque implexum talem, quem ignis motu, etiamsi vehementi intestino diuellere & dissolvere neutiquam valet. Placet itaque proponere quædam exempla ex chymicis, ubi ex mutua mixtura partium, quæ per se ignem non ferebant, subnata fuerit satis constans fixitas. Ita memorabile est, spiritum vitrioli summe sulphureum volatilem sale tartari saturatum cedere in sal neutrum, quod in igne fixissimum est, ubi tamen, quando admiscetur, vel spiritus salis vel vitrioli, statim resuscitatur pristinus sulphureus odor. Eadem ratione, spiritus nitri fumosus fugacissimus commixtus cum nitro fixo vel sale tartari transit in verum nitrum inflammabile, quod validissimo igne fustum in crucibulo non auolat, sed persistit, simul ac autem affunditur ipsi oleum vitrioli in momento prodit spiritus nitri volatilissimus, sub vapore flammeo, & odore graui, præsertim si accedit lenis calor. Ita quoque obseruatione dignissimum est experimentum, quo salis in igne fixissimi natura ostenditur: nimirum ex vrina recenter euaporata & inspissata paratur per crystallisationem sal mediæ naturæ, quod igne commissum exhalat spiritum vrinofum, remanet autem sal, neutro analogum, quod neque cum sale acido, neque alcali efferuescit, in igne autem vehementissimo & penetrantissimo, qualis est solaris per vitrum convexum duorum pedum diametri concentratus, manet fixissimum & pellucidum; cum e contrario omnia salia media, vti sal commune, tartarus vitriolatus, arcanum duplicatum, sal ammoniacum promissime auolent in auras, ne particula quidem relicta. Interim curiosum est, hoc sal vrinæ fixissimum, ex spiritu salis acido necessario compositum esse debere, quoniam, si iniicitur

citur aquæ forti, vel spiritu nitri, efficit aquam regiam, compactum & densissimum auri corpus soluentem. Ex quibus patet, corpora volatilia ob mixturam & implicationem ad fixitatis summæ gradum perducì posse.

21. QVOMODO autem sulphur, quod naturæ est admodum in igne fugacis & dissipabilis, fixum & ignis patiens detineri possit, ex sequentibus illucescet experimentis. Nimirum plumbum si æquali parte misceatur cum sulphure & hæc inuicem mixta iniiciantur in crucibulum bene lutatum, plumbum, quod alias facillimæ etiam ante ignotionem fusionis est, ab admixto sulphure vehementissimum ignis gradum sustinet, antequam colliquescat. Quodsi autem addatur limatura martis, pulvis carbonum vel aliquid nitri, fusio mox promouetur. Mercurius metallorum fluidum & volatilissimum ad magnum fixitatis gradum redigi potest, si nempe mixtura fiat ex mercurii triplo, sulphuris parte vna & salis armoniaci parte vna, hæc inuicem probe in mortario lapideo vel vitreo trituratione indantur phiolæ vitreæ & aliquot vicibus instituatur sublimatio, ita tandem mercurius infundo residuus, ponderosus purpurei coloris instar adeo fixus euadit, vt diu ignis violentiam perpeti queat, & vitrum citius colliquetur, quam mercurius in altum euehatur.

22. ADDVXIMVS hætenus varia fixitatis exempla, eum in finem, vt appareat, ex mutuo nexu & implicatione corpusculorum per se non fixorum insignem firmitatem & in igne constantiam obtineri posse, vnde etiam non tanta animum subire debet miratio, quando sulphur nostrum, quod per se ignis est impatientissimum propter subtilem salino ætheream substantiam, quæ illud ingreditur ad maximum fixitatis gradum perductum fuit. Non possumus enim non hoc loco confiteri, corpus illud, ex quo soluens nostrum antimonii confectum fuit, si igne etiam validissimo solari tractetur, nullo labore ad fusionem, colliquationem vel vitrescentiam posse reduci, cum tamen asbesti & talci species omnesque
vege-

vegetabilium cineres, ipsique lateres in vitrescibilem massam hoc ipso redigantur.

23. VNICVM adhuc mihi excutiendum restat altioris indaginis, qua ratione corpus in igne fixissimum tam egregium effectum & operationem, quæ sine actiuitate motus non potest concipi, in corpore nostro producat; cum tamen notum sit, corpora fixa ad motum præferim intestinum intendendum propter defectum mobilium partium valde esse inepta. At vero experientia optima rerum magistra testatur, etiam fixa corpora, & quæ valentissimum ignis gradum sustinere possunt, virtute mendicamentosa mirabili adhuc splendere. Notissimum enim in foro medico est, quid pulvis hæmatitis, quem certus medicus pro panacea solari per multos annos maximo cum lucro venditauit, quid limatura martis, mercurius fixatus cum auro, corallia vsta, aurum fulminans curatum & eius generis plura præstent in medicina. Non enim videtur dubium, corpus, tametsi sit ad ignem fixum, solui tamen & discerpi quadantenus posse, præsertim a liquore soluente congruo. Cum autem liquor saliuæ microcosmicus, vtut insipidus efficacissimum menstruum sit, pro intime extrahendis non tantum animalium & vegetabilium partibus, verum etiam ex mineralibus dissoluat quasdam minutias, vt id patet in assumptione vitri antimonii, mercurii diaphoretici vel dulcis; rationi itaque non inconueniens & absonum est, sulphur nostrum minerale fixatum ab eodem liquore quadantenus extrahi, dissolui, & particulas illas sulphureas actiuissimas postea per totam corporis sphaeram dispensari atque deduci. Videtur etiam huius asserti ratio exinde probabilis, quoniam nostrum remedium in ore ad tempus detentum, metallicum & leuiter constringentem saporem relinquit, luculento indicio, quasdam partes ab ipso mediante saliuâ dissolui.

24. OPERANDI huius remedii ratio, potissimum mihi videtur consistere non tam principaliter & primario in mate-

(*Hoffm. Opusc. varii argumenti.*)

Q q q


riæ

riæ morbificæ correctione & alteratione, sed potius in motuum vitalium sanguinis, & secretiorum, qui depurationi humorum inferuiunt, promotione, & quidem tonum fibrarum neruearum ac musculosarum roborando agunt, leuiterque constringendo. Vnde tono partium relaxatarum adaucto contenti humores ad circulationem promptiorem non tantum inuitantur, sed & per arctiores vias dum transpirantur, maiorem fluxilitatem subtilitatemque nanciscuntur. Accedit, quod intensiori facto circulo sanguinis excretio etiam partium heterogenearum ac impuritatum longe liberior atque liberalior euadat, & per consequens maior puritas ac benignitas sanguini concilietur. Cum autem cutis vniuersale & optimum sit euacuatorium, quo particulæ agilissimæ, salino-sulphureæ vaporosæ ad corruptionem pronissimæ sequestrantur ac separantur, vnde diaphoretica & quidem talia quæ salua sua textura neque immutata efficacia, quod expectandum a mineralibus, iure meritoque optima securissima, & magnis morbis sanandis aptissima sunt remedia.

25. POSTREMO loco adiiciendum etiam aliquid est circa singularem illum effectum, quem sulphur nostrum in nonnullis subiectis exserit, dum per aliquot dies stata hora sudorem continuat. Adscribendum hoc esse existimo operationi medicamenti, quod effectum suum id est sanguinis ac humorum commotionem per longum tempus continuat, quoniam ex regno minerali desumptum propter soliditatem & plane non destructibilem vel alterabilem partium suarum naturam, non facile in effectum suo suspendi & impediri potest. Quod autem stata hora sudor profluxerit, hæc dici potest causa, quoniam de die corpus non sufficienter tegitur, deinde etiam onere alimentorum humores pressi non tam promte circumuolui, neque secretio nec excretio excrementorum libere peragi potest; circa tempus autem matutinum, concoctione peracta & humoribus redditis fluxilioribus, medicamentosæ particulæ adhuc in corpore restiles vi, quæ mo-
uens

vens est, fibras partium solidarum motrices, ceu ordinarium organon ad motus armant, & humores fluxiliores reddendo ad cutis euacuatorium pro excrementitii humoris secretionem liberaliter deducunt.

26. CIRCA nostri remedii vsum & applicandi modum, paucissima adhuc veniunt monenda; primum efficacia eius deprehenditur longe maior, in corporibus complexionis cholero-sanguineæ, nec non tenerioris & sensibilibioris texturæ, quoniam ad mobilitatem & fluxibilitatem magis sunt disposita, hinc tali in casu energiam præsentiozem exhibere potest. Hoc ipso tamen non negamus, eius efficaciam in illis morbis, vbi humorum tenacitas segnis ac tardus motus est, tunc enim maiori & reiterata dosi opus est. In genere autem obseruandum, omnia illa, quæ quantitatem nimiam humorum ad conuenientem proportionem deducunt, & fluxilitatem humoribus adferunt, non negligenda simul esse; impossibile enim est, vt vnum remedium omnibus & diuersissimis indicationibus solum satisfaciat, & ex æquo vbique respondeat. Hæc itaque pro tempore de efficacia huius remedii præstantissimi dixisse sufficiant.



DISSERTATIO X.
DE
SPECIFICIS ANTISPAS-
MODICIS.

§. I.

PERELEGANS dictum est ipsius HIPPOCRATIS *Libr. de Art.* §. 13. *quorum instrumentorum, siue naturæ, siue artium facultatem obtinemus, per ea, sane opifices esse possumus, per alia vero minime licet; quum igitur homo a morbo afficitur, qui vehementior est, quam medicinæ instrumenta, ne sperare quidem oportet, ut a medicina exsuperetur.* Ingeniose diuus vir medicamenta adpellat instrumenta. Nam sicut artifex sine instrumentis nihil valet agere, ita medicus sine præstantibus remediis, nihil solidi præstare poterit in medendo. Indigitat quoque porro hoc dicto, proportionem esse debere inter morbi causam, & inter medicinæ instrumenta, adeo, ut si morbus valentior sit ipsis instrumentis, quæ debiliora neque sufficientia tollendæ causæ, morbus non sanetur. Quapropter utique opus est, ut medicus, non secus ac artifex, possideat instrumenta præstantissima, eaque bene præparata, quorum virtutem, facultatem probe perspectam cognitamque habeat, eorum applicationem ac administrationem calleat, hisce si destitutus est, omni suo fine ad scopo frustrabitur. Notum vero est, ad tres maxime classes omnis generis remedia referri posse, ad euacuantia nempe, alterantia & specifica, nam quoniam tota medicina est mechanica, h. e. innititur principiis physico mechanicis, quæ sunt materia & motus, & quia nulla causa morbifica ex alio fonte, quam materiæ & motus vitio, potest deriuari; hinc liquido fluit, omnem virtutem remediorum, quæcunque etiam sint, vel materiam, vel motum, respicere debere. Res clara est de alteranti-

rantibus, quæ materiæ qualitatem variet modificant, temperant, disponunt, mixtionem, texturam, crasin immutant aliamque reddunt, ut ex maligna & inimica fiat blanda ac benigna, ex immobili mobilis, ex crassa fluxilis, ad circulationem, nec non secretionem, vel euacuationem, idonea. Clara quoque & omnis dubitationis expers res est de euacuantibus. Cum enim euacuatio consistat in motu, hinc quæ movent, siue motus vehementes in partibus solidis fluidisque concitant, simul euacuatorium effectum præstant. De specificis vero non adeo res liquet, quo sensu hæc accipi debeant, quamque virtutem agendi vel operandi habeant, in eo vero maxime conueniunt, quod per specifica intelligantur eiusmodi remedia, quæ nec alterando, nec euacuando, præstant magnos effectus in certis morborum speciebus, eos vel tollendo in totum, vel mitigando. De horum virtute modoque agendi communis quidem est sententia, quod lateat, quod occulta sit, nec explicari possit; nobis autem iam animus est euincere, quod motus nimios effrænes in morbis sistant, sedent, componant, siue quod sedatiua & antispasmodica virtute gaudeant.

2. QVONIAM scopus noster est, ea, quæ specificorum titulo superbiunt, perspicue explicare: quod eorum energia tantummodo versetur in certorum motuum, qui sunt in partibus solidis, morbosorum placatione, cohibitione, siue vi antispasmodica, primo omnium nobis opus erit, ex naturæ regnis famosissima specifica recensere, i. e. talia remedia, quæ magnum, certum & exquisitissimum effectum in certa morbi specie præstant. Fundamentum cui nostram assertionem superstruimus, est ipsa experientia, non imaginaria non fortuita, vel cœca, sed certa, constans & fida. Et ut initium faciamus a vegetabilibus, certe ibi reperiuntur magnæ virtutis remedia, quæ specificè & peculiariter in certis morbis profunt, quod ab aliis expectari non potest, ita v. g. mentha & ex ea paratum purissimum, sine additione

& adulteratione, oleum, est desideratissima medicina externe in dolore colico, tumore & dolore mammarum, a lacte coagulato, sola inunctione administratum, interne vero, hoc oleum vel in essentiam redactum, vel aqua eius in singultu, vomitu, diarrhoea, in omnibus hæmorrhagiis certissimæ efficacæ medicina est; unde eius vsum frequentissimum ac vires mirifice in praxi commendo imo noui exempla, vbi aliquot guttulæ olei, cum puluere absorbente datæ, tussim conuulsivam stomachalem, & asthma eiusdem naturæ, breui cum admiratione sustulerunt. Temporibus oleum eius adplicatum somnum inducit, cephalalgiam tollendo, diarrhoeam externe ventri inunctum certissime sedat. Porro ex vegetabilium familia splendet inter specifica & peculiaris efficacæ medicamina chamomilla vulgaris, & ex ea paratum oleum sapphirini coloris, quale debet esse non adulteratum, quod in doloribus colicis & post partum, in cardialgia quoque est præsentissimum. Herba basilici eiusque oleum purum, in hemi-crania, epilepsia, inque omnibus ferme capitis affectibus, qui ex spasmodis & contractionibus nervosi generis proueniunt, singulariter se exhibent. Oleum lauendulæ, vel spicæ, saluæque, in paralyfi, quæ fit a spasmodis, rheumatismis, sive dolore artuum lancinatorio, tremore, vertigine, exterius specificè sese exserunt. Origani oleum in dolore dentium prædicatur, sed de oleo saluæ, menthæ & basilici similiter respondet experientia.

3. Si vllum in classem hystericorum reponi meretur quod spasmos intestinorum & nervosarum partium placat, sedat ac sistit, dolores colicos mulcet, certe est horminum, eiusque aqua vel decoctum, interius sumtum, aut per clysteres applicatum. Aqua ranunculi esculenti, siue tragoni, est in asthma sicco & conuulsivo metallico certissimæ efficacæ remedium. Hyssopi oleum & aqua quid præstet in pectoralibus affectibus, in vulgus notum est. Radix valerianæ syluestris, a FABIO COLVMNA tantopere celebratur, vt eam semel aut bis exhibitam, ab epilepsia liberare affirmer, refertque, se hanc mul-

multis amicis dono dedisse, qui deinde, diuino prius numine & fauore glorificato, puluere huius radice sibi restitutam sanitatem affirmarunt. Dosis autem est cochleare semis cum vino, aqua, lacte, aut quouis liquore appropriato. Pueris vero in minori dosi cum lacte datur, vid. RIVERIUS *in prax. med.* p. 30. Radix cynosbati in morfu lupi rabidi & canis summam præstitit efficaciam, & sequens puluis magnopere commendatur: Recipe pulueris radice cynosbati odorati vnciam vnam, vngular. lync. vnciam semis M. F. puluis detur ad drachnam semis. Anno MDCXXX. in Eislefeldensi pago Ruhmsprung, die XXIV. Mart. a lupo rabido ultra triginta homines læsi fuerunt, ex quibus X. ad minimum mortui, reliqui per hunc puluerem euaserunt, sicuti ex communicatione ibi Practici D. RICHTERI habeo.

4. ROSÆ, earum aqua, spiritus & oleum, in capitis dolore & delirio compescendo, egregiam possident virtutem. Foeniculum eiusque oleum purum in tussi catarrhali, tam inveterata quam stomachali vel pectorali, idiopathica, vel consensuali, præualet oleo anisi & præsentaneos reddit effectus. Flores sambuci & ex iis parata aqua, in affectibus exanthematicis, erysipellate omnique interno grauiori dolore, inflammatione, magna præstant, quod etiam in doloribus & tractionibus podagricis vagis egregie se gerit, simulque aluum blande subducit, nisi fuerit spirituosa. Corticis & florum sambuci efficacia, quam præstat externe in erysipellate discutienda, in vulgus notum est. Croci virtus in infarctibus pectoris resoluendis, in lenienda tussi & torminibus infantum solandis, obscura esse nequit.

5. PAPAVERACEA, siue flores, siue semen, siue resinam consideremus, tam intus, quam extus instar incantamenti dolores sopire, somnum accersere, excretionem nimias iistere, expeditissimum est. Flores illæ, primulæ veris, liliorum alborum, conuallium, iasmini, aurantium, in omnibus affectibus capitis, conuulsionibus, epilepsia, & quibuscunque spasmodicis internis motitationibus, non sine fructu sese gerunt.

Tota

Tota pœonia, tam quoad semen, quam radices & folia, in epilepticis insultibus compescendis egregia est; in cuius rei testimonium ad puluerem Marchionis prouocamus & specificum MICHAELIS, cuius virtus, maxime simplici huic & cinna-
bari est adscribenda. Nam calces & magisteria, quæ ingre-
diuntur, plane effœta sunt, & nullius efficaciam. Hyosciami
semen, nec non cynoglossa in impetu sanguinis cohibendo! &
hæmoptysi sananda, nulli sunt secunda, exemplo sunt pilulæ
de cynoglossa, quæ in hoc morbo sunt instar omnium. Ly-
copodii semen in vrinæ suppressione, quæ fit ex dolore & spas-
mo, in epilepsia, dysenteria magnifice æstimatum fuit a D.
MICHAELIS aliisque, qua de re legi meretur, B. HOFFMANNVS
in Clau. Pharmaceut. Schröderiam. Anthera liliorum albo-
rum in partu difficili, quem remorantur spasmi potentes & va-
gabundi abdominis, non sine ratione commendatur. Baccas
paridis, herbam melissæ, artemisiæ, in substantia nouimus in
affectu maniaco, ceu arcanum cum magno successu fuisse ex-
hibita. Nos vnum adiiciemus, quod in illustri quadam fa-
milia Monspeliensi, pro secreto gentilitio & hæreditario ha-
betur, illiusque descriptio talis est: recipe foliorum melissæ
manipulum vnum, incidantur minutim & infundantur in spi-
ritus vini vncias quatuor; deinde adde margaritarum præpa-
ratarum drachmam semis. M. dosis est cochlear. 2. RIVER. p. 56.
Nucista largitur oleum duplex, vnum æthereum per destilla-
tionem, & alterum expressum, paulo crassius, vtrumque in
dolorum ac fluxuum ferocia sistenda placidoque somno con-
ciliando, infallibilem exserit virtutem.

6. RECENSITIS iam plurimis ex vegetabilium regno, præ-
sidiis, quæ specificorum titulum merentur, progredimur nunc
ad animalia & ex iis quoque depromere, quæ specificè certis
morbis subueniunt, apud animum constituimus. In vniuer-
sum autem hic notari velim, quod omnes partes animantium
duriores, v. g. ungulæ, cornua, ossa, in substantia & puluere
sumtæ, virtutem habeant antepilepticam & antispasmodicam,
in cuius rei confirmationem ac testimonium aduocamus ex-
peri-

perientiam & auctoritates v. g. Alcis vngula, quod specifica virtute celebretur aduersus epilepsiam, noto notius est, neque hic attendendum est, ad vngulam maris, nec adultam ætatem, vel tempus, quo in venerem hæc animalia feruntur, nec ad vngulam dextram posteriorem, quamuis non negandum sit, quod animalium partes tunc temporis, quo vegetiora sunt, quo maiori continuo motu fluidorum & spirituaſcentia gaudent & sulphur copiosius & actiuius possident, eo efficaciores esse ad medicum vsum. Verum enim vero, hic antepilepticus effectus non tantum valet de vngulis alcis, sed & de cornubus aliisque. Vngulam asini, alcis in epilepsia esse vicariam, scribit SCHROEDERVS p. 146. De bouis & equi vngula idem sperandus effectus.

7. CORNU bouis ad epilepsiam idem SHROEDERVS commendat & scribit, quod viderit scobem eius exhibitam fuisse contra epilepsiam cum effectū, & p. 272. hæc habet: *cornua & vngulæ bubulæ medentur spasmis*: de eboris dente idem perhibet p. 287. quod tollat epilepsiam, arceat melancholiam & resistat venenis. De crânio humano & osse triquetro temporum, quod peculiare in epilepsia specificum sit, vulgo perhibetur. Rhinocerotis cornu, lapis manati, dens hippopotami, ad dysenteriam, ad spasmus, de quo subministramus locum ex THEODORI TABERNÆMONTANI *Wasserschaz* p. 121. mirifice commendantur. Ego puto, quod non tantum horum animalium duræ allegatæ partes hac virtute antepileptica celebrentur, sed quod in vniuersum omnes dentes, cornua & vngulæ, rasuræ, in subtilissimum pollinem redactæ, antispasmodicam & antepilepticam virtutem habeant, inque iis morbis, vbi spasmus tragoediam ludunt, vel causam morbi subministrant, virtute donata sint eximia; & hoc ipsum non modo verum existimat de duris & osseis partibus, sed etiam de eorum sanguine, visceribus, corde, hepate, intestinis, carne exsiccatis, adeo vt non magno selectu hic opus sit, sed ferme promiscue & indistincte, ficcata quædam pars ex animalibus desumpta, egregie & specificè opituletur epilepticis, conuulsi-

(*Hoffm. Opusc. variis argumenti.*)

Rrr

vis

vis & spasmodicis pathematibus, & magnos effectus in mendo exferat.

8. NIHILOMINVS quædam ex autoribus probatis, qui collegerunt specificorum classem ex animantibus desuntam, tradere necessum est, vt asserti nostri veritas confirmari & res explicari possit. Aper dentem largitur, qui in substantia & philosophice præparatus, aut melius in decocto, in pleuritide & cynanche mirifice a practicis æstimatur. In sanguine asinino, singulare latitat arcanum contra maniam, de quo scribit B. HOFFMANN. *in clauæ*: hoc solo B. MICHAELIS in aula Altenburgensi maniacum restituit, eumque non semel maniacis applicauit summa cum euphoria. Secatur scilicet vena ad aures, intinguntur lintea & exsiccantur, deinde extrahitur cruor cum aqua florum hyperici & propinatur, egregie mouet sudorem. Axungia ex animantibus, v. g. muris alpini, apri, ex ungulis bouis, vrsi, cerui, taxi, humana, castorei, in leniendis omnibus doloribus, in luxationibus articulorum, dolore pleuritico, colico, stranguria, tenesmo, contracturis, ariduris, externa illinitione, virtutem mirabilem exserunt, dum cicatricum duritiem leniunt, callositates resoluunt, & foveas post variolas relictas delent. Sanguis ex nonnullis animalibus v. g. bouinus, hircinus, ceruinus, humanus, leporinus exsiccatus in dysenteria, dolore pleuritico, epilepsia, in dolore ex calculo egregiam efficaciam exhibet.

9. FEL catelli lactantis ab VNZERO hisce verbis prædicatur: *sume catellum paruum, nigrum, adhuc sugentem, (pro femella vero epileptica sume catellam) eumque strangula & interfice. Ex interfecti & per sectionem aperti corpore extrahere totam cystim felleam, vix 3. vel 4. guttas sinceræ bilis in se habentem. Illum biliosum succum omnem puerulo, in paroxysmo epileptico cum pauxillo aquæ florum tilie propina, & miraculi instar videbis illum ab hoc morbo & vestigio sanari ac curari.* Vid. RIVER. *prax. medic. pag. 33.* In Finlandia, vbi datur vrsorum copia, vulgatum rusticorum est, fel exsiccatum instar panaceæ exhibere, vdoreque superueniente, morbos quam plurimos

rimos solutos] audiui. vid. SCHROEDERVS p. 312. Cæterum, hanc ferme peculiarem habent virtutem fellis species v. g. anguillæ, leporis, viperarum, carpionis, ranarum, suilli, quod, vel in substantia, vel etiam soluta in spiritu vini, in aurium & oculorum adfectibus, tinnitu, surditate, vlceribus non sine fructu vsurpentur. Pulvis testium equi ad secundinas pellendas, foetumque mortuum expellendum, ceu magnificæ famæ remedium commendatur, vnde HENRICVS ab HEER *L. I. obseru.* cuidam foeminæ difficultate partus laboranti, puluerem testium equi cum croco propinauit, & dimidio quadrante citius, puerum enixa est. Decoctum rasuræ cornu cerui, dentis hippopotami, vnicornu marini, priapi ceruini, in dysentericorum spasmis & torminibus leniendis sopiendisque non sine magno fructu propinatur.

10. DEINCEPS, celebris est pulvis secundinæ humanæ ad epilepsiam, ad expellendum foetum mortuum. In moscho præsentissima virtus antepileptica latet, & ab eo quoque mutuatur efficaciam suam pulvis de Gutetta in Gallia famigeratissimus, quem describit RIVERIUS p. 52. & hic est: recipe radicis pœoniæ, seminis eiusdem, dictamni albi, visci querni ana vnciam semis, seminis atriplicis, drachmas duas, craniū humani drachmas tres, coralliorum rubrorum præparatorum, hyacinthorum præparatorum, ana drachmam vnam semis, vngulæ alcis præparatæ vnciam semis, moschi scrupulum vnum, foliorum auri drachmam vnam. Misce fiat pulvis. Sanguis porcellorum, cum cancris destillatus, in tabe & atrophia curanda remedium eximiæ virtutis & efficacix existit. Zibethum in torminibus colicis, ventris dolore infantum, etiam in vteri strangulatu, vuluæ applicatum, inque virili impotentia membro inunctum præstantis virtutis remedium est.

11. QVANTA sit vtilitas, præsertim ad passionem hysteri-
cam tollendam, item ad strangulatum & spasmos horrendos
ex vtero sistendos, castorei, & ex eo paratorum medicami-
num, mulierculis non est ignotum, adeo, vt vsum eius re-
medii mox grauissima spasmodica pathemata, in quocunque

etiam morbo præsentia, remittere soleant. Axungia eius peculiariter quoque conuenit neruoso generi ac vtero, ideo morbo comitiali, membris resolutis conuulsiuis, apoplexiæ prodest. Pulmones ouis, vituli recentis, vel etiam viua columba vel gallina dissectæ, capiti impositæ, in cephalalgia, phrenitide & melancholia egregiam virtutem produnt. Aqua ex pica & hirundinibus destillata cum vino, non sine singulari fructu maniacis & epilepticis propinatur. Anguillæ fel ad partum facilitandum commendatur a pluribus. Cinis cancrorum aduersus morsum canis rabidi vulgo extollitur, item in abortu arcendo. *Nos in concepto fœtu retinendo, inquit POTHERIVS, eius usum pluries experti sumus. Mulier cuiusdam phrygii, septies abortum passa, hocce puluere ad duos menses accepto, partum ad finem feliciter tulit. Quos viuos, ut ranas, in olla vitreata, post panis extractionem, siccamus. De puluere ad libitum sumitur in cibis, sero & mane.* Funambulus quidam pro singulari arcano habuit puluerem sciuri in vertigine, quem pretio & precibus vix ab eo extorquere potuit D. D. MICHAELIS vid. FRIDER. HOFFMANN. p. 280. Pellis cygni colicos iuuat & stomachi vitio laborantes. Stercus pauonis in epilepsia & vertigine exhibetur, a nouilunio vsque ad plenilunium, cum saccharo mixtum. De quo etiam legi potest BORELLVS *Cent. III. p. 119.*

12. LVMBRICI terrestres in substantia specificè profunt in arthritide scorbutica, quam vagam appellant, (die lauffende Gicht, die Bahren) adhiberi possunt intus & extus. Intus exhibentur vel toti conquassati, recenterque, cum vino traiectione per linteam, vel siccati & puluerisati: extus applicantur viui & mortui, viui impositi, donec moriantur, mortui in cataplasmatibus forma adhibentur, podagricos dolores lenit pulvis cum farina calide impositus. Viperarum & serpentum carnem, hepar, cor, in puluere, item illorum axungiam contra viperarum & serpentum morsum specificam antidotum esse & incomparabilem præstare efficaciam certissimæ experientiæ est. Eodem modo puluis scorpionum & eius oleum, inter-

terne & externe, contra morsum suæ speciei, & pars ex cane rabido sumta & exsiccata, interne & externe, contra morsum similis canis, si tempestiue vsurpetur, quod infallibilem virtutem producit, indubitata confirmat experientia. Cæterum viperarum caro, earum fel, spina, hepar, in dysenteria maligna, in arthritide vaga, in maligna & leprosa scabie, peculiarem quoque energiam ostendunt. Vltterius pulvis lapidis manati, ad sanguinis ad eructationem spectantis cohibitionem, vt hæmoptycum fluxum, vtilissime adhibetur. Dentem hippopotami ad omnes hæmorrhagias eodem scopo B. MICHAELIS in *Not. ad ideam Med. Pract.* IONSTONII commendat, & notat WORMIUS in *Museo* & PATER BOEHM, quod Goæ dens valde efficax, qualis fuit hippopotami, asseruetur in nosocomio regio, cuius vim si monstrare cuipiam velis, venæ sectæ eundem admouent, quo ipso illa statim fluere desinat.

13. CORNU rhinocerotis in omnibus affectibus spasmodicis, dolore pleuritico, hæmorrhagiis, in substantia non sine effectu datur, & similem ferme cum dente hippopotami, vnicornu marino, & lapide manati exhibet virtutem. Pulvis intestinorum lupi ad compescendos dolores colicos datur non sine fructu. Leporis oculi exsiccati valent ad partum difficilem, ad secundinas & molam propellendam, leporis cor quartanæ peculiariter medetur secundum HORSTIVM, secatur in tres partes, & præmissis vniuersalibus, initio trium paroxysmorum, tertia pars singulis vicibus propinatur, vid. SCHROEDERVS pag. 300. Pellis leporina in affectu ischiadico & arthritico egregie celebratur. Officulum tale commendatur ad colicam partusque difficultatem, fel est otalgicum & ophthalmicum, renes testiculis & calculosis prosunt, & mictionem inuoluntariam corrigunt. Humor crySTALLINUS ceruorum exsiccatus soluitur instar tragacanthæ in aqua rosarum, hæc in omnibus oculorum vitiis, fluxionibus, inflammationibus, quæ a fero acri, vel dolore proueniunt, pluribus opem tulit præsentissimam. De decocto rasuræ cornu cerui hoc loco non prætermittendum est, quod eius vsus maxime

congruus sit omnibus infantum morbis, vbi spasmus, dolor & calor præternaturalis sese exserit, id quod experientia certa ac constanti confirmo.

14. ALLEGAVIMVS hic ingentem specificorum numerum, quorum virtus certe non est de nihilo. Nam profecto experientiam vulgi, tot hominum & per tot tempora ratione certi remedii non temere reiicere debet medicus, vt vt ignorato operandi modo. Commendamus itaque dicta attentiori obseruantia & experientia; nobis vero in præsentiarum opus est demonstrare, quod illa effectum exserant dictis in morbis tollendo spasmos, circa quod necessarium ducò exponere quid sit spasmus, & quid per illum intelligatur. COE- LIVS AVRELIANVS *Lib. III. cap. 6.* ita definit spasmum: *Spasmus est inuoluntaria tensio atque conductio partis cum vehementia & dolore acuto, ob structuræ violentiam cum dura distensione.* Et certissimum quoque, quod in omni spasmo fibræ musculosæ cum ipsis membranis non distendantur & elongentur, sed constringantur, comprimantur, & arctiores euadant. Spasmi nempe subiectum sunt præcipue fibræ musculares & membranæ quoque nerueæ, & versatur maxime circa motum eiusque incrementum: notum enim est, regulariter secundum naturam fibras musculosas filamentaque neruea esse instrumentum omnis motus atque impulsus, nec non omnis sensus in corpore nostro, vnde nulla actio fit in œconomia animali, quæ non mediantibus hisce partibus absoluitur. Et quandocunque huius instrumenti, nempe fibrarum ac nervorum motus, actio, vel secundum aliquos, tonus recte sese habet, i. e. debita in eis fit strictio & dilatatio, tunc circulatio sanguinis & tota œconomia motuum, nec non secretionis & excretionis negotium, item animæ operationes rite munere suo funguntur, & secundum regulam fiunt, & sic præsens adest sanitas: ex aduerso, quando fibrarum & nervorum actio, motus & tonus vitiatum est, quod vitium consistit, vel in nimia earum distensione, vel relaxatione, vel in nimia constrictione, siue spasmo, tunc morbus vel dispositio
ad

ad eum in procinctu est. Nam omnes fere interni morbi, sublato huius motus æquilibrio, causam suam agnoscunt & pro diuersitate partium, in quibus hi motus fiunt, varii effectus morborum nascuntur, variumque accipiunt nomen: principaliter vero causam constituit illorum motus auctus, nimirum actiuus, qui vocari solet spasmus. A qua ille motus celebretur causa, & an hæc sit substantia immaterialis, notitia & ratione prædita, & an hæc propter certum finem & ex morali consideratione, ad auertendum grauius malum, tales motus suscipiat, siue an sit materialis indolis substantia, & tantum virtute motus alioque physico actu suam operationem efficiat, & quomodo id in fibrarum structura præstet, studio hæc indaganda prætermittimus, ceu obscura, incognita, determinatione & inquisitione difficilia, nullius vsus & ad medendi scopum directe non pertinentia; sed potius cuius hac in re suas speculationes & delectationes in ipsis relinquimus. Hoc autem non poterit negari, neque dissensio reperitur, fieri tales spasmodicos contractorios motus in fibris corporis nostri a causa externa duplici, vel immateriali vel materiali. Quod primum attinet, euincunt id animi affectus. Nam nulla grauior animi passio est, quæ non sese exferat in corpore per spasmos, & inde dependentes irregulares motus variaque symptomata; vel proficiscitur a causa materiali. Hæc rursus duplici ratione, vel in quantitate considerata, siue mole, vel in qualitate versatur; vnde obseruatio practica & medica docet, vehementes & morbosas generis neruosi & fibrosi contractiones, non tantum fieri a sanguinis stagnantis in certis partibus copia, infarctu, earumque distensione, sed & ab acrimonia vellicante, scindente & caustico materiæ morbificæ elemento eos suscitari, vti ad oculum venenorum effectus, animantium morsus & multorum medicaminum, v. g. euacuantium effectus, testantur. Præterea, aliæ causæ externæ fibras nerveas musculosasque vellicantes, vti sunt calculi, festucae, globuli, lumbricorum morificationes, causam præbent hisce motibus contractoriis dolorificis.

15. CONSIDERATA iam in genere essentia spasmi, videbimus iam, in quibusnam morbis maxime ludat suam tragoediam, ut deinde melius pateat asserti nostri veritas, quod superius allegata in morbis, qui ex spasmo proueniunt, efficaciam suam exserant. Primo, vniuersalis medicorum est consensus, epilepsiam esse spasnum totius corporis vniuersalem, vbi non modo systema neruosum, sed & fibrosum fortiter contrahitur. Testantur id contractiones digitorum & pollicis, agitationes, iactationes & circumgyrationes corporis intensæ, oculorum contorsiones, anxietates præcordiorum constrictoriæ cum cordis palpitatione vehementes, compressio faucium & asperæ arteriæ, vnde spuma, contractio intestinorum, vnde borborygmi, flatulentia, alui constrictio contumax, nascuntur. Porro, ad spasmos referimus omnes grauiores dolores, quales sunt in passione iliaca, colica, calculosa, siue calculus sit in vretheribus, siue in vesica, siue in ductu choledochi, cephalalgia, otalgia, odontalgia, & podagra. Confirmant id symptomata, quæ hos dolores sequuntur, violentæ tractiones partium dolore affectarum, & subsequentes, maxime in artubus, incuruationes, cum stupore; euincunt id stases & repressiones, vel etiam expressiones sanguinis, vnde dolor horripilationem & frigus, vel etiam calorem partibus inducit, ob liberum circulum, propter spasnum fibrarum & compressionem vasorum, suppressum. Deinceps, ad spasmodicos & conuulsivos motus referri quoque debent, v. g. incubus, tussis conuulsiva, asthma conuulsium, singultus, palpitatio cordis, vomitus, tormina in dysenteria, alui contumacissima adstrictio, vrinæ & sudoris suppressio, tetanus, spasmus cynicus, priapismus, qui ex violenta tractione & motus intensione fibrarum proueniunt.

16. SPASMIS quoque accensendæ sunt hæmorrhagiæ: nulla enim magna hæmorrhagia interna nascitur, nisi præcedant spasmi, præsertim in primis viis, mesenterio & abdomine. Spasmi enim, sunt causa inæqualitatis sanguinis circuli: dum enim præcluduntur & constringuntur viæ ac tubuli, & impeditur

ditur is motus, sanguis cum impetu fertur ad alias partes, ubi facta distensione, vasa disrumpit; ideo, qui hæmorrhagias, curare vult spasmos prius tollat necesse est, hinc antispasmodica optima aduersus hæmorrhagias sunt præsidia. Denique pathemata, quæ in hysteriis, hypochondriacis, & ubi hæmorrhoides suppressæ, concurrunt, non nisi spasmi adscribi solent; item abortus, non nisi in vteri spasmi, & partus difficilis causa, in spasmodorum vehementia quærenda est. In intermittentium paroxysmis, præsertim sub frigore & horrore, spasmodicæ contractiones manifestissime visuntur: stricture enim pororum cutis, horripilatio, rigor, frigus, dolor contusius pedum, inflatio abdominis cum alui adstrictione, nausea cum dispositione vomitus ad lumborum dolor, præcordiorum anxietas, nil nisi mere spasmi effecta sunt. Venenati animantium morsus & ictus, ipsaque caustica ex regno minerali depromta, non alia ratione infensissima corpori sunt, quam spasmodorum, quos producant, violentia & copia ideoque subito interficiunt.

17. DIXIMVS specifica esse antispasmodica, iam ex præcedentibus facillime colligitur, quare ea, quæ recensuimus tam ex vegetabili, quam animali regno, in morbis ubi spasmi omne ferunt punctum, præsentissimum solamen afferant, & eam ob causam nominatim in dolore arthritico, colica, epilepsia, diarrhoea, dysenteria, mania, passione hysterica, hæmorrhagiis, partu difficili, abortu præcauendo, conuulsiua tussi, contracturis, moribus animantium venenatis conueniant. Iam res ipsa & ordo postulat, ut quo principio agendi instructa sint, & operationem suam exsequantur dicta specifica, videamus. Dicimus vero medicamentorum virtutes dependere principaliter ex duplici actiuo principio; sale nempe & sulphure. Sal est substantia, ex particulis figura acuta & scindente coagmentata, vnde saporem in lingua efficit, inque neruosis partibus vellicatione ac rosione sua sensum doloris excitat, in glandulis vero euacuationes, excre-

(*Hoffm. Opusc. varii argumenti.*)

Sss

tiones

tiones causatur. Non enim dubitari potest, omnis generis euacuantia, vti sunt purgantia, vomitoria, sudorifera, diuretica, salivantia, apophlegmatizantia, aperientia, principaliter ex salino principio operari. Longe vero a sale distat sulphuris textura ac crasis. Quemadmodum enim salis particulae figuratae sunt & facillime dissoluntur, discerpuntur, ita sulphur compositum est ex partibus magis inter se implicatis, intricatis, arctius unitis, acrimoniae expertibus, propter quam intricatam & implicatam texturam, oleosa & sulphurea aciem salium excipiendo & quasi in vagina recondendo, illa temperant, quo minus nocere possint. Et haec quoque est ratio, quare acidissimi concentrati spiritus, nitri, vel vitrioli, affusi oleis destillatis, acrimoniam suam ferme deponant, ita etiam sulphur, reguli antimonii & argenti viui vim virulentam, penitus, admixtione facta, castrat; & quemadmodum in sale magna est vis solidas partes irritans & rodens; ita in sulphure est principium vim istam sistens, fugans, temperans.

18. EQVIDEM obici potest contra hanc sententiam, quod sulphura intensum calorem in corpore accendant & materiam motus intestini calidi igneique in ipso praebent; vti videmus omnia olea destillata calidissima esse: sed respondeamus, verum id esse de oleis, quae sale volatili subtili pollent, vti olea destillata ex vegetabilibus, item ex animalibus sumpta, quae manifestam propter sal admixtum intimeque coniunctum habent penetrantiam ac volatilitatem, vnde utique talis substantia salina volatilis, cum partibus sulphureis irritata, diutius manet in corpore, nec tam cito auolat per poros, & sic calorem tam intestinum quam progressuum irritatione sua accendit eamque ob causam plus calefacit, olei guttula destillati, quam decem grana puri salis volatilis ab oleo liberati. Hoc ipsum vero non valet de sulphure sibi relicto; vti patet ex omni pinguedine, oleo expresso, axungia ignem non passa, quorum assumpta etiam magna quantitas minime calo-

calorem augent in corpore, sed potius leniendo, demulcendo spicula salina, sistit motum caloris, eundemque deprimit. Latet itaque in sulphure vis motus sedans, sistens adeoque antispasmodica, cum omnis dolor & spasmus ex motus incremento fiant; in sale vero reconditur principium mouens, siue motus excitans, vnde omne sal calefacit, euacuat. Iam vero si consideremus supra recensita specifica, tam ex regno vegetabili, quam animali desumta, & inquiramus in illorum agendi principium materiale, mox sese sistit ac manifestat sulphurea substantia. Nam ex vegetabilibus plerumque olea v. g. menthæ, lauendulæ, spicæ, saluiæ, basilici, chamomillæ, origani, anisi, foeniculi, hyssopi, hormini, tantum exserunt suam efficaciam dictis in morbis propter sulphur vaporosum, quo pollent, & caput & nervos replent. In radice valerianæ, opio, croco, semine hyoscyami, camphora, substantia sulphurea vaporosa ipso odore teste præsens est. Semen lycopodii, anthera liliorum alborum pure sulphuræ indolis sunt, & flatu immixtæ in flammam, ventum cum strepitu igneum exhibent flores vegetabilium, pœoniæ, rosarum, papaueris, liliorum alborum, conuallium, primulæ veris, sambuci, virtutem suam anodynam & specificam exhalantibus subtilioribus sulphureis partibus vnice debent. In animali regno principii sulphurei, benigni, lenis, acrimoniæ expertis, maior datur copia. Nam sine destillatione præuia sanguis & omnium animalium partes, ossa, dentes omni salina acrimonia carent; porro quanta pinguedo & oleositas inexistat animalibus, notissimum; obseruamus enim totos panniculos adiposos; viscera in pinguedine latitant, & nulla pars reperitur, etiam durissima, vti os existit, in cuius poris non copiosa pinguis substantia delitescat. Posset quidem hic opponi, ex animali regno salia volatilia maxima in copia præparari posse, quibus respondemus, quod salia volatilia formaliter non inexistant, sed mediante igne, non ex pinguedine, sed ex substantia terrea, motu igneo, producantur, vnde ratio patet, quare ex

ossibus, terreis corporibus, maior quantitas illorum, quam ex aliis partibus confici possit; item quod non formaliter inexistant, ex eo iudicare licet, quod non ex animantibus præparentur, nisi præuia combustionem, & non in initio destillationis, sed demum in fine prodeant, aperto indicio: minime his formalem assignari posse existentiam; nam sal tale est volatissimum, & sub lenissimo calore euaporat.

19. PORRO salis manifesti expers est regnum animale, & inter excrementa potius, quæ salina sunt, sal referri debet, nam proxime non ingreditur partium, siue fluidarum, siue solidarum, compositionem. Ex dictis iam facile apparebit, cur animalia tantam specificorum largiantur copiam, i. e. remediorum, motus impetuosos conuulsuos, spasmodicos, dolores, nimiasque euacuationes sistentium; quoniam nempe sulphure vaporoso gaudent, ratione cuius hos effectus præstant. Iam vero sulphur custodire talem virtutem ex supra dictis in regno vegetabili constat, quæ omnia ob sulphur euaporabile agunt. Sulphur enim vaporosum est, i. e. multas exhalationes, vapores & effluuia, vigore motus intestini, qui in ipso latitat, emittit; testante id graui, vel etiam suauis odore. Nam ex sententia omnium chymicorum & physicorum affirmatur, quod sal sit principium saporis, sulphur vero odoris. Odor itaque prouenit ex copia effluuiorum, siue exhalationum. Atque hæc etiam abundantissime deprehenduntur in animalibus eorumque partibus exsiccatis, quæ graueolentem & fortem odorem spirant, vt puluis lumbricorum terrestrium, vipera-tum, rasura vngulæ alcis, fel ex animalibus, sanguis eorum exsiccatus & viscera exsiccata id docent. Hæc blandæ exhalationes neruis sese insinuant, & per poros in sanguinem transfuentes, rarefactione sua nimium dilatando fibras musculosas & in meningibus arterias, istum motum systalticum arteriarum & fibrarum impediunt, a qua systole & motus progressius & spasmus pendet. Quod vero opiata agant rarefactione & nimia arteriarum expansione, lati-

us iam deduxi in *dissertatione de opiatorum mechanica operandi ratione.*

20. NVNC selectiora eaque composita remedia contra hos morbos spasmodicos annectere placet, v. g. in epilepsia habituali sequens pulvis valde est proficiuus: recipe rasuræ vngulæ alcis, dentis hippopotami, vnicornu marini, cranii humani, pulveris lumbricorum terrestrium ana drachmas duas, moschi drachmam semis, essentiæ castorei inspissatæ scrupulum vnum. M. F. P. qui vel cum cinnabari mixtus, vel solus vsurpari potest. Ad foetum mortuum & secundinam pellendam: recipe pulveris testiculorum equi, vngulæ alcis, secundinæ humanæ præparatæ ana drachmam, fellicis anguillæ, antheræ liliorum alborum, croci ana grana XII. olei cinamomi guttas quatuor. In morfu viperarum ana drachmam, pinguedinis viperinæ drachmam semis. M. In dolore pleuritico: recipe rasuræ dentis apri, mandibularum lucii piscis, vnicornu marini, oculorum cancri, dentis hippopotami, cinnabaris antimonii ana scrupulum vnum, nitri grana XII. In contracturis externe, recipe axungię humanæ, castorei, vrsi, taxi ana unciam semis, olei maioranæ, saluiæ, lauendulæ ana drachmam. In colico dolore potest addi zibethum. Contra maniam sanguis asininus egregius est. Contra morsum canis rabidi: recipe rasuræ vngulæ lyncis, pulveris viperarum ana drachmas duas, castorei grana XII. In hæmorrhagiis: recipe dentis hippopotami, lapidis manati ana drachmam, nitri drachmam semis. M. In phrenitide, cephalalgia, externe, gallina viua dissecta egregia est. In arthride pulvis viperarum lumbricorum terrestrium cum cinnabari antimonii & nitro egregium effectum præstat.


21. QVOD attinet ad conuenientem vsum & applicationem specificorum, maxime eorum, quæ ex regno animali petita sunt, sequentia monita notari merentur. I. Ex animalibus tutiora sunt & præferendâ iis, quæ in re-

gno vegetabili prostant. Ratio in proclivi est; nam naturæ nostræ conuenientiora sunt, facilius inueniunt ingressum in sanguinem & poris lubentius sese accommodant ideoque magis amica. Aliter vero res habet cum iis, quæ ex aliis regnis profluunt. Hæc enim non tam propinqua sunt nostræ naturæ, sed & heterogenea quædam principia simul custodiunt, qua non bene correspondent mixtioni partium fluidarum, vel spiritibus, siue principio mouendi corporis nostri inimica sunt; vnde v. g. opium ob suum sulphur vaporosum anodynam quidem vim habet, nihilominus hoc spiritibus non quadrat, spasmodica pathemata non tam promte sistuntur, quam a castoreo aliis remediis adpropriatis. II. Notandum est, quod hæc dicta specifica ex animantibus, si pollere eximio usu debent, non nimis esse debeant inueterata, adeoque non diu in puluere seruanda, neque ex inueteratis effoetisque ossibus sumenda sint; ratio in procinctu est, quoniam per fluidum aereum iacturam partis volatilis, qua agunt, ferunt; vnde omnia, quæ recentia sunt, quæ cadauerosum & volatilem spirant odorem, præstantissima. III. Deinde obseruamus, quod illa ex animantibus, quæ principio pollent vaporoso copiosisque exhalationibus, longe celerius & citius, sed etiam magis transitorie operationes suas exsequantur, præ iis, quæ sulphure & oleo magis fixo scatent, hanc ob causam castoreum, zibethum, moschus, ceu odoratissima expeditioris sunt virtutis, præ rasura ungularum, ossium, dentium, cornuum, quanquam horum virtus fit constantior, in agendo tamen tardior. Medio modo se habent ea, quæ ex visceribus exsiccatis harum animantium parentur. IV. Hæc specifica virtutem suam amittunt, quando fuerint vsta, destruitur sic tota crasis, consequenter etiam virtus remedii. Exstat hanc in rem egregius locus apud ANGELVM SALAM, Sect. 1. *Res, quæ in igne tractantur, omnes alterationem subeant, & de naturali sui temperamenti statu quodammodo deiciantur necesse est, ac magis, si vel vehemen-*
tissi-


tiſſimum cum, vel diutius ſuſtinere cogantur, minus ſi remiſſior fuerit moraque, in eo breuior. Nihil quicquam itaque certi de operationibus remedii colligere licet e ſubſtantiis, vi ignis extortis; imo ſæpenumero contingit, ut herbae, quæ vulgo refrigerantes putantur, ut cichorium, lactuca &c. oleum calidum & ſal volatile alcalicum fundant, quod calidis annumeratur. Deinde indubium eſt ac per innumera experimenta euictum, chinam chinæ præſtantiffimum eſſe febrifugum, quod ſi tamen deſtilletur; ſpiritum acidulum cum oleo pauco empyreumatico præbet, exiſtente capite mortuo nigro: hæc vero febricitantibus exhibeantur, ſiue ſola, ſiue inuicem mixta, omni virtute plane ſunt caſſa ac inefficacia. V. Parum hæc ſpecifica faciunt in epilepſia & aliis morbis, qui ſiunt per conſenſum, ſed debet tolli primum cauſa, v. g. in epilepſia, quæ fit ex dentitione difficili, variolis; longe vero maiorem efficaciam exſerunt in affectibus idiopathicis, v. g. epilepſia iuneterata valde conuulſiua, maxime omnium vero efficaciter ſe exhibent in affectibus & ſpasmis conſuetudine quaſi introductis, quæ nihil aliud eſt, quam ſumma facilitas & procliuitas ſpasmoticorum motuum per multiplex exercitium ſæpius repetitum, v. g. in epilepſia aſthmate habituali, & hæmoptyi. VI. Ratione uſus porro monendum eſt, ne iis tantum inhæreamus, ſed ad cauſam morbi reſpiciamus, hinc v. g. ſi ſanguis ſtagnat ex menſium vel hæmorrhoidum ſuppreſſione, item ſi circulus mæſæ ſanguineæ impeditus, in hyſtericis, hypochondriacis cauſam præbet variorum ſpasmoticorum motuum v. g. arthriticorum, ſola non conueniunt, ſed tunc ſimul euacuantia, ſanguinem detrahentia ſubiungenda ſunt: præmiſſis enim euacuantibus, alterantibus, nullum dubium eſt, quin tunc ſuppoſita ſpecifica egregie hiſce affectibus ſubuenire poſſint. VII. Perpendendum & hoc, quod non tam iuuent, quando tantum ex cauſa materiali & eius quantitate, quam potius ex motu, conſuetudine, affectu
ani-

animi & subtilissima materia motum prouocante, prouenit morbus, e. g. ex morfu canis rabidi, viperarum, dysenteriae miasmate, motibus spasmodicis in partu, epilepsia ab ira, terrore, verum etiam, consensuali malo medentur v. g. calculi doloribus, si non constanter perseuerat affectus, nisi principalis causa sublata sit. IIX. Et vltimo monitum hoc inculcari debet iunioribus practicis, ne hisce specificis abutantur, quoniam nonnulla ex iis potenter fluxum sanguinis cohibere & suppressere solent; ideo cauendum est, ne in iis, qui criticas tales euacuationes solennes cum fructu sentiunt, v. g. menses, hæmorrhoides, narium hæmorrhagias, præsertim si natura ad tales diu fuerit adsueta, frequentius & repetita dosi propinent. Facile enim euenire potest, vt in totum talis fluxus suppressi possit; vnde præsertim, si homines fuerint adultiore, ad spasmodicos affectus, vel etiam ad hecticam, cachexiam, hydropem via panditur apertissima.

F I N I S.



INDEX



INDEX RERVM PRÆCIPVARVM.

A.

A Bies ob balsamicum resinofum
succum perpetuo viret 226.
eius turiones in quibus mor-
bis conueniunt ibid.

Abortus uteri spasmus est 505. ple-
thoricis familiaris ibid. par-
tu est periculofior ibid. ab alui
adstrictione & nimia ciborum
ingestione sæpe excitatur 91. or-
dinario circa mensium tempus
acidit 272. & venæsectione præ-
cauetur ibid.

Acidulæ ex principio spirituoso
minerali agunt 195. potissimum
quantitate & copia 174. hinc iis,
quorum ventriculus debilis, no-
cent ibid. aluum ducunt 406.
quibus morbis minus conueniunt
29. & an senibus proficux 255.

Acidum quomodo in ventriculo
generetur 101. ex alimentis in
in massam sanguinis traducitur
129. naturæ est infensum 59.
cum particulis terreis mixtum
in ventriculo austerum fit ibid.
a neotericis pro causa morbo-
rum habetur 102. peccat ple-
rumque in hypochondriacis 100.
capiti nocet si in ventriculo su-
perabundat 101. ad calculum
disponit 100. menses & hæmor-
rhoides intercipit ibid. & hu-
(Hoffm. Opusc. varii argumenti.)

mores coagulat & ad obstructi-
ones disponit 102

• in vino Rhenano an humores
coagulet 166

Acida cur e foro medico proscripta
& a quibus 11. cum particulis
sulphureis mixta aluum ducunt
quod probatur 410. quibus
subiectis in hunc finem adhibita
nocent ibid.

Actiones animales cum sanguinis
circulo harmoniam habent 71

Adeps difficilis in ventriculo solu-
tionis est 51. hinc varia pathe-
mata suscitantur ibid.

Adolescentia vnde dicta 192. eius
terminus ibid. morbis maxime
thoracis obnoxia 198

Aequinoctia magnam in corpore
efficiunt mutationem 196. eo-
rum natura explicatur ibid.

Aer ad vitam est necessarius
73. præcipuum mouens corpo-
ris est 74. quinam & quo tem-
pore optimus ibid. quinam
senibus sit eligendus 248.
purus & temperatus ad sanita-
tem conducit 45. peregrinus
mense Maio & Septembri seni-
bus salutaris 249. impurus quæ-
nam mala concitet 74. aduetos
non facile lædit 69. præhumidus

T t t

& fri-

Index rerum præcipuarum.

- & frigidus tonum fibrarum relaxat & transpirationem impedit 75
- Aestas senibus amica & cur 244
- Aetas mutat temperamenta & actiones 194. & quidem ex necessitate caussarum & harmonia ibid.
- Aether quo magis liquidis inest & potulentis eo salubritate aliis præstant 124
- Agninæ carnes in ventriculo facile solvuntur 48. hinc a Deo concessæ videntur ibid.
- Alaudæ nocturnæ diurnis pinguiores & cur 80
- Alcis ungula in epilepsia prædicatur 497
- Alimenta in tres dispeſcuntur classes 98. ad vitam & sanitatem sunt necessaria 46. differunt ratione indolis ac virtutis 47. per se & absolute nec salubria nec insalubria dicenda 60. ex quo salubritas cognoscenda 99. saluberrima quæ 76. insalubria quæ 88
- Aloe hæmorrhagias iussa dosi exhibitæ sistit 9
- lignum per destillationem oleum ficcum album odoratissimum largitur 355
- Alterantium medicamentorum virtus 493
- Aluina excretio quomodo fiat 394. medicus ad hanc maxime respicere debet ibid. senibus maxime salutaris 247. quibus remediis prouocetur 396. quibus subiectis expeditior 397. senibus sæpe solutior est 237. quæ a tristitia sæpe euenit 243
- - prohibita senibus sæpe familiaris 237. cur 246. quibus remediis prououenda 257. in variolis an restituenda 26. in febribus acutis & exanthematicis 9
- Amor insanus corpus emaciat 44
- Anima an in corpus nostrum habeat potentiam 40
- Animantium corpora sunt hydraulica 239. partes sulphure vaporoso gaudent 508. manifesti facili expertes sunt ibid. hinc specificam suam nanciscuntur virtutem ibid. vim habent analepticam 496. non diu in puluere seruandæ & cur 510
- - morsus venenati qua ratione nocent 505
- Animi adfectus moderati conferunt ad sanitatem 41. quod ex sacra scriptura & medicina probatur ibid. faciunt ad faciliorem morborum curationem 42. omnes spasmo sese exferunt 503. immoderati in plethoricis maxime noxii & cur 97
- Annus sexagesimus tertius cur inultis fatalis 195
- Antimonium ex sulphurea & mercuriali substantia constat 475. sulphur quod inexistat experimentis probatur 476. sed non purum est 479. quomodo a regulo separatur ibid. igni non adeo forti obsecundat ibid. quomodo extrahi possit 476. Et mülleri sulphur præparandi modus 483. mercurialis substantia experimentis elucescit 479. crudum sine noxa est 404
- - cinnabaris quomodo præparatur 476
- - clys-

Index rerum præcipuarum.

- • clyffus sulphuratus aluum ducit 409
- • diaphoreticum quomodo præparetur 478
- • reguli præparandi modus 477. qua ratione maior eius obtineatur copia 479
- • • • scoriarum lixiuum incoctum sal alcalinum sulphureum præbet 481. diaphoresin excitat ibid.
- • sulphur fixatum quomodo præparetur 485. vnde fixitatem suam nanciscatur 488. eius propter fixitatem operandi ratio 498. sudorem mouet per aliquot dies stata hora matutina 486. & cur 490. commendatur in morbis rebellibus & acutis 486. quid circa eorum vsum & applicandi modum tenendum. 491
- • tinctura Grammanni sicca quid sit 484. dosis & vsum ibid.
- • vitrum vino infusum cur emesis excitat 405
- Appetitus prostratio sæpe a tristitia oritur 243
- Apoplexia non semper a plethora oritur 282. senes maxime infestat 336. & adultiores sæpe ab hæmorrhagia narium suppressa 266. non raro ab ira prouenit. 243. qui maxime huic obnoxii 270
- Apri dens in pleuritide & cynanche commendatur 498
- Aqua particulas recondit aereas & æthereas 384. insipida est & cur ibid. interstitia habet diuersæ figuræ ibid. eius potus ventriculorum roborat 179
- • calida quid in infusis præstet 383. quid circa illam notandum 348. & eius vsum 386
- • duræ ac grauis potus fugiendus 108. quænam concitet mala 109
- • pluuiialis genuinum vegetabilium pabulum est 123
- • tepida vomitum concitat 424
- • thermalis liberalius hausta cum leuamine vomitum mouet 425
- • stagnans putrida putridis morbis fauet 109
- Aqua carminatiua Friderici Regis Prussiae quomodo præparetur 135
- Arbores succum vel gummeæ vel resinosa naturæ habent 308. in nostris regionibus gummeam & cur ibid.
- Argenti solutiones aluum mouent 401. eius magisterium ad aluum aperiendam commendatur 402. quibus subiectis conveniat ibid.
- Arietinae carnes facile in ventriculo soluuntur 48. hinc a Deo permissæ videntur ibid.
- Aromata purissimum æthereum oleum per destillationem largiuntur & cur 308
- Arsenici effectus in corpus 425. quomodo compescendus ibid.
- Arthritis a plethora sæpe fouetur 273. non raro leni emetico præcauetur 441. & venæsectione 273
- Asari folia & radices recentes per inferiora & superiora operantur 420
- Asthma infantum a lacte in primis viis acescente sæpe originem ducit 430. leni emetico sæpe tollitur ibid.

Index rerum præcipuarum.

Atrophia in senili ætate vnde 240.
in infantili vnde 91

Avenæ decoctum quomodo præpa-
retur 210. in morbis acutis &
podagra commendatur. ibid.

Augster vuzæ in Hungaria optimæ
118. vnde nomen ibid. colli-
guntur extra maturationis tem-
pns 119. mustum ex his para-
tum ab incolis essenç vocatur ib.

Aures a cerumine purgare conve-
nit 449

Aurum est per se fixissimum & gra-
vissimum 399. solutum & cum
variis salibus commixtum aluum
stimulat 400. ex auro præpara-
ta 400. tutiora sunt liquida
quam sicca & cur ibid.

Auri fulminantis virtus vnde 400.
non sufficienter edulcoratum ma-
gis purgat quam ab omni salino
contagio elotum 401

Ausbruch vinum in Hungaria cre-
scit 116. ex vuīs selectioribus &
quomodo præparatur 116. 119.
dulcedinem suam servat 120. vir-
tutes eius ibid.

Automa vnde motum 39

Axungie in quibus morbis conue-
niunt & quæ 498

B.

Balnea nostris regionibus senibus
minus tuta sunt 252. quando au-
tem conveniant ibid.

Balsamum quid 295. vnde nomen
296. variæ eius acceptiones 297.
cadavera a corruptione defendit
295. quali veteres ad balsaman-
da corpora vfi sunt 297

- de Copaiva 295. duplex est 302.
differt a balsamo Peruviano ibid.

- Locatelli describitur 326

- Hispanicum quomodo præpa-
retur 325

- Peruvianum est naturale 297.
quid sit 307. eius locus natalis
300. ipsius arbor describitur 301.
modus colligendi duplici modo
fit ibid. vel incisione vbi ex ar-
bore effluit album 302. vel co-
ctione vbi nigrum evadit ibid.
hinc album nigro est carius ibid.
differt a balsamo de copaiua ib.
a balsamo de Tolu ibid. sapor
eius acris est & amaricans 303.
odor suavis & fragans ibid.
album in officinis nunquam pu-
rum est & cur 304. nigrum cur
non possit adulterari ibid. expe-
rimenta cum ipso instituta ibid.
acidum ipsi sufficiens deest quod
probat 305. quomodo eius o-
leum obtineri potest 306. quod
duplex largitur 307. ingreditur
balsamum apoplecticum 313.
balsamum pectorale 310. syru-
pum Conerdingii 311. per se
nimis calidum est 100. hinc in
pectoris adfectibus miscetur cum
balsamo Locatelli ibid. com-
mendatur in gonorrhœa 309.
fluore albo 310. in adfectibus
spasmodicis ibid. in lue venerea
& scorbuto 312. in vitiis ventri-
culi & in intestinorum 313. suf-
finigium etiam præbet in coryza
314. eius essentia cum essentia
myrrhæ mixta vulnerarium
præstantissimum præbet 313.
usus eius noxius notatur 314

- sulphuris quomodo præparetur
321. caute phthisicis exhibendum

329

Balsa-

Index rerum precipuarum.

Balsamum sulphuris antimonialis
præparatio 312

- de Tolu locus natalis 302. dif-
fert a balsamo Peruuiano ibid.
eius color & sapor ibid.

Basilici herba in adfectibus capitis
conuenit 494

Bellidis syluestris flores vulnerari-
am possident virtutem 225. et-
iam a Minderero in hydrope
commendantur ibid.

Benzoes flores quomodo confician-
tur 463. sternutatorium habent
vsum 319. cum extracto deco-
cti ligni quaiaci aluum & nares
stimulant 414

Betæ rubræ radices succo subtili ni-
troso & colliquativo scatent 217.
hinc aperiunt & humectant ibid.

Bilis multum ad conseruationem
motus peristaltici confert 396.
eius defectus aluum tardiozem
efficit ibid. per iram effusa &
stagnans ad lentas febres dispo-
nit. 435

Borborygmi a nimia aciditate cibo-
rum sæpe proueniunt 90

Bouis cornu in epilepsia prædicatur
497

Brassica rubra succo scatet nitroso
emolliente & laxante 216. hinc
eius vsus chronicos morbos ar-
cet. ibid.

Brodia senibus commendantur 253

C.

Cachexia a plethora sæpenumero
oritur 274. quomodo tollatur
275

Calculus quomodo generetur 274.
senibus familiaris 241. ex copia

sanguinis. plerumque prouenit
180. 274. senes hinc eo adfecti
vina dulcia fugere debent 180.
venæsectione arcetur 274

Calor in quo consistat 385. quid
efficiat in corpore nostro 267. na-
turalis solis quam maxime seni-
bus conducit 249. immodicus
sanguini blandum humorem suf-
furatur 75

Cacochymia senibus familiaris &
cur 241

Calcinatio philosophica quæ dica-
tur 385

Camphora est vel natua vel facti-
tia 352. eius origo & solum na-
tale 351. a veteribus falso pro
resina habita 352. a recentiori-
bus pro sale volatili oleoso 353.
nos vero pro oleo volatili id
quod etiam experimentis pro-
bamus 353. seq. differt ab aliis
oleis æthereis 356. præ aliis de-
stillatis tenuiores sulphureas in-
flammabiles habet 356. maxi-
mum est discutiens 358. cur ve-
teres interne non præscripserint
359. quid eius evaporationem
impediat 357. prodest in tumo-
ribus & inflammationibus 359.
368. dolores capitis & angustias
an producat 360. an venerem ex-
stinguat 362. conuenit in mor-
bis contagiosis & malignis 362.
in splacelo 363. in peste 366.
in gonorrhœa & lue venerea 367.
in hæmorrhagiis quando febres
malignæ iunctæ 369. in hæmo-
ptysi 370. in flatibus disentiendis
& aliis huius generis symptoma-
tibus 371. in sanguineis excreti-
oni-

Index rerum præcipuarum.

- onibus promouendis 372. in ve-
ficæ adfectibus 373
- Cancrorum lapides acidum prima-
rum viarum absorbent 231. cum
nitro æstum temperant ib. cum
aceto destillato vrinam & sudo-
rem prouocant ibid.**
- succus cum succo semper viui
mixtus in grauioribus capitis do-
loribus prædicatur 231. in phthi-
si cum iusculis nutritivis 231
- Cancrosæ exulcerationes cur seni-
bus familiares 241**
- Cantharides cum camphora mixtæ
in gonorrhœa virulenta com-
mendantur 373. cautelæ circa
vsum ibid.**
- Cantores ad quos morbos dispositi
112**
- Cardialgia vnde natales suos habe-
at 436. infantilis sæpe emetico
tollitur ibid.**
- Carnes animantium nutrientes sæ-
pe nocent 92. præsertim in ma-
lignis & acutis morbis & cur 91.
nimis salitæ senilem sanitatem
destruunt 245.**
- bouinæ facile in ventriculo sol-
vuntur 48
- suillæ maximam cum humana
habent conuenientiam 51. glu-
tinosum habent succum hinc val-
de nutriunt ibid. laboriosis sa-
lutares sunt 77. crebrius com-
mesti ad cacochymiam dispo-
nunt 104. & infirmioribus &
cachecticis nocent 52
- Caseus senibus nocet & cur 247**
- Castoreum in passione hysterica
laudatur 499**
- Catarrhales defluxiones senibus fa-
miliares 237**
- Catarrhus suffocatiuus sæpe scenam
ludit in senibus 237**
- Cellæ ad vina conseruanda quænam
optimæ 160**
- Centaurii minoris essentia & extra-
ctum tutissima alui stimulantia
sunt 414**
- Cepæ sale tenui caustico gaudent.
214. assæ ad tumores emollien-
dos singularem possident virtu-
tem ibid. in infantum vrinæ sup-
pressionem pubi adplicatæ laudan-
tur ibid.**
- Cephalalgia a plethora sæpe oritur.
96. & præsertim a consueta na-
rium hæmorrhagia suppressa 266**
- Cerenisæ quænam optimæ 78. cur
a fulgure & tonitru alterantur
162. vetustiores senibus sunt vi-
tandæ & cur 248. vt & recentio-
res 254. quænam iis conducunt
ibid.**
- Chærefolium in semine consti-
tutum destillatione dat oleum vi-
ridiusculum 346. chærefolium
virtutem possidet diureticam, re-
soluentem & emmenagogam 224.
hinc sanguinem coagulatum re-
soluit 223**
- Chamomilla vulgaris fere similes
cum millefolio recondit vires
343. hinc in variis adfectioni-
bus cum eo coniungitur ibid.
ventriculo amica est ibid. longe
tutius febres quam cortex chi-
næ compescit ibid.**
- Romana largitur sub destillati-
one flauum oleum 346
- Cheiri flores & succus mentes &
foetum mortuum pellunt 225**
- China chinæ destillata suam virtu-
tem amittit febrifugam 511**
- Cho-**

Index rerum præcipuarum.

- Cholera** a dulcibus & fructibus nimium ingestis sæpe oritur 101
Cholerici cur a purgantibus celeriores sentiant effectum 397
Cibi auide excepti multorum morborum causa sunt 89. nimium ingesti sanitati sunt infensi & cur 47. senum præsertim 245. & imbecillum 48. nutrientes in febribus acutis & continuis fugere decet 91
Cicerum decoctum calculum comminuit 211
Cinamomum oleum aurei coloris sub destillatione fundit 346
Circulus sanguinis æquabilis ac liber ad sanitatem est necessarius 80. a plethora redditur difficilis 268. in senibus est tardus 240
Citri acetositatis syrupus æstum sedat 230. eius toleoli pulsibus applicati æstum temperant ibid. cortices cum saccharo contusi & spiritui infusi stomachicum præbent. ibid.
Claret-Wein eius color ac virtus 141
Climacterici anni quid significant 185. eorum synonyma ac varia significatio ibid. veterum de his sententia ibid. quinam sint 186. fundamentum eorum demonstratur 188. 190. non ex numero aut tempore aut astris debet desumi 189. in quibusdam periculosi sunt 192
Cœliaca passio senibus infensa 232. & cur 242
Coffee potus senibus confert 255. eius noxa 290
Colophonium est caput mortuum terebinthinæ 320. destillatum oleum spissum acre & empyreumaticum fundit ibid.
Conerdingiana Panacea quid sit 482. eiusque usus ibid.
Consuetudo quid sit 68. non facile & subito mutanda ibid.
Contracturæ quid in his conducat 509
Cornu cerui rasuræ decoctum in infantum morbis conuenit 501
Coryza senes quam maxime infestat 237. & cur 240. quo sternutatorio debellanda & quando 468
Crocus sulphur blandum anodynum & sal acre volatile fovet 229. hinc dolores mitigat & humores incidit ibid. cum aqua rosarum & pauxillo camphoræ inflammationi oculorum ineditur 230. eius infusum cum aqua veronicæ in tussi contumaciori prædicatur 129. cum aqua cinamomi menses pellit ibid. & externe cum floribus sambuci et mica panis coctus in arthritide laudatur ibid.
Cubebæ masticatæ vertiginem avertunt 230
Cuprum vin drastrictam habet 402. ex eo præparata sunt emetica & cur ib. circa eius præparationem & usum quid tenendum 403
Curæ morborum secundum causas & circumstantias sunt instituen- 14. autumnales & vernaes præseruandi causa an salutare 84. quomodo instituendæ ibid.
Cursor quibus morbis patet 112
Cu-

Index rerum præcipuarum.

- | | |
|---|---|
| <p>Cutis ficca & arida in senibus mul-
torum morborum causa 241</p> <p>Cyani flores decocti in urinae sup-
pressionem commendantur 225</p> <p>Cynosbati radix in morfu canis ra-
bidi laudatur 495</p> <p style="text-align: center;">D.</p> <p>Dentes quando in infantibus deci-
dunt 192. & cur 197. eruptio-
nis symptomata ibid.</p> <p>- - canini quando primum erum-
punt 197. eorum eruptio cur
periculosa ibid.</p> <p>- - molares quando proueniunt
197</p> <p>Diæta exquisita ad sanitatem neces-
saria 233. veteres ea magis quam
medicamentis curarunt 115. car-
nosa puerperis dissuadenda 92</p> <p>Diaphoretica secura sunt remedia
490.</p> <p>Digestio ciborum post prægressos
morbos facile destruitur 435</p> <p>Dolores a spasmo concitantur 504</p> <p>Dulcia in ventriculo facile in fer-
mentationem abeunt 106. hu-
mores glutinosos ac viscidos red-
dunt ibid. ieiuno ventriculo
sumpta appetitum destruant ibid.
sanos non facile lædunt 105. in
infantibus generationi fauent
vermium 106. hypochondria-
cis & senibus nocent 247. in
morbis pectoris an proficua 107</p> <p>Dysenteria quando lethalis 434.
quid in initio faciendum ibid.
vomitu sæpe tollitur 433</p> <p style="text-align: center;">E.</p> <p>Ebrietas cur a veteribus commen-
data 173</p> <p>Einschlag vinorum cur ea conservet
157</p> | <p>Elixir proprietatis Paracelsi aluum
mouet 409</p> <p>Emetica præsertim antimonialia
summam partem fouent tenui-
tatem 417. seq. hinc caute dan-
da ibid. vim suam maxime in
ventriculo & intestinis exserunt
422. 423. quomodo agant 422.
clementiora quæ 423. a nonnul-
lis medicis damnantur 7. veterum
emetica quænam sint 424. in ca-
lidioribus regionibus minus tuta
sunt 7. ventriculum deplent &
motum excretorium iuuant 424.
activæ indolis chymica & mine-
ralia quænam concitant mala
425. aduersus venena & narco-
tica optima sunt medicina 427.
id quod probatur 428. profunt
in lacte in ventriculo coagulato
eliminando 429. inter initia in
morbis contagiosis 431. in dy-
senteriiis & diarrhœis & quæ
433. in morbis ex colluie vitio-
forum humorum 434. in mor-
bis infantum 436. quartana &
hydrope 439. in rheumatis-
mis & erysipelatis & arthritidis
speciebus 441. sæpe mortuum
foetum promouent & partum fa-
cilitant ibid. ad præseruationem
morborum commendantur 442.
caute cum his mereandum 443.
in ipsa accessione & vigore mor-
borum 444. in hypochondriacis
& congestionibus sanguinis ad
caput 446. vegetabilia fortiora
& mineralia in forma liquida
melius propinantur ibid. quid
in & post eorum vsum tenendum
447.</p> <p style="text-align: right;">Epi-</p> |
|---|---|

Index rerum præcipuarum.

Epilepsia spasmus vniuersalis est 504. quomodo a sternutatione differat 425. vnde sæpenuero oriatur 311. quid in habituali conueniat 509	Ferinae carnes domesticis leviores 76
Errhina sale volatili acri sulphureo pollent 461. alcalinae magis quam acidæ sunt naturæ ibid.	Fermentatio quid 131
Error quid 2	Fixitas corporum vnde 486
Eruditi capitis debilitati obnoxii sunt 112	Fixum quid sit 486. quomodo pos- sit operari in corpus 489
Erysipelas senes sæpe infestat 237. ab ira sæpe excitatur 243	Flatus a nimia aciditate sæpe inge- nerantur 89. inducentia ipsos se- nibus sunt fugienda 246
Essentia dulcis in dispositis fortiter purgat 400	Fluiditas in quo consistat 384
Euacuantium medicamentorum virtus 493	Fœniculi decoctum in lactis defe- ctu conuenit 215
Excretiones ingestis debent esse proportionatæ 80. & tunc sta- tum sanum promittunt 68	Fœtor vnde 303
Experientia non omne punctum fert in medicina 34. cur fallax dicatur 4. eius requisita 13. a contemptu vindicatur 14. 22	Fœtus ad exitum quando maturus 192. mortuus quibus remediis pellendus 509
F.	Francofurtensis terra valde sulphu- rea est 150. hinc Sachenhuf- num vinum sulphure vaporoso scatet. ibid.
Fabæ senibus nocent 245	Frictio motus vices supplet 251. quomodo & in quibus locis in- stituenda 82. cur mane pro- dest 449
Fabri murarii quibus morbis obno- xii 112	Frigus vehemens corpus lædit 64. ventriculo nocet 388. senibus cur infensum 244. & quæ su- scitet mala ibid.
Fames magnorum morborum sæpe genetrix. 67	Frumenta quænam nobiliorem & copiosorem dent farinam 125
Farina secalina exsiccata cum sale & floribus sambuci externe in ery- pelate prodest 209. cum melle maturatione apostematum infer- vit ibid.	Fumaria succo amaricante & sale tartareo nitroso scatet 223. in morbis ex lymphâ corrupta prodest ibid. quomodo vsurpan- da ibid.
Febres acutæ alui fluxu spontaneo sæpe terminantur 9	Furfures abstersiva vi pollent 209. balnea ex his parata debilitati ar- tuum inseruiunt. ibid.
Feces albæ a defectu bilis oriuntur 100. in senibus frequentes 246	G.
Fel catelli lactantis in epilepsia lau- datur 498 (Hoffm. Opusc. varii argumenti.)	Gaudium effusum sanitati nocet 4 V v v Geförn

Index rerum præcipuarum.

Gesdenter Tobac quomodo præpa- retur 462	Halec aluum mouet 405
Generationis potentia in fœminis quando cesset & cur 193	Helleborus albus emetin excitat 420. non correctus instar veneni est ibid.
Gestatio in lectica imbecillimis quam maxime conducibilis 281. hinc senibus a Celso commenda- tur ibid.	Hemicrania a plethora sæpe mu- tuatur natales 96
Gesduttien Trauben vuæ sunt in Hungaria crescentes 119	Hepar multis vasculis capillaribus præditum est 106. hinc infarcti- bus obnoxium ibid.
Glauberi Panaceæ præparandi mo- dus & vsus 482	Herbæ earum vires non ex signatu- ris cognoscendæ 336. multum autem ex gustu & odoratu 337. quo loco sint siccandæ 382. quæ- nam in calculo expertæ virtutis 224
Grauidæ ordinario plethoricæ sunt 272. quibus adfectibus obnoxie ibid.	Hilaritas multum facit ad sanitatem 41. 72. senibus præcipue saluta- ris 248. quibus obtinenda re- mediis 72
Gummata fere omnia sale quo- dam acri prædita sunt 326. quæ- nam aluum stimulant 413	Hippopotami dens ad dysenteriam commendatur 497
Gummi guttæ per inferiora & su- periora operatur 420. cum a- qua decoctum virtutem amittit catharticam ibid.	Horæi fructus senibus minus salu- tares 246
Gutta serena per leniora sæpe ster- nutatoria tollitur 467	Hordei decoctum quomodo præ- paretur 209. sitim & æstum ex- stinguit ibid. cum succo auran- tiorum & cornu cerui in variolis & aliis acutis commendatur ibid.
H.	Horinum in malo hysterico con- venit 494
Habergrüze in morbis ab humorum acredine ortis commendatur 210	Hungaria in duas diuiditur partes 115. ad vina generosa proferen- da est idonea 121. eius incolæ parum vini spirituosu bibunt & cur 116
Hæmorrhagia narium a spasinis prouenit 504. ab ira sæpe excita- tur 72. puerili ætati familiaris 95. quibus remediis sistenda 505 509	Hydragrum purum omnis violen- tiæ expers est 404. sed quando ibid.
Hæmoptysis in quo consistat 275. a plethora oritur 95. sed non sem- per 282. venæsectione præcaue- tur 275	Hydrops a plethora sæpe inducitur 274. & proxime a sanguine in visceribus stagnante 96. qui ei obno-
Hæmorrhoides vitæ sedentariæ de- ditis familiares 112. nephriti- cis salutare 274	
- suppressæ varia inducunt sym- ptomata 266. mictu cruentum 242. calculum ibid.	

Index rerum præcipuarum.

- | | |
|--|--|
| obnoxii 274. quando curatio-
nem admittit 439. sæpe emetico
tollitur 440 | Ipecacoanna antidysentericum est
remedium 433. in icteri initio
laudatur 438. puluerisata & diu
aeri liberiori exposita suam per-
dit virtutem 420 |
| Hyoscyami semen quibus morbis
conducit 496 | Ira est pestis corporis 44. hæmor-
rhagias sæpe suscitatur ibid. &
quæ alia mala 280. 243. |
| Hyperici flores in dispositione
phthifica & vermibus commen-
dantur 225 | Italia vina generosa nobis offert &
quæ 139. eius incolæ ingeniosi
sunt 170 |
| Hypochondriacum malum quos
præsertim inuadat 288. an ve-
næsectio in hoc conducatur ibid. eo
laborantes lac ferre non possunt
430. in eorum ventriculo ali-
menta insipida facile acescunt &
cur 100 | Iuniperi arbor tota medicamentosa
est 226 |
| Hyssopi oleum in pectoris adfecti-
bus prodest 494 | - - baccæ oleum possident copio-
sum 226. morbis ex obstructio-
ne medentur ibid. quomodo v.
surpandæ ibid. |
| Hysterica passio sæpe a plenaria ces-
satione mensium oritur 198. spas-
mis quam maxime adscribenda
505. a vini Rhenani usu non ra-
ro increfcit 109 | - - lignum aliis exoticis potest sub-
stitui ibid. |
| I. | - - lixiuium ex cineribus hydropi-
cos sanare dicitur 226 |
| Icterus quomodo generetur 437.
emetico sæpe tollitur 438 | Iuscula senibus commendantur &
quæ 50 |
| Inauratores spasmodicis morbis ob-
noxii 112 | Iuuentus duplici absolvitur septe-
nario 192. in hac ossa & mem-
bra firmitatem acquirunt 193. ad
quos morbos procliuis 198 |
| Infantes morbis capitis maxime
patent 198 | L. |
| Infusum quid 376 | Lac animantium optime nutrit 93.
est antidotum 232. asininum
commendatur præ cæteris 231.
quibus conuenit 436. prodest in
phthisi podagra & aliis mor-
bis 231. in ventriculo largiter
sumtum corrosiuam sæpe induit
naturam 436. cum allio coctum
vermes enecat 213 |
| Ingesta in copia sumta aluum mo-
vent 356 | Lætitia multum ad sanitatem con-
fert 49 |
| Intermittentes febres vnde oriun-
tur 177. ante earum paroxysmum
emetica non sunt exhibenda 445.
an vinum in his conueniat 177. | Lectio clara senibus tanquam mo-
tus species conuenit 250 |
| Intestina porcorum ex vini adusti
reliquiis saginatorum cur ad far-
cimina non possint vsurpari 79 | V v v 2 Legu. |
| Inuidia corpus humanum consu-
mit 44 | |

Index rerum præcipuarum.

- Legumina** crassum ingenerant sanguinem 98
- Lenta febris** a venæsectione improvida & emmenagogorum usu sæpe producit 285. dentium eruptioni facile sese adsociat 197
- Lentium decoctum** cum caricis & femine fœniciuli in exanthematum propulsione commendatur tur 211
- Leporis oculi** exsiccati ad partum difficilem laudantur 501
- Lepra** a salitorum nimio usu sæpe inducitur 103
- Leucophlegmatia** a sanguine in visceribus stagnante provenit 96
- Lex microcosmica** quæ 64
- Lien** ex innumeris vasculis capillaribus est constructus 106. hinc obstructionibus patet ibid.
- Longævitas** laboriosis vnde 57
- Lotrices** ad quos morbos dispositæ 112
- Lumbrici terrestres** exsiccati in epilepsia & arthritide expertæ sunt virtutis. 231. 500
- M.**
- Malignæ febres** vnde cognoscendæ 177. earum natura in putredine consistit 49
- Mancæle** vna quænam sint 118. loco passularum maiorum ab Hungaricis vsurpantur ibid.
- Marasmus** a plethora sæpe oritur 276. hinc venæsectione præcauetur ibid.
- Marchionis pulueris** virtus vnde 496
- Martialia** dubiæ sunt virtutis in debellandis chronicis morbis 12. non semper sedes movent 403.
- quando ea exhibere continet 28
- Martis limatura** caute est præscribenda 403
- - **Tinctura** ex Silesia allata vnde colorem cœruleum 204. quomodo exhibenda 403
- - **vitriolum alium** mouet 403
- Materia perlata Krugneri** vnde virtutem suam habeat 477
- Mechoacannæ albæ puluis** cum oleo fragrante errhinum est 465
- Medicamenta** in tres diuiduntur classes 492. vel materiam vel motum respiciunt ibid. duplici agunt principio 505. per se & absolute salutaria vel minus salutaria dici non possunt 60. secuta quæ 360. infecuta ibid. specifica quæ 493. actiua quænam sint & quomodo agant 421. seq. domestica quænam 203. crebrius sumpta adfuetis parum iuuant 70. eorum effectus quomodo explorandus 388
- Medicina** quid 259. ratiocinatione magis increvit quam experientia 32. contemnitur & cur 16
- Medicus** quæ scire debeat 18. eius officium 415
- Mel** ventriculo nocet 108
- Melissa Turcica** infusa vitiiis vteri medetur 219. eius puluis in melancholia hypochondriaca commendatur ibid.
- Mentes** quando primum erumpunt 197. quibus remediis prouocandi 284. quibus symptomatibus sese manifestant ibid. quando plenarie cessant 193. & quibus tunc pateant morbis 198. a terrore sæpe subsistunt 72. suppressi varia

Index rerum præcipuarum.

- varia concitant mala 274 quibus
 præcauendi ibid. & quibus re-
 mediis renocandi 285
Mentha subtili sedativo & roboran-
 te oleo scatet & adstringente ter-
 reo principio 218. ventriculum
 roborat. ibid. in singultu & ali-
 is huius generis adfectibus con-
 uenit 494. eius aqua fluorem al-
 bum & gonorrhœam sæpe tollit
 218. externe colicis doloribus
 medetur 494
Mercurialia in puluere data salua-
 tionem suscitant 28. in forma
 pilulari magis danda ibid. quan-
 do exhibere conuenit 29
Mercurius friabilia reddit metalla
 477
Metalla mutuum habent consym-
 bolismum 403. eorum tinctura
 quomodo præparetur. 418
Methodus medendi specialis quae-
 nam sit 33
Meyran - Trauben vnde dictæ 118.
 earum structura ibid. vinum
 quod præbent palato gratum est
 119
Mictus cruentus cur senibus fami-
 liaris 242
Milites quibus morbis obnoxii 112.
 & vnde i si oriantur 279
Millefolii variae sunt species 333.
 denominationis ratio ibid. cur
 diu flor. 335. flores describun-
 tur ibid. vianodyna gaudet 337.
 sapore amaricante 338. experi-
 menta cum ipso instituta 347.
 destillatum saphirinum præbet
 oleum penetrantis; saporis & o-
 doris vaporosi ibid. extractum
 gaudet virtute antispasmodica
 ibid. eius sal amaricantis est sa-
 poris 399
 - aqua febrium paroxysmos co-
 hibet ibid. infusum vel essentia
 in doloribus prodest 340. in cal-
 culi doloribus ibid. herba cum
 butyro infulso frixa in odontal-
 gia ibid. in nimis sanguinis pro-
 fusionibus 341. antepileptica
 gaudet virtute 342. in spasminis a
 vermibus egregii est virtutis ibid.
 abortum arcet ibid. decoctum in
 vomitu laudatur 342. in malo
 hypochondriaco & hysterico ibid.
 in vlcere pulmonum 344. in læ-
 sionibus & exulcerationibus post
 dysenteriam in clystere ibid. in
 tumoribus & inflammationibus
 discutiendis 345. in tumore scro-
 ti venereo ibid. vulnera recentia
 purificat & consolidat ibid. her-
 ba contusa in carbunculis com-
 mendantur 346
Mæror est maximum corporis tor-
 mentum 43
Monckii pulvis emeticus ex quibus
 præparetur 418
Morbi plurimi ab obstructionibus
 oriuntur 383. contagiosi quo-
 modo operantur 431. vomito-
 rio sæpe felicissime arcentur 432.
 populares vnde 279
Mors in quo consistat. 38. subita
 vnde 270
Moschus vim antepilepticam possi-
 det 499
Motus quid 18. est præcipuum me-
 chanices principium ibid. pri-
 mus in vtero quando 192. variae
 corporis humani dantur species
 81. ad sanitatem conservandam
 Vvv 3 con-

Index rerum præcipuarum.

conducit 56. senibus convenit
249. & qui 250. quando insti-
tuendus 81. non excessivus sit 57.
sed successivus 82. fortior inusi-
tatus in adsuetis nocet 69. vehe-
mens corpus extenuat 268
Mucus sternutatione proleclus non
e cerebro 453. & unde 457
Mustum destillatum quid largiatur
130
Mutatio subita senibus infensa 244.

N.

Narcotica quæ 428. quomodo a-
gant 427
Narium structura consideratur 454.
seqq.
Natura veteribus quid 66. duobus
maxime in mixtione gaudet
principiis sale & sulphure 337.
quo ordine in fœtu formando
procedat 199. & reliqua ætate
hominis ibid. eius diversitas di-
versa in corpore humano postu-
lat alimenta. 60
Nausea gravidarum quomodo tol-
lenda 129
Nitrum est fere uniuersale remedi-
um 232 in quibus morbis maxi-
me conueniat ibid. aluum du-
cit 406. ut & eius spiritus 409
Nucistæ oleum quibus morbis con-
ducat 496
Numerus non est fundamentum
annorum climactericorum 188
Nux moschata oleo aromatico &
anodyno gaudet 229. hinc in
dysenteria & gravidarum adfe-
ctibus prodest ibid. cum alumi-
ne crudo mixtus febres intermit-
tentes sistit ibid.

O.

Oculi per nares purgantur 467.
hinc sternutatoria sæpe condu-
cunt ibid. mane cum aqua fri-
gida vtiliter terguntur 449. eo-
rum inflammatio in variolis &
morbillis quomodo tollatur 230.
& quid in aliis adfectibus profit.
465
Odontalgia a plethora sæpe oritur
96
Odoratus quomodo fiat 457. sub-
iectum ibid.
Odor petitur a sulphure 303. sua-
vis a mixtura pendet ibid.
Olea omnia destillata sanguinis
massam exagitant 357
Opiata nihil virulenti & acris in se
continent 427. adsuetis nihil no-
cent 70. nostris temporibus dam-
nantur 11. & vomitum sistunt
& proritant 426 seq. & quomo-
do ibid. quando ea exhibere
conducat 27
Opobalsamum quid 299. eius arbor
& colligendi modus describitur
ibid. saporis acris & amaricantis
est 303. quodnam artificiale ibid.
Origani oleum in dolore dentium
prædicatur 494
Oris elutiones cum aqua simplici
conveniunt 449
Otalgia a plethora sæpe oritur 96
Oua ad duritiem cocta senibus sunt
inimica 245. sorbilia sanis opti-
mum præbent nutrimentum 108

P.

Panis ex frumentis inter optima
refertur nutrimenta 50. bene
fermentatus leuior est crasso 76.
secalinus similagineo præferen-
dus

Index rerum præcipuarum.

- dus 77. ex fornace modo extra-
 ctus & comestus nocet ibid. gros-
 sior ad morbos ex impuritate or-
 tos disponit 104. affatus cum vino
 laboriosis in alui profluio ab
 Hippocrate commendatur 207.
 decoctum eius Boerhauii quo-
 modo componatur 207. cum vi-
 no Maluatico imbutus abortum
 sæpe arcet 208. butyro illitus
 mane comestus acidum infringit
 ibid. cum semine carui coctus
 & ex furno recens extractus ad-
 versus furditatem commendatur
 ibid. eius crusta cum aceto vini
 & aromatibus alui profluio &
 vomitu laudatur ibid.
 Palpitatio cordis a terrore sæpe
 oritur 72
 Paralysis sæpe numero a tono de-
 iecto & laxitate oritur 311. quos-
 nam inuadat 11. & præsertim
 senes 236
 Perspiratio libera excretionum sa-
 luberrima 241. in senibus non
 rite procedit ibid. prohibita va-
 ria inducit mala ibid.
 Pestis inuadens emetico sæpe tolli-
 tur 432
 Petroselinum florens & in semi-
 ne constitutum destillatum viri-
 diusculum largitur oleum 346.
 urinam mouet 212. in mensibus
 suppressis & cachexia in infuso
 commendatur ibid. herba cum
 lupulo ex cereuisia cocta in vri-
 næ suppressione laudatur 213
 Pharmacomania hypochondriacis
 familiaris 69
 Phasianorum carnes concoctu faci-
 les sunt 76
 Phthisis quibus signis se prodat 275.
 & quibus remediis sæpe tollatur
 ibid.
 Physica medicis est necessaria 113.
 Pictores spasmodicis morbis infe-
 statur & quibus 112
 Pili in pube quando primum visun-
 tur 192
 Pinguedo motu vehementiori con-
 sumitur 80
 Pini in nostris terris terebinthina-
 ceum reddunt liquorem 318
 Pisces respectu aquarum quinam
 salutares 50. non facile putres-
 cunt 49. nimis saliti & indurati
 vetustiores senibus nocent 245. in
 morbis malignis concedendæ 49
 Piper sal habet alcalino fixum valde
 acre 228. viscidos humores re-
 soluit ac incidit ibid.
 Pifa senes fugere debent 245. eo-
 rum brodium aluum referat &
 lochia promouet 211. decoctum
 nephriticis commendatur ibid.
 Pix quomodo conficiatur 318
 Plantæ pro varietate locorum vir-
 tutibus variant 337. quænam al-
 uum mouent 411. pinguibus lo-
 cis crescentes qualem virtutem
 habent 337. in montosis locis
 saluberrimæ 125
 Plethora in quibus subiectis quam
 maxime fiat 95. quibus signis se
 prodat ibid. eius causæ 95. mul-
 torum morborum causa ibid.
 sed non omnium 278. grauidis
 familiaris 272. hinc ad abortum
 & alia incommoda disponit 270.
 272. ad polypos 271. ad calcu-
 lum 274. ad cachexiam ibid. ab-
 stinentia & victu tenui immi-
 nui.

Index rerum præcipuarum.

- nuitur 269. & venæsectione 266
Pocula emetica quomodo confici-
antur 418
Pœonia in epilepsia prædicatur 496
Polypus sæpe subitæ mortis causa
270. qui maxime ei patent 271
Potus quinam optimus 78. calidus
quid in corpore efficiat 386. seq.
frigidus in corpus calefactum in-
gestus funestas concitat inflam-
mationes 110. femellis menstru-
atis nocet ibid.
Primulæ veris in quibus adfectibus
conueniunt 495
Pueritia ad decimum quartum an-
num extenditur 192. quæ muta-
tio in corpore humano tunc acci-
dat ibid. capitis morbis quam ma-
xime est obnoxia & quibus 198
Puerperæ a carnosa diæta abstinere
debent 92
Purgantia agunt principio salino &
quo 397. seq. salibus additis a-
ciuntur 407. non proprie &
immediate sedes mouent 397. ex
vegetabilibus recentibus per su-
periora & inferiora operantur
412. ante vel post cibum data
profunt 396. in quibus & quan-
do difficile operentur 397
Purgatio sub fluida tempestatâ cur
facilis 397. an venæsectionem
præcedere debeat 25
Purpura cur nostris temporibus fre-
quens 290. in puerperio vnde
272
- Q.**
- Quaiacum lignum valde resinosum
est 308. raspatura cocta & inspif-
sata resinosum magma relinquit
ibid. quod est magnum sternuta-
torium 463
- Quartana contumax hepatis vitio
debetur 438. emetico tollitur
439
- R.**
- Radices edules quibus maxime
morbis conueniunt 212
Ranunculi esculenti aqua in asth-
mate sicco commendatur 494
Raparum exsiccatarum decoctum
in pectoris adfectibus laudatur
211. in puerorum tabe 212
Raphanum vomitum mouet 213.
cum sale calculum arcet ibid.
Ratio quibus nitatur fundamentis
22. quid valeat in medicina 16
Ratiocinatio genuina quæ sit 21. in
medicina præualet experientiæ
32
Res non naturales quæ 39. cur a ve-
teribus ita dictæ 65. harum le-
gitimus vsus vitam ac sanitatem
conseruat 39
Resinæ ex tenui subtili oleo & aci-
do constant 319. id quod experi-
mentis probatur ibid. tussiculam
concitare solent & quomodo 303
Respiratio difficilis in variolis &
morbillis vnde 437
Rhabarbarum infusum aluum ducit
414. laxantem virtutem magis
exserit infusum quam coctum
377
Rosarum flores destillati quale lar-
giuntur oleum 355
- - - aqua erigit vires & dolores
lenat 224
- - - acetum in doloribus capitis
& deliriis avertendis laudatur
224
- - - conserua phthificis & hecti-
cis prodest 224
Ros

Index rerum precipuarum.

- Rosmarinus oleo balsamico abundat 220. destillatus qualem largiatur aquam 346. in adfectibus capitis, fluore albo & aliis morbis prodest 220
- Ruta oleo acri & penetrante gaudet 217
- • folia cum butyro & pane mane sumta pituitosis profunt 217. febriles motus compescant & quomodo ibid.
 - • succus cum aceto vini in morbis contagiosis laudatur 217
- S.
- Sal quid sit 505. differt a sulphure & quomodo 506. in corporibus existens sapore diiudicatur 337. ex alumine paratum purgans febrifugum est 406
- • commune est ciborum condimentum 103. digestionem promouet ibid. aluum ducit 405. in copia sumtum nocet 103. in clystere cætera antecellit 344
 - • volatile ammoniacum siccum cum oleo maioranæ in odoratu deperdito laudatur.
- Salia omnia neutra sedes mouent 407. caustica ex animali regno diuretica sunt 398. volatilia animalibus formaliter non inexistunt 507. virtute purgante destituuntur & cur 398
- Salivæ defectus digestionem impedit 472
- Salvia oleum subtile vaporosum & sedativum recondit 218. recens destillata aquam viridem largitur 346. in adfectibus spasmodi-
(Hoffm. Opusc. varii argumenti.)
- cis & contractionibus loco Thee prodest 218. eius decoctum in faucium inflammatione ibid. oleum in quibus morbis conducit 494
- Sambuci aqua in morbis acutis & chronicis commendatur 227
- • cortex medius recens per inferiora & superiora operatur 420. cum vino aut aqua coctus urinam & menses pellit 227
 - • flores externe in tumore erysipelaceo commendantur 226
 - • rob ex baccis uniuersale præseruatorium est & cur 227. impetum febrium mitigat ibid.
- Sanguis quid 49. a continuo motu rubicundus fit ibid. quando vitæ thesaurus dicendus 263. duplici ratione bonus dicitur 267. amissus non semper corpus debilitat 264. e vena emissus statim coagulatur & cur 52. plethoricorum qualis 267. a leguminosis spissescit 58. a continuo mœrore 267. animalium esus cur interdictus 51. seq.
- • asininus contra maniam prædicatur 498
- Sanitas in quo consistat 249. ex quo cognoscenda 38. accurata diæta conseruatur 35. 80
- Santalum flauum destillatum balsamum largitur & quod 309
- Sapientia in medendo quam prima 242
- Saporis diuersitas vnde 138
- Saturnina aluum mouent & quando 404
- Scorbutus in septentrionalibus locis endemius 103. a plethora sæpe ori-

Index rerum præcipuarum.

oritur 282. qui ei obnoxii	274	Specifica quæ 493. caute cum his	
Sect est vinum Hispanicum	142.	mercandum	512
quomodo præparetur	131	Sphacelus cur senibus familiaris	
Selterani fontes senibus conducunt	256	241. in ventriculo a potu frigidus	
Semen in testibus quando separari		sæpe excitatur	110
incipit	192	Spica gaudet oleo subtili balsamico	
Semina vegetabilium quæ habent		& aromatico 219. hinc eius spi-	
principia 50. trita lacteum li-		ritus cephalicus est ibid. in ner-	
quorum fundunt	ibid.	vorum debilitate prodest	ibid.
Senectus in tres diuiditur periodos		Spiritus quid	157
234. prima quando terminatur		Stannum virtute laxante & anthel-	
193. quas secum fert mutationes		mintica pollet	404
ibid. altera quæ ibid. in hac vita		Stannarii quibus morbis patent	112.
ut plurimum finitur ibid. & quæ		Stein-Wein vnde dictum	149
ultima 194. sæpe ante tempus		Sternutatio quid 451. epilepsia par-	
ingruit	235	va a veteribus dicta 451. eius	
Senes qui sunt 236. quam maxime		natura 458. sedes & subiectum	
plethorici sunt 276. hinc mor-		ibid. causa 459. materia 460.	
bosi ibid. æstate optime valent		quando signum reconvalescen-	
	244	tia 452. quando mali ominis	
Sennæ folia infusa melius ope-			453
rantur quam cocta	377	Sternutatoria sale volatili acri sul-	
Septenarius numerus cur a veteri-		phureo pollent 460. quorum	
bus perfectus habitus	187	naturæ 460. quando conducant	
Sol cur in quibusdam subiectis ster-			465
nutationem concitet	460	Sternutatorii pulueres quid sint 451	
Solidæ partes iuxta ætates valde		quomodo præparentur in Hi-	
differunt 239. in annosioribus		spania 462. ferositates ab aliis par-	
valde duræ & rigidæ sunt	ibid.	tibus abducunt 471. medicæ præ-	
Solstitia magnam in corpus habent		pationes variæ 464. seq. balsa-	
efficiaciam	196	mici in aurium vitiis conueniunt	
Somnus ad vitam & sanitatem mul-		468. fœtorem & polypum na-	
tum confert 57. præprimis vero		rium præseruant ibid. vlcera na-	
senum 252. refarcit enim vires		rium in scorbuto & lue venerea	
deperditas 58. post coenam dige-		ibid. ad memoriæ & prudenti-	
stionem secundat 253. eius defe-		am conferunt 469. eorum abu-	
ctus ab tristitia sæpe venit	243	sus exsiccat nares 470. loque-	
Spasmus quid 502. eius subiectum		lam impedit 471. in narium	
ibid. causa inæqualis sanguinis		hæmorrhagiis nocet 472. ebriosi	
circuitus	404	ibid. cautela circa horum vsum	
			473
			Sto-

Index rerum præcipuarum.

Stomachicum Poterii vnde virtutem nanciscatur 477

Streptus in sternutatione vnde 459

Structura corporis multum facit ad longævitatē 235

Succolade senibus conducit 255.

Sulphur quid 151. facile cum metallis congregitur 478. quomodo arte parari possit 332. quomodo in corporibus cognoscendum 337. ex mineralibus non adeo forti igni obsecundat 487. quomodo figi possit 488. vina turbida clara reddit 157. sed quia capiti nocet quid substituendum 158

- auratum quid 481

Sulphuris hepar ex quo conflet 479

Syncope a terrore sæpe excitatur 72

T.

Tabacus princeps est ingrediens puluerum ptarmicorum 461. eius fumus propter sulphur narcoticum naturæ inimicus est 70. an fugentium cerebri anteriora sicca & fumo nigro infecta sunt 454

Tartarus ex quo conflet 151. emeticus quomodo præparatur 418

Teer quomodo conficitur 318

Tempus quid 188

Terebinthina quid 315. variae eius species ibid. Cypria pretiosissima ibid. a qua terra profertur 316. correctione opus non habet 319. Veneta 317. ubi crescat ibid. adulterata quomodo cognoscenda ibid. correctione non eget 319. communis 318. qui locus eius natalis ibid. corrigi debet cur & quomodo 319. sed non semper 320. expe-

rimenta cum ipsa instituta ibid.

seq. purgantis virtutis est 326.

variae ex ea prostant compositiones ut pilulae in gonorrhoea 323.

Becherianas ingreditur ibid.

eius aqua contra gonorrhoeam

323. aquas nephriticas 324.

aquam Anhaltinam ibid. balsa-

mun Hispanicum ibid. balsa-

mun Locatelli 325. omnia fere

chirurgorum emplastra ibid. &

commendatur in cutis defœdationibus ibid. in adfectibus renum

& vesicae 327. in thoracis mor-

bis 328. in gonorrhoea & fluore

albo ibid. nocet in ventriculi de-

bilitate 329. eius spiritus cante

est adhibendus 329. in contra-

ctionibus laudatur 330. & cum

spiritu vini mixtus ad vlcera ca-

coethica & carnem superfluam

absumentam commendatur ibid.

Terror a corporis ambitu ad interiora sanguinem pellit 72. &

quæ inde symptomata ibid.

Thee herba multas alcalinas partes fovet 380. cocta minus grata

est & adstringit 377. infusum

somnum dissipat 386. senibus

minus salutaris 225. eius noxa

381

Thermæ vnde virtutem suam

petant 125. quomodo agant 174

quando in usum vocandæ 29. &

an senibus proficiat 255. arte

quoque parari possunt & quomodo

411

Tilia aqua in doloribus & spasmodis

laudatur 228

- cortex medius in mucilaginem

reductus in ambustionibus & do-

lori-

Index rerum præcipuarum.

- loribus podagricis commendatur 228
- Tiliæ flores infusi epilepsiam chronicam sæpe solvunt 227. & quibus aliis profint morbis 495
- Tonus unde 240
- Tranquillitas animi confert ad sanitatem 41
- Transpiratio liberior omnium excretionum optima 129
- Tristitia sanitati est aduersa 24. vires prosternit 243. & varia inducit symptomata 43
- Tussis senibus familiaris 237. infantilis a retenta lactis copia sæpe oritur 436. emetico sæpe tollitur 435
- V.
- Valeriana sylvestris in epilepsia commendatur 494
- Vappescencia quomodo a vino avertenda 148
- Vegetabilia unde specificam suam virtutem petant 507. quænam alium ducunt 412.
- Venæsectio quem habeat effectum in sanguinem 292. a veteribus contempta & cur 261. a recentioribus 262. corpus non debilitat 264. nec prima a morte vindicat 265. genuina eius ratio in quo consistat 291. plethoram imminuit 266. neglecta apoplexiam sæpe concitat 270. morbos arcet & tollit 270. polypum 271. inflammationes & morbos acutos 271. abortum & reliquos gravidarum adfectus 272. morbos ex mensium suppressione aut cessatione 274. dolores ex calculo ibid. cachexiam & phthisin 275.
- in senili ætate conuenit ib. nocet in militum morbis castrensibus 279. in pathematibus ab ira 280. in vitio digestionis a morbis prægressis 180. in morbis a potu frigido 281. in morbis a defectu spiritus ascensæ succorum ibid. in morbis spasmodicis & convulsivis 29. caute cum ea mercandum 289. 291. indiscretim enim instituta sæpe nocet 284. & crebra 289. hinc caute instituenda in podagra 291. in mensium suppressione 289. in hysterico malo 287. quando in spasminis utilis 289. in intermittentibus an conueniat 282. an in morbis ex hæmorrhoidibus 288. cautelæ circa hanc recensentur 293. seq.
- Ventriculus suum in senectute perdit robur 246. eius sphacelus ac inflammatio sæpe a potu frigido excitatur. 110
- Venus moderata a Deo permessa 59. senibus est infensa 243. immoderata præsertim vna nocte sæpe repetita nocet 67. vires labefaciat 59. parca torpidos facit homines 67
- Vermes quomodo pellendi 213
- Veronica quid sit 376. decoqui non debet sed infundi ibid. seq. aperiente & roborante virtute gaudet 224. chymice examinatur 378. 379. eius terrestres partes non facile aquam intrant 381. infusa quid largiatur 382. ratione volatilium particularum in corpore quid præstet ibid. quid ratione alcalinarum & salinarum 282. quid ratione terrestrium 283

Index rerum præcipuarum.

- um 383. quid ratione aquæ calidæ ibid. digestionem promo-
vet 388. phthificis confert 390.
asthmaticis ibid. sanguinem pu-
rificat 390. hinc in scabie lau-
datur 391. in calculo ibid. in
quartana & tertiana etiam pro-
dest statim post paroxysmum pota
389. aqua hecticis est solatio 390.
Vertigo senibus familiaris 236.
Vesicæ vitia senibus quam maxime
infestant 242
**Vigiliæ nimix noxam corpori infe-
runt** 58
Vigor vnde 240
Vinum quænam habeat principia
constitutiva 156. seq. diuersitas
a solis calore 122. & solo natali
123. quodnam optimum 127.
in montibus fluuiis vicinis salu-
bre 126. bonæ notæ quod 169. 78
ab aere vappido & tonitru alte-
ratur 162. a frigore & gelu 169.
quomodo ab his defendendum
159. inutatur in vasis circa tem-
pus florentis vitis & cur 161. re-
cens qualem colorem habet 154.
facile vappam concipit 157. ge-
nerosum, antiquum & spirituo-
sum non facile situm concipit
ib. salubre quod dicendum 167.
multum facit ad longæuitatem
170. hilares & animosos facit ho-
mines 171. præseruat a morbis
172. præsertim chronicis 144.
acidulis & thermis est præferen-
dum 174. & quid circa curam
præseruatoriam tenendum 175.
prodest in febribus malignis ex-
anthematicis 176. febribus conti-
nuis 177. intermittentibus ibid.
in syncope & virium prostratio-
ne 178. in nausea & imbecilli-
tate ventriculi aliisque ventricu-
li morbis ibid. cum aqua dilu-
tum sitim restinguit 178. in obstru-
ctionibus conuenit 179. in hy-
drope ibid. an in hypochondri-
acis conueniat ibid. an in scor-
buto 180. in calculo renum ibid.
podagra & arthride 181. nocet
in inflammationibus & capitis
& pectoris morbis 183. auste-
rum senibus vitandum 247. quod
ipsis eligendum 254. spirituo-
sum varia concitat mala 109. sul-
phuratum nervis & capiti est in-
fensum 158
- - adustum cur naturæ inimicum
111. eius potatores quibus mor-
bis obnoxii ibid. breuioris vitæ
sunt 79. sectio eo abutentium a-
natomica 111
Vina Albana vrinam & sudorem
mouent 139
- - Asciuti quænam dicantur 146
- - Aurelianensia qualem habent
saporem & virtutem 141
- - Baccharacensia quænam sint.
148. quale ipsis solum natale &
quomodo præparentur ibid.
- - Beaunensia vbi crescant 141
- - Canarina Hispania largitur 142
- - le Champagne delicati saporis
& odoris sunt 441
- - Cochheimensia vnde dicta 146
- - eremitica quali gaudent odore
& sapore 146
- - Franconica sulphure gaudent
corpori nostro minus amica 149.
quænam sint 150. & quæ salu-
berrima 169
Xxx 3 Vina

Index rerum precipuarum.

- Vina Frontiniana vnde dicta 141.
 fapor & odor ibid.
- • Gallica vina quænam sint 171.
 fenibus vitanda 247.
 - • Goldbergensia cur reliqua an-
 tecedunt 115
 - • Græca cur diu non seruent dul-
 cedinem 130
 - • Hispanica hic loci sunt artifici-
 alia & quomodo præparantur
 151. diu non seruant dulcedinem
 130
 - • Hochheimensia vnde dicta 146.
 sapes & odore ad succinum ac-
 cedente pollent 156. cæteris præ-
 stant Rhenanis 146
 - • Hungarica variæ dantur speci-
 es & præparationes 119. sq. cele-
 bria vnde præstantiam suam nan-
 ciscantur 124. diuturnitate for-
 tiora evadunt 120. nullum fere
 acidum in se recondunt 129. ser-
 vant dulcedinem suam 134. ge-
 nuinorum indicium 137. quo-
 modo adulterentur ibid. diapho-
 retica alia antecellunt virtu-
 te 328. moderate hausta chylo-
 sum succum ac temperarum in-
 generant 132. vires deperditas
 restaurant. ibid. laudantur in vi-
 tio digestionis & alvo stipata 133.
 in malo hypochondriaco 129.
 paulo liberalius sumta non
 tam facile nocent 133. nocent
 plethoricis 134. & ad iram pro-
 pensis ibid. variæ cum ipsis præ-
 parationes institutæ recensentur
 135. seq.
 - • Italica dulcia & cur 140. diu
 non seruant dulcedinem 130
 - • Maluasina ex quibus vis præ-
 parentur 142
 - • Marcinina innoxia podagricis
 sunt 140
 - • Moeni quænam saluberrima 168
 - • Mosellana alium mouent 408.
 quid de his tenendum 149
 - • Muscat de Lion vnde dicta 141.
 qualis ipsis virtus & fapor ibid.
 - • Neccarina quid de his tenen-
 dum 149
 - • Palatina quænam sint 148. eo-
 rum virtus 149
 - • Puccina quem habent locum
 natalem & virtutem 140
 - • Rhenana quas habent partes
 constitutivas 154. recondunt sul-
 phureum subtile principium
 165. hinc non grauant caput
 ibid. acidum tartareum subtile
 166. alia salubritate antecel-
 lunt 168. non facile alterantur
 162. quænam optima 168. lau-
 dantur in appetitu deiecto & ro-
 borando stomacho 178. in diar-
 rhœa & dysenteria 179. antiqua
 commendantur 180
 - • Rhingavensia recensentur 146.
 seq.
 - • Roster vbi crescunt 116. aerem
 liberiores diu sustinere non pos-
 sunt ibid.
 - • Tockaviensia Hungariæ gene-
 rosissima sunt 117
 - • Xenena vbi crescunt 142. eo-
 rum odor & fapor ibid.
- Violarum flores syrupus ex his con-
 fectus ad morbos pectoris & ad
 feces expellendas in infantibus
 commendatur 225
- • semen in emulsionem redactum
 diureticum & purgans est 412.
- Virilis ætas vnde dicta 193. quan-
 do ter-

Index rerum præcipuarum.

- do terminatur ibid. abdominis
morbis maxime obnoxia 198
- Virium in senectute defectus 236.
veterum de hoc sententia 238.
nostra 239. plethoricis sæpe fa-
miliaris 269. quibus restituendæ
258
- Vita quid 38. ingestionibus & ege-
stionibus conservatur 76. seden-
taria plethoræ ingenerandæ fa-
uet 112
- Vitriarii spasmodicis morbis obno-
xii 112
- Vitrioli oleum aluum ducit 409. &
eius spiritus ibid.
- Vnctiones præ balneis senibus con-
ducunt 252
- Vociferatio motus species est 81
- Volucres in aere viuentes præ pa-
lustribus sunt salutare. 76
- Vomitum unde 444. quomodo con-
citetur 424. subsequenter signa
443. in gravidis a plethora sæpe
oritur 272. quid profit in hoc
229. in infantibus sæpe salutaris
91. 436. nimius ab emetico anti-
moniali quomodo compescendus
425
- Vrina evaporata sal fixum relinquit
487. turbida ac pultacea sæpe ab
hæmorrhoidibus suppressis ori-
tur 242. eius stillicidium senibus
familiaris 237. & cur 241.
- X.
- Xylobalsamum quid 299. eius odor
& sapor ibid.
- Z.
- Zibethum in colicis doloribus & a-
liis commendatur 499
- Zingiber sal acerrimum fixum ha-
bet 228. in quibus morbis pro-
fit ibid.
- Zuckerberg qui ita dicatur 117. vi-
nis abundat pretiosis ibid.
- Zythopeptæ quibus morbis pateant
112



B. 4126

